


清代傳記叢刊·綜錄類 ⑦
周 駿 富 輯

國朝耆獻類徵初編

(十三)

卷二六至
卷三五

(清)李 桓 輯



明文書局印行

WCC/12/1

國朝耆獻類徵初編卷二十六目錄

宰輔二十六

李侍堯

劉綸

皇朝通志卷之八十八

--	--	--	--	--	--	--	--	--	--

國朝耆獻類徵初編卷二十六

通奉大夫前署江西巡撫江西布政使司布政使湘陰李桓輯
宰輔二十六

李侍堯

李侍堯漢軍鑲黃旗人高祖李永芳天命六年以明撫順所游擊
投誠屢立戰功授一等伯世襲自有傳曾祖釋迦保祖祈天保皆
襲爵父元亮累官至戶部尙書諡勤恪入賢良祠侍堯於乾隆元
年授六品廕生八年補印務章京九年授副參領十三年十月遷
參領十一月調印務參領十四年擢正藍旗漢軍副都統十七年
六月授公中佐領十二月調熱河副都統二十五年擢工部右侍

郎兼管鑲白旗漢軍副都統六月調戶部右侍郎十一月署廣州將軍二十一年三月劾前將軍錫特庫等廢弛馬政空額五百餘得旨錫特庫交部嚴議廣州駐防漢軍甲兵三千諭以千五百出旗轉補綠營兵缺實以在京滿兵千五百侍堯奏綠營未建兵房請將從前水師營空房給出旗兵住諭如所請六月奏滿洲漢軍駐防各半官制兵額事宜一滿洲漢軍各設協領一原設漢軍參領八請改爲漢軍佐領應添設滿洲佐領八其防禦驍騎校各裁八員即將所裁俸支給新添佐領一水師旗營甲兵應於壯丁內各半挑補水師營協領請作爲滿缺佐領防禦驍騎校等官缺亦應各半挑補一漢軍筆帖式三請裁一以一作滿缺一漢

軍清字員外郎八請裁四畱四缺挑補滿洲一漢軍原設領催三百二十請裁八十漢軍滿洲各設百二十並請設前鋒百五十委署前鋒校十二應支銀米將議裁官兵俸餉抵給一額設礮手三十名請裁六與弓鐵匠均各半補一綠營步糧八百分請酌畱四百分補畱旗壯丁餘四百分俟缺出扣歸綠營部議 從之七月署兩廣總督二十二年十月奏廣東各州縣買補倉穀將上中下三等穀兼買充數開上價報銷至借糶則於應碾米者用上穀借糶用中下穀 諭曰所奏甚悉情弊上中下三穀碾米多寡迥殊若聽其將中下穀石混開上穀價值而以借糶爲銷穀地是僕役之獲利益多而窮民受虧益甚廣東既有此弊他省諒亦不能盡

無著傳諭各督撫嗣後買補倉穀當嚴飭州縣親自碾試務得上
穀其該管官盤查並當一體碾試不得徒以額貯數符遽行出結
儻有徇隱卽令分賠又奏廣東制錢有攙和古錢並吳逆偽號錢
請查禁 諭曰前代廢錢流傳至今已屬無幾該省攙和行使相
沿已久若盡行查禁轉使吏役得以借端滋擾如唐宋元明之舊
錢不妨仍聽民便至偽號錢文仍當嚴行禁革著該督撫等出示
曉諭所有利用偽號錢文准民間檢出官爲收換如係小錢則兩
文換制錢一文小民自當踴躍從事所換偽錢卽供鼓鑄之用十
二月疏言廣州駐防更換滿兵其出旗漢軍兵曠米及扣缺官俸
米共截存萬四千餘石可平糶以便民 諭如所議行二十三年

奏守備張彬佐禁村民演劇被民人聚眾毆傷見飭審是否村民
違禁演劇恃眾逞兇抑或該守備尋釁滋事 諭曰據所奏似欲
以官民計較曲直殊未得懲創惡習之意地方莠民恃眾逞兇不
畏官兵至公然肆行毆辱刁悍已極無論該弁巡查禁諭本係職
守當爲而刁民輒行抗拒固當痛加懲治卽或有滋事情弊召侮
有由自當不論曲直先治匪棍然後徐議劣弁以飭官方庶刁悍
之徒稍知畏懼二十四年正月實授兩廣總督五月劾碣石鎮總
兵書德侵那公帑玩視巡洋 諭嚴鞫論罪如律九月奏外洋夷
船到粵請禁帶絲出洋 從之十二月奏防範外夷規條五一夷
船銷貨後應飭依期回國禁止住冬一夷商館毋許漢奸私行交

易一內地行商毋許借夷商資本一夷商毋許雇內地厮役一夷船泊處守備一員督同弁兵防範下部議行二十五年正月奏粵海關外洋商船出入向於正稅鉛鈔外另有官吏家人通事巡役等規禮以及分頭擔頭等項銀從前私收入已後經奏報歸公則例內仍臚刊前項名色請刪除統刊歸公銀若干省城大關及海洋各口向有書役家人等飯食舟車等費勢難裁汰亦備列則例內請於歸公造報外另刊應支條款送部按年覈銷下部議行四月疏言粵東左翼總兵既改外洋水師應照碣石南澳二鎮例一體巡洋 諭如所請行廣西貴縣獯民韋志剛滋事不法先經巡撫鄂寶請褫知縣石崇光職 上以事係知縣查出 命暫停革

職侍堯尋奏先經面諭該縣體勘始行查報得 旨將崇光逮問旋審明志剛實無陰謀不法事崇光妄事猜疑率行混稟應照溺職例革職 諭曰石崇光既非避重就輕如鄂寶原奏亦並未姑息養奸如李侍堯所云也在石崇光不過以韋志剛恃符武斷情似謀逆不及詳悉體究遽行通稟誠不免冒昧而鄂寶惟恐李侍堯先行入告至落人後故飛章參審李侍堯復以鄂寶已經奏聞又故甚其詞爲面諭體勘之語今水落石出不能科韋志剛以謀逆之罪乃反坐該縣以率報之愆而督撫如不預焉者屬員皆有人心何以使之折服耶卽此一事觀之則該督撫二人之不能和衷共濟已可概見此特其一事耳設兩省地方公務俱如此各

懷意見豈足以鼓勵人才振肅綱紀將朕所憂於二臣者又不僅在於此事之虛實矣在韋志剛雖無謀逆情事其恃強豪橫惡蹟纍纍擬以發遣自所應得知縣石崇光革職之處俟該部議覆時另降諭旨著將此旨傳諭李侍堯鄂寶嗣後務宜痛加省改固不可一味和同亦不可各挾私意總以一秉虛公破除習氣副朕委畀封疆至意十一月請加徵粵海關補平銀經戶部議駁 諭曰所駁甚是此項銀兩如果彈足起解自足敷該部兌收是以向來從未有短少挂批案件何至近日遽有不敷部收之處看來該關起解縱未必短少而解員中途滋弊諒所不免著李侍堯嗣後起解稅銀應慎選謹飭之員管解仍畱心查察勿令滋弊儻有侵蝕

卽行嚴參不懲二十六年正月授戶部尙書十月承襲勳舊佐領
十一月授正紅旗漢軍都統二十七年京察加一級二十八年五
月授湖廣總督七月奏湖北丞倅佐雜各員遇委署差遣本任不
另委員署理見飭藩司凡有委署出差者另委接任以專責成恐
他省亦有此積習請 敕部通行查禁 從之又奏已革武昌府
知府錫占任內有未買倉穀一萬石將穀價交存江夏縣庫及查
奏銷冊錫占原報實貯並無未買字樣且其中缺數頗多尙有發
各屬代買未經交足者並有屬員事故穀竟無著者司道俱以實
貯無缺結轉見委員查錫占缺穀實數勒限清交並飭司將通省
倉穀澈底盤查 上嘉之八月奏湖廣鹽價過昂已查出擡價病

民商人依律懲治請酌中定價作爲限制 諭兩淮鹽政高恆赴
楚會議尋奏請按准商成本酌加餘息定制 諭曰所奏允協如
所議行從前湖廣鹽行之弊總由不按准商成本折衷定價是以
漢口各商從中意爲低昂甚至擡價餘欠侵吞種種作奸而揚商
寫遠阻礙不得受其挾制今高恆遵旨前往李侍堯與之協力
清釐將成本覈定加以餘息明定限制清理皆得其平鹺政可以
永行無弊十月加太子太保十一月疏言兩湖各營如宜昌鎮洞
庭協漢陽荊州常德岳州等營原設水師戰船巡哨未定章程見
分飭各鎮協營分定管轄水道里數責各將備督率巡防中有地
方遼遠兵船較少者酌量抽撥 上可其奏二十九年六月奏湖

南各營千總外委請歸督臣考驗拔補七月奏湖南辰州府屬乾州同知及鳳凰營通判分駐苗疆前因紅苗滋事每廳撥給標兵百把總一又寶慶府同知亦議給標兵百把總一今苗民向化所撥弁兵請裁均下部議行八月疏言州縣造報詞訟僅止開列事由巡道往查亦照所報呈送餘皆隱匿以致無從查驗請嗣後責道府詳查報冊如有未經造報之案提卷察覈果無枉斷延擱仍照造冊遺漏請參道府扶同徇隱者並處 上嘉其奏交部議行又請仍復楚省驛站赴口買馬例 從之是月調兩廣總督三十年三月奏督撫同城者如遇水旱偏災及勘收城工事撫臣前往查辦解審案件歸督臣審辦 從之又請改瓊州水師副將爲海

口營參將左營都司改守備又左翼碣石二鎮標右營遊擊改都司仍照舊巡洋雷州協副將改雷州營參將並裁中軍都司以左營守備兼管欽州土徭錯雜幅員較廣所設遊擊請改參將下部議行五月廣西右江鎮總兵李星垣婪索土田州知州岑宜棟

諭侍堯嚴鞫尋鞫實定擬具奏

諭曰李侍堯審擬李星垣婪索

土田州岑宜棟銀兩一摺定罪甚屬失當李星垣始向岑宜棟索借銀二千兩因一時難以措應輒將營中見存買補穀價一千五百兩令其預領俟秋間買穀交倉旋令家人張同收取入己侵用以庫貯買穀官項假冒預發之名巧爲騰挪私充欲壑非監守自盜而何李侍堯並不按應得之罪定擬乃引索借所部財物律擬

以絞候轉似於本案加重科斷錯謬已極卽其家人張同等承李星垣意指兩次向岑宜棟勒索六百餘金情均可惡亦不應僅以杖責完結已交部另行覈擬矣李星垣係該督保舉堪勝總兵之任今其贓罪敗露猶欲爲人迴護意從輕減李侍堯著傳旨申飭尋奏請交部嚴加議處部議革職侍堯於六月丁艱卸任奉 旨補官日降三級調用九月 命署工部尙書所降之級帶於新任三十一年正月署刑部尙書七月因兩廣總督任內失察糧道張曾受賕部議革任得 旨著於見任內降二級從寬畱任三十二年三月 上以侍堯服制將滿 命回兩廣總督任三十三年正月奏請各標協營伍守糧缺出必將兵丁有無子弟確查考補不

得以外來無籍人入伍報 聞七月劾潮州鎮總兵明達偪勒守備甘廷亮墊發齋摺路費不准領項歸款致廷亮自縊 命禱明達職交待堯嚴審旋奏明達審無偪勒致死情事查該員任內曾侵用馬價擬罪如律八月戶部奏驗兌粵海關稅銀短少 命侍堯詳查覆奏尋奏請嗣後稅銀照依解部兌收法馬收足卽以原封批解毋許鞘外另備添平部議如所請十二月襲二等昭信伯三十四年大軍征緬甸 命侍堯傳檄暹羅如緬酋竄入一體截擒旋奏暹羅見爲甘恩敕竊據其人係彼國亂臣不宜傳檄移會選目莫士麟素恭順臣作爲己意檄令移會暹羅各夷目密偵緬匪竄入境內擒拏具報 上可其奏三十五年二月奏粵東民多

偷渡臺灣請於出口處發循環印簿責成地方官逐日盤驗登記
按月呈繳報 聞五月奏守備楊春榜至參將王希曾署稟事忽
自戕請將希曾解任訊究 上以案內疑竇頗多侍堯並不親提
研鞫飭之尋奏查王希曾於楊春榜冒銷工程銀不行糾舉反侵
收工料銀入己致釀人命擬戍十一月奏審擬豐順縣奸民朱阿
姜潛謀不軌請革知縣吳蘭穀職並自請交部嚴議 上以該犯
等糾黨結盟事經兩月知縣不能先期訪獲革職未足示儆 命
將蘭穀拏交刑部治罪侍堯督拏首夥要犯安速從寬免議三十
七年三月奏運庫公費充裕請撥十萬兩解交藩庫充餉下部議
行十一月廣州將軍秦璜副都統恆泰彼此訐奏 命褫秦璜等

職發侍堯查審尋奏恆泰病故據秦璜劾稱以馬價餘銀私抵倒斃馬匹訊無染指情弊恆泰參秦璜加收房租及受賄挑補額缺等款屬實擬罪如律三十八年晉武英殿大學士仍畱總督任三十九年六月奏安南內訌見飭粵西鎮道嚴防夷兵竄入得旨褒嘉十二月入覲命紫禁城騎馬賜黑狐端罩四十年十月奏審辦廣西高明縣民潛赴安南滋事案查取失察職名按其日月將前署明江同知嵇璇開參左江道秦廷基忽赴粵東謁見先爲游說希欲通融前據太平府知府程大治甯明州知州康坦嶽倒提日月開送前任同知鄒錫彤職名及指駁行提復令役甘華頂冒串供種種舞弊請將廷基等革職嵇璇解任審訊諭嘉

其秉公交部議敘十二月兵部咨粵東糾黨結盟案不數月多至五起應照例加重議處武職雖協拏從前究屬寬縱未便卽予免議侍堯奏員弁既經協拏若因案多不准免議必致暗爲消弭兇徒轉多漏網請將協拏員弁照例寬免 諭曰所奏是已於摺內批示矣地方武弁平時不能約束稽查致匪徒糾黨結盟屢經犯案自應示以重懲如果實力查拏有犯必懲則藏奸自少卽所屬地方犯案較多若知上緊緝拏功過原可相抵設仍予以議處轉致各員弁自顧考成暗爲消弭於懲治奸匪整飭吏治均屬無益李侍堯此摺爲挽回積習起見所奏甚是然亦惟該督向來董察屬僚不事姑息朕所深信始可爲此言若他人未可輕爲倣效也

此案著照李侍堯所請行四十一年二月奏嘉應州斬犯蔡老三
臨刑未經殺死帶傷脫逃奉委監刑之長樂縣知縣薛閎等未親
往遠報斬訖次日獲犯正法請將薛閎等革職拏問 諭曰此事
殊堪駭異實爲從來未有處決重犯奉委之知縣及該營遊擊並
不親往監刑委之吏目千總微末員弁黑夜行刑並不親驗首級
致重囚臨刑脫逃復敢捏報斬訖實出情理之外其行刑之兵丁
黃仕榮顯有賄囑情弊不可不嚴訊重懲卽鎮道等所報次日尋
獲正法之處亦恐難以憑信並當嚴密訪查勿使兇惡要犯得以
潛蹤漏網所有知縣薛閎署遊擊劉永惠吏目鄭兆驥千總劉駿
俱著革職拏交該督撫同行刑之兵丁黃仕榮一併嚴審明確從

重定擬具奏總督李侍堯巡撫德保及該管提鎮道府著一併交部嚴加議處尋奏飭委護惠潮嘉道康基田赴嘉應查驗該犯屍首處斬屬實並究出兵丁黃仕榮於行刑時受賄全屍情節仕榮擬斬請旨卽行正法擬辭閔等罪如律部議革侍堯任得旨寬免四十二年正月因緬酋悔罪投誠籲請還人納貢命大學士阿桂往滇董其事調侍堯爲雲貴總督諭曰雲貴總督見在辦理此事爲最要之缺各省總督老成有識能辦大事實無出李侍堯之右者是以將伊調補李侍堯到滇將諸事妥爲經理至開關通市以後所有內地民人出口及嚴禁沿邊百姓不許前往茂隆廠生事諸事已詳悉面諭阿桂李侍堯晤阿桂時卽可問明一

切悉商爲之既定章程阿桂卽可回京而實力永久查辦則惟李侍堯是賴三月京察議敘加一級因緬目孟幹入關稟稱象眾未到還人納貢請暫緩四月偕阿桂等奏孟幹等言詞反覆見檄諭緬酋以蘇爾相楊重英在內地不足輕重送還與否無關緊要以折其居奇之心 上嘉其深合機宜又奏請禁止土人出關偵探並得 旨褒嘉是月 命阿桂回京緬甸尋送出蘇爾相訊供解京仍檄送還楊重英六月奏緬匪綻拉機稟請釋回孟幹等並未提還人進貢嚴諭來差傳知綻拉機俟送還楊重英奉表貢象不但遣回孟幹並准開市 嘉其所辦尤合機宜又奏三十三年征緬甸在木邦殉難之原任永北同知胡邦佐廣南府經歷許景淹

因展轉行查迄今十年未具題請 賜旌卹 上可其奏下部議
行四十二年正月奏把總李有貴在蠻墩盤獲進關奸民潘起騰
越州人潛赴緬地今進口爲賊探信訊供解京 上褒獎之尋
諭曰緬地水土惡劣實非可用武之地卽或該處有可乘之隙亦
不肖兵出無名興師涉遠朕自有定見李侍堯在滇一載已熟悉
緬地情形且其平日閱歷年久遇事亦知慎重自不肖稍涉喜事
輕舉妄動若緬甸內訌已成上下瓦解其頭目紛紛投出能深悉
其底裏實在唾手可取則又機不可失李侍堯當酌量爲之六月
奏永昌普洱等府界連緬甸每歲派兵五千五百在張鳳街三臺
山九龍江等處防守揆度邊情實不值如此辦理請於杉木隴設

一 大汛撥騰越鎮標兵五百千崖設一小汛撥南甸左營兵二百
令各本營員弁輪駐巡防又虎踞銅壁等關卽於杉木千崖兩汛
分兵駐守毋庸多派官兵滋費下廷臣議行時滇撫裴宗錫以滇
銅不敷額運奏請調劑 命侍堯悉心籌畫具奏十一月請裁鑪
座並查明鑪欠分別著賠 諭曰所奏仍未能善體朕意如將有
著無著之項概令攤賠仍不脫從前陋習著傳諭李侍堯等將舊
有廠欠之項詳細覈查其有著者若干卽將鑪戶勒追如逾限不
交查明家產抵補未完之項卽於經手原放之員名下著追無論
見任在籍亦俱勒限追繳如不能完卽將家貲田產查封抵補庶
不敢遲迴觀望其從前實係無著之項查明若干卽據實開單奏

明候朕覈定豁免降旨朕此次清釐專在剔除積弊卽或應免無著之項稍多亦所不惜李侍堯不得存帑項爲重之心畏首畏尾復涉含糊致負朕諄切訓諭之意四十四年奏滇省墮欠鹽款由於鹽斤無著因勒限於本歲奏銷前不准絲毫短缺見任各員向井竈收買餘涵趕煎趨補半年內鹽已足數 諭曰滇省墮欠鹽款情弊相仍歷久未能釐剔今李侍堯知致弊之由勒限趕辦不及半年而應存鹽數業已顆粒無虧可見事在人爲果能實心查辦積弊自卽肅清四十五年三月原任雲南糧儲道海甯向軍機大臣訴侍堯貪縱營私狀奏 聞 命尙書和珅侍郎喀甯阿查辦和珅等尋奏查訊侍堯供認收受道府等官餽賂各款不諱

諭曰李侍堯身爲大學士歷任總督乃負恩婪索盈千累萬甚至向屬員變賣珠子贓私狼籍如此不堪實朕夢想不到不特朕用人顏面攸關卽各督撫聞之無不慙愧痛恨矣李侍堯著革職拏問交和珅等嚴審定擬具奏 命褫所襲伯爵以侍堯弟江西提督李奉堯襲五月擬侍堯斬監候下大學士九卿議改斬決復下各直省督撫議十月 諭曰各省督撫覈擬李侍堯一案業已到齊李侍堯以大學士兼管總督受恩最深乃敢營私敗檢驕縱妄行實出意料之外覈其情罪非僅如彰寶之因病任性縱家人勒索供應者可比較之從前恆文良卿貪婪散法致罹刑憲情節實約略相等惟恆文甫任督撫卽肆意婪贓平日又無出力辦事之

處李侍堯則身任總督二十餘年如辦理暹羅頗合機宜緝拏盜案等事亦尙認真出力且其先世李永芳於定鼎之初歸誠宣力載在旗檔尤非他人所可援比是以前於尙書和珅等照例定擬斬候大學士九卿請改立決朕復降旨令各督撫等各抒己見確議具題原欲以準情法之平茲各督撫大率以身在局外多請照大學士九卿所議而閔鶚元則以李侍堯歷任封疆幹力有爲爲中外所推服請援議勤議能之文稍寬一綫具奏是李侍堯一身之功罪原爲眾所共知諸臣中既有仍請從寬者則罪疑惟輕朕亦不肯爲已甚之事李侍堯著卽定爲應斬監候秋後處決餘著照大學士九卿原擬行四十六年三月甘肅撒拉爾逆回蘇四十

三滋事 特旨賞侍堯三品頂帶並戴花翎赴甘肅總辦軍務四
月陝甘總督勒爾謹獲罪 命侍堯管理總督事時大學士公阿
桂奉 旨剿辦逆回閏五月侍堯奏見調滿漢屯土兵臣抵省後
查覈軍精頗裕尙有陸續報運者計算足敷儲備之數報 聞又
偕阿桂奏賊於華林山築卡我兵奮擊克之得 旨嘉賚先是
上以甘肅私收監糧折色明係捏災冒賑 命阿桂會同侍堯詳
查具奏六月奏甘肅捐監歸蘭州總辦自開例卽收折色並未買
糧歸倉盤查出賑俱屬虛文捏冒侵吞屬實請 旨將前任藩司
王直望任內假捏結報之歷任道府直隸州革審 命將前任蘭
州府知府蔣全迪皋蘭縣知縣程棟革職拏解蘭州審訊此外各

員交吏部查明曾任蘭州道及首府首縣者一體革職拏問其餘各道府州縣加恩免其提訊是月殲斃賊首蘇四十三七月逆回平尋偕阿桂奏冒賑舞弊之司道以下各官見據蘭州府知府陸緯等將浮冒銀數及餽送上司各款逐一供認八月 諭曰甘省私收折色一案戩法營私弊端百出已將首先倡議侵冒分肥之勒爾謹王直望王廷贊蔣全迪分別明正典刑矣至此案大小各員通同侵蝕自應按律問擬以彰國憲而警貪婪但人數較多若概予駢誅朕心有所不忍著傳諭阿桂等將各該犯所有侵冒銀數其有二萬兩以上者俱當問擬斬決二萬兩以下者入於情實其一萬兩各犯亦應問擬斬候請旨定奪所有應行定擬案犯俱

著趕本年旬到以前具奏毋致延緩是月阿桂赴豫督辦河工九月侍堯奏請將冒賑二萬兩以上之程棟等二十員正法餘分別定罪有差又奏蘭州城西南兩面均山高於城逆回在華林山憑高下擊城守兵無可遮蔽且該處人煙輳集屋宇直接城垣易於攀攻請自西外城安定門起由拱蘭門迤至風神廟止又自通遠門東南角起由迎恩門至廣武門北角止添建城垣西南兩關廂居民勸諭遷移撤屋以畱火道華林山應築營堡移督標右營官兵駐劄得旨如所議行四十七年三月奏臬蘭等三十四廳州縣虧缺庫項八十八萬八千餘兩倉糧七十四萬一百餘石數冊檔自雍正年間至乾隆二十年以前卽有虧欠銀自數十兩至千

餘兩糧自數十石至四五百石二十年後虧缺日甚多者至萬餘
各上司捏結報題致州縣毫無忌憚見今查出二十年至四十年
虧項積至四十二萬俱係那新掩舊今四十年後自總督以至州
縣俱治罪抄產無可追賠其四十年溯自二十年之累任各官應
照任內虧空之四十二萬擬定成數加倍賠補有無力完繳者入
通案各員名下分賠其尚有八十二萬餘請於臣及司道府廳州
縣養廉內攤賠 諭曰倉庫正項銀兩竟敢任意侵欺卽令加倍
賠補亦所應得但念歷年已久各州縣輾轉接收較之折捐冒賑
昧良舞弊者尙屬有閒其濫行出結保題之各上司咎止失察著
加恩將虧空四十二萬之數照依原單按其在任久暫照股分賠

毋庸加倍賠補至該督所稱其餘尚有八十二萬餘兩未便竟歸
無著請於見任總督及司道府廳州縣各員養廉攤扣三成陸續
歸補等語甘省積弊相仍爲從來未有之奇事此等劣員既經冒
賑殃民又復侵虧正帑實屬罪無可逭昨已將閔鶚元等交軍機
大臣會同英廉等詳加覈奏降旨分別辦理至李侍堯福崧等辦
理此案澈底清查尙屬實心卽見在道府州縣各員多係新任若
令攤扣養廉辦公未免竭蹶且恐將來轉有藉詞賠累復致虧缺
之弊並著一體加恩免其分賠此次寬免後若再有虧缺查出斷
不能爲之曲貸也四月奏虧空案內查有節年民欠未完籽種口
糧銀一項除節次邀 恩豁免外尙有應徵積欠倉糧二百萬石

有餘折銀三十萬兩有餘請分年帶徵 諭曰甘省地瘠民貧朕前節年加恩出借緩徵用紓民力在小民感激朕恩自無不踴躍輸將但念該省每遇偏災動項賑恤多爲劣員等侵蝕冒銷閭閻未得普霑實惠甚非朕惠養黎元之意今該省積弊已除所有此項積欠銀兩著加恩全行豁免五月 命給予見任品級頂帶八月加太子太保四十八年三月請增甘肅衝途州縣養廉下部議行四月因奏參洮河廳同知李天植承修築工折收料物一案未將失察之知府附參部議降二級調用得 旨寬免畱任六月奏河州改協爲鎮鞏秦二營向隸固原提標請改歸洮岷協專轄下部議行四十九年閏三月廣東監生譚達元控總商沈冀州斂派

公費餽送前督臣李侍堯經 欽差尚書福康安審訊照因公科
斂所屬財物例定擬 諭曰李侍堯久任封疆素能辦事是以加
恩復行錄用自簡任陝甘總督以來於勦捕逆回查辦監糧二事
尤能認真出力而地方諸務亦俱實心整頓其令總商科斂公費
購買物件與枉法受財者有閒所用公費銀兩議令按數賠繳亦
足蔽辜李侍堯著加恩免其治罪從寬改爲革職畱任四月奏肅
州安西等處雇車出口向例每百里給價一兩六錢經烏魯木齊
都統海祿查奏止給一兩續經覈奏每百里給六錢應查歷任報
銷浮冒各員一體查辦但此項車價原係照例給價其咎在明知
例價有餘不行呈出尙與舞弊有閒可否罰令加倍賠繳免革職

治罪 上可其奏是月甘肅鹽茶廳小山逆回田五等聚眾滋事
諭侍堯會同固原提督剛塔迅速勦捕尋奏帶同臬司陳步瀛
前往籌辦 諭侍堯應以速以嚴尋奏田五竄回小山慮句結各
處新教見密飭附近州縣及河州西甯回族較多地方畱心防範
諭曰此案田五等復敢倡設新教糾眾滋事究係從前李侍堯
未能殲絕根株以致復萌餘孽自難辭辦理不善之咎而此時緊
要關鍵總以安撫舊教爲主侍堯旋奏拏獲田五等家屬並夥賊
多名解鹽茶廳收禁臣卽馳往審辦 諭曰據奏田五等家口已
被拏獲李侍堯親往審訊所有田五蹤跡及起事緣由均無難澈
底跟究著李侍堯於審明後卽將見獲各犯分別凌遲斬梟一面

奏聞一面正法五月奏賊匪至打喇赤復回撲鹽茶恐劫家屬調固原兵彈壓 命侍堯速遵前旨將所獲賊夥犯屬審明尋奏田五中槍傷在馬營自戕餘匪竄徐家溝添派官兵痛剿又據賊供意欲回搶鹽茶約人內應已將供出各犯密拏收禁隨將田五等家屬正法 諭曰李侍堯辦理此案甚屬妥速且鹽茶廳拏禁賊犯及犯屬甚多昨經降旨該督等先行審明即將各該犯正法以絕賊人窺伺搶救之心今李侍堯於未奉諭之前業已籌慮及此將各要犯四十九名卽行正法與朕所降諭旨符合足見其能辦事本應卽予優敘但此案究係李侍堯前此查辦新敎未能淨盡平日又疏於防範所致功過兩不相掩李侍堯著交部議敘侍堯

奏賊匪撲靖遠城經官兵擊退臣見已馳抵靖遠賊竄窩石山梁因大雨軍裝火藥潮溼俟天晴進兵 諭曰此時李侍堯在靖遠駐劄不過籌辦糧草事務可以委道員等代辦李侍堯當前往馬家堡督率調度較之剛塔一人在彼呼應更爲得力況鹽茶監禁賊回家屬俱已正法其靖遠內應回民亦經按名拘獲正法賊匪見退入山內自不能復至靖遠滋擾卽或拚命回撲官兵正可就其出時半路截殺更易爲力見在賊所據馬家堡前左右三面俱係深溝大河官兵嚴密圍攻已如釜底遊魂困守空山食盡計窮自不能長久占據惟堡後靠山踞險防其別尋路徑或由山後逸出該督等不可專意在前攻圍後路致賊人或乘閒竄逸李侍堯

旋奏馬家堡賊翻後山遁 上以侍堯安坐靖遠並不親往調度
嚴飭之 諭部停其議敘時賊匪竄西鞏 上虞驛路梗塞令設
法安置郵傳賊又遁馬營街侍堯親赴軍營由安定一帶賊蹤較
近處駐劄 諭曰李侍堯既知親往辦理卽當星赴馬營街打仗
處所與剛塔等面商妥辦乃僅於賊蹤較近之處逗遛駐劄是何
言耶著再傳旨嚴行申飭時通渭縣之石峯堡先有賊接應 上
以侍堯屢失機宜 命大學士公阿桂尙書福康安馳往督師侍
堯尋奏賊自馬家堡竄後剛塔徒事尾追及至西鞏賊復遁馬營
街恐與石峯堡賊會合臣兼程赴安定堵禦 諭曰摺內措詞皆
隱隱參奏剛塔總督與提督平日雖屬平行至行軍之時一切皆

應聽總督調度如李侍堯親往打仗處所督辦剛塔仍然怯懦不前原不妨據實參奏乃該督惟知安坐觀望逗遛靖遠及賊已遠颺惟知以落在賊後歸咎剛塔試思伊不又落剛塔之後乎尋奏通渭城陷西安副都統明善陣亡上以侍堯辦理不善致各路賊蔓延句結嚴飭之侍堯奏賊據石峯堡飛札領隊大臣五岱派兵堵截諭曰李侍堯既慮及賊人侵擾後路卽應星赴打仗處所與五岱等面商辦理且賊已南竄安定一帶驛遞往來均無阻礙有何必須該督親身在彼料理之事乃仍於該縣安然遙駐惟以札致了事其故實不可解又奏盤獲賊探徐璠成究出通賊之萬數十隨拏到京據供欲往蘭州河州句合新教上以蘭州省

會重地河州尤係回民巢穴 飭侍堯嚴防時因奉節次 飭詢諭旨逐款覆奏 諭曰從前甘省蘇四十三因新舊爭教地方官辦理不善致釀事端小醜跳梁立時撲滅經朕節次降旨令李侍堯將通省新教回民當不動聲色密行查辦遠遣斷絕根株以靖邊疆而安良善查辦新教係李侍堯分內專責經數年間該督祇查拏一二人奏明辦理乃爲時無幾遂有固原所屬小山回民田五等聚眾謀逆之事攻城掠堡傷害官兵因令李侍堯查明賊人起事根由據奏靖遠城內回民於本年三月十五日眾新教回人齊集禮拜寺將田五糾眾謀逆情節告知旬令臨期內應等語是賊人多係新教久蓄逆謀公然於縣城中齊集糾約李侍堯安坐

省城毫無聞見其從前查拏一二回匪不過藉以塞責而其並不實心查辦已屬顯然追賊首田五就斃餘黨竄入馬家堡剛塔等帶兵追趕李侍堯惟知株守靖遠城審辦賊犯家屬而於一切攻剿機宜竟視爲非伊總督應辦之事祇委之提督以致軍營統攝無人賊匪乘閒翻山而遁經朕再四訓飭李侍堯始行移駐安定仍與剛塔等軍營相距遙遠彼此信息祇憑文劄往來行軍之道有如此之玩延怯懦者乎且各處從逆賊匪一經拏獲卽當審明立時正法乃據奏鹽茶靖遠安定地方尙有未審未辦之犯此等回匪爲逆有何疑難耽擱李侍堯無非藉以遷延觀望遠避賊鋒巧爲卸過地步是其避重就輕豫存文飾之見豈能逃朕洞鑒眞

所謂欲蓋彌彰也此事李侍堯既玩愒於平時又畏葸於臨事遂致賊匪蔓延猖獗到處勾通李侍堯之罪實無可追李侍堯著革職暫畱甘省帶罪效力辦理軍需事務俟剿賊事竣後再降諭旨時西安將軍傅玉奏石峯堡地本險要上年五月新教回人重加修葺約期起事 諭福康安抵甘省速將傅玉所奏情節詳細查明具奏如果有心隱匿卽將李侍堯拏解熱河六月伏羌告警侍堯帶兵親往剿捕得 旨李侍堯此時竟宜專力剿辦伏羌之賊牽綴其勢勿使句結則福康安在東路剿辦石峯堡賊匪尤易爲力福康安奏侍堯玩愒貽誤諸罪狀遵 旨拏解熱河訊問 諭曰李侍堯久任封疆歷練地方事務數十年受朕恩眷最深迨調

任雲貴總督後有受廠銀等事一經發覺卽將伊革職拏問治罪
覈其情節雖非近年王亶望陳輝祖國泰郝碩等之貪黷敗檢營
私者可比但其簞簞不飭已墮名節而損廉隅其時彙內外臣工
之奏將李侍堯加恩暫緩典刑適因甘省有蘇四十三之事需人
辦理善後事宜一時總督驟不得人李侍堯究屬明白能事是以
復將伊補授陝甘總督朕於李侍堯破格加恩原欲其倍加策勵
查辦邪教安靖地方以贖前愆李侍堯稍有人心宜何如感激奮
勉仰答朕恩乃本年回民田五於小山起事李侍堯並不親帶兵
丁設法剿捕彼時尚得以審辦賊黨籌畫軍餉爲名追賊於馬家
堡翻山逃遁伊仍逗遛靖遠軍營統攝無人肆行竄逸句結經朕

於五月十二三十四等日屢次飭諭始行駐劄安定仍距賊眾遙遠以致賊黨蔓延到處煽誘攻城掠堡擾害良民是李侍堯之畏葸遷延實爲失機債事賊人於四十六年卽已修理石峯堡上年五月又加葺治整固且田五陰謀不軌公然糾眾聚集禮拜寺商同謀逆一切旗幟號衣帳房器械種種齊備足見逆謀已有三四年之久李侍堯安坐省城竟同聾瞶是其參賊養癰釀成事變李侍堯之罪百喙難辭此事辦理始終貽誤卽李侍堯平日如勒爾謹之庸懦昏瞶尙不能曲宥其罪況李侍堯在各省總督中素稱明白能事人所共知朕之棄瑕錄用亦因其尙有才能冀其感恩出力乃竟於地方大事貽誤若此朕更不能曲爲之解抑自深

引咎愧恨也所有福康安參奏李侍堯之處俱係實在情節諒伊亦無從諉卸著將原摺交畱京王大臣會同大學士九卿科道覈議定擬具奏七月畱京王大臣定擬斬決 命隨從之王大臣等覆覈請照原議 諭曰李侍堯本應依擬卽行正法但念本省因有不逞之徒滋事擾害致本省總督卽羅典刑轉恐啟刁風而滋厲階非所以遏寇虐靖邊疆也從前蘇四十三滋事時將勒爾謹革職拏問交廷臣覈擬斬決彼時亦曾加恩改爲監候後因該省折收監糧案發是以賜令自盡原不因蘇四十三之事今李侍堯玩誤因循其罪雖淨於勒爾謹但念其歷任總督多年於地方事務尙屬諳練通曉至軍旅本非其所嫻著從寬改爲應斬監候秋

後處決五十年十月 諭加恩釋放十二月 命署正黃旗漢軍都統 賜紫禁城騎馬五十一年三月署戶部尚書五月湖北江陵縣民蔣魯玉控知縣孔毓檀侵蝕賑銀 命侍堯前往查辦尋審明毓檀無侵蝕情弊但上年領到銀穀先放附近各處其較遠處所至本年正月始放致災民情急呈控請革職發往軍臺效力

諭革毓檀職免治罪是月 命署湖廣總督十月參奏前署孝感縣知縣秦樸任內有縣民劉金立等向族姓借貸不遂糾眾搶劫旋有並未被搶之革生梅調元因慮被累邀同居民楊維智等毆斃金立捉獲幫搶之劉大么等二十三人活埋於查家山地方官諱匿不報請 旨革職嚴審得 旨褫秦樸職擊交刑部治罪

前總督特成額等並逮問旋命實授湖廣總督是月寅調元等於法又查奏黃安縣知縣陳玉興國州參革知州溫有光辦賑多侵漁諭革陳玉職同已革知州溫有光一併嚴審定擬尋審明論罪如律五十二年正月入覲時臺灣奸匪林爽文事起命侍堯爲閩浙總督抵閩後駐劄蚶江前總督常青赴臺灣督辦軍務二月奏馳抵泉州飭屬碾米解貯廈門等處接應並防範內地各隘口上嘉之三月奏籌辦軍糧器械在廈門澎湖者徑解臺灣府城在泉州者由蚶江解鹿仔港再匪徒私立天地會既久若將內地從教民人澈底究辦恐致驚擾見豫爲訪察存記俟逆匪辦竣與緣坐家屬之在內地者一同辦理又奏南路官兵克復鳳

山北路賊自聞風震懾如鳳山無須重兵彈壓儘可專注北路均報聞又疏劾提督黃仕簡任承恩分剿南北兩路各有牽制諭常青渡臺將黃仕簡撤回廈門候旨逮問任承恩侍堯旋奏軍營各提鎮彼此觀望南路黃仕簡見請添兵常青欲向北路會剿已無兵可帶若俟咨會到日恐調集遲誤見飛咨粵省令派將弁兵丁剋日起程得旨籌辦甚爲周到動合機宜又奏臺灣自賊匪滋事以來大兵僅屬困守黃仕簡等皆以兵單難於遠捕爲辭命俟仕簡抵廈門飭粵省官兵趨程前進並備船隨到隨渡四月奏林爽文在大里杙築堡拒守難民附船入口者兵役藉稽查勒索得旨事竣後當嚴查處治以示懲儆時常青咨調征兵七

千侍堯以海疆存兵未便再撥請調浙兵 上聽其言又奏粵省
二起兵自海澄縣水路赴廈門行至嶼仔尾被盜行劫請將海澄
縣知縣侯謹度等革職畱於地方協緝總兵羅英岌等一併交部
議得 旨均革去頂帶暫行畱任督緝侍堯奏臣由廈門回泉州
向蚶江料理配渡據臺灣道府請發銀米各十萬各路接濟鄉勇
並賑恤難民經臣駁飭 命將該道府請發銀米速行照數運往
以備接濟並以所見錯謬飭之又奏漳浦平和一帶有械鬪案已
咨提臣藍元枚暫畱漳浦辦理得 旨藍元枚已授爲參贊其漳
浦匪徒卽著李侍堯前赴該處督辦時鹿仔港難民亟須撫恤侍
堯籌買番薯並撥米委員解往 諭曰李侍堯以鹿仔港難民噉

噉待哺酌籌調濟事宜是李侍堯知過能改並不稍存迴護惟不及朕先見之速所奏採買番薯一萬斤並撥米二千石爲數恐不敷用著該督酌量情形多爲豫備陸續採運以資口食五月奏閩省內地各營存兵無多請將浙兵配渡進剿 諭曰見在臺灣額兵征兵臨陣傷亡者不少所有缺額何不趁此時卽在內地召募充補使兵數足額巡捕旣資充裕而該處游手好閒之徒亦可收歸卒伍更爲一舉兩得時漳浦械鬪案應往審 諭侍堯察看情形如不必親往查辦卽在廈門蚶江一帶往來照料接濟軍需又 諭曰李侍堯駐劄廈門一帶照料官兵配渡迅速辦理軍需糧餉均能先事豫籌源源接濟著交部議敘六月奏漳泉會匪甚多

風聞逆首遣人勾結須豫防範擬再調浙兵二千到泉州廈門駐劄諭曰所慮甚是自當如此辦理至漳泉一帶會匪甚多賊首林爽文遣人勾結之說雖得自風聞不可不畱心防範總以靜鎮爲要至該督擬調浙兵二千名到泉州廈門駐劄一節浙兵向來怯懦無用卽調駐漳泉亦不得力徒勞跋涉更致虛糜且需時日朕聞閩人素稱曠悍且游手無藉者更多不若卽在閩省就近招募俾食錢糧以充營伍伊等自必樂從可以一呼而集較之浙兵旣屬勇健可恃且游手無藉之徒亦可收以爲用不致爲匪實屬兩有裨益又奏賊據笨港解往糧餉火藥恐被邀截見撥緝船二令營員帶領水師槍兵分駐鹿耳門鹿仔港彈壓防護諭曰此事

最關緊要朕未及降諭旨令該督加意防範而李侍堯一聞笨港有失卽能慮及於此若能沿海一帶要隘保守無虞將及大功告成時此亦李侍堯之一功也七月奏前派繒船尙單薄見飭海壇金門二鎮調繒船各一撥沿海槍兵防範至內地營伍未查明缺額實數應先約略募補 命侍堯廣行添募毋庸拘定原額八月奏洋盜行劫官運米船有不搶米石止搶軍器者請照從前辦海澄縣劫案例請將該地方文武革去頂帶畱本任勒限緝拏 諭曰李侍堯督飭所屬員弁務須上緊設法勒限查拏務獲並拏獲盜犯時卽行提訊是否係海洋劫盜抑係賊人夥黨之處嚴切跟究務得實情時藍元枚奉 旨帶兵往鹽水港剿賊侍堯奏鹽水

港距鹿仔港較遠恐元枚帶兵南行賊潛至鹿仔港滋擾見移咨
令從陸路進攻大里杙等處 諭獎其所籌實合機宜尋以臺灣
剿捕事未竣 命福康安爲將軍代常青督師 諭侍堯將應用
軍需妥爲覈算俾十餘萬官兵無致乏用九月奏內地臺灣轉運
夫價請照金川口內口外例增給價值其海運船隻事前守候事
後回空亦請暫給口糧得 旨摺內所奏各款姑照所請行李侍
堯當明諭朕意安心籌辦軍務要件其尋常細事無庸豫爲將來
地步也尋奏藍元枚卒於軍飛檄總兵李化龍畱鹿仔港駐守總
兵普保由西螺進攻斗六門十一月加太子太保奏接奉發交常
青 諭旨恐常青宣露致府城人心惶惑擬節錄發寄得 旨深

合機宜殊得大臣之體著賞戴雙眼花翎以示優眷十二月總兵羅英岌督率兵役在金門洋面拏獲前在海澄縣嶼仔尾地方行劫粵省兵船之黃突等十二犯又獲累劫軍米拒傷兵丁之何片等三十七犯均審明恭請 王命正法 命賞還英岌頂帶時福康安劾提督柴大紀又侍郎德成自浙回京面奏大紀貪黷狀上以侍堯有心徇隱申飭之 命據實查參五十三年正月奏大紀貪劣各款並自請交部治罪 諭曰李侍堯此次辦理照料渡兵撥運糧餉火藥等事尙爲出力原欲俟戡功之日給還伊原襲伯爵乃於柴大紀貪縱不職之處經朕節次降旨詢問李侍堯知難隱飾始行具摺陳奏似此有心徇隱更忍辜負重恩李侍堯不

應出此前已晉加宮銜賞戴雙眼花翎已爲僥倖豈可復膺懋賞
並著交部嚴加議處部議降三級調用得旨從寬畱任二月林
爽文就擒奏上年各營新募兵原係暫備差遣今賊首就擒福康
安移師南路搜捕莊大田軍務剋期告蒞征兵即可歸伍若將新
兵全裁辦理未免太驟見通飭各營以新兵補舊額至各營募兵
多寡不同並飭新兵較少營分遇缺出卽於新兵較多之相近各
營移補報聞旋獲莊大田臺灣平上以侍堯照料過兵運送
糧餉妥速交部照例議敘又奏軍務告竣各省撥運米未入境者
應行截畱停運從之三月命查明臺灣被害各官平日居官
及死事情節具奏尋奏彰化縣知縣俞俊到任未兩月聞賊警親

往查拏遇害又理番同知長庚署同知王鼎鳳山縣知縣湯大奎
居官並無劣蹟均死事應請議卹至臺灣府知府孫景臺防同知
劉亨基臺灣縣知縣程竣署諸羅縣事董啟埏唐鎰在任雖久暫
不同俱以貪黷釀變雖被害不應給予卹典疏入 上嘉其公當
四月挑撥臺灣換班戍兵 命侍堯於興化延平建甯邵武各營
均勻撥派毋專派漳泉兩郡兵是月 賞還原襲伯爵八月 諭
建福康安等生祠於臺灣侍堯居福康安海蘭察之次復 命圖
形紫光閣列前二十功臣 御製贊曰以恆入覲命往閩疆戰固
老已謀猷允長渡兵濟餉井井有方不誤軍儲其績孔臧十月疾
命侍堯子侍衛毓秀前往省視是月卒 賜祭葬諡恭毅子毓

秀仍襲伯爵六十年正月因侍堯前在雲貴總督任內與廠員通同偷減錢法褫毓秀襲職以奉堯子三等侍衛毓文襲毓秀爵

右 國史館本傳

李昭信相國侍堯爲忠襄公永芳六世孫少以世廕膺宿衛 純皇帝見曰此天下奇才也立授滿洲副都統部臣以違例尼之上曰李永芳孫安可與他漢軍比也後任廣東將軍卽轉兩粵制府先後幾二十餘年公短小精敏機警過人凡案籍經目終身不忘其下屬謁見數語卽知其才幹擁几高坐談其邑之肥瘠利害動中窾要州縣有陰事者公卽縷縷道之如目覩其事者故警欵之下人皆悚慄然性驕奢貪黷竭民膏脂又善納貢獻物皆精巧

是以天下封疆大吏從風而靡識者譏之任雲貴總督以受納下屬賄賂故下獄廷議大辟 上終憐其才故緩其獄復歷任陝甘兩廣閩浙諸制府而貪黷仍如故其督閩時值臺灣之變 上以常青非將材恐不能守臺郡令其全師以歸待福文襄王至再籌進取公以臺爲巖邑一旦失守非十萬兵不易取恐有失機宜因將 諭節去數語錄寄常青然後具疏請罪 上大悅以爲處置得宜有古大臣風度 賜雙眼孔雀翎 褒諭獎之其處大事明決若此亦未可徒責以素絲之節也

右錄宗室昭榘撰

劉綸

劉綸江蘇武進人乾隆元年由廩生舉博學鴻詞試第一授翰林院編修二年恭修世宗憲皇帝實錄充纂修五年遷侍講六年六月充日講起居注官尋充陝西鄉試正考官九月授太常寺少卿七年三月遷通政司右通政十月轉左八年遷太僕寺卿九年內閣批本處行走十年遷大理寺卿十一年授內閣學士十二年命編詞林典故十三年充武會試正考官十四年九月署兵部侍郎充續文獻通考副總裁入直南書房十月充國史館副總裁十一月擢禮部右侍郎十二月調工部兼理兵部十五年命單機處行走充平定金川方略副總裁十六年土默特貝子哈木

噶巴雅斯圖圖不按原議年限逐種地人民直隸總督方觀承入
奏命綸借貝勒羅卜藏侍讀學士麒麟保查勘六月合疏言出
口民價典旗地者應遵原議三年五月限外撤還原主嗣後不得
私典他如領地耕種爲佃戶受雇力作爲傭工皆浮寄謀生初無
占地之意應許暫行餬口更有領地開荒之民積累辛勤始得成
熟與價典不同俟年滿日先還莊主所需自種之地有盈給種以
償前勞市肆舍宇定租價以息爭端畱商賈工匠以免驅逐游手
木頭城三座塔二處居人稠密許照常居住不得添增於三座塔
設巡檢一以資彈壓從之七月充詩經館副總裁九月丁父憂
十八年補戶部右侍郎十九年正月兼理順天府府尹事二月充

經筵講官二十年六月準噶爾平定軍功議敘加三級七月充平定準噶爾方略副總裁十二月浙江按察使富勒渾奏參調任巡撫鄂樂舜授意布政使同德勒派商銀 命綸赴浙同浙閩總督喀爾吉善兩江總督尹繼善會審二十一年二月覆奏鄂樂舜受銀屬實擬絞候同德並末知情富勒渾誣參擬杖流 上以富勒渾所參重款已實不應議罪綸等定擬過當下部議革職奉 旨寬免畱任四月 命專辦部事不必兼軍機處行走二十二年教習庶吉士二十三年奉 旨仍在軍機處行走二十四年六月奏言薊州寶坻等處蝻子萌動臣等見在督捕惟是一邑村落甚多州縣官事繁未能周徧派千總外委同佐雜分捕參將大員偕監

司巡察勤惰以示勸懲疏入報 可閏六月擢都察院左都御史
十一月平定回部功成議敘加三級二十五年八月充恩科順天
鄉試正考官十一月 命偕刑部侍郎伊祿順赴西路勘將軍嵩
阿禮剋兵糧勒餽送等款得實論如律二十六年五月署兵部尙
書六月教習庶吉士二十七年 賜紫禁城騎馬二十八年五月
調戶部尙書仍署兵部教習庶吉士六月 命協辦大學士十月
加太子太保二十九年兼署刑部尙書協辦大學士事三十三年
六月兼署戶部十月充經筵講官三十四年三月充會試正考官
四月以中式舉人梁泉卷被勘部議革任得 旨寬免三十五年
八月充順天鄉試正考官十一月充三通館副總裁三十六年二

月晉文淵閣大學士兼工部尚書五月充國史館正總裁三十七年充會試正考官三十八年卒遺疏入 諭曰大學士劉綸品行端醇學問博雅久直禁廷簡畀閣務勤勞夙著倚任方殷今春患病屢遣侍衛御醫存問診視復特賜人蔭俾資補益昨復沈劇倍增廬念茲聞溘逝深爲軫惜著加贈太子太傅入祀賢良祠其任內降革之案均予開復賞銀一千兩辦理喪務派皇十二子帶領侍衛十員往奠茶酒所有應得卹典仍著該部察例具奏尋 賜祭葬如例諡文定子躍雲見官禮部左侍郎

右 國史館本傳

皇上乾隆元年將選魁艾閱碩之儒登用於廷乃 親試博學鴻

詞士於保和殿得第一人曰武進劉公諱綸字繩庵其先自大同徙鳳陽明初有從信國公湯和下常州者畱爲西營劉氏八世至屯田郎中諱光斗從王師定福建有活氓功閩人歲祠至今又一傳爲保定知府諱履旋保定生福甯知州諱維甯代能其官吏行循最福甯生康熙癸酉舉人諱演者公祖考也郡學生諱機者公考也三世皆贈光祿大夫公自諸生釋褐授編修以文章學術應期發聞受上知遇汜奮於庸未三十年而預參閣務又八年而眞拜又二年年六十三以薨詔贈太子太傅入祀賢良祠諡曰文定公少雋異六歲綴文驚其里師稍長則學爲古文辭不怵是非覃精銳思卓然早成十九補諸生尋爲廩生旣而入翰林

益踔厲自力擢侍講進太常少卿由左右通政太僕卿三遷至大理卿歷試克釐不懈於位拜內閣學士兼禮部侍郎從 幸木蘭卽獵所奏秋郊大獵哨鹿賦二篇 上嘉其才由是滋欲嚮用公以署兵部侍郎入直南書房再遷禮工二部侍郎直軍機處出入帷帳列於近臣流民越塞耕土默特言者欲盡毆民遷而歸其地上命公馳視公議緩其期俾民輸作受傭不奪不爭旗民輯和丁光祿公憂服除補戶部右侍郎兼順天尹故事順天府公牘治中通判不署名皆穴放自廢公請以錢穀屬治中以獄訟屬通判先署案而呈尹以可否之 王師西征將發役車供侍壹切辦治事竟無一人諱於道者充經筵講官卽其部爲左侍郎拜都察院

左都御史使讞獄於秦比還遷兵部尙書旋以戶部尙書協辦大學士加太子太保丁金太夫人憂甫除喪詔以吏部尙書起公仍贊閣務公爬梳抉剔綜覈名實奏定考試書吏法規條畫然當是時天下皆望公爲鉅人長德 天子亦習知公忠信可倚用三十年二月遂拜公文淵閣大學士兼工部尙書仍管工部事公秉節簡諒不爲聲章洽於 眷毗觀聽翕服三十八年春公得疾自齟腫達於左頰猶強起視事 上命公少休遣太醫院判武世倬就第視疾使者存問載道久之不瘳則益 賜公人蔭和劑以進而公病寢劇六月二十三日薨於阜成門內之 賜第 上方駐蹕熱河聞之悼惜 詔皇十二子臨其喪賻以千金朝野上下皆

頌 天子能知公以恩禮始終而益弔公遭會 聖明不克延其
年以究厥施者之爲大可悲也公性至孝親喪三年不御酒肉號
而行日踣數十里營高燥以葬旣得卜則手樹槨表之自書隧碑
礪斷惟謹自工部侍郎歸買玉帶橋宅僅數楹迨公薨二十年未
嘗益一椽寸甃衣履極垢敝不改作而盛服以朝曰 朝廷有章
吾不敢簡也食於廚者數百指室無儲餘前後典順天試二會試
二武會試一其他考校以十數所等第士皆有名發舒於時者甚
眾爲文章沒淫六朝而根極漢魏千變萬紵涵於一源於詩獨喜
高青邱謂能入唐人門閥未薨前一年自編類爲內集十六卷外
集八卷今皆刊行有法度可傳於後公娶許氏縣學生諱仲女

誥封一品夫人子四人長圖南乾隆戊子舉人次躍雲乾隆丙戌
一甲進士翰林院編修署日講起居注官次召揚國學生次驥稱
早卒女六人長適戊子舉人陳賓餘俱先卒孫男七人孫女二人
公薨之明年圖南等奉柩歸常州將以其年十月葬公於澤庵之
賜塋而先期來謁銘始余爲翰林居宣南坊與公鄰巷暇輒走
就公語比在軍機處更得日夕從公後公又嘗以女孫許字余孫
爲姻婭周旋最久且習每歲時蒙 恩燕賚賜予兩人者蓋無不
同而至於有所撰述研練工贍惟余恣然自以爲不如公遠甚在
直次給札下筆極端謹點畫小不如意必再三潤色合法乃已公
器量凝重不見有喜愠出入殿門進止有恆處 上前所聞語益

久無所遺忘亦未嘗一出諸口也余居海淀與公同 賜園一區
而中分之常時退朝寂無聞人聲徐覘之則公方飯脫粟已手冊
兀坐器用輒略蕭然如布衣諸生時嗚呼公行卓卓大者在人口
而以余平日親見公言語動作之微有他人所不及知而余獨知
之者然益可以見公之德矣今其葬也不敢以不文辭謹考次公
事狀大略以誌其墓而繫之銘曰

翼翼劉宗西營基慶循施弗彰積世以盛劬躬燾後公克受之蓄
淵蘊崇起爲人師在 帝初元哀然舉首騫其羽儀如券交手入
綰章綬出捧觴英年除歲遷陟於九卿維瀛有瀾學也伊識維杓
有樞政也伊德遂參近密左右屏毗迴翔六官秉一自持 內朝

從容發揮翰札紀頌 功德典謨奧質授几重席鳴珂 禁垣錫
 我 寵渥昕夕便蕃載總臺衡百寮是式載分魁柄司空是職淵
 淵其衷坦坦其施匪闕匪流用罔不時玉鉉大斗 皇心簡倚壽
 富康甯宜多受祉胡斯奄忽乘化則遷豐德與言而嗇之年有崇
 者封將作所治猗爍 御碑以風在位宜爾子孫既固且安刻銘
 隧道奕禩不刊

右墓碑銘于敏中撰

劉文定公綸武進人少時家貧竄會至絕食嘗以竹煙筒乞煙草
 於鄰家鄰人謂曰煙草消食勿多吸也公笑受之後受知尹文端
 公首薦博學鴻詞張文和公喜其文穎銳既讀其詩至可能相對

語闕闕句曰真奇才也因擢第一後致位宰相 本朝漢閣臣不以科目進者惟公一人而已

右錄宗室昭榘撰

文定謙和恭謹以清修自勵少在尹文端公幕府得其指授繼以鴻博入翰林汪文端公愛其才兼重其度晚年尤與劉文正公相得余嘗以要事繕奏彙夜半詣公請閱公起爇燭操筆點定時仲冬寒甚公呼三公子具酒脯而廚傳已空僅有白棗十餘枚以侑酒公亦自歎儉陋爲可哂也

右湖海詩傳王昶撰

文定家本舊閩力學敦行以文詞受 高宗純皇帝知遇游歷執

政康熙己未制科五十人惟華亭王文恭公頊齡位至宰執而文
定亦以鴻博起家立朝風度端謹允堪媲美在政府十載明良
契合襄贊雍容遇事直陳無所依附與劉文正公同在相位尤稱
善品望亦相亞故時有南劉北劉中堂之稱後以艱歸里依然一
老諸生出入從不乘輿投戚友名柬未嘗作大字洵可謂搢紳居
鄉之法生平以清節自持歿後囊橐蕭然毫無貲產後人致賃屋
以居

右鶴徵後錄李富孫撰

余最喜宋魏野上寇萊公詩云有官居鼎鼐無地起樓臺夫萊公
以崛起爲宰執歷朝未久而云無地起樓臺世尚傳其清節今吾

鄉劉文定公官卿相者三十年其子今少司馬躍雲繼之父子服官於朝至七十年之久而家無一畝之宮半頃之地可謂清矣昨聞少司馬以年過七十予休歸里余憂其棲止無地也先寄以詩曰此福真難及君恩賜鑑湖乍看拋黻冕才敢憶純鱸卿相兩傳久田廬一寸無誰將去官日清節繪成圖孰謂古今不相及哉

右北江詩話洪亮吉撰

大學士劉文定公武進學廩生年二十六舉鴻詞科擢第一廷試五六天地之中合賦諸徵士不解所出多瞠目縮手公獨揮翰如飛桐城張文和公故睨公卷對眾朗吟始其得題解詩題山雞

舞鏡有句云似擬投林方戢戢可能對語便關關一時傳誦時吳郡沈歸愚宗伯亦以諸生赴召試未第頰首曰吾輩頭顱如許乃不如一白望後生得不媿死

右炙硯瑣談湯曾輅撰

武進劉文定公舉鴻博第一官至大學士而居食皆儉如寒素其雜詩有云朝來學舍升分餼贏一勺滿腹與之俱差解生事薄其儉有由來也故侯墓詩云見說經年牲酒闕兒孫破產奪祠官若以此爲殷鑒故公之子少司馬休歸時無可棲之地蓋奉公之儉德於勿衰也然百餘年來所見亦僅矣

右寄心齋詩話符棨森撰

劉文定公衡文嘗言佳卷多至溢額始難在取繼難在去較量進退每至夜分人勸節勞公曰卷之佳兄弟也一去取閒於我甚易獨不爲士子計乎嗚呼公用心之勤如此卽被棄者可無恨矣

右松軒隨筆張維屏撰

杭董浦太史詞科掌錄備載薦舉博學鴻詞諸人姓氏爵里而閱卷大臣姓名未見載入究不知是科閱卷爲何人後讀沈文愨公自訂年譜乃知閱卷者爲鄂文端爾秦張文和廷玉二相公少宰邵基

右松軒隨筆張維屏撰

雍正十一年 詔舉鴻博至乾隆元年合內外所舉凡二百七十

六人試授館職者十五人一等五名二等十名武進劉綸爲之冠
二年丁巳補試復得萬松齡等四人

禮部侍郎張廷璐舉三人劉綸劉鳴鶴陸桂馨

右詞科掌錄張維屏錄

國朝書獻類徵初編卷二十七目錄

宰輔二十七

于敏中

達爾黨阿

阿里衮

阿桂

補錄

阿桂

國朝耆獻類徵初編卷二十七

通奉大夫前署江西巡撫江西布政使司布政使湘陰李桓輯
宰輔二十七

于敏中

于敏中江蘇金壇人乾隆二年一甲一名進士授修撰八年充日
講起居注官九年二月遷左中允七月充山西鄉試正考官十二
月提督山東學政十一年遷侍講十二年九月典山東武鄉試十
一月調浙江學政十四年八月轉侍讀十一月奏言浙省生員游
幕在外欠三考者七十餘人請定限咨催回籍補考 諭曰朕前
降旨主員欠考至三次以外者皆行黜革但念該省士子逾限尙

係初次且有七十餘人之多伊等向來讀書入泮亦非容易若盡行除名情有可憫著加恩免其黜革勒限催回原籍補考一次若仍借端規避不赴考者卽行黜革十五年入直上書房十六年三月遷侍講學士九月充武會試副考官十七年九月轉侍讀學士十一月遷少詹事十八年二月遷詹事七月授內閣學士九月提督山東學政十九年擢兵部右侍郎二十年二月轉左七月充經筵講官二十一年丁本生父憂奏請歸宗持服二十二年六月起署刑部左侍郎十一月奏村莊道路設汛分防或以阻遠偷安或以偏隅生玩請令防兵晝則瞭望稽查夜則支更巡邏往來絡繹擊柝相聞俾征途倚以無虞姦宄望而斂迹并責成汛弁按季輪

巡統轄之副參遊都等員分年巡查下部議行二十三年五月以嗣父于枋在籍病故奏請回籍治喪二十四年正月御史朱嵇劾敏中兩次親喪蒙混爲一愬然赴任 諭曰于敏中守制回籍陳請歸宗原爲伊本身生母起見若非歸宗則於例不得受封此亦人子至情至回籍後復丁母憂伊聞命暫署刑部侍郎時未經具摺奏明此一節原未免啟人訾議但于敏中才力尙可造就刑部侍郎缺出一時未得其人是以降旨起用凡遇宴會不令預列此正與從前用蔣炳莊有蒸爲巡撫同一不得已之苦心而該御史輒以侍郎巡撫意爲區別豈外任封疆不妨從權而內任部務竟不必需人辦理耶閏六月授刑部左侍郎調戶部右侍郎二十五

年 命在軍機處行走充方略館副總裁二十六年二月充會試副考官十一月轉左侍郎仍兼錢法堂事充經筵講官二十七年命紫禁城內騎馬三十年擢戶部尙書七月充國史館副總裁九月 諭曰于敏中之子于齊賢屢應鄉試未能中式因念于敏中侍直內廷有年僅有一子年已及壯加恩照伊尙書品級賞給廕生三十三年加太子太保三十六年協辦大學士三十八年閏三月充四庫全書正總裁八月晉文華殿大學士兼戶部尙書九月充國史館三通館正總裁十一月 命在上書房爲總師傅兼翰林院掌院學士三十九年七月內監高雲從漏洩 硃批記載事覺詞連敏中曾向訊觀亮記載及伊買地受騙具控曾懇敏中

轉託蔣賜榮辦理等事 上親詰敏中敏中奏高雲從面求轉託
實無允從並以未能據實劾奏引罪 諭曰內廷諸臣內監等差
使交涉事所必有若一言及私情卽當據實奏聞朕方嘉其持正
重治若輩之罪又豈肯以語涉宦寺轉咎奏參者卽于敏中侍朕
左右有年豈尙不知朕之辦事而思爲此隱忍耶再高雲從供有
于敏中曾問及觀亮記載之語于敏中以大學士在軍機處行走
日蒙召對朕何所不言何至轉向內監探問消息卽自川省用兵
以來于敏中書旨查辦終始是其經手大功告竣在卽朕正欲加
恩優敘如大學士張廷玉之例給以世職乃事屬垂成而于敏中
適有此事實伊福澤有限不能受朕深恩于敏中甯不痛自愧悔

耶因有此事相抵于敏中著從寬免其治罪仍交部嚴加議處尋部議革職 詔從寬畱任四十一年正月金川平 諭曰大學士于敏中自辦理軍務以來承旨書諭夙夜殫心且能鉅細無遺較眾尤爲勞勩其前次過失尙可原恕著賞給一等輕車都尉以示格外恩眷著世襲罔替七月充文淵閣領閣事四十三年三月充會試正考官奏言同考官評閱硃卷向用藍筆近科改用紫筆紫與朱色近設改易點乙數字亦難辨別內簾書吏繕寫文移檔案並用紫筆尤覺非宜請仍舊例用藍筆 上從之四十四年十二月故 諭曰于敏中才練學優久直內廷小心謹慎自簡畀綸扉辦理平定金川軍務承旨書諭懋著勤勞因加恩列入功臣特予

世職以彰優眷恪恭匪懈倚任方殷前因其喘疾較甚諭令乞假
加意調攝卽派太醫院堂官前往診視並賜人淺俾資培益用冀
速痊復屢遣大臣存問昨聞病勢沈劇倍增塵念茲聞溘逝深爲
悼惜著加恩入祀賢良祠應得卹典該部察例具奏尋 賜祭葬
如例諡文襄四十五年六月敏中孫德裕訐堂叔時和挾制家產
擁貲回籍等事 上命大學士英廉嚴訊查辦並以時和先行回
籍或隱占敏中原籍貲產事 詔江蘇巡撫吳壇查辦嗣吳壇奏
時和吞占家產屬實請將時和發往伊犁充當苦差其所侵銀物
酌給德裕三萬餘兩餘畱充金壇開河費 允之復以蘇松糧道
章攀桂曾爲敏中覓匠修葺花園吳壇奏議革攀桂職發軍臺效

力 諭曰于敏中受朕深恩乃聽本省地方官逢迎爲之雇匠蓋房若在生前必當重治其罪今既完名而歿姑不深究以示朕終始保全之意至章攀桂逢迎鄉宦罔顧官箴卽發往軍臺亦所應得但尙未出貲幫助亦姑不深究章攀桂著革職免其發往軍臺四十七年 詔以敏中孫德裕承襲一等輕車都尉並加恩以主事用五十一年 諭曰朕因幾暇詠物有嘉靖年間器皿念及彼時嚴嵩專權煬蔽以致國是日非朝多稗政復取閱嚴嵩原傳見其勢燄薰灼賄賂公行甚至生殺予奪皆可潛竊威柄顛倒是非實爲前明奸佞之尤本朝家法相承紀綱整肅太阿從不下移本無大臣擅權之事卽原任大學士于敏中因任用日久恩眷稍

優外間無識之徒未免心存依附而于敏中亦遂時爲招引潛受苞苴然其時不過因軍機大臣中無老成更事之人而福康安又年輕未能歷練以致于敏中聲勢略張究之于敏中亦止於侍直樞廷承旨書諭不特非前朝嚴嵩可比實並不能如康熙年間明珠徐乾學高士奇等卽寵眷聲勢亦尙不及鄂爾泰張廷玉安能於朕前竊弄威福潰亂是非耶朕因于敏中在內廷供職尙屬勤慎且宣力年久是以於其身故仍加恩飾終並准入賢良祠以全終始迨四十六年甘肅捐監折收之事敗露王直望等侵欺貪黷罪不容誅因憶及此事前經舒赫德奏請停止而于敏中於朕前力言甘肅捐監應開部中旣免撥解之煩而閭閻又得糶販

之利實爲一舉兩得朕以其言尙屬有理是以准行詎知勒爾謹竟如木偶爲王直望所愚遂通同一氣肥橐殃民竟至釀成大案設非于敏中爲之主持勒爾謹豈敢遽行奏請卽王直望亦豈敢肆行無忌若此是于敏中擁有厚貲亦必係王直望等賄求酬謝種種弊混難逃朕之洞鑒此案發覺時設于敏中尙在朕必嚴加懲治雖不至如王直望等之立置重典亦不僅予以褫革而已也因其時于敏中先已身故不加深究曲示矜全但于敏中於此等營私舞弊朕不爲己甚不肖將其子孫治罪已屬格外恩施若賢良祠爲國家風勵有位昭示來茲盛典攸關豈可以不慎廉隅之人濫行列入朕久有此心茲因覽嚴嵩傳觸動鑑戒恐無知之入

將以嘉靖爲比朕不受也于敏中著撤出賢良祠以昭儆戒六十年五月諭曰昨國史館進呈于敏中列傳朕詳加披閱于敏中以大學士在軍機處上書房行走有年乃私向內監高雲從探問記載又於甘肅監糧一事伊爲之從中主持愆惡開捐以致釀成捏災冒賑鉅案因此案發覺時于敏中先已身故不加追究但于敏中簡任綸扉不自檢束既向宦寺交接復與外省官吏夤緣舞弊卽此二節實屬辜恩非大臣所應有使其身尙存必當從重治罪今雖已身故若仍令其濫邀世職又將何以示懲于敏中之孫于德裕見官直隸知府已屬格外恩施所有承襲輕車都尉世職著卽撤革以爲大臣營私玷職者戒

右 國史館本傳

自世祖時殷鑒前代宦官之禍乃立鐵牌於交泰殿以示內官不許干預政事 純皇待之尤嚴稍有不法必加箠楚又命內務府大臣監攝其事以法周官冢宰之制凡有預奏事者必改易其姓爲王以其姓眾多難分辨其用心周詳也若此有內監高雲從素與于相交善稍洩機務 上聞之大怒將高立置磔刑其嚴明也如此

乾隆初軍機大臣入參密勿出覽奏章無不屏除奔競廉直自矢如果毅公訥親其人雖谿刻不近人情而其門庭闐然可張羅雀其他人可知矣惟汪文端公由敦愛惜文才延接後進爲世所訾

議然所拔取者皆寒峻之士初無苞苴之議者于文襄敏中承其衣鉢入調金鼎初尙矯廉能以蒙 上眷繼則廣接外吏頗有簠簋不飭之議再當時傅文忠劉文正諸公相繼謝事秉鈞軸者惟公一人故風氣爲之一變其後和相繼之政府之事益壞皆由公一人作俑識者譏之然其才頗敏捷非人之所能及其初 御製詩文皆無煩定稟本 上朗誦後公爲之起草而無一字之誤後梁瑤峰入軍機 上命梁掌詩本而專委公以政事公遂不復畱心一日 上召公及梁入復誦 天章公目梁梁不省及出公待梁默膳久之不至問之梁茫然公曰吾以爲君之專司故老夫不復記憶今其事奈何梁公愧無以答公曰待老夫代公思之因默

坐斗室中刻餘錄出所差惟一二字耳梁拜服其得膺 天眷在
政府幾二十年而初無所譙責者有以哉

右錄宗室昭榘撰

達爾黨阿

達爾黨阿滿洲鑲黃旗人父阿靈阿任領侍衛內大臣理藩院尙書有傳乾隆二年達爾黨阿由三等侍衛襲其祖果毅公遏必隆所立一等子爵五年授鑲黃旗蒙古副都統六年調熱河副都統命御前行走九年擢奉天將軍十年督辦錦州隄工尋奏請每年春季統兵副都統赴旅順操演水師屆三年奉天將軍查驗一次部議如所請十三年四月授刑部尙書兼鑲藍旗滿洲都統尋遷吏部尙書十月以從弟訥親金川軍營獲罪請往效力 命隨經略大學士傅恆赴軍營授參贊大臣十四年凱旋敘功加太子少保十九年八月授黑龍江將軍九月從弟果毅公策楞北路軍

營獲罪革爵以達爾黨阿襲二十年正月 命率索倫巴爾呼兵
速赴北路軍營隨大軍勦準噶爾投參贊大臣在哨探兵隊前進
五月大軍定伊犁 上獎達爾黨阿奮勉令回京協辦大學士九
月 命仍赴北路軍營授定邊左副將軍偕參贊大臣哈達哈勦
叛賊阿睦爾撒納十月 命率兵一千赴西路軍營掌定邊右副
將軍印尋 諭曰據達爾黨阿等奏稱聞西路大兵於明歲草萌
時再行進發此奏甚屬錯謬昨命達爾黨阿領兵前往西路哈達
哈爾駐北路達爾黨阿至西路時一切會同商酌速奏膚功方合
機宜見在冬令進兵較難人人所知然愈遲緩則賊愈固辦理更
費周章所謂兵貴神速者此也將軍大臣等儻因難退縮何以鼓

士氣而振戎行達爾黨阿等所奏朕因北路已停進兵是以不行深究若伊西路時亦出此言必至搖撼軍心所關非細決不姑貸十一月改參贊大臣二十一年正月以索倫兵八百赴珠爾都斯迎定邊右副將軍薩喇爾 命駐特納格爾辦事二月奏言薩喇爾已抵吐魯番臣與台吉噶爾藏多爾濟等卽赴西爾哈阿濟爾罕約會進剿 詔獎經理合宜尋以兵千赴安集哈雅偵緝阿巴噶斯賊眾四月阿睦爾撒納竄哈薩克 諭曰將軍策楞等擒擊阿睦爾撒納事事舛謬全無籌畫今西路專任達爾黨阿北路專任哈達哈伊二人尙屬勇往著卽領兵前赴哈薩克務期擒獻五月授定邊右副將軍時策楞借口糧乏駐登努勒臺且令達爾黨

阿撤兵還駐達爾黨阿以兵已前進糧又充裕不聽事 聞奉

旨嘉獎革策楞職卽以達爾黨阿爲定西將軍並 諭詳察形勢

併力擒剿八月達爾黨阿統大軍至雅爾拉偵哈薩克二千餘賊
伏山谷中誘之出奮勇督擊斬五百七十餘級生擒十一人復追
至努喇慶戰斬三百四十餘級生擒十人阿睦爾撒納易服遁九
月捷 聞 賜雙眼花翎哈達哈尋亦奏捷奉 旨嘉獎是時達

爾黨阿等縱被擒之楚魯克昭華什還諭其汗阿布賚縛獻阿睦
爾撒納而楚魯克等詭爲阿睦爾撒納乞命請寬限達爾黨阿信
之按兵待阿睦爾撒納得脫走閏九月 諭曰阿睦爾撒納背叛
策楞玉保帶兵追緝坐失事機經朕飭催西北兩路之兵始克稍

振軍聲哈薩克汗阿布賚等望風奔潰阿睦爾撒納易服潛逃然
所獲之楚魯克等兩次縱回傳諭擒獻卒以限期相誑達爾黨阿
等遲迴觀望爲其所愚逾月之久賊蹤愈遠朕早已料及是以八
月望前卽降旨令其班師乃達爾黨阿等於前奉到此旨之先奏
請暫回哈薩拉克地方過冬俟明春再進此不過強爲之詞耳事
斷難行仍諭令遵照前旨撤回又 諭曰前因達爾黨阿哈達哈
效力軍前尙知奮勉加恩賞給雙眼翎以示鼓勵乃西北兩路大
員會合一處反彼此推諉各存意見殊負委任朕念伊等遠行勞
苦不卽從重治其罪然亦無功可錄所賞雙眼翎著一並繳還不
准戴用十月 命達爾黨阿來京十一月 諭曰達爾黨阿等前

遺哈薩克楚魯克昭華什等往諭阿布賚而雷阿喇勒拜杭吉勒
圖於軍營爲質乃不加意防範致阿喇勒拜等先後脫逃續經拏
獲杭吉勒圖又不卽行正法仍復疏縱著交部嚴議二十二年二
月詔革公爵及都統降爲副都統以其從弟阿里袞襲公爵八月
諭曰去歲擒勦逆賊阿睦爾撒納進兵至哈薩克西路以達爾
黨阿爲將軍北路以哈達哈爲將軍旣未能擒獲阿睦爾撒納又
致阿布賚脫逃本應治罪朕意伊等未必有心僨事不過爲賊所
愚路遠遲誤之所致是以從寬免其處分後經詢問在軍營之侍
衛官員則咸稱達爾黨阿追阿睦爾撒納相距近一二里逆賊不
及馱載反遣人託爲哈薩克本欲擒獻阿睦爾撒納惟待其汗阿

布賚至卽便送來達爾黨阿墮其計中專候擒獻並不督兵勦捕且下令不許眾兵前進直至逆賊捆載脫逃後方遣兵追逐哈達哈則路遇阿布賚既經後隊官兵呈報並不勒兵追捕至阿布賚逃去始尾追一次以塞其責眾奏僉同是達爾黨阿哈達哈之怠玩愒事顯然可見因將伊等公爵革去降秩示譴今訊問擊獲阿逆之姪達什策零等供稱阿睦爾撒納於去歲九月下旬自敗走地方潛回又據尼瑪供稱去歲大兵追及阿睦爾撒納我催促進勦將軍等候阿布賚擒獻以致脫逃再阿布賚對面安營我兵亦並不迎敵直至逃去始行追逐旋卽撤兵等語與侍衛等所奏昭合觀此則伊二人不能用朕奮勇之官兵且爲逆賊等所輕視矣

達爾黨阿哈達哈俱勳舊子孫受恩襲爵乃身爲將軍專任討賊而因循觀望坐失事機若此實出情理之外且去歲撤兵時伊等奏稱我兵距逆賊逃竄之地速行亦需月餘今於九月初撤兵自葉什勒椿集行五十餘日至巴顏鄂拉南之哈薩拉克地方等語今據達什策零等所供阿睦爾撒納聞大兵旣撤於九月下旬回至葉什勒椿集行三十餘日巴顏鄂拉又十五日抵哈薩拉克東之額布根塔爾琿地方共五十餘日等語設果如伊等所奏月餘程途則阿逆復回亦必須兩三月且逆賊必確知撤兵之信方敢起程果與我兵相去月餘往返探聽又三四月矣乃我兵則於九月初撤回行五十餘日始至哈薩拉克而逆賊則自九月盡起程

至額布根塔爾琿亦祇五十餘日何以如此之速耶則其被賊所欺愈爲顯著觀阿逆今春卽到額林喀畢爾噶此卽伊等因循推諉之明證也況今歲阿布賚遇我兵三十餘人一戰卽降則去歲若稍肯奮勉阿布賚早已投誠將逆賊擒獻矣又伊等擁兵觀望之明證也再兩路官兵會合後自應連爲一體乃伊等竟於相見之次日卽分營行走第三日卽議及撤兵有是理乎伊等卽協力追勦尙未知獲賊與否況復自分彼此安能集事且如逆賊免脫時伊等俱係將軍若肯親行豈不勝於參贊大臣乃伊二人並不前往止遣阿里衮一人領兵追逐不知將軍所司何事達爾黨阿哈達哈如此種種貽誤若不加罪譴則國家之賞罰何在本當以

軍法從事但達爾黨阿本一糊塗無能之人爲賊所愚而哈達哈
每圖安逸遇事因循尙非出於有心且係勳舊子孫似此坐失機
宜玷辱滿洲更何顏覲列班聯達爾黨阿哈達哈俱著革職發往
熱河披甲效力二十三年十月 詔宥前罪授三等侍衛十二月
率西安駐防兵千赴軍營二十四年正月搜捕沙喇斯瑪呼斯逸
賊二月大軍剿回酋霍集占 上以達爾黨阿及哈達哈歷練
諭由巴里坤送馬至阿克蘇八月定邊右副將軍富德等大敗霍
集占於阿爾楚爾及伊西洱庫爾淖爾達爾黨阿均在事有功
詔授二等侍衛二十五年二月卒於軍營

右 國史館本傳

阿睦爾撒納叛走哈薩克誘煽其汗阿布賚將軍達爾黨阿哈達哈兩路進討阿布賚遣和集博爾根以四千騎從阿逆走魯臘而自率千餘騎西行會於毫阿臘克山下以待七月將軍達爾黨阿兵遇和集前隊二千於雅爾臘山勁騎突其中堅破其伏賊潰斬六百級擒其渠楚魯克又擊和集後隊二千騎於西路陷陣獲其纛斃斬三百級而北路軍亦敗阿布賚於毫沙臘克山下斬二百級獲其渠帥昭華什三戰三捷遂抵伊什河河者阿布賚庭帳也乃遣所獲二渠帥歸諭使擒阿逆而阿逆已遠竄

右記魏源撰

日本書紀卷之二十一

三

阿里衮

阿里衮滿洲鑲黃旗人姓鈕祜祿父音德官領侍衛內大臣諡愨敬有傳乾隆二年阿里衮由二等侍衛授總管內務府大臣四年八月授鑲紅旗滿洲副都統十二月授兵部侍郎五年六月左都御史陳世倌疏劾山東巡撫碩色奏報沂州歉收分數失實 諭阿里衮偕僉都御史朱必堦詳勘疏言沂州府屬之蘭山郯城二縣俱被水患蟲傷而水災尤甚地方官將被水稍輕者議以勘不成災最重者止報五六分照例蠲免十分之一見在應徵錢糧窮黎實難措辦請將上年帶徵錢糧緩至後兩年完納其勘不成災者亦緩至次年徵收民借社倉穀石向例秋後還倉不必催追動

帑買補災民出境鄰省設法養贍咨送回籍冬月加意撫綏所賣
子女力能取贖買主不許勒指下部議行十月調戶部侍郎十一
月署兩江總督楊超曾劾江西巡撫岳濬與知府董文煒劉永錫
徇情納賄 命同江南河道總督高斌鞫實濬坐革職餘論如律
六年七月兼管武備院事十月疏言盛京內務府三佐領下未入
旗檔者六七千丁請冊報內務府存案嗣後比丁年卽照納差之
三千八百餘名添差則差輕易納無隱漏弊奏入如所請時戶部
侍郎梁詩正奏八旗兵丁分置邊屯事 命同大學士查郎阿往
奉天一帶相度地勢再行定議尋合疏言甯古塔將軍所屬吉林
烏拉之東北拉林阿爾楚克及阿爾楚哈之東飛克圖等處平曠

沃壤五穀皆宜江繞於外河貫於中山木取資不盡黑龍江將軍所屬齊齊哈爾之東南呼蘭地方地脈深厚五穀皆宜江河圍繞山場樹木俱便又吉林烏拉之西南黑爾蘇站周圍至一統河地脈肥饒五穀皆宜河流貫注林木尙足採取吉林烏拉之西南刷煙站及白都納之東八家子至登額爾者庫五穀皆宜材木稍覺不便黑龍江將軍所屬呼蘭之東佛忒喜素素地方材木豐裕江河通繞但地勢高下各異其不宜屯墾者黑龍江將軍所屬墨爾根黑龍江地寒暑旱齊齊哈爾沙磧地多零星不成片落甯古塔將軍所屬吉林烏拉地方旗民耕種餘地無多三省地方山多地窄霜雪早深甯古塔地重山圍繞其東烏蘇里隨分陽春一帶係

國朝通志 卷二十一
產淺之所俱不便移駐七年五月議政王大臣議以拉林阿爾楚哈去船廠甚近地肥饒廣潤五穀皆宜最爲膏腴之地請先移駐滿兵一千名屯墾種地將來著有成效由近及遠漸次舉行 上如所請七月兼管奉宸苑事八年四月湖南巡撫許容劾糧道謝濟世狂縱各款總督孫嘉淦請革濟世職御史胡定以許容挾私誣陷入奏 上命阿里衮會鞫得容冤誣鍛鍊嘉淦瞻徇扶同狀復濟世職容論罪嘉淦革職 命阿里衮署湖南巡撫六月調署河南巡撫十月授山西巡撫十一月河東鹽政吉慶奏山西民間買田有擇地勒配輕糧弊 敕阿里衮妥議因言晉省富民乘貧民之急田取其上賦納其下遂至賠糧無已嗣後將地畝數目田

則糧額詳書契紙赴縣查驗覈其賦之上下輕重與實徵紅簿無
差者聽其過割從前田糧有避重就輕者限二年內自首更正照
則收糧免究二年後別經發覺按數計贓以枉法論田地入官賣
主並知情不舉之中間人等照例杖懲庶富民知做貧民無累
詔悉心妥協爲之十二年調山東巡撫十三年閏七月仍調山西
蒲州府民與陝西朝邑縣民以爭黃河雞心灘地互控 詔偕陝
西巡撫陳宏謀會勘阿里衮疏言雞心灘介秦晉閒本屬官地墾
種者晉省居多秦省較少請將灘中熟地並未種之灘灘地以六
分給晉民四分給秦民耕種 從之十五年擢湖廣總督先是總
督永興布政使嚴瑞龍疏參巡撫唐綏祖巧詐營私累商肥橐各

款十六年四月 命阿里衮同河南巡撫鄂容安會鞠尋奏綏祖
無贓款惟縱容鑪頭私買銅鉛添鑄屬實部議革職議上 諭曰
嚴瑞龍駕詞誣捏永興率入彈章自應分別反坐唐綏祖家產著
給還來京候旨九月調兩廣總督十八年二月廣東東莞縣莫信
豐等黨同逆首王亮臣糾黨散剗謀居蘭蕙山爲不軌事覺阿里
衮馳赴增城搜捕逆匪二百七十餘凌遲正法如律 上嘉之下
部議敘旋丁母憂回京九月補戶部侍郎十月兼管工部事務十
九年授步軍統領二十年正月署刑部尙書六月署工部尙書補
鑲白旗漢軍都統十月授戶部尙書二十一年五月 命爲領隊
大臣赴西路軍營九月定西將軍達爾黨阿率師至雅爾拉賊迎

拒阿里衮等領左右翼兵陣斬五百七十餘擒十一人追至努喇復遇賊二千餘奮勇鏖戰擒宰桑扎南布戮賊三百四十餘上嘉之尋 召回京二十二年正月 命爲領隊大臣辦巴里坤事二月從兄達爾黨阿軍營獲罪 詔以阿里衮襲果毅公爵 諭曰逆賊阿睦爾撒納及阿布賚逃竄達爾黨阿帶領西路官兵追捕相距里許爲人所紿以致遠遁同事諸臣無所辭其咎阿里衮著降補戶部侍郎六月授正白旗蒙古副都統九月沙拉斯嗎呼斯等游牧復叛掠臺站阿里衮帶兵二百前往同都統滿福進剿由阿斯罕布拉克和什特克取道至哈喇沙爾搜剿山僻賊眾進抵塔本順和爾納木噶獲男婦二百餘口 諭曰前因阿里衮進

兵遲延交部議處經部議革職朕諭以且觀後效今既自知罪愆奮勉行走著加恩免其革職十二月滿福爲叛賊郭多克哈什哈車凌等誘害沙拉斯嗎呼斯游牧逃庫車等處阿里袞遣熟識路徑之人取近堵截師次哈喇沙爾西南庫爾勒二十三年正月疏報沙拉斯嗎呼斯賊由呼爾塔克山逸至羅卜淖爾我兵往剿路擒嗎呼斯得木齊額默根等二月 詔阿里袞所帶兵丁歸雅爾哈善隊 諭曰前閱阿里袞所奏伊等追剿沙拉斯嗎呼斯等賊向呼爾塔克山前往嗣素賚瑪報稱阿里袞已回俟剿殺藏匿之瑪哈沁等即可撤兵伊等如果因馬匹口糧不足不妨奏明撤回既稱向前追剿而究未得賊人蹤跡不過於中途遷延行走卽謂

爲追襲巧詞飾說可乎四月阿里衮自魯克察赴巴里坤 上以
阿里衮辦理沙拉斯嗎呼斯賊未能奮勉 詔革侍郎仍以副都
統革職畱任五月奏巴里坤種地人犯分屯築堡酌量安插 上
以阿里衮不諳事體申諭之八月疏奏雅爾哈善永貴等議於哈
喇沙爾托克三闕展烏魯木齊等處屯兵三千六百名外增二千
四百名酌於收穫後分駐哈密巴里坤又哈密所設卡倫兵請酌
裁調往屯田查黃廷桂奏有哈密夾山路徑可至吐魯番而巴里
坤糧餉均由哈密運送請將撤回屯兵俱駐哈密以節運費再哈
密駐兵二千所設卡倫七十三除塔勒納沁等三十二卡倫仍須
安設其一顆樹等三十九卡倫均可撤又聽差各兵內亦可裁減

抽調六百名遣往屯田軍機大臣議如所請時將軍兆惠領兵薄葉爾羌城以四百餘人渡黑水衝勦小和卓木霍集占賊眾二萬餘道遠馬乏堅壁固守三閱月先是 上命選馬三千餘濟軍以阿里衮爲參贊大臣自哈密進發尋遷吏部侍郎十二月擢兵部尙書正紅旗蒙古都統二十四年正月副將軍富德統兵至呼爾璊遇賊騎五千轉戰五日四夜會阿里衮督解馬亦至乘夜分翼斫陣賊潰戮千餘人餘悉負創遁逆酋大和卓木布喇哈尼敦脇中槍我兵復進屢敗賊眾將軍兆惠全軍出 諭曰阿里衮前雖未著成勞今送馬濟軍如期集事且會同勦賊朕心深爲獎許著賞給雲騎尉世職七月逆賊霍集占逃阿爾楚爾阿里衮偕參贊

大臣明瑞阿桂等衝擊賊大潰八月阿里衮等領兵五百駐伊西
勒庫爾淖爾西堵截拔達克山要隘復分兵守淖爾南賊據淖爾
北阿里衮等攻奪其家屬輜重逆回二千餘乞降復選兵二百踰
嶺追勦逸賊九月 命以參贊大臣爾葉爾羌辦事十月 賞戴
雙眼花翎二十五年四月 命回京 賜紫禁城內騎馬阿里衮
行次雅木札爾聞賊掠臺站圍城堡卽回喀什哈爾時伯克邁喇
木妄稱阿睦爾撒納已取阿克蘇糾賊千餘由伯什克勒木來犯
阿里衮率兵力戰賊入城堅守復以槍礮攻圍邁喇木夜遁牌租
阿巴特阿里衮追及之於利羅木魯克擒邁喇木及呢雅斯 諭
曰阿里衮聞賊回搶掠臺站卽回喀什哈爾擊敗賊眾撫定回人

應機立辨阿里衮著交部議敘伊子拜唐阿豐昇額著授爲藍翎侍衛又諭曰阿里衮奏倡亂回人邁喇木呢雅斯等俱已擒獲此次辦理迅速甚屬可嘉伊子豐昇額著加恩授爲三等侍衛次子倭輿額著授爲藍翎侍衛十月授領侍衛內大臣命圖形紫光閣御製贊曰富德入援次呼爾璊趨行戈壁馬不進焉以馬濟軍敵營夜襲同事建績曰鄂博什二十六年十一月署禮部尙書十二月充經筵講官二十七年命爲御前大臣兼上駟院卿二十八年兼管滿洲火器營大臣六月署陝西巡撫十月加太子太保二十九年授戶部尙書協辦大學士三十年兼管禮部事務三十三年正月授參贊大臣往雲南軍營三月署雲貴總督尋授

副將軍駐永昌七月疏言緬酋向來恭順內地人往來貿易以資其用今擾我土司抗我大兵則中華一切貨物不許絲毫透漏永昌普洱一帶千餘里山路叢雜恐潛行偷越嗣後奸民販貨出口拏獲卽行正法隘口兵丁得財賣放罪亦如之疏防照例治罪失察文武官弁查明參革 上是之又疏奏雲南省城距永昌千餘里山嶺陡險過兵運糧崎嶇難行是以撥糧二十五萬石到永者僅一萬三千石請將藩庫報銷閒款項內動支二三萬兩修理道路糧運庶免遲誤文報亦不稽延 敕速行妥辦八月又言沿邊土司地廣民稀往往年歲豐收賣與內地商販經緬匪蹂躪夷散田蕪蒙 恩調駐重兵夷民俱已復業請於今冬借給銀兩購買

科種牛具普行耕種秋成按照時價交米還項不敷兵糧卽在名
土司地方採買以省內地輓運之費官兵裹帶之勞得 旨嘉獎
九月阿里衮會雲南巡撫明德奏滇省銅廠向例糧道專管遇有
奏銷布政司雖會銜無稽查之責糧道駐省城銅廠三十餘處近
者數百里遠者千餘里耳目難周查本地道府州縣鄉保是其管
轄山廠設有透漏卽可調撥兵役拏究至金銀鉛廠二十九處係
布政司兼管本地道府無稽查之責請將銅鉛金銀各廠係州縣
管理者責成州縣專管本府稽查係府廳管理者責成本府專管
道府稽查係府道管理者責成本道專管各廠事務統歸布政使
總理報銷至糧道不管銅廠止辦兵糧事務太簡驛鹽道繁請將

驛鹽道所管之雲南武定二府改歸糧道管理如所議行三十四年二月以軍營馬匹疲瘦 諭責阿里衮不能殫心籌畫交部嚴議應革職 詔畱任五月疏奏騰越沿邊一帶緬匪闖入遮放隴川猛卯及戶臘撒等處臣選熟習擺夷言語兵弁令向沿邊土司偵拏既可使內地情形不致透漏並可詰緬匪往來作何防備奉旨如此畱心更有何可諭六月疏奏黔省換補習舟楫兵撥補赴滇可得數百水師之用九月偕經略大學士傅恆合疏言猛拱土司渾覺等來降令趕辦牛馬糧米接濟軍營並以猛拱人與堂札爲嚮導進攻阿瓦渾覺獻象牙牛隻等物並採買早稻運送軍營 上嘉之四月師至蠻暮十月至新街時傅恆偕副將軍阿桂

領兵新街東岸賊三千餘船百餘迎拒阿里衮同伊勒圖據夏鳩
江西岸派滿洲吉林綠營兵七百餘進剿賊寨藏百餘人我兵奮
勇衝入賊遁又一寨藏賊三四百貴州把總姚卓殺賊一奪旗一
我兵鼓勇進剿賊棄壘逃賊踞寨者復五百人我兵放槍追擊賊
堅壁不出日暮不能固守潛逃擊斃二十餘人奪寨三殺賊五十
餘諭曰初次接仗卽能如此獲勝覽奏甚爲欣慰十二月以疾
卒於軍諭曰尙書果毅公阿里衮久侍禁廷敷歷中外公誠恪
慎宣力有年前此平定西陲懋著勞績曾經圖像策勳是以征緬
之役特命前往滇南俾膺副將軍之任去歲因其身患瘡疾遙遣
御醫馳視並賜藥餌調攝旋卽得痊而精神未能全復朕心方爲

廛念昨自夏鳩進次猛拱所至頗稱勞瘁及在新街分兵勦賊奮
勇奪壘純盡足嘉乃因體弱邁疾猶統舟師前進正冀其速愈以
副委任遽聞溘逝深爲軫惻所有應得卹典該部察例具奏禮部
議上 賜祭葬如例 命入祀賢良祠諡襄壯三十五年 諭曰
尚書果毅公阿里袞宣力殫忱克彰勞勩昨歲賜卹時曾令人祀
賢良祠今思其先世額亦都遏必隆並以崇勳建有宗祠得膺祀
典阿里袞亦應附入邀榮而其父領侍衛內大臣音德尙未列入
著與阿里袞一併入遏必隆宗祠用獎勵盡該部卽照例行四十
四年 御製懷舊詩列五功臣中 詩曰昨歲秋之仲盛京謁
陵園三大功臣墓陪葬其間存茲阿里袞者額都四世孫勇豈匹

其祖忠實一例肫兆惠阻黑水回眾如蜂屯爾時舒赫德統兵速
入援又被狂狙阻進退至兩難適值阿里衮送馬繼進遊率兵亦
弗多乘夜賊營掀賊駭自天降鹿瑤羣逃奔西軍俱歸善重進鴻
功全後復往征緬受瘴惜隕身一再忘軀勞思之輒淚捫幸而子
善繼金川建殊勳凱旋以病終悲惜何忍言阿里衮子四長豐昇
額官戶部尚書襲果毅公以軍功加繼勇號自有傳次倭興額官
雲麾使次色克精額襲雲騎尉次布彥達賚襲兄豐昇額子爵見
任鑲紅旗滿洲副都統

右 國史館本傳

阿桂

阿桂正藍旗滿洲人章佳氏大學士阿克敦之子由廕生任大理寺寺丞乾隆三年中式舉人四年六月補兵部主事五年六月升員外郎八年三月升郎中軍機處行走六月調戶部顏料庫郎中十年二月調銀庫郎中十一年六月以失察庫項被竊降調七月補吏部員外郎十三年正月隨兵部尚書班第赴金川軍營辦事是年冬經略訥親總督張廣泗坐貽誤軍務獲罪提督岳鍾琪劾阿桂勾結張廣泗朦蔽訥親奉 旨逮問十四年六月 諭曰阿桂年少無知自干罪戾固應按律重懲但其獲罪之處與貽誤軍務者有閒伊父阿克敦辦事勤勉高年僅有此子著加恩釋放十

五年四月授吏部員外郎十六年十月仍在軍機處行走十七年正月升郎中十一月升江西按察使十八年三月授內閣侍讀學士二十年四月擢內閣學士是時大兵征準噶爾六月命赴烏里雅蘇臺辦理臺站二十一年丁父憂回旗六月署鑲藍旗滿洲副都統七月諭曰青滾雜卜遣人至烏里雅蘇臺煽惑喀爾喀等著舒明會同親王成衮札布德沁札布等相機查辦再著阿桂速赴軍營協同辦理九月授參贊大臣十二月以北路軍務大臣應分駐地方辦事命阿桂駐科布多是月補鑲紅旗蒙古副都統二十二年正月命仍畱烏里雅蘇臺辦事八月授工部侍郎十月命仍赴科布多辦事二十三年三月上以定邊將軍兆

惠奏輝特賊人舍楞將入鄂羅斯 命阿桂行知領兵大臣和碩
齊唐喀祿畱意截擒五月奏舍楞遣人約降和碩齊唐喀祿領兵
往會爲賊掩襲見已領兵前往策應 諭曰阿桂聞我兵爲舍楞
所誘卽領兵策應甚屬奮勉著賞戴花翎逆人狡詐如此傳諭策
布登札布乘其未入鄂羅斯境領兵速進與阿桂合力攻擊六月
奏臣詢問舍楞處逃出之額魯特額勒椿謂舍楞不能入鄂羅斯
將由哈薩克逃往土爾扈特或不達恐復回準噶爾當卽派兵
在彼守候採取實信若已入哈薩克卽帶兵索取候其擒送 上
以阿桂觀望遲延嚴飭之七月 諭阿桂不必回科布多卽來京
請訓十月回京十一月 命仍赴西路與副將軍富德合兵追剿

準夷餘孽二十四年五月 命往霍斯庫魯克同副將軍富德勦
辦逆回霍集占八月追賊至阿勒楚爾又追至伊西洱庫爾諾爾
回眾乞降收獲賊眾萬二千人軍器二千餘件駝馬牛羊無數霍
集占遁走拔達克山是年回部悉平九月 上以阿克蘇新附爲
回城要地 命阿桂駐紮辦事十月奏查看阿克蘇牧羣牛羊除
解往葉爾羌外請將見存牛羊爲伊犁駐防兵來年行糧之需已
令該管官加意牧放以濟軍需十一月奏將軍兆惠經過阿克蘇
會議伊犁駐兵及遷移回人屯田事宜 諭曰屯田回人需兵彈
壓自阿克蘇至伊犁安臺傳事聲息相通最關緊要阿桂卽領駐
防兵丁護送回人往伊犁管理屯田事務二十五年二月 諭曰

據阿桂奏伊犁所派屯田及阿克蘇調兵兼辦嗎哈沁各事宜甚屬勇往可嘉此時自以屯田爲要務阿桂著專辦耕作營造諸事務使兵丁回人樂於從事三月 諭曰阿桂奏伊犁河以南有地名海努克水土沃衍請於此處先行屯種所辦甚是果能實心奮勉則屯田一事當錄伊經始之功也七月加都統銜九月奏籌辦伊犁耕牧城守各事宜一增派回人屯田一增派官兵駐防協同耕種一增派官兵隨時酌量定數一次第建置城邑一預備屯田官兵馬駝又奏請定伊犁山川土穀諸祀典俱得 旨允行十一月奏伊犁土田沃衍來年復添回人兵丁屯種收穫益豐軍實既足可無庸阿克蘇接濟報 聞并給優敘是年以西陲底定圖像

紫光閣 御製贊曰阿克敦子性頗捷敏力請從戎宜哉惟允身
不勝衣心可干城楚才繼出爲國之楨二十六年四月奏伊犁牧
羣蕃息請停止內地購辦又奏招徠葉爾羌喀什噶爾阿克蘇烏
什等處回人添駐伊犁耕種屢奉 優旨嘉獎授內大臣六月
御書詩扇賜之 詩曰典屬今時班定遠冠軍昔日霍票姚雪塗
無藉持清暑欲扇仁風萬里遙七月授工部尚書議政處行走兼
鑲藍旗漢軍都統仍留伊犁是月奏伊犁烏魯木齊之間有瑪斯
納庫爾喀喇烏蘇晶河三處請各酌派屯田兵人各墾地十五畝
晶河以西歸伊犁管轄托克多以東歸烏魯木齊管轄下軍機議
行二十七年正月疏定約束章程一甲缺宜均齊一錢糧宜畫一

一員缺宜變通一產業宜均分一家口宜量給養贍四月奏葉爾羌等城回人續請移駐伊犁者二百四十戶其年力強壯者給籽牛令往屯田老弱者交伯克養贍幼者長成補屯田之缺並請於霍濟格巴克海努克分屯安插六月疏請建關帝廟以原任將軍班第參贊大臣鄂容安竭忠全節請於廟後設位附祀十月予騎都尉世職二十八年正月回京命軍機處行走賜紫禁城騎馬五月上幸避暑山莊命畱京辦事六月充經筵講官諭曰阿桂在軍營殊爲出力且在伊犁辦事亦甚妥協著加恩擢入上三旗嗣是隸正白旗七月調正紅旗滿洲都統十月加太子太保二十九年三月署伊犁將軍尋調署四川總督時金川酋

郎卡與綽斯甲布等九土司構釁阿桂巡邊至雜谷腦查閱營伍體察番情盡得郎卡狡獪怙惡狀並悉其山川形勢奏入 上嘉之又奏松茂道有彈壓諸番之責請加兵備銜自松潘各營都司以下均聽節制十二月回京任工部尚書三十年正月 上南巡

命畱京辦事閏二月烏什逆回賴和木圖拉作亂 命赴伊犁辦事三月 命馳至烏什與將軍明瑞協力攻城五月賊出劫營我兵擊敗之賴逆中箭死眾伯克復推額色木拉圖爲首以抗我師六月阿桂設伏督將弁往來衝擊賊據城死守我兵持雲梯登城亦不克賊糧盡計窮屢有密約出降者賊渠悉囚之八月賊內訌有沙布勒等擒額色木拉圖以獻烏什平奏至 上以阿桂等

勦辦遲延示怯損威獲犯後又未確訊起釁緣由草率錯謬交部
嚴議尋議革職 命從寬畱任十一月 命駐雅爾城十二月
上以阿桂辦理烏什事務毫無章程革尚書任三十一年五月
上以伊犁生齒日繁籌辦安置事宜須有準則可垂永久 命阿
桂回伊犁與明瑞協同辦事七月奏雅爾城距牧場遙遠近城地
畝不敷耕種查有楚呼楚地方田土膏腴形勝亦便請移雅爾城
於楚呼楚 從之三十二年二月授伊犁將軍九月奏雅爾地方
未設驛站請由楚呼楚至烏爾圖布拉克地方設臺三座下軍機
議行三十三年二月授副將軍 命偕經略大學士傅恆副將軍
阿里衮進勦緬甸四月授兵部尚書六月授雲貴總督三十四年

罷總督任以副將軍專辦軍務尋授正白旗領侍衛內大臣八月
諭曰阿里衮阿桂進兵野牛壩阿桂見事較爲敏捷所有諸事
主見決斷朕皆責成阿桂當竭力抒誠妥協爲之九月大兵收服
猛拱阿桂進滾弄奏言俟經略傅恆到時卽進攻老官屯十月奏
軍營糧不敷食用 諭設法辦理毋再坐待內運又 諭曰阿桂
請事畏怯此次進攻猛密豈伊一人所能勝任著革去副將軍授
爲參贊大臣十一月以阿里衮病故仍授阿桂副將軍尋奏傅恆
染瘴見患腹泄 上以老官屯水土惡劣官兵不耐瘴癘 命傅
恆回京畱阿桂籌辦撤兵事宜是月緬酋遣頭目齎書詣軍營投
誠奏入 諭曰情駁乞降如果願爲臣僕納貢輸誠則緬地皆我

版籍貿易無妨相通儻僅求撤兵未請納貢通商斷不可行十二月授禮部尚書三十五年 上以緬酋奉表納貢久未至情僞殊不可信屢 飭阿桂整備邊防事宜時木邦蠻暮土司及孟連土目等慮爲緬夷所害求安置內地阿桂疏言永昌大理蒙化地方有舊存馬廠官莊田可以撥給請附近安插 從之二月兼授鑲紅旗漢軍都統三月阿桂遣都司蘇爾相齎檄至老官屯交緬夷頭目諾爾塔轉遞阿瓦緬人拘留之并給回文請還木邦等三土司 上以阿桂等遣使失當又撤兵時辦理恩遽爲敵所輕革退其子阿迪斯阿彌達官阿桂交部議處六月奏請派兵三千分駐隴川遮放至冬襲取猛密 諭曰此次進兵意在懲創使之警懾

國威非利其土地宜相機行之八月部議上 諭曰阿桂辦理軍務一味取巧屢加寬宥此次部議革任難以再爲曲貸所有領侍衛內大臣禮部尚書鑲紅旗漢軍都統俱著革去以內大臣畱辦副將軍事務令其自效三十六年二月奏緬匪狡猾已極應於今年大舉進剿請入 覲面陳機密 上詰責之阿桂復以籌備軍糧各條臚奏 上以大舉斷不可行又復飾詞瀆告令革任仍畱軍營效力九月 命隨副將軍尚書溫福赴四川效用先是一年金川酋郎卡故其子索諾木夜襲革布什咱土司據其寨落而小金川酋澤旺之子僧格桑亦與鄂克什構釁并侵擾明正土司四川總督阿爾泰調兵進剿至是 上以阿爾泰辦理年餘不能剋

期歲事宜集大兵分路擊之故有是 命十二月 命署四川提督攻克巴朗拉達木巴宗各寨三十七年二月攻克資哩山進克阿喀木雅會松潘鎮總兵宋元俊亦收復革布什咱兩金川勢日蹙於是合謀以抗大兵 上以兩酋同惡相濟罪在必誅 命溫福等三路進兵阿桂自西路阿克木雅進攻喇卜楚克之又攻奪普爾瑪寨進逼美美卡小金川酋澤旺遣人詣軍營以伊子僧格桑獲罪 天朝不敢親來先遣人謝罪而金川酋索諾木亦遣人投稟願爲小金川與鄂克什講和令僧格桑退還鄂克什侵地令澤旺率其子僧格桑詣營請罪奏入 諭曰金川酋狡詐百出今雖力竭計窮願求免死能保其永不復反乎宜一併擒獲兩金川

地方全行平定以靖邊徼是月授參贊大臣四月諭曰頃令豐昇額往阿桂處協同攻剿伊係御前大臣領侍衛內大臣尚書奏事列名應在阿桂前但阿桂歷練軍務著阿桂列名在前豐昇額不可稍存意見致有掣肘阿桂亦須和衷辦理期於軍事有益五月總督桂林在墨壘溝失利革職逮問命阿桂馳赴南路接剿六月抵卡了軍營奏西路軍營以鄂克什爲正路而曾頭溝爲協剿之師南路軍營以卡了爲正路而綽斯甲布革布什咱爲協剿之師今卡了一路再得多兵擣其西南犄角之形旣成賊腹背受敵必難支禦所有續調官兵請添派南路以資進取八月奏甲爾木山梁逼近金川爲進取僧格宗要路由墨壘前進山形雖險至

山頂道路較寬前次失利後賊必驕怠正可乘其不備迅擊之隨派弁兵分防各隘口并調派侍衛鎮將等分隊潛赴墨壘溝齊集是夜按隊進發夜半乘大霧掩襲奪山梁三座破碉二十四獲火藥器械無算復派兵別由深嘉卜踞其山寨扼金川之要路自此進取僧格宗可不攻自潰 諭曰阿桂覓閒攻勦甲爾木山梁甚合機宜具見實心經理著授爲內大臣十一月攻克都恭日木則札爾瑪噶察丹嘉等寨大兵逼近僧格宗賊猶力拒我兵四面合圍賊棄寨循河而遁奏入 諭曰僧格宗係小金川門戶突入毀碉殲賊從此直擣美諾小金川之事自當剋日告蒞阿桂等籌畫調度悉合機宜著賞御用黑狐冠以示獎異十二月授右副將軍

時溫福以大學士授定邊將軍豐昇額亦授副將軍 命分道並進直取美諾是月阿桂攻克美都喇嘛寺美都形勢最高俯視美諾賊巢與近巢等礮互相犄角卽乘勝進擊盡奪其礮寨僧格桑先期遁布朗郭宗 諭曰阿桂由達烏踰險進攻連奏克捷一月之中直擣美諾僧格桑雖暫時鼠竄不日卽可就獲而賊巢已破我武維揚阿桂交部從優議敘時溫福豐昇額已由西路攻克路頂宗明郭宗日果爾烏谷山至是與阿桂會於美諾卽馳勦布朗郭宗僧格桑先送其孥於金川已遁至底木達求見其父澤旺拒不納僧格桑遂渡河走金川溫福至底木達澤旺跪道左自陳不能教束其子之罪溫福令執之械送京師三十八年正月阿桂偕

溫福等奏小金川全境蕩平卽應聲討金川而金川賊巢惟噶拉依及勒烏圍爲心腹地應分三路進兵臣溫福由功噶爾拉進臣阿桂由當噶爾拉進均攻噶拉依臣豐昇額由綽斯甲布進逕攻勒烏圍報 聞二月授禮部尚書議政處行走四月加太子少保是月奏請將續調黔兵赴當噶爾拉軍營五月奏請再調貴州雲南湖廣兵五千迅赴軍營備剿 上命總督劉秉恬赴溫福阿桂營商定需用兵數奏明調撥時溫福移攻昔領駐軍木果木賊誘降番叛分擾我兵後路侵占糧站兩營軍報不相聞六月犯木果木大營將軍溫福死之小金川地復陷於賊軍營奏至 上震怒調發健銳火器兩營黑龍江吉林伊犁額魯特兵五千赴川備剿

阿桂奏木果木一帶降番既經蠢動則當噶爾拉後路均應防範
本月七日軍營降番稟稱色木則有金川賊人教令今夜同反又
科多及納圍各城均有賊番滋擾業經派兵勦堵但各路礮寨相
望官兵駐守爲數無多難以分兵四出逐一勦洗因將當噶爾拉
以西各寨番人盡數調出收其軍器其桀驁者卽置於法餘分送
至章谷打箭鑪酌賞各土司臣營左右降番所駐之處距賊礮不
遠一爲賊誘慮生事端查有叛逆實跡卽正刑章餘令將領密加
看守遇有可疑者卽行嚴辦庶免返顧之虞 上以所辦深合機
宜投定邊將軍旋奏美諾至僧格宗一帶道路尙未通凡小金川
與金川接壤之處寨落甚多均添兵防備其色木則納圍拉約等

寨已分派將弁痛剿焚其寨落其僧格宗至約咱卡了至榮寨小金川賊匪俱已淨盡餘寨亦分兵剿辦不日可以克復七月 命回軍至美諾已失守阿桂奏木果木功噶爾拉一路別無官兵可調惟所貯軍糧火藥尙爲充裕臣悉力籌辦鼓勵眾心尙能堅守兩三月請勿慮 聖懷 諭曰自以由打箭鑪回軍爲要回至內地再籌進剿旋奏見在陸續撤兵分撤各要隘防守臣等親自斷後見至翁古爾壘思紐扼要地方暫駐又奏臣在南路日久所有巴旺布並克底革布什咱明正各土司相習已慣駕馭已熟是以仍派令協同防守眾情亦俱甯帖臣今馳赴省城與督臣商定整頓軍裝並議定道路卽由桃關出口前赴西路軍營 諭曰收復

小金川之舉西路尤爲緊要而西路又分鄂什克別斯滿兩路自非阿桂領兵不可其南路或令明亮富德進兵諒阿桂籌之已熟朕惟阿桂是倚惟當密爲妥籌迅速具奏是月調戶部尙書八月奏赴日隆軍營臣阿桂與色布騰巴勒珠爾在西路督兵臣富德與明亮馳赴南路是月授定西將軍九月奏小金川酋挾僧格桑以誘致降番既侵占各地則令金川賊眾守之仍挾僧格桑以歸其視僧格桑如孤豚腐鼠小金川番眾俱懷怨望而各土司亦慮金酋肆毒必殄滅之始獲安枕此次收復小金川及接勦金川白屬因勢易辦俟各路兵齊剋期十月杪進兵及期阿桂從中路攻資哩令富興等攻其北成德等攻其南三日克之并收復美美卡木

蘭壩鄂克什寨十月收復路頂宗明郭宗及美諾 賜御用黑狐
冠旋收復大板昭曾頭溝其帛噶爾角克底木達布朗郭宗以次
俱下南路明亮等克復僧格宗與阿桂會於美諾凡七日小金川
全境蕩平十二月奏酌貯軍需之地當遠近兼資層遞相及今大
兵已克美諾卽日進攻金川則達木巴宗鄂克什等處均當貯米
數千石其南路打箭鑪章谷綽斯甲布之梭磨從噶克周叟並應
倣此分貯各路總理司道府等量地勢之遠近時候之早晚數目
之盈絀隨時稟商臣等酌覈情形令分路轉輸則接濟旣便亦不
致積多成累又奏小金川各寨降番各就土司戶口多寡分別賞
給見將彭魯爾各寨番人均交瓦寺土司管束山札舍壘等寨番

人交木坪土司管束底木達曾頭溝等寨番人交雜谷腦五寨內屯弁管束餘零星寨落戶口分給巴旺布拉克底革什咱等安插又奏查進剿金川道路惟谷噶凱立葉較爲易進臣等將一切事宜料理靡備擇於正月初一日密往底木達初六日卽從底木達發兵不令賊人知覺令軍士兼程而進裹帶乾糧不許舉火定於初十日從谷噶了口進兵突入其豐昇額明亮兩路已飛檄寄知同時並舉其舒常宜喜軍營亦囑其駕馭新土司多派土司奮力攻擊以收牽綴之益三十九年正月阿桂行抵布朗郭宗查點兵數軍械給十日裹糧分其兵爲三隊第一隊兵五千令海蘭察等統領初六日進發第二隊兵五千色布騰巴勒珠爾等統領初七

日進發第三隊兵五千阿桂自領之初八日進發越八日大兵抵
谷噶阿桂督兵進擊轉戰二十餘里抵喇穆克其左右兩山及贊
巴拉克諸山次日克色依谷山奏入 諭曰阿桂悉心調度動協
機宜領兵各員協力進攻所向克捷先賞荷包以示鼓勵仍交部
議敘二月克羅博瓦山三月奏賊恃遜克爾宗與喇穆喇穆爲犄
角拒守甚嚴若從羅博瓦進據日則了口賊必悉力來拒臣擬分
兵六隊襲擊別斯滿諾爾各棚以擣其虛使賊疲於應援臣另選
精兵從羅博瓦直攻喇穆喇穆之後以占日則了口則格魯瓦覺
各寨均歸掌握從此進攻勒烏圍更覺直捷是月晉太子太保六
月攻克色湖普七月克日則了口進攻遜克爾宗八月奏金川逆

酋本爲各土司所切齒卽竄往他處亦斷不敢收留但力竭勢窮
爲鋌而走險之計亦未可定當早爲檄示俾各先事豫防護將
諭旨指示勿畱餘孽以滋後患并曉諭諸番協同擒獲之處譯出
番字發各土司遵照加意嚴防不得絲毫疏懈 上嘉之是月大
兵攻遜克爾宗甚急賊酋僧格桑死於金川金川酋獻其尸阿桂
仍督兵進攻九月奏賊以遜克爾宗爲緊要門戶死守愈力急切
未能攻克當月由日爾巴當噶等處爲出奇制勝之計十月 賞
黑狐冠貂馬褂各一 是月克默格爾山及凱立葉各險隘時我兵
已深入賊巢而日爾巴當噶達爾札克等賊嗣俱在我兵後阿桂
派諸將率兵悉埽平之 諭曰將軍阿桂自統兵進剿以來實心

調度諸事皆合機宜此次又將日爾巴當噶全行攻克接通凱立
葉指日卽擣勒烏圍甚屬可嘉著授爲御前大臣並賞戴雙眼花
翎用昭恩眷十一月克格魯見古了口金川東北之賊剋洗殆盡
四十年正月克康薩爾山梁二月克沿河斯莫思達寨四月克木
思工噶克了口五月克下巴木通及勒吉爾博山梁進據得式梯
復克噶爾丹寺噶明噶等寨進攻巴占賊捨死抵禦屢戰未下阿
桂相度形勢分兵從舍圖枉卡繞擊以分賊勢七月克昆色爾及
果克多山進克拉栝喇嘛寺舊則大海山梁旋克章噶 諭曰阿
桂籌辦軍營大小諸務實爲盡心時當盛暑統眾攻堅賢勞足念
因 御製詩六韻親書箑頭賜之以示嘉獎 詩曰掌握師行掄

俊豪事無巨細一心操功成九仞尤應慎惠洽諸軍實所褒探路
欲因乘怠隙攻礪直可歷危撓我居避暑原無暑卿效賢勞真是
勞嘉予七言錫書扇凱歌三捷換征袍勉之指日親郊勞紫閣勳
銘崇爵叨八月克隆斯得寨獲其火藥槍子無算賊益不支遂克
勒烏圍賊巢 諭曰官兵攻克勒烏圍已降旨將軍等從優議敘
並遣阿彌達齋紅寶石頂帽至軍營賞給阿桂俾益奮迅集勳九
月克當噶克底達思里噶拉宇莫魯古各寨十月克達木噶十一
月克西里山雅瑪朋寨十二月克薩爾歪寨旋克科布曲索隆古
寨屢奉 優旨褒敘旋授鑲黃旗領侍衛內大臣是月進據噶占
大頭人色木里雍中及布龍普阿納木等降四十一年正月克瑪

爾古當噶碉寨五百餘遂圍噶拉依 諭曰阿桂等奏官兵已將
金川全境埽平見在四面圍攻噶拉依巢穴賊酋索諾木弟兄及
作惡頭人均在圍內且索諾木之母姑姊妹均已來營投降更不
虞索諾木等尙懷觀望所有渠兇黨惡自必卽行擒縛馳遞紅旗
褒績酬勳宜頒渥典阿桂盡誠體國不憚艱勞制勝運籌克成偉
績實爲此事首功加恩封爲頭等誠謀英勇公並賞四團龍補服
金黃帶以昭崇典旋授吏部尙書協辦大學士是月莎羅奔岡達
克降二月索諾木彭楚克及大頭人達爾什桑卡爾雅瑪朋阿庫
魯降翌日逆酋索諾木降黨惡頭人等悉數就擒金川平奏捷
諭曰此次平定金川實皆阿桂一人功績茲班師在邇特解親御

黑狐毳黃馬褂先行隨報賞賜三月奏兩金川屯田事宜所有番
眾擬分安於金川河東河西與官兵相錯而居並遵旨一體酌
給牛具籽種此時屯田之初姑免其租賦三年後均照屯練納糧
例交官以佐兵食下軍機議行四月命軍機處行走恩賞緞
六十端銀六千兩是月庚申上東巡還駐蹕黃新莊阿桂等
凱旋詣行在恭請聖安戊辰上幸良鄉城南行郊勞禮
賜御用鞍轡馬一匹是日扈蹕還京己巳獻俘禮成上御紫
光閣行飲至禮親賜阿桂等卮酒賜紫韁及四開襖袍圖像
紫光閣御製贊曰西師參贊經歷多年茲爲巨擘掄掌兵權誠
而有謀英弗恃勇集眾出奇成勳元鞏五月上幸避暑山莊

命留京辦事八月阿桂六十生辰 賜崇勳者慶扁額聯云功冠
紫光榮賜袞籌添絳甲贊調梅 御製詩云功高殊眾賜冠衣壽
日充閭耀吉輝謀勇奏平定玉壘歸來俾協贊黃扉六旬慶自今
伊始廿四考當逾古稀不說保全最阻勉名同郭令豈其非四十
二年正月雲貴總督圖思德奏緬酋惜駁已故其子贅角牙襲頭
目得魯蘊具稟情願送還內地人輸誠納貢懇請開關 上以受
降通市及善後章程必得曉事之重臣相度妥辦 命阿桂前往
經理五月授武英殿大學士管理吏部兼正紅旗滿洲都統是月
緬甸送還蘇爾相等至虎踞關奏入遵 旨回京六月調鑲白旗
滿洲都統充 玉牒館國史館四庫全書總裁文淵閣領閣事經筵

講官十月調鑲黃旗滿洲都統管理戶部三庫四十三年四月充
殿試讀卷官閏六月兼管理藩院事七月署兵部尙書時 上詣
盛京 命畱京辦事十一月 命在總諳達上行走四十四年正
月河決儀封蘭陽等處 命赴河南查辦阿桂至工詢訪河狀開
郭家莊引河築攔黃壩嗣以下流淤澱上流潰溢且風水時作屢
築屢開因於王家莊築挑水壩順黃壩兜蓄水勢逼溜直入引河
至次年三月隄工始集四十五年正月兼翰林院掌院學士五月
畱京辦事十二月 命勘浙江海塘四十六年正月奏劾杭嘉湖
道王燧買部民女爲妾拆毀民居建造私宅及原任嘉興府知府
陳虞盛前與王燧同在差局浮冒侵蝕等罪尋抵工次悉心履勘

度潮勢之緩急沙性之堅軟工力之難易請築魚鱗石塘與柴塘並修以資鞏固而垂永久於是老鹽倉范公塘各隄一律修固二月命順道往清江查勘陶莊河身情形並高堰石工是年撒拉爾新教逆回滋事進逼蘭州上命阿桂督師剿除阿桂自磁州接旨卽馳赴軍營時賊已爲官兵所敗退踞龍虎華林等山阿桂派弁兵分三路擊之斃賊數百人賊勢漸蹙阿桂察看地形我兵必由龍虎山過溝再上華林山而山澗經水衝刷俱成橫截立礮僅容一人一騎兵力不能施展阿桂籌議俟川兵及阿拉善兵到齊以川兵攀踰險阻直擣賊巢以阿拉善兵防其竄逸乘其追捕可期一鼓勦洗淨盡而賊自創敗以後掘濠增卡止畱向南小

路盡力抵禦爲死守計是月各路兵及屯練兵抵營阿桂屢設伏誘戰賊出抗拒皆殲戮之五月攻克華林山大卡逼近賊營阿桂派兵四面設圍絕其水道六月督兵進攻賊營賊大潰逆首蘇四十三殲焉尋奏甘肅應行撫卹事宜得旨俞允七月搜勦逆回餘匪始竣奉旨議敘時甘省監糧折色冒賑事覺上命阿桂按之盡得大小官吏通同舞弊狀讞定奏請添設倉廩存貯以濟民食又奏安插各城回眾及添設循化參將復設河州州判以資撫馭俱下軍機議行是秋河決青龍岡命赴河南會同河道總督李奉翰督辦十月抵工督同員弁將東西兩壩先後下埽引河流行漸暢十二月兩壩甫合龍而東壩旋又塌壩阿桂等自請治

罪求請習河工大臣來豫籌辦 諭曰近年諸臣中經理河務較有把握者舍阿桂豈復有人惟當安心靜鎮另籌妥辦旋奏請將青龍岡迤下至孔家莊榮華寺楊家堂引河一律加寬以期河流宣暢四十七年四月奏請另於青龍岡迤上自蘭陽至商邱添築大隄挑挖引河并於北岸建築壩基逼溜南趨以期截溜全歸新河得 旨允行五月詣熱河 行在復 命面奉 指示仍赴工所酌定章程分派段落委員承辦九月浙江布政使盛住揭總督陳輝祖查抄王直望貲產抽換金玉 上命阿桂莅浙按之讞定順道勘南鹽河等處宣洩機宜及東伊家河運各工四十八年二月 命勘河南蘭陽十二堡隄工並酌建戴村壩迤上閘座三月

工竣回京 命管理戶部刑部事四十九年甘肅鹽茶廳逆回田
五等滋事田五斃張阿渾等糾其眾踞石峰堡擾及通渭伏羌靜
甯等境 上以總督李侍堯等辦理失宜遣尙書福康安領侍衛
內大臣海蘭察帥師往勦旋 命阿桂督辦六月至軍與福康安
等議安卡掘壕聚兵圍之使不得他竄凡賊匪滋擾之處派兵搜
勦以次肅清七月進攻賊巢殲其眾八百餘人生擒七百餘人首
逆張阿渾大通阿渾賊目楊慎四等悉數就擒械送京師敘功予
輕車都尉世職八月 命督河南睢州隄工三閱月工竣五十年
舉千叟宴 命領班入宴 賚如意壽杖貂皮補服蟒袍八月再
勘微山睢州工並閱洪澤湖清口情形十月回京 賜調元錫瑞

扁額五十一年四月再勘清口隄工六月查辦浙江倉庫虧缺彌補實數並勘海塘石工閏七月勘江南桃源安東黃河漫口情形及堵築事宜八月再赴浙江按平陽縣重徵案是月七十生辰賜平格延祺扁額聯云耆筵錫慶高千叟雲閣銘勳贊上台並如意紅絨結頂冠朝珠補服蟒袍貂皮等件九月回京總理兵部事務五十二年四月署正黃旗蒙古都統充殿試讀卷官五月留京辦事教習庶吉士六月赴河南督辦睢州十三堡漫口工程時臺灣奸民林爽文滋事遣福康安督剿上以阿桂素諳軍務如有所見據實奏聞阿桂奏大兵進剿宜扼其要害分路進攻先打通諸羅使官兵聲勢聯絡並宜於鹽水港等處廓清後路由大甲溪

國朝通志卷之二十一
克期進攻庶易掃除 諭曰所見與朕略同已將一切機宜詳悉
指示福康安辦理十月睢州合龍勘江南臨湖甄石隄工五十三
年正月回京二月臺灣平 諭曰大學士阿桂夙興夜寐一體宣
勤著交部議敘圖像紫光閣 御製贊曰戡外守中居恆亮功馳
咨軍務志每予同歸朝襄贊翦逆除兇三登紫閣福厚功崇七月
勘湖北荊州被水情形疏下流塞金洲以導水勢修萬城隄以護
城垣十月回京五十四年三月 命充上書房總師傳四月再勘
荊州隄工五十五年二月 上東巡五月 巡幸熱河俱 命留
京辦事五十六年五月如之時阿桂子工部右侍郎阿必達故軍
機大臣奏 聞 諭曰阿桂年高恐因此事悲切體氣失調賞給

嬭餅一匣務須仰體朕意善自寬慰九月大兵征西藏廓爾喀五十七年廓爾喀平以阿桂贊襄機務圖像紫光閣御製贊曰七旬以上身體康強從不言功黃閣贊襄威克久安曾亦協謀亶一介臣有容休休嘉慶元年正月戊申朔太上皇帝授璽禮成今上皇帝卽位越四日再舉千叟宴阿桂領班入宴如前儀八月八十生辰太上皇帝賜介眉三錫扁額聯云純嘏懋勳延帶礪耆齡碩望重絲綸聖製詩云黃髮未曾駘背白廿年於是掌絲綸試看信史今兮古幸我斯時君與臣耳重目明政何礙前功後業福猶申相期矻矻漫言老七字促成賚壽辰九月辭管兵部十一月以疾乞假二年八月卒奉太上皇帝敕諭大學士公阿桂

老成練達辦事多年自平定西陲時卽隨同出師旋經理新疆事務周詳妥善懋著勤勞嗣辦兩金川畀以將軍重寄稟承方略堅持定見克戡膚功特封爲一等誠謀英勇公賞給四團龍補服黃帶紫韁紅寶石帽頂雙眼花翎圖形紫光閣以旌殊勳續經簡任綸扉綜理部務贊襄樞要二十餘年前因撒拉爾及石峰堡回匪滋事統兵剿捕立就殄平復加恩賞給輕車都尉世職令伊長孫承襲疊沛恩施正資倚畀邇來雖精力稍衰兩耳重聽猶照常趨直夙夜靖共頃聞患病頗劇卽特命三皇孫貝勒蘇億御前侍衛豐伸濟倫由熱河馳往看視並賞賜陀羅經被仍冀調理或可就痊茲聞溘逝深爲悼惜著卽令綿億並另派散秩大臣一員

帶侍衛十員前往奠醑加恩晉贈太保入祀賢良祠九月 今上親臨賜奠 御製詩云 帝念功勳舊朝廷重上公將星落霞表箕尾見雲中函丈儀曾侍綸扉望最隆路人知感泣不愧世家風 賜祭葬諡文成子阿迪斯原襲一等誠謀英勇公官四川成都將軍綜事革退 恩賞六品頂帶阿必達原名阿彌達官至工部右侍郎先卒孫那彥珠襲一等誠謀英勇公那彥瞻原襲一等輕車都尉緣事革退那彥寶襲一等輕車都尉見官戶部右侍郎兼左翼總兵那彥成乾隆五十四年進士由編修遞擢至直隸總督嘉慶十八年十二月剿除河南教匪克復滑縣封三等子爵十九年正月班師復 命 諭曰那彥成係阿桂之孫亦由平日習聞

祖訓勉紹家聲故能宣力效猷懋膺爵賞茲追念舊勳著於本月二十九日在阿桂墓次賜祭一壇著禧恩前往奠酒用示朕眷舊酬勳至意二十一年那彥成因前在陝甘總督任內那移賑銀並捏奏捐廉等事奉 旨革職

右 國史館本傳

公名阿桂字廣廷一字雲巖姓章佳氏生康熙五十六年八月三日幼而沈靜端重性警敏好讀書就傅以後聞人談史事卽了了能記其大略雍正十年入學十二年補廩生明年選拔貢生乾隆元年副榜貢生以文勤公侍郎廕生在大理寺寺丞學習三年鄉試中式明年補兵部主事又明年遷員外郎八年擢郎中直軍機

處調戶部顏料庫十年調銀庫尋以事降調吏部員外郎十三年
小金川土司郎卡侵擾鄰境大學士納公親督師進討兵部尙書
班公第繼往軍營奏請以公參軍事明年納公得罪提督岳公鍾
琪并劾公逮至刑部治罪時文勤公以刑部尙書協辦大學士
高宗純皇帝念其年老無次子得釋明年復爲吏部員外郎尋遷
郎中十七年出爲江西按察使公奏爲用法貴乎明慎決獄專忌
淹留 上嘉許飭部從之未幾 召補內閣侍讀學士復遷內閣
學士兼禮部侍郎先是準噶爾有四衛拉特 王師累征之而未
能滅文勤公奉 命往與噶爾丹策凌議分地界禁侵犯邊鄙甯
謐者幾二十年至是厄魯特噶爾丹策凌死子策妄多爾濟那木

札爾襲位其庶兄喇嘛達爾札執而篡之而巴圖魯渾台吉第七子布木之子大策凌敦多卜之孫達瓦齊復因和碩特拉藏汗之孫阿睦爾撒納計算其位部落大亂所屬昂吉策凌伍巴什等率其家屬詣嘉峪關來降 上以侮亡取昧兵有常經先後遣將軍永常等督兵撫勦適阿睦爾撒納與達瓦齊有隙叛其汗亦來求款達瓦齊孤立無助竄往回部爲同人擒獻 上召阿睦爾撒納至熱河 行在封親王使往主故地已而復 召之至中途叛走時準噶爾逸賊率眾北走將入鄂羅斯 上命公赴北路軍營至烏里雅蘇臺與靖邊副將軍蒙古親王成衮札布隨機搜討成衮札布係額駙超勇親王策楞之子爲諸蒙古盟長 上所最倚重

者成袞札布奏公遇事奮勉七月令辦臺站事務而文勤公已得
目疾以二十年七月請解任二十一年正月薨公奔喪回京七月
仍以內閣學士 命同成袞札布辦理軍務閏九月授爲參贊大
臣十二月駐劄科布多授鑲紅旗蒙古副都統二十二年因成袞
札布赴巴里坤 命公代其任雷烏里雅蘇臺辦事十月赴科布
多辦事二十三年聞舍楞搶擄臺站官兵失利乃與策布登札布
合兵追勦及聞竄入鄂羅斯乃止八月補授工部侍郎領索倫兵
千名往塔爾巴哈臺駐劄是年準噶爾平十一月 命與副將軍
富公德追捕準夷餘賊初回酋大小和卓木爲準噶爾所拘及將
軍兆公惠定伊犁使還回部至是兆公遣使定其貢賦回酋執而

留之並戕害參贊大臣三公泰 詔命公同富公進兵合剿回眾
迎拒於阿爾楚爾時賊眾甚盛橫互數里官軍方力鬪未分勝負
公親率勇銳數百人由山麓繞出其右衝擊之賊遂潰亂二十四
年八月回部各城遂以次克捷十二月公奏在阿克蘇辦理安撫
事宜明年還伊犁伊犁自土爾扈特部竄入鄂羅斯其黨伏林莽
者尙眾 上念西域旣平其地方二萬餘里若不令官兵分駐則
伏戎必出而復據其地否亦恐爲鄂羅斯兼并則邊患終不能久
安乃 命各軍營大臣等籌議如何分兵駐守諸大臣皆謂地方
遼遠沙漠居多舊時準夷馬匹羊羣消耗殆盡難爲駐守計公獨
上言伊犁爲西域適中之地幅員廣闊苟能悉心籌計從容布置

可冀有成查守邊以駐兵爲先駐兵以軍食爲要臣來往軍營詢問此間地勢情形伊犁海努克及固勒札等處水土沃衍且有河可引灌注若開墾屯田則兵食可漸充臣請以屯田事宜列款上聞一請增派回人屯田一請官兵駐防協同墾種一請建置城郭一請預備馬駝 上以勇往任事降 旨嘉獎各如所議行公因言回人嫻於耕種非似準夷專於游牧者可比使以屯田爲業而以舊有軍營官兵其調征日久及疲弱者遣歸內地但畱到營未久之兵協同回人種地則荒蕪漸次可開又酌分舊有馬匹分設臺站以通文書摺奏往來又酌計見在沿邊運出糧米俱赴伊犁先爲兵丁口食又請於各省軍流人犯內有能工匠技藝者悉

改發伊犁以供應用。上皆善之。且派各大員協同辦理。於是在阿克蘇置辦農器。又以回人所送馬匹。令官兵等陸續先行。而準夷餘黨亦遣大臣侍衛分路勦撫。分別安插。遂率兵開屯。至秋豐稔。收糧皆倍。兵食以足。乃復奏一伊犁種地。回人當會滿足千數。一駐防滿洲索倫察哈爾兵種地。之綠旗兵當增益。駐劄一兵丁數目。當定準遵行辦理。一設立城守營。定準地方。一預備種地。兵丁馬匹。一伊犁山川土穀之神。請定祀典。一伊犁兵丁日多。錢糧日廣。請於烏魯木齊等處。派同知知縣管理。收放事務。俱允行。於是伊犁規模大定。上諭平定西域諸功臣五十人圖像於紫光閣。公居第十七。御製贊云。阿克敦子性頗健敏。力請從

戎宜哉惟允身不勝衣心可干城楚材繼出爲國之楨蓋以元耶
律文正王爲比也二十六年三月授內大臣七月補工部尙書在
議政處行走復補授鑲藍旗漢軍都統二十七年正月奏新疆約
束章程公私兩利之處一甲缺宜均齊也一錢糧宜畫一也一員
缺宜變通也一產業宜均分也一攜眷兵丁量給養贍也亦得
旨允行時伊犁添移阿克蘇種地回人千餘又準部餘夷由哈薩
克諸處投歸者亦皆給地耕種哈薩克卽古大宛產馬高大以內
地緞匹易之牧廠蕃息商賈林集乃選工陶埴建二城一綏定城
城四門東曰仁熙南曰利渠西曰義集北曰甯漢一安遠城城四
門東曰景旭南曰嘉會西曰環瀛北曰歸極民居兵房以次分列

規制一如內地而哈薩克越境遊牧者悉驅逐之數千里地來往晏然 詔給騎都尉世職並令還京供職詢問方略且以均勞逸而以明公瑞代之及至京授軍機大臣 賜紫禁城騎馬尋 命審歸化城都統法啟案件又查勘霸州文安等處水利所奏皆當 上意六月以原銜充經筵講官升隸正白旗七月補授正紅旗滿洲都統晉太子太保二十九年金川郎卡復與鄰封戕殺聞 上以公舊在四川軍營熟悉情形因 命總督阿爾泰進京公署其任相機籌辦公覆奏綽斯甲布等九土司與郎卡互相攻擊正如鼠鬪穴中本屬外番常有之事體察機宜不必急於辦理 上以爲然嗣阿爾泰回任公回京仍任工部尙書三十年 上幸浙

江 命留京辦事閏二月烏什回人賴穆黑圖拉作亂令公馳赴
行在請訓前往伊犁 上復傳諭以賊人恃其城堅糧足敢行
抗拒官兵不必徒事攻擊惟嚴防要隘俟其自敝明公瑞軍其北
公軍其南作長圍以環之且絕水道賊眾惶懼九月其眾擒賴穆
黑圖拉以獻公與明公誅首惡而貸其餘奏入 上以寬縱太甚
交部議處而令永公貴爲伊犁將軍公駐劄雅爾三十三年三月
補授伊犁將軍是時緬酋憤駁以兵偪脅內地土司總督劉藻楊
應琚不能辦因 命明公率兵進剿三十二年二月明公軍至猛
育糧盡戰沒於是大學士傅公恆請自督軍 上乃授爲經略而
以協辦大學士戶部尚書果毅公阿里袞及公爲副將軍三月

召至京四月授兵部尙書六月總督雲貴兼副將軍十月抵永昌
時署總督阿公里袞已先赴夏鳩公往會於騰越州卽於途中接
印任事三十四年二月經略自京起行先有旨以本年大舉架
入公專任副將軍以明德代爲總督四月經略至軍議分三路進
兵經略出萬仞關由大金江西路從猛拱暮魯至老官屯西岸阿
公里袞率舟師由水路下老官屯公由銅壁關抵蠻暮伐木造舟
七月出關九月舟成舟師遂出江而經略亦至公逆知賊之必迎
拒也先以兵伏江澗之甘立寨屆時賊果從猛戛拒戰寨兵出舉
礮擊之墮其三舟我舟師喜譟寨兵應之鼓角齊振賊皆披靡潰
散殲其頭目賓啞得諾搜舟中得旗幟器物數百件舟師遂出江

抵西岸合攻老官屯緬兵守禦堅甚時官兵多病瘴自副將軍阿
公里袞下都統提督總兵等官實有死亡經略亦病奏聞 上命
撤兵而憎駁亦以甘立寨之敗大懼乞降遣大頭目十四人請議
事公遣副都統明公亮等責以此後永不得擾邊境內地之官民
在緬境者越六年一貢其頭目惶恐遵約遂撤兵歸永昌十二月
經略起程還京除日有 旨令赴雲南省城偕經略總督議沿邊
善後事并合計頻年軍需用數三十五年二月兼管鑲紅旗漢軍
都統三月 命赴騰越以待緬人入貢是時明德降巡撫代以彰
寶使守備蘇爾相往緬責其入貢遲慢憎駁畱之公上言緬人邨
落在蠻暮木邦猛密三土司外偏師不可深入宜休息數年爲大

舉計 上以連年用兵恐他省備辦糧馬一時竭蹶且不直以拘
畱蘇爾相故輕議大舉降 旨切責於是部議革職 命以內大
臣管副將軍事明年以溫公福爲定邊副將軍革公職畱營效力
初阿爾泰之總督四川也議合綽斯甲布等九土司環攻金川有
能得其地者卽以畀之而諸土司散漫不相通謁又有陰與金川
通者久而無功時郎卡已死子索諾木與小金川土司僧格桑侵
占鄂什沃日之地阿爾泰因循失措有 旨令溫公移師討之溫
公以公兩使四川熟邊事請偕以行十二月至金川軍營攻巴郎
拉克之遂授四川提督與溫公分道進攻三十七年阿爾泰因運
糧遲延罷職桂公林以戶部侍郎代之并領其眾正月使副將薛

琮率三千人從墨龍溝閒道進攻會天雨雪賊兵絕其後路兵潰散薛琮死之阿爾泰因以此劾桂公 上令兵部尙書福公隆安來讞其獄 命公爲內大臣統南路官兵南路山勢嶄絕軍次達河之翁古爾壘山尤險峻而溪南布勒山頂有賊壘與達河互相犄角攻五閱月弗能下十一月溪水消落乃派兵之躡捷者偕土兵半夜渡溪攀援直上布勒躍入卡出其不意盡殲其眾而北岸官兵直攻翁古爾壘賊方出拒布勒官兵復以飛礮擊賊賊遂驚潰因分兵南北岸夾起而進直至美諾之南山僧格桑逃占古而溫公西路之兵亦至小金川遂平捷聞 上命爲定邊左副將軍由南路戶部侍郎豐公昇額亦爲副將軍由北路與將軍溫公福

分兵三路進攻金川溫公由西路之空喀豐公由北路之凱立葉而公攻喇穆山梁以三十八年正月朔半夜由大雪中進發連得當功噶爾拉各碉其餘攻之未下是月仍授禮部尙書四月晉太子少保而索諾木誘小金川降番掩襲空喀後路斷登春糧道時溫公在木果木兵潰溫公陣亡小金川之地復皆爲賊據美諾等相繼被陷公聞信先使五岱率兵救之不及乃派兵凡西南兩後路小金川降番皆收其軍械毀其碉寨悉調來營以絕其響應時賊已得志將斷當功噶爾拉後路每夜從高下峽而軍心鎮定且副都統奎林副將劉輝祖參將劉倅皆悉力拒戰每日夜十數合殺賊頗眾賊人料不能動而所得木果木各營米糧財帛甚多莫

有戰志於是求撤兵 上亦命公整師而出另籌進剿遂投公定邊將軍於七月由當功噶爾拉親爲斷後退駐達河是時 上添派京城健兒火器營吉林黑龍江伊犁厄魯特等兵五千名 命以 國初愛星阿所佩定西將軍印授之公仍統西路之兵南路則屬明亮北路則屬豐昇額皆爲定邊副將軍而舒公常以參贊大臣至金川河西日傍山攻擊牽綴公由南路至成都尋至鄂克什軍營至九月各兵俱集議先收復小金川公集諸將問計宜先攻何處諸將或以爲宜由南山或以爲宜從中路未定獨番人木塔爾謂此兩路皆去年進攻日久之地賊知其險要必力守禦恐徒延時日無益北山直藏噶山雖峻而山之西南卽美諾山之西

北卽占古若派兵先攻中路之礮卡以殺其勢而別派勇幹大臣上北山直下美諾則已出中路賊人礮卡之後勢必望風奔潰卽可以得美諾公熟思久之深以爲然遂定計以十一月十一日派兵由中南兩路進兵賊方悉力堅拒而派登北山之兵已入其巔頭之從山西下中南兩路之賊知將襲美諾各驚散去於是復美諾收占古凡七日而小金川全復奏入 上嘉其迅速 賜詩褒美三十九年正月十日五更冒大雪由當功噶爾拉進兵抵喇穆喇穆左右山梁南北遙互上列入礮極峻險堅固番人守禦亦倍於他所至二月克羅博瓦山梁晉太子太保六月克色溯普山梁七月克達爾圖布達什諾喇穆喇穆日則了口等處八月克該布

達什諾等處賊酋僧格桑死於金川番人獻其尸是時官兵在金川河北望宜喜日傍東面山勢險易一一可見而明亮同舒常在山西駐兵日久尙無進取之計公乃指畫形勢遣海蘭察率兵往助由是宜喜之兵亦逾山而東盡克各碉與南山之兵相望豐公昇額駐劄凱立葉者亦扼險不得進自宜喜既克公復遣兵往助豐公於是北路官兵亦逾險下至於河濱九月克默格爾山梁十一月克過格魯古了口十二月克日爾八當等寨奏入 賞戴雙眼花翎補授 御前大臣四十年正月克康薩爾等處二月克甲爾納堪布卓各碉四月克甲索得楞山梁五月克下巴木通等山梁六月克遜克爾宗山梁七月克章噶等處八月克勒烏圍勒烏

圍在刮爾厓北與索諾木官寨互爲犄角故其寨亦高大堅實官軍用大礮毀其礮牆賊更穴地死守至是乃盡克之進兵至刮爾厓之上尙有餘礮未下而聞索諾木之母先往河西將收集餘眾合力抗拒公乃遴選精兵間道下山直至河邊於是其母與索諾木音信斷絕惶遽不知所出公使人及降番等往諭之其母遂偕官兵詣軍營公居以別帳俾作書招索諾木時官兵四面合圍索諾木官寨晝夜用大礮轟摧索諾木窘迫既得其母書乃於四十一年二月初四日率其妻妹及各頭人至營乞降請命金川全境至是俱平 上遣副都統椿林齋 詔至營封公爲誠謀英勇公協辦大學士戶部尙書 賜寶石頂四團龍補服先是軍營屢報

捷 上知大功必成 賜公扇且畫蘭於上題以同心之言其臭
如蘭二人同心其利斷金且 製詩以 賜蓋兩金川之平定寶
廟算早決其機宜也於是遣大臣侍衛分次獻俘且安置降番
於各寨請設副將同知分駐其地以資約束撫綏定以四月班師
回京 上飭禮兵二部議行郊勞禮築臺於良鄉之黃新莊四月
二十六日公至良鄉 上遣誠親王及大學士舒公赫德 賜公
及將軍參贊將佐等膳次日至黃新莊 駕幸勞臺公等用軍服
甲冑橐鞬入行抱見禮一如兆公惠自回部凱旋故事禮畢入京
又次日 賜宴瀛臺紫光閣 賜紫韁及四開襖袍仍授軍機大
臣又繪功臣五十人像於紫光閣公居第一復 賜贊云西師參

贊經歷多年茲爲巨擘掄掌兵權誠而有謀英弗恃勇集眾出奇
成勳克鞏五月 駕幸熱河 命畱京辦事八月公六十生辰
上賜崇勳耆慶扁額及 御製詩篇如意等物爲壽先是公在金
川時緬酋遣人來議入貢事總督械至京師下獄至是部臣請以
索諾木母子弟兄及其頭目正法 上命撤緬使赴西市觀行刑
且告之故緬使等驚怖欲絕因 命械至雲南令其歸諭緬酋以
震動之明年正月遂遣公赴雲南臨邊示以禍福緬酋乃先以蘇
爾相送歸未幾緬甸內亂互相戕殺又十餘年而新立酋長孟隕
遣使具表恭祝八旬 聖壽願此後十年一貢南徼永甯亦公先
聲有以讐之也是年四月大學士舒公薨公爲武英殿大學士兼

管吏部尙書四十四年河決儀封蘭陽等處日久未塞 上命公
往視公謝以不諳河務 上曰如卿豈有不能者乃馳至儀封與
總河巡撫及舊河臣詢訪河狀及見在堵築開引河立攔壩之法
且進道府丞倅而詰其潰決之由鑲裏之術及老兵宿弁亦朝夕
咨訪再三體察故凡風水沙土之性靡不明如觀火乃集料聚夫
晝夜堵塞每下椿埽公皆親自臨之然海口自雲梯關稍稍淤澱
下流不暢則上流多潰溢屢築屢開至次年三月隄工始集四十
五年正月兼充翰林院掌院學士日講起居注官五月畱京辦事
十二月 命勘浙江海塘工程奏請修魚鱗石塘與柴塘並建以
資永久四十六年二月 命辦巡撫王亶望案件事畢復順道勘

高堰等一路河工是時蘭州逆回蘇四十三作亂 上命大學士和公坤督勦稍失利乃 命公督師四月至蘭州賊眾數千人據華林山死守公四面設圍絕其水道賊旅抗拒皆殲戮之遂獲賊首等解京師皆置之於法適甘肅令監生納粟以實邊儲年久虧缺日多 上命公往按事畢復勘河隄工時河復決青龍岡畱公督辦而令公子侍衛阿彌達祭告河源明年六月河始合龍九月浙江巡撫陳輝祖與藩司盛柱互訐公往讞其獄四十八年二月復勘河南蘭陽十二堡隄工回京管理戶部刑部事務四十九年五月甘肅鹽茶慶回子張阿渾作亂渡河而南破隆德靜甯進圍伏羌總督李公侍堯尾追不及 上遣海公蘭察福公康安等帥

師往勦復。命公督之。至則敗賊於底店。進圍石峰堡。阿渾等窮蹙。乞降。械送京師。逾月。事平。敘功。予輕車都尉。世職。八月。復命督河南睢州隄工。三月。工竣。五十年。舉千叟宴。奉卮上壽。領班入宴。賜詩以寵之。六月。命閱視黃淮清口情形。十月。回京。賜調元錫瑞扁額。五十一年。四月。再勘清口隄工。八月。公壽七十。復賜平格延祺扁額。及御製對聯。九月。按浙江平陽縣黃梅重徵之案。十月。回京。總理兵部事務。五十二年。七月。復勘睢州隄工。適臺灣奸民林爽文戕官爲亂。上以公素諳軍旅。如有所見。據實奏聞。公以大兵進勦。宜扼其要害。分路前進。庶幾易於掃除。上然之。十二月。回京。五十七年。西藏廓爾喀平。上命圖福

公康安等十五功臣像於紫光閣以公參帷幄贊襄之任亦得與
列位第二五十九年 今皇上正位東宮典禮隆重一切皆公與
禮臣斟酌定議六十年冬 上以御宇周甲將行內禪禮而隆儀
盛事古所罕見公亦敬謹定議儀注斟酌盡善比至嘉慶元年正
月元旦公仰承 景命於 太和殿上捧冊授寶及初四日再舉
千叟宴公進觴上 壽如前視履考祥周旋中禮百寮及外藩貢
使皆驚喜相告謂重臣耆德實國家之上瑞也八月八十生辰又
賜介眉三錫扁額及對聯 御製詩如意等物九月辭管兵部
十一月公疾 上遣醫診視且 賜葢藥頻加慰問至二年八月
二十一日薨逝事 聞奉 太上皇敕旨大學士公阿桂老成練

達辦事多年自平定西陲時卽隨同出師旋經理新疆事務周詳妥善懋著勤勞嗣辦兩金川畀以將軍重寄稟承方略堅持定見克戡膚功特封爲一等誠謀英勇公賞給四國龍補服黃帶紫韁紅寶石帽頂雙眼花翎圓形紫光閣以旌殊勳續經簡任綸扉綜理部務贊襄樞要二十餘年前因撒拉爾及石峯堡回匪滋事統兵剿捕立就殄平復加恩賞給輕車都尉世職令伊長孫承襲疊沛恩施正資倚畀邇來雖精力稍衰兩耳重聽猶照常趨直夙夜靖共頃聞患病頗劇卽特派皇三孫貝勒蘇德御前侍衛豐伸濟倫由熱河馳往看視並賞賜陀羅經被仍善爲調理或可就痊茲聞溘逝深爲悼惜仍著蘇德並另派散秩大臣一員帶同侍衛十

員前往奠醊加恩晉贈太保入祀賢良祠任內降罰處分俱著開復所有應得卹典該衙門查例具奏以示軫念耆勳至意九月上親臨奠醊並賜祭葬諡曰文成公享年八十有一配瓜爾佳氏累封一品夫人乾隆三十年卒子三人長阿迪斯襲封一等誠謀英勇公歷官戶工二部侍郎今官古北口提督次阿思達筆帖式次阿彌達官至工部右侍郎皆先公卒孫六人長那彥瞻承襲一等輕車都尉官乾清門侍衛次那彥寶由生員今官乾清門侍衛次那彥成乾隆五十四年進士今官工部尙書次那彥柱次那彥福次那彥堪六品蔭生曾孫六人崇綬五品蔭生容安六品蔭生崇喜崇德崇義增壽皆幼以嘉慶二年十一月二十日葬

於左安門外之楊邨坊文勤公墓左公器識宏遠智計沈密遇大事必籌其始終得失計出萬全然後行之雖在萬乘之前不輕爲然諾及其肩荷大任次第措置有時詔書敦迫從容陳奏亦不冝苟且以就功名故所作必有成而聖明專心委任雖延時日必令其悉心展布不强爲催促也生平善知人自大帥以至偏裨咸稔其才具察其性情隨所宜而任使之又均其勞苦差其等第從不以喜怒加人故爲所用者皆得其死力戰勝攻克各疏其功以上之故將校中封公侯出爲將軍都統提督總兵者甚眾及爲宰執管尙書事聞人廉潔勤幹者輒以陳於當宁二十年來總督巡撫亦公密薦者爲多自少畱心史事凡古今成敗治亂之

迹與邪正進退之機皆默識其所以然遇有績學勵行之士教以修身直節以成大器而於佻巧營求之輩必痛絕之蓋文勤公以重望著於朝端一時名臣鉅老法家拂士咸與訂道義交公時聞緒論用以自淑恆欲與諸公方駕後先至開疆拓土武功烜赫適際時會之自然非公意也昶鄉會試主考同考官多出文勤公門下是以爲公所知自軍機從在軍營幾二十年公事之餘笑言款洽無所不盡故能窺其生平大概如此乾隆四十一年凱旋後昶爲鴻臚寺卿多暇日公出文勤公所撰詩文屬以編次成德蔭堂集十六卷又以文勤公生平事實屬爲行狀公讀而善之昶乞老歸田後二年至京與于叟宴別公歸又二年而公薨今年正月

驚聞 高宗純皇帝鼎湖大故入都恭謁 梓宮因得哭公之墓
而公孫那彥成以所撰年譜見示俾爲行狀公功在國史名在天
壤無藉於私家志乘然冊府所藏士大夫罕得見之故條繫事件
以示藝林至年譜悉本 諭旨及 御製詩文各集并公所上奏
章不敢有所增飾昶亦悉仍其舊焉

右行狀王昶撰

文成公阿桂滿洲正白旗人其勳簿官闕生卒歲月具載 國史
茲特錄遺事數則方公之爲定西將軍勦金川酋索諾木也已百
戰抵其巢索諾木震懾業約別日盡室出降其木城木柵悉已毀
撤是日晩參贊以下謁公曰事機叵測今日必生縛索諾木致帳

下方可安枕公不答亦不待語竟已入帳中臥諸將弁待命不敢退而公已鼻聲如雷徹帳外矣諸人者旁皇達旦甫日出索諾木已自縛率諸酋跪帳外公次第以屬吏因進參贊以下告曰諸君昨日之語蓋懼索諾木他竄或畏罪先死耳我已據阨要竄將何之渠若能死又豈待今日哉吾故以爲不若高枕待旦日當自來也諸將弁諾諾皆曰非某等所及又木果木失事後公代統大軍一日日欲暎公忽率十數騎升高阜覘賊屯紮處不知阜數折已偏賊營賊望見卽率獵騎數百環西南阜馳上公願從騎曰下馬復曰解衣衣不足復曰解裏衣解單曰衣悉寸寸裂急分走高阜雜挂林木上挂單曰無衣者悉束帶曰上馬曰向阜南緩轡下適

賊騎已馳至距向所立阜僅二十步時暝色已上忽見岡缺處旗幟飄忽絡繹不絕疑援騎從山後至勒馬不遽進方遣騎四出覘伺而公已率從騎回大營矣公曰此兵機也不爾則賊馬十倍於我甯得脫耶前一事余值內廷日 成親王爲言之後一事在文淵閣石經館公自言之 純皇帝末年和珅橫甚公業知不能制凡朝夕同入直必離立十數步外和珅知公意故就公語公亦泛荅之然卒未嘗移立一步公嘗病臥直廬吾友軍機章京管君世銘入省之公素所厚也忽呼語曰我年八十可死位將相 恩遇無比可死子若孫皆已佐部務無所不足可死忍死以待者實欲俟 皇上親政犬馬之意得一上達如是死乃不恨然竟不果余

國朝書林英雅不刊 卷二十一 三
登第日公爲讀卷官擬第一進呈余素不習書公獨賞之嘗謂吾友刑部郎孫君星衍曰人皆以洪編修試策該博不知字亦過人余首拔之者取其無一毫館閣體耳

右書事洪亮吉撰

木果木之敗 上在熱河聞報 召畱京大學士劉統勳詣行在咨之劉統勳前言金川不必勞師至是則亦以兵不可罷乃授阿桂定西將軍豐伸額明亮爲副將軍前此溫福阿桂皆奏言調滿兵之費三倍綠營不如多調土兵至是以潰兵之故復調健銳火器營二千吉林索倫兵二千赴勦十月阿桂改赴西路明亮赴南路豐昇額仍由綽甲進取宜喜阿桂由鄂克什入轉戰五晝夜直抵

美諾復之明亮率軍由瑪爾里入亦所向克捷遂盡復小金川地
上以夷性畏威不懷德前此開網縱獸不革心轉啟侮今不可
不大創之先磔澤旺於市 敕諸將移小金川之師進討大金川
勢必堵穴擒渠乃許嚴事阿桂力以身任之而大金川之地自十
二三年以來全力抗守增壘設險嚴密十倍小金川嗣是王師三
路進攻復閱兩載餘始克復時賊巢有二一烏勒圍一噶爾厓其
烏勒圍以羅博瓦山爲門戶阿桂令海蘭察額森特海祿三路繞
出其後福康安成德特成額三路仰攻其前黎明盡奪其險進營
那穆山賊全力守之乃移豐昇額攻宜喜之兵同來併力六月偵
知色湖普嶺有間道可繞出那穆山之後乃令諸軍陽攻其前而

海蘭察由閒道破色溯普寨賊舍那穆山退守薩斯甲嶺防禦益嚴惟迤西最高峰有兩大碉削絕壁立料我兵不能至未甚備七月令諸軍分攻各碉寨數十道並進而海蘭察率死士六百由最高峰猱引而上趾頂相接比明及其碉一涌而入盡殲之數十里各寨間之皆奪氣遂同時破乘勝直臨遜克宗壘賊震懾索諾木醜殺僧格桑而獻其尸及妻妾頭目至軍乞赦已罪阿桂繼致京師而攻益急遜克宗壘爲賊巢勒烏圍外障賊以死守百計攻之不入而日爾巴山之下營葛博山之上營墨格山可進十月大兵冒險克之遂移營其地距勒烏圍二十餘里於是日爾巴山營葛博山之賊反在後皆失其險還攻盡克之賊復退守康薩爾山時

五岱在凱立葉五福在丹壩望隔嶺煙燄知大軍已深入皆越嶺以軍來會攻勢大振時已十一月矣距賊巢愈近守愈堅頓兵兩月明年春力攻克之賊復聚守朗噶寨初明亮之攻南路也阻於庚額山天險不能進阿桂令移軍由宜喜入當西路攻克色湖普嶺時南路軍亦冒雨破宜喜七棚十月克琅谷遂與大軍隔河阿桂軍河東明亮軍河西乃約明亮過河議兩路並進使賊不可抽調禦我會連兩數旬兵未能進番地故少晴多雨賊之刺麻又能爲札蒼邪術致雨雪泥潦沒膝四月中始霽阿桂先使福康安海蘭察渡河西助明亮攻宜喜偵知甲索僅有賊老弱防守襲破十棚遂分兵六路盡殲河西二十里內之賊乘勝連克各寨五月阿

桂河東軍破朗噶寨距勒烏圍僅數里進偏其巢連破昆色刺麻寺及拉枯刺麻寺七月抵勒烏圍其官寨礮堅牆厚西臨大河迤南有轉經樓與官寨相犄角木柵石卡長里許其東負山麓有崖八層層各立礮各路敗回之賊咸聚守之我兵先破卡柵數十重以斷其犄角又毀橋斷其走路明亮亦攻河西以絕其援八月十五夜進擣巢穴四面礮轟官寨破之攻至黎明又克轉經樓其逸賊皆溺水死兩賊巢已破其一而莎羅奔兄弟及各頭目已先期遁赴噶爾崖矣噶爾崖之前有瑪爾古山得之則可以俯臨賊巢大軍議奪賊上游而隔於西里之科布曲山乃於九月攻西里木城石礮中槍礮如萬雨雹我兵步步立柵以次進偏擲火彈入木

城城外多積薪乘風延燎木城頃刻盡十一月攻克科布曲山於是軍進無阻十二月遂據瑪爾古山盡奪要害噶爾厓卽在其下其頭目及番眾紛紛出降索諾木之母姑姊妹亦降惟莎羅奔索諾木及心腹死黨則皆在圍中而明亮河西軍自克茹寨後阻額爾替山明亮乘軍中運礮邪許聲賊不備時三道突破其寨又阻於札烏古山求濟師於阿桂時大兵方擣噶爾厓賊巢不能分兵往助而賊兩路分拒我者至是亦左支右格無能兼顧及河東兵已偪噶爾厓河西賊皆內顧喪膽於是明亮富德兩路亦所向破竹明亮至馬爾邦與富德軍隔嶺乃與富德合軍徇各險皆下十二月三路軍皆會於噶爾厓築長圍周數里斷水道以困之大礮

晝夜霆擊所至洞牆壁數重索諾木窘急使其兄詣營乞哀而自稱病匿堅礮中不敢出先是賊勢蹙揚言寨破當舉家自焚上知番俗最忌自戕賊妄倔强不足信也及是飛走皆窮外圍益急索諾木果從莎羅奔及其頭目妻子挈番眾二千餘出寨奉印獻軍門金川平露布八日至京上恭謁兩陵岱嶽闕里獻俘廟社上皇太后徽號勒碑太學及兩金川地封阿桂誠謀英勇公在事文武官以次封賞進秩郊勞飲至時乾隆四十有一年之正月也

乾隆四十六年蘇四十三聚黨仇殺老教百餘蘭州知府楊士璣河州協副將新柱以兵往捕遇害總督勒爾謹以標兵五百馳扼

狄道州調各鎮兵勦之捕教首馬明心下省城獄而賊二千餘陷河州城宵濟洮河由間道徑犯蘭州時蘭州止督標兵八百迎擊失利賊斷黃河浮橋以拒援師繞城譟索馬明心甚急布政使王廷贊使登城諭賊旋誅之以靖內變勒爾謹遣兵復河州並捕賊家屬三百餘於循化廳畱兵斷狄道馳回蘭州 詔發京師健銳火器營兵二千 命大學士誠謀英勇公阿桂佩欽差大臣關防自河南工次赴勦先 命領侍衛內大臣海蘭察護軍統領額森特馳往又赦李侍堯於獄以三品頂帶赴蘭州總軍餉四月西安將軍伍彌泰提督馬彪仁和等先後赴援蘭州城西南偏山官軍不先扼之爲賊所踞臨高俯瞰眾雖千餘皆新教死黨素業射獵

精火槍又負地險官兵萬餘皆營於城東與賊遼隔屢屛挫銳每夜輒驚擾槍礮達旦勒爾謹見兵多賊少謂半月可滅遽奏止禁旅及續調川兵會海蘭察至率老回兵擊賊龍尾山殺二百餘敗回華林山巢穴崖坑陡深十數丈斜徑上下僅通一人且二山皆無水泉軍不能久而賊營汲河甚近海蘭察奏賊據地勢我兵多不習戰請發侍衛三十員赴軍 詔逮勒爾謹入都以李侍堯代之是月阿桂至軍首營山上斷賊赴城之路而柵山北至河岸以聯聲勢漸移城中城東之兵進逼賊巢又奏調金川屯練番兵千阿拉善山蒙古兵七百助剿五月選兵千有五百攻賊華林山先佯敗誘之出壕截殺二百餘遁匿壕內不復出閏五月土番兵至

先分路進攻符賊以察路徑知東北阻於崖下西南阻於大卡乃謀奪大卡之策復連日挑戰知賊於官兵退後亦卽撤守卡之賊回巢休息乃伏精兵溝內各備鈇鏃次日大兵進攻佯退賊果回巢惟餘數十賊守卡伏兵突出空路踰溝盡殺之遂奪其險俯瞰賊巢築長圍絕汲道湮井瀉溝困之餘賊四五百食不下咽適連雨復延殘喘尙謂蘇阿渾念經禱雨之力蘇逆告以事急但徑奔西北自有生路蓋預計投河而愚黨冥頑不悟也阿桂以賊破旦夕無多傷士卒乃移柵漸逼賊溝乘六月初大雨囊土填壕四入遂斬首逆餘賊遁華林寺火之無一降者先後三閱月賊平分剽洮河以南餘黨以叛產賞老教回兵班師 詔陝西提督自西安

移固原而移固原總兵於河州以控回民又陝甘兵因移防新疆及扣存公費公糧致缺原額三萬有奇其增兵萬有二千分布衝要並展寬蘭州城令據山臨河阿桂奏言龍尾華林二山暴潦衝成溝塹水悍沙汕難城惟有展寬東面而盡撤西關外城以遠山麓抑或移督標右營於華林山上而建四墩堡於龍尾山與城中犄角則毋庸改建 命工部侍郎成德往勘奏從後議

官軍之圍蘭州賊也斷其汲道屢被雨解 上因以甘肅歷年恆旱請賑爲疑適王廷贊奏繳廉俸銀四萬兩助餉而前布政使王廣望擢撫浙江卽捐海塘工程銀五十萬兩皆不類甘肅瘠地藩司所爲其捐賑監糧必有私收折色虛報災歉之弊 命阿桂李

侍堯察奏具得始末而王直望任內開銷監糧六百餘萬石舊存常平倉穀百有三十萬石較歷年尤甚罪斬籍其家勒爾謹王廷贊均賜自盡道府直隸州具結者五十餘員領賑州縣六十餘員計贓科罪其有守城捕賊承辦軍需者免死烏魯木齊浮銷屯糧四員罪如之並追論前大學士于敏中管戶部時議允開捐之罪而仍豁免甘肅積欠籽糧二百四十五萬餘石折色銀三十萬兩以惠邊氓云

右記魏源撰

阿文成公屢膺捷伐平定絕域爲近日名臣之冠其拔擢人才或於散僚卒伍以一二語賞識卽登薦牘故人皆樂爲之用與將軍

奎以將校從事公奇其貌曰此將材也因與之副將割付命其攻克某嶺卽日克捷其後卒爲名將如王述奄司寇昶韓桂船司寇封百菊溪制府齡朱白泉觀察爾賡額皆以微員賞識其後皆爲卿相聞其於軍務倥傯閒惟於幕中獨坐飲酒吸煙秉燭竟夜或拍案大呼愀然長嘯持酒旋舞則次日必有奇策其驅使將士如發蒙振落其成功者或獎以數語或償以饒果而其人感激終身甘與效死其薨數日前自知死期於其誕辰置酒作樂終日訓其子孫勵以綱常名節曰余從此長訣不復訓教爾等矣病篤時將其兵書詩文稿盡命焚之曰無以此誤後人也余嘗往弔見其廳第湫隘居然儒素較之當時權貴萬廈巍然者薰猶自別

安南國王阮光平至京遣其臣饋阿文成公土儀公取一二物使人出口 中朝公相問陪臣好汝國王既誠心朝覲其優賚厚寵皆出自 皇上體恤遠人之意莫謂 中朝相公不識順逆二字也其陪臣汗流浹背出謂人曰此誠宰相語公有 上賜馬一日脫韁去圍人入告公方觀書曰覓之既獲復命公徐曰好仍讀書如汝其相度若此

乾隆辛丑夏撒爾回民叛 上命阿文成公征之時阿文成公視浙江海塘工未卽趨赴 上命和相往攝其篆和固自負其才欲諸將爲所用和每發一議眾輒阻之亦不能難也及公至和出迎公問其失機狀和赧然曰將帥皆傲慢不爲吾用公請試之公曰

然則斬耳和復問進兵狀公笑不荅令諸將帥於次日晨集轅前
公每呼一將入輒命和坐其側公有所調撥及命屯戍處其人輒
應如響如是者數和坐上甚恚憤公部署畢問和曰諸將初不見
其慢尙方劍不知誅誰之頭也和戰慄無人色公乃命和卽日銜
命歸和於是憾公次骨故終身與之齟齬蓋構釁於此也

右錄宗室昭榘撰

公像貯 紫光功存 冊府勳名德望所不待言二十餘年爲太
平宰相而意猶不自慊蓋本文勤公之教令其事鄂文端公爾泰
朱文端公軾楊文定公名時徐文恪公元夢蔡文勤公世遠承其
指授又與王弼林蔣湘颺諸君游意在文苑不以韜略爲長也統

兵所在決策如神自在西陲卽親行陣屢著膚功及木果木兵潰後七日而復美諾二年而埽金川甘肅化林坪鹽茶廳回人連年蠢動負固皆兩月平之故番王悍將率拱手聽命悅服無間言其後偏裨官至將軍提鎮者數十人至督撫者亦十餘人及入內閣愛才好士見官屬必教以慎持名節毋營競見外吏必戒以廉潔自矢毋貪黷所居廳事前僅容旋馬日食不及四簋無園亭聲色之樂比其薨也天下識與不識皆嗟嘆之先是公從軍於北路及平伊犁改回部拓地二萬餘里上欲置兵屯候尉益壯西北屏藩同事大臣未肯肩其任公獨奏請從容建置浚河渠集農功立驛傳築城積穀商旅交集不十年而甌脫變爲都會自嘉峪關西

國朝通志卷之二十一
三
天山以北直接科布多烏里雅蘇臺與喀爾喀諸旗相接而葱嶺以南直抵葉爾羌行者如適堂塗如哈薩克布魯特及北鄙强悍之鄂羅斯亦恪恭震疊公薨後伊犁將軍保公徇眾請建專祠隨蒙 俞允蓋深知遺愛之長也

右蒲褐山房詩話王昶撰

國朝耆獻類徵初編卷二十七補錄

宰輔二十七

阿桂

故公大學士阿文成公出師萬里位極人臣 天子郊勞雲臺畫
象豐功偉烈載在史冊無事宣述星衍前官翰林及尙書郎以上
第上考受公知從公遊九年窺公敬君敬事知人愛士之量一二
端謹書於方以識名臣言行焉公承文勤公家教進止溫恭起居
有常處每朝先五鼓起入 禁廷坐直房待旦不假寐諸曹吏屏
息室內外如無人召閣部直事官詢 上折記閣本與歲時應舉
掌故及一日所折獄備顧問始入 內朝有覆奏稟必親檢閱無

誤字乃進御或 上輦經直房侍者下戶幰公從室內起立垂手
候鹵簿過始復坐嘗惡公牘繁冗顧令星衍卽坐隅刪之稱意因
曰例文如屋下架屋耳值纂修歲安得好手筆刪之畫諾至恭慎
每署日彙尾雖遇倉卒運末筆如有力千鈞議政持平舉大體無
私見無拂人情背經術言不肖輕重法探 上意曰 上聖人也儻
意不在是行之後以爲比法安得平耶日餉退朝門無私謁泊如
也比部郎某與公議事不合公嫌其戇直已而卒予特擢郎有偏
僂而勤政者公舉任劇郡及入 覲 上亦曰人果不可以貌取
也公嘗省人以所忽不許人以炫長故樂爲公用者眾舉朝無奔
競風所薦舉中外官蒙 上柄用皆有清正聲其人或知或不知

公未嘗以機密言告於外始星衍殿試時公奉命讀卷有書策中貳臣傳一語者大學士彭公尙書紀公曰此卷不入十本吾當引故事特奏御公見讀卷諸公且爭執起持星衍卷曰吾亦賞其條對詳覈遂前列及奏御上拔置第一以誤字改第二稱此科得士能讀書公教習庶吉士召星衍謂曰吾以畢督部言知汝學有根柢當除名士氣及星衍改官比部偕同歲生馬履泰謁公公止星衍等勿行一足跪禮曰吾爲郎官時無此禮也先是中臺官謁長官皆長揖因親王領部乃有加禮俗相沿不能改故公言之又謂星衍曰學成亦大難勿以習律令廢舊業也及星衍授監司謁別公公曰外閒風氣非一人能變亦勿以聲名身命隨人轉移

汝起家高第能自愛吾所知餘無他言矣公孫侍郎那彥成公後
入翰林以公常稱道星衍在京邸時屢過從考論文史星衍別公
未三年而公薨於位及官外臺思公言歷歷如有先識今雖欲聞
公教飭不可得徒揮泣記公遺事以質之公孫雖不賢識其小者
亦使後世知公爲 國元老建大功又能以功名終而昌厥後蓋
有古名臣度量而得於家學及稽合於聖經者至深醇也

右遺事孫星衍撰

國朝耆獻類徵初編卷二十八目錄

宰輔二十八

莊有恭

三寶

國朝耆獻類徵初編卷二十八

通奉大夫前署江西巡撫江西布政使司布政使湘陰李桓輯

宰輔二十八

莊有恭

莊有恭廣東番禺人乾隆四年一甲一名進士授修撰命在上

書局行走五年九月以疾乞歸授學士七年遷光祿寺

卿尋下父憂十一年特擢內閣學士十三年提督江蘇學政十

五年正月授戶部侍郎尋充江南鄉試正考官八月仍提督江蘇

學政十六年授江蘇巡撫十七年二月疏言濬墅關向委佐雜四

員協查但未定更代之期盤踞日久弊竇叢生且啟劣員戀關曠

國朝耆獻類徵初編卷二十八 宰輔二十八

職之端嗣後請半年一代著爲定例得旨允行十月署兩江總督十一月疏言太倉鎮洋沿海田廬全賴海隄保障雍正十年前撫臣高其倬議自寶山湖口港歷鎮洋太倉常熟至昭文之福山港築土塘三萬四千七百餘丈時因經費不充僅於湖口港至劉河南岸沿邊頂衝處建土石塘工餘至今未辦今歲七月東北風潮劉河以南賴塘隄得無恙以北頗致損傷築隄捍田斷難再緩見據士民自請挑築但民力一時難集若陸續興修又恐工程及半遇伏秋大汛不能捍禦仍棄前功應接築土塘九千四百七十七餘丈請酌借庫銀一萬六千兩給紳士自募夫役春融動工官爲鼓舞勸懲務令汛前告竣所借銀按畝扣輸不過升米之值二年

即可完款 詔如所請初有恭爲江蘇學政時浙江人丁文彬者
偵有恭出獻所著文武記太公望傳等逆書有恭以爲病狂不究
至是文彬復挾其書至山東呈衍聖公孔昭煥昭煥告巡撫楊應
琚以 聞有恭自請治罪 上以有恭故縱逆罪罰學政養廉十
倍十九年御史楊開鼎條奏江南收漕之弊 敕有恭覆奏有恭
謂賦法江南收漕向爲最弊洲畝而蘇州松江常州鎮江太倉爲
尤甚雍正中前撫臣尹繼善竭力剔除漕政爲之一清年久法弛
故智漸萌臣到任後同督臣鄂容安酌定條例勒石漕倉遇收期
飭糧道及各道府不時周巡臣與督臣仍委員弁微服查訪胥吏
稍犯立擊嚴究至楊開鼎所稱需索不遂借詞米不如式勒令曬

賒飾颺臣思積弊官民皆可藉口而偏信反得售奸益漕糧上供
天庾自應乾圓潔淨儻不如式非特盤驗不符糧道運官俱干
參處卽朦混交納而不堪久貯必致貽誤倉儲糧戶良頑不等往
往以青腰白臍潮嫩雜碎之米強交令換卽造作浮言挾制自應
分別察究又不得但責官吏取悅刁民也 上獎其所言公正二
十一年丁母憂 特命給假百日回籍治喪於伏汛前至淮署江
南河道總督事有恭奏泰興縣捐職州同朱晔主使斃命按律應
絞晔呈請贖罪臣業經批准尙未結案 諭曰莊有恭此奏觀之
實爲駭然豈有入人死罪並未奏聞擅自飭司准其收贖至離任
後始含糊具奏之理見命尹繼善等據實查辦其有無染指雖尙

未定然觀其專擅妄謬如此已大失人臣敬事之道令其家屈待罪尋尹繼善及新任巡撫愛必達奏朱晬贖罪一案有恭不遵成例遽行批准專擅之罪百喙難辭又有恭監試秋闈察出張穀孫等賄謀聯號擅批議罰又嚴凝裕鬪蟋蟀事發有恭亦批罰贖俱未奏明其所罰銀分貯江甯吳縣泰興等庫 命革有恭職解京治罪二十二年四月大學士九卿擬有恭罪應絞 諭曰莊有恭簡任巡撫辦理地方案件自有憲典可遵惟以重罰爲事自朱晬一案而外如張穀孫之聯號嚴凝裕之鬪蟋蟀不一而足其意以爲行之既熟將來自可操縱由己莊有恭自應照律治罪然此案尙無贓私入己情弊著從寬免死發往軍臺效力伊見有母喪仍

加恩准其回籍料理事畢前往軍臺不准捐贖六月 命帶罪署理湖北巡撫二十四年調浙江巡撫二十五年二月劾署杭州將軍伊領阿副都統劉揚達違例咨取轎役工食經臣駁回伊領阿等仍自乘用 命革伊領阿劉揚達職有恭交部議敘紀錄一次三月疏言海甯塘工宜乘此浮沙刷盡分別修築又紹興之南塘嘉興之台塘並關緊要臣於二月初赴山陰勘宋家樓工係三江曹娥二水交會之所又適當潮汐衝刷爲南塘首險前於二十一年改建石塘四百丈見但壑固隨由山陰至蕭山之龕長等山越南大壑至海甯之中小壑登文堂萬畝諸山按海甯南門外西過戴家石橋工長二千一百六十丈東至陳文港工長二千九百八

十丈雖石塊參差殘缺然根址堅實若一律折建無論費帑不資轉恐不如舊工之固無庸一槩興修其必需修築者千六百餘丈見在分別加工自陳文港東至尖山下有韓家池柴塘四百一十丈亦應一律拆修勘畢後臣卽循海而北由海鹽至平湖徧歷乍塘按海鹽東臨大海南有台駐北有乍浦諸山山趾角張縣城以一面當潮汐衝城外石塘最爲險要上年八月風潮稍大塘工閒有衝塌臣已指示隨時修補至海甯應修建千六百餘丈亦分緩急臣就其殘缺過甚者七百七十餘丈作爲要工其餘察看潮形以次接辦 諭如議行六月疏言自西塘至湖家兜至海甯南門外三四月閒潮退沙漲計長十八里臣前請辦戴家石橋要工四

百六十餘丈既有新長沙形爲之外護應先就迤東工段僱辦再
審量沙勢分別緩急庶帑不虛糜工歸實用奏入 上曰此佳兆
也應致祭 海神以昭靈貺九月疏言陳文港緩修塘工十丈照
魚鱗作法逐層整砌圓通庵前緩修塘十丈仍照緩修作法如式
堅築廿里亭西緩修塘二十五丈修整坦面加用排椿令緊貼塘
身報 聞二十六年十一月疏請浙江鼓鑄照福建例配用白鉛
得 旨嘉獎十二月奏言海甯西塘老鹽倉一帶經霖伏兩汛老
沙汕刷亟宜先事預防先後拆鑲二百丈自霜降後臣往來察勘
見柴石兩塘交接之區水已臨塘自此迤西老沙仍多坍卸請將
接連前工之七十丈上緊鑲辦報 聞二十七年春 上南巡

賜以時日己未視爲策士文精掄彙榜得超羣起行不負坐言學
率屬偏能先已勤鶴市舊聲猶眷眷龍山新政更愨愨海塘正是
投艱處磐石維安勉奏勳九月有恭疏報海甯塘工竣 諭曰浙
江海甯塘工最關緊要今春巡幸抵杭之次日卽赴老鹽倉尖山
等處相度指示飭令修築柴塘益建設竹簍坦水各工用資保護
今據莊有恭奏查勘工程俱已陸續完竣餘工並皆穩固該督撫
率各員儆辦蒞事甚屬盡心深可嘉予莊有恭著交部議敘尋議
加一級十月調江蘇巡撫 諭曰浙江海塘工程莊有恭籌辦甚
屬盡心且見有查辦災賑事務亦爲緊要其日行事件照常交護
撫索林接辦塘工賑務仍聽莊有恭專司其事蘇杭一水之地案

牘往還本可無虞稽誤至熊學鵬抵浙賑務自能妥辦若海塘工程自不如莊有恭之輕車熟路鄰封伊邇兩撫應始終會辦莊有恭斷不因已經調任稍分畛域十一月 特免有恭學政任內應罰未完銀六萬餘兩二十九年九月擢刑部尙書暫畱巡撫任十二月疏言松婁二江宣洩太湖爲東南水利第一雍正五年大挑後今三十餘年江身淺窄日甚又一切濱湖港道菱蘆充塞淤占成田若不及早疏治一遇積雨數郡平田可慮臣按上自太湖入運口下至松婁水口應分別開寬疏濬崑山新陽之外壕張家橋青浦之黃渡鎮應開月河資分洩 詔可三十年正月協辦大學士仍暫畱巡撫任 上南巡 賜以詩曰重教任蘇撫近復擢

秋卿豈不輕車藉要資法網平蹕塗暫畱扈翰幄自歸并德政吳
松在何曾讓畢亭八月有恭劾蘇州府同知段成功縱役詐擾累
民革職未及擬有恭 召還十二月兩江總督高晉奏段成功因
瘧不能檢點案牘致家人婪贓成功實未與知 上嚴飭之令巡
撫明德據實查奏嗣明德奏段成功家人出票滋擾成功不惟知
情且圖染指知府孔傳炯按察使朱奎揚明知成功假病贖徇未
究 命革朱奎揚孔傳炯職解部治罪三十一年正月高晉奏莊
有恭原參卽有段成功抱病朦混語 諭曰莊有恭旣訪知段成
功有出票婪索之事具題參劾豈有復信其捏病被朦之理伊彼
時若仍任江蘇巡撫決不肯如此姑息了事亦不肯爲此隱躍兩

可之語其意不過以五日京兆離任在即何必結怨故畱此罅隙
即使他日審出實情伊可居救之不得之名如得以捏病一節藉
端開脫即可解怨市恩此等卑瑣居心行事尙得爲純臣乎因令
內閣檢取原本閱對則有本官抱病家人蒙官舞弊之語並詢問莊有
恭據稱該司府等審究段成功家人等僉供段成功時適患病係
伊等朦蔽所爲隨據揭敘稿題參未能即將段成功斷非患病之
處明白指駁實屬錯謬此語更屬取巧莊有恭若果知其實係患
病則又何必嚴參其所以嚴參者蓋恐後任參出朕將問及故不
得不參而爲之隱躍其詞耳莊有恭受朕深恩特加擢用乃敢爲
此巧於市恩之術此非前任受尹繼善局弄之過是有心欺朕矣

莊有恭著嚴加議處部議革任 命革去協辦大學士嗣欽差侍郎四達得有恭授意朱奎揚孔傳炯有意從寬狀疏 聞 諭曰此事實出情理之外深可駭異矣朕初意莊有恭因離任在即巧於解怨市恩尙外省所素有之惡習耳是以前部議革任時僅將其協辦大學士革去今閱此奏則此案之上下相蒙實由莊有恭授意指使以致知府臬司扶同狡混其居心欺詐若是實非朕意料所及莊有恭從前疊獲重罪皆經棄瑕錄用復加恩升授尙書協辦大學士朕之施恩於莊有恭者有加無已苟稍有天良自應實心圖報乃敢於參審重案授意屬員巧爲欺蔽深負朕恩此皆朕之不能以德感人以明識人深用爲愧若再姑息使過將來何

以董正天下督撫哉莊有恭著革職拏問交軍機大臣會同刑部
嚴審定擬其前在學政任內應罰未完銀兩曾經加恩寬免莊有
恭如此喪心負恩仍著追繳尋 諭曰向來各省督撫辦理案件
瞻徇欺蔽上下通同舞弊習氣最爲惡劣前歲湖北盜犯張洪順
一案經朕澈底查辦嚴加懲治以爲各省督撫自應滌慮洗心奉
法惟謹乃未及三年不意又有罔上行私毫無顧忌如莊有恭之
甚者可見各省督撫之錮習相仍牢不可破段成功詐擾累民贓
蹟已著莊有恭身任巡撫不思秉公參究轉授臬司知府令其
委罪家人書役巧爲開脫以遂其解怨市恩之計居心欺詐執法
以恩莫此爲甚若不痛加懲創其何以飭吏治而正人心今將伊

革職拏交刑部令軍機大臣會同審擬外閒無識之徒未必不以此案較之湖北案情爲輕而處之則同不知張洪順祇係細民犯盜愛必達等並非有意袒徇乃因回護已過遂將後案延擱究未敢公然授意屬員乃屬員承其意旨相與顛預了事耳若段成功則身爲職官索詐部民情節可惡莊有恭惟知官官相護罔知法紀於查參段成功時輒先授意臬司知府令其從寬開脫遂爾隱躍其詞以患病被朦參劾若非朕畱心詳閱洞燭其奸則貪竄擾民之段成功幾至倖逃法網是此案之挾私舞弊實倡於莊有恭其罪更浮於愛必達矣且愛必達已經發遣伊犁並不稍爲寬貸今朱奎揚孔傳炯供詞具在案情歷歷如繪稍有知識者閱之尙

能爲莊有恭置一詞乎昨四達等奏到卽令軍機大臣將朱奎揚等親供交莊有恭閱看伊惟俯首認罪並不置辯其意不屑與屬吏對簿自爲得體不知實小人之尤豈有如此重案聽其含糊認罪而遂可成信讞之理因命軍機大臣等復行傳旨訊問則又供朱奎揚等承審月餘延捱觀望直至莊有恭自行訪有款單札司傳府拘審伊等始將家人書役索詐得贓各情弊具揭又不將段成功自己標判廳卷回明送看等語所供情節亦係一面之詞難於憑信卽日朱奎揚等拏解到京自可得其底裏設稍有支吾掩飾亦何難加以嚴詢使之水落石出耶外省吏治敝壞皆由督撫不能正己率屬上下和同聯爲一氣以行其蒙蔽欺詐之伎倆各

省皆所不免而江南爲尤甚在伊等相習成風恬不爲怪不思此等鬼域形跡難逃朕之洞鑒一經敗露惟有力加整頓執法不撓務在廓除積習俾吏治肅清該督撫等各宜猛省自愛毋得以身試法將此通諭各直省督撫知之二月大學士傅恆等擬有恭罪應斬 諭曰據審莊有恭及朱奎揚孔傳炯等供覈其情節莊有恭並非袒護段成功而於保舉段成功之和其衷則曲意爲之瞻徇恭和其衷爲新任巡撫明德弟兄恐事發累及舉主有礙顏面遂爾心存瞻顧上司屬員意會色授各相喻於不言因置段成功受賄情事不復深加結怨妄冀含糊結案外省上下和同官官相護積習最爲惡劣若不急爲整飭將漸啟黨援門戶之弊於世道

人心深有關係莊有恭身爲巡撫屬員視其趨向自應依律問斬
著監候秋後處決八月 命赦有恭罪補授福建巡撫三十二年
七月卒 諭曰莊有恭已經病故所有伊江蘇學政任內未完銀
六萬餘兩著加恩寬免

右 國史館本傳

上御極之四年 詔以廷試進士撰擬頌聯獻諛非體且啟請託
之弊 命大臣集議制策當取通達治體以漢鼂錯董仲舒唐劉
蕡宋蘇軾爲式於是番禹莊公以第一甲第一人登第讀卷日拆
號得公名 天顏喜甚引 見授翰林院修撰入直南書房越三
年公弟有信成進士引 見公適以起居注官侍直 上顧問公

遂得選庶吉士其冬兄弟同請告歸省海內傳爲盛事假滿還朝遷右春坊右中允進翰林院侍講遷侍講學士擢光祿寺卿丁資政公憂卽家拜內閣學士服闋入都遷兵部右侍郎提督江蘇學政轉戶部右侍郎 召還供職尋充江南正考官再視學江蘇卽除江蘇巡撫莅事六載丁太夫人艱扶櫬南行有 詔擢江南河道總督以居憂未之任坐在蘇日罰贖事失當逮繫法司論如律 詔特貰罪令護喪還籍後赴軍臺自效方詣謫所中途卽授湖北巡撫歲餘仍調江蘇巡撫未行復調浙江巡撫莅事四載復調江蘇加太子少保逾年擢刑部尙書協辦大學士仍畱辦巡撫事乙酉冬入都供職未幾坐劾段成功事遠問頌繫半載有餘復

授福建巡撫乾隆三十二年七月二日寢疾終於福州官署享年五十有五公以文學侍從之臣荷 聖天子深知出膺節鎮誓以清勤自勵初在江蘇晝接見僚屬夜治文書或至漏盡不少休癸酉夏秋之交淮揚諸郡水公親往察勘撫卹得 旨截漕百二十萬石出帑銀五十萬兩以備賑濟民乃得蘇乙亥大江南北復以災告公草奏自言奉職無狀數干天和並陳諸救荒策 上皆允行所費內府白金凡十餘萬督率屬吏檢視給散胥役不得侵漁明年夏民多病疫公首捐俸錢令有司察民病者予藥死者予棺並檄管內推其法行之湖北督撫並駐武昌公事往往齟齬公在楚歲餘與總督碩公和衷共濟始終無閒人以爲難及撫浙之始

浙西三郡以風雨蟲傷米價騰踊而江南亦歉商販不至公奏請
動司庫銀三十六萬委官往湖廣採買有旨命畱湖南漕米十
五萬石並碾倉米五萬石運浙糶濟富戶知楚米將至價不得踊
米亦漸出而自冬徂春米之來自楚者舳舻相望分撥諸郡減值
以售歲雖儉而民不飢矣錢塘江入海之處有三鹽曰南大鹽曰
中小鹽曰北大鹽乙丑以後水行中鹽者十餘年己卯歲改趨北
大鹽公承詔抵海甯閱柴石塘登尖山渡江周遭履勘首以購
芻薪加築土堰添建坦水爲請旣而水勢直齧塘根以預備得無
患又奏復海塘兵專司負薪運土發石下椿設守備一員千把外
委十二員分界防守省民夫無算海甯之老鹽倉向以土活沙浮

祇立柴塘壬午歲 聖駕南巡議改石塘 命相國劉文正公統
勳今相國高公晉與公先往察勘果以活沙不能立椿 上復親
歷隄上指示形勢令修柴塘增坦水加薪價公承 命鳩工庀材
剋期蒞事又用前人竹絡之法編竹爲篋實以巨石鱗次櫛比以
衛塘根其秋風潮大作石塘閒有崩裂而柴塘獨無恙公之力也
是時秋霖之後水漲久不退公親往嘉湖兩郡察勘知水歸太湖
之道多淤而太湖下流亦多壅闕因請浚烏程長興境內七十二
澗並遣官至江南按行三江故道疏入尋有改撫江蘇之 命公
遂親往探尋脈絡得其要領建議大修三江水利具摺入告其略
云太湖北受荆溪百瀆南受天目諸山之水爲吳中巨浸而分疏

之大幹則以三江爲要三江者吳淞江婁江東江也東江自宋已
湮明永樂閒別開黃浦寬廣足當三江之一今亦謂之東江三江
分流經吳江震澤吳元和崑山新陽青浦華亭上海太倉鎮洋嘉
定十二州縣之境其閒港浦縱橫湖蕩參錯大概觀之無處不可
分洩似亦可安於無事然百節之通不敵一節之塞數港之洩不
及一江之壅其勢必有所阻查太湖出水之口不特寶帶橋一處
如吳江之十八港十七橋吳縣之鮎魚口大缺口爲湖水穿運河
入江之要道今亦不無淺阻又如入吳淞之龐山湖大斜港九里
湖澱山湖澈浦向稱寬深足資宣洩者邇來小民貪利徧植芟蘆
圈築魚蕩亦多侵占劉河古之婁江也今河形大非昔比舟楫來

往必艤舟待潮崑山外濠爲婁江正道淺狹特甚蘇州之婁門外江面僅寬四五丈偶遇秋霖眾水匯集江身淺窄先爲潦水所占俟其稍退然後湖水得出爲之傳送而上游已漫淹矣東南財賦重地水利民生大計若及早治之事半而功實倍今籌所以治之法當於運河以西凡太湖出水之口皆爲清釐占塞俾分流無阻其運河以東三江故道惟黃浦見在深通但於泖口挑去新漲蘆墩三處足資宣洩其吳淞江自龐山湖以下婁江自婁門以下凡有淺狹阻滯之處宜濬治寬深令上源所洩之數足相容納其江身所有植蘆插蘄及圍占之區盡數剷除嗣後仍嚴爲之禁則水之停蓄有所傳送以時並卽以挑河之士加培圩岸見有牯座

去海太近難於啟閉者酌量改移庶渾潮不入清水盛強而海口之淤亦將不挑而自去總計所需雖覺浩繁然散在十二州縣通力合作實亦無多民間聞有此舉咸樂趨事願以民力爲之但分段督修仍須官董其成且工費繁多若待鳩集財力而後興工不無稍稽時日仰懇 聖恩准於公項內先行動支興工仍於各州縣分年按畝徵還則民力既紓工可速集奏入報 可於是選紳耆賦工役先疏橋港次及河身菱蘆魚蕩之圍占者除之城市民居之不可毀者別開月河以導之工始於癸未十二月至甲申三月告成凡用白金二十二萬有奇公再撫蘇有 旨仍兼管浙江海塘先後增築魚鱗石塘凡若干丈松江太倉沿海亦有石塘而

土塘居什之八九公請如浙塘之法編竹篾實石護塘根以禦海潮公之盡心於水利海塘其大者如此其撫福建也預誠族人居晉江者勿至省卽至遣門者謝之曰我爲封疆大臣嫌疑當避且俟去此之日再相見今則不敢也洎公之薨晉江宗人始來會哭咸稱公之公正爲不可及維公奮跡嶺海以文學登巍科不及十年而躋九列貳六卿皆 聖明親擢不由薦援 天子察公識度閱遠材任公輔東南重地膺委寄者十有餘年入領尙書遂參大政中閒兩遭顛躓賴 天子仁聖終保全之重建節旄恩禮罔替天不假年未臻中壽然海內士夫識與不識聞公名靡不歎羨謂科目得人之盛也嗚呼休哉公生而穎異少爲諸生試輒冠其曹

偶好吟詠日有程課書法圓勁出入顏平原趙吳興之間片楮隻
字人爭藏弄以爲榮在禁林日經進詩文數被獎賞及 車駕省
方公以方岳大臣扈從輒 命賡和 御製詩篇 上幸嘉興之
煙雨樓 特召公至行營給札聯句詩成書以勒石羣臣莫及焉
公諱有恭字容可號滋圃先世爲晉江望族父資政公始徙居粵
今爲番禺縣人曾祖某祖某父奕仁皆以公貴 贈資政大夫江
蘇巡撫夫人楊氏某公之女子一士斌國子監生女二附貢生何
文通壬午舉人龍川縣教諭羅永楫其壻也公沒後九年公子士
斌卜窀穸於某鄉之原以某月日葬先期屬大昕爲銘大昕久從
公遊今奉使嶺南又得會公之葬奚敢以不文辭銘曰

九曜降精生傑人驪駟得路鸞鳳騫讀書百篇筆有神 大廷對
策陳萬言龍頭首擢侍從班文章經濟夙抱全手持玉尺分荆均
三吳善類推獎勤 帝曰汝諧撫吾民百城保障氣若春水旱拯
恤無因循清波可活涸轍鱗築塘捍海土石堅或編竹絡楫焚薪
震澤底定三江分原委脈絡細討論尾閭勿壅流沄沄惠流越角
兼吳根出乘八駟擁節幡入長六曹參絲綸平生溫飽志不紛盤
錯歷盡能自完封川莫南海倫瓊山邱江門陳科名事功相
後先惟公兼之在一身崇岡鬱鬱宰木繁千秋萬歲名不湮

右墓誌銘錢大昕撰

殿試日公對策有云不爲立仗之馬而爲朝陽之鳳此二語當時

頗傳誦之

右松軒隨筆張維屏撰

乾隆二十七年 上南巡幸嘉興之煙雨樓時公爲浙江巡撫
特詔公聯句用石鼎體成二十四韻 御製有句云老錢筆老健
謂錢尙書陳羣所書也兩老字一時頗難屬對公對句云蒙莊眎
蒙翳自註臣日本近視蒙 詢樓中陳羣所書幾茫無以對後公
書此詩勒石固足見 聖朝喜起賡歌之盛而公敏捷之才亦卽
五字可見一斑矣

右聽松廬詩話張維屏撰

三寶

三寶正紅旗滿洲人姓伊爾根覺羅乾隆四年繙譯進士授中書
五年襲世管佐領九年遷內閣侍讀十三年隨尙書舒赫德往金
川辦理臺務軍功加一級十六年授湖北驛鹽道二十一年來京
授戶部郎中二十三年派往北路軍營經理達什達瓦游牧二十
四年五月授直隸布政使疏言州縣承修工程事竣報銷奉部覈
減國帑攸關皆例應追繳之項知府直隸州爲親臨上司例有
督催之責請嗣後州縣等官名下有應追覈減銀兩該管府州不
卽嚴催完解者於揭參州縣遲延之日卽將督催不力之府州職
名一併開送照督催交代不力例議處其順天府四路同知所轄

州縣與知府同亦應責成照例議處至各州縣如升遷降調事故離任令接任官查明其任內並無未完覈減各項出具印結入於交代案內儻不行出結將接任官照不行詳查例議處部議准行二十六年七月 上巡幸熱河因橋道船夫俱未修整齊備部議降調 命以道員職銜往哈密辦事二十八年十二月回京二十九年六月授四川布政使七月調湖北三十一年調湖南三十二年派查雲南一切緊要軍務三十五年七月調貴州布政使三十六年擢山西巡撫三十七年九月疏言西安將軍富僧阿奏西安兵移駐巴里坤事宜移會各省查山西巡撫向有親丁步糧四十分經前撫臣諾岷奏請在太原駐防滿洲蒙古餘丁內挑取四十

名給與支食以資生計又經前撫臣阿里衮以太原駐防餘丁支食親丁名糧係作爲養育兵丁體制實爲未協應照部咨將駐防餘丁原支山西巡撫親丁隨糧四十分裁汰可否仰懇 聖恩俯念太原駐防生齒繁盛增設養育錢糧俾其餘丁得資養贍第查晉省右衛養育兵每名月支銀一兩五錢米一石二斗五升今裁隨糧增養育若卽援數議設未免太優查西安駐防養育錢糧每名月支餉銀一兩粟米三斗請仍按原額四十分之數增設養育兵四十名每名卽照向辦月支銀米例遇折色之月給銀三錢錢糧不致加增而旗人均沐 聖主養育之恩於無旣矣照所請行三十八年正月調浙江巡撫七月疏言杭州府屬之海甯縣所轄

民戶四十萬餘額徵地丁銀六萬五千有奇歲完漕南米六萬三千零兼有修防塘工事件實屬繁疲難兼三要缺湖州府屬之安吉州所轄民戶止八萬四千餘額徵地丁銀一萬六千餘兩歲完南漕等米亦止六千餘石實屬簡僻中缺請將海甯縣升爲州安吉州降爲縣又查海甯州城西北三十里之長安鎮商貨畢集兼爲嚴緝私鹽竊匪要地離州稍遠必得專員彈壓請將該州州判移駐部議 從之四十二年五月擢湖廣總督十月 諭曰三寶升總督已在本年恩詔之後應照巡撫職銜請封念其平日辦事尙屬認真著加恩給總督封典四十三年十二月疏言查閱營伍情形衡州協副將海福年非強壯不能振作但出師金川著有勞

績若以旗員補用尙能勝任請給咨送部引 見又沅州協副將
洪昌運年力漸衰請勒令休致 諭曰海福洪昌運同係副將俱
年力衰頹自應一併勒令休致今三寶以海福身係滿洲請以旗
員補用於洪昌運則竟請勒休顯係偏護旗員有心軒輊非所以
示公允況海福在金川出兵如果勞績懋著自必得受世職該旗
必照例辦理非查覈軍政之督撫所應議及者也且三寶以滿洲
身任總督於閩屬滿漢官弁均宜一視方足以飭營伍而昭勸懲
乃於滿漢副將一例兩辦其何以使眾心帖服耶三寶著傳旨嚴
行申飭四十四年正月授東閣大學士兼禮部尙書仍管湖廣總
督事三月奏湖北安陸府城外舊有富民河一道年久淤塞經署

湖北布政使福川奏請借項興挑臣覆查此河備旱潦通舟楫商民兩便見當徵旱後貧民得傭餬口自當遵旨妥爲辦理疏入報 可是月調閩浙總督四十五年五月疏言浙江海塘老鹽倉一帶柴塘四千二百餘丈蒙 聖主親臨閱視諭令改築石塘實爲萬年經久之計臣親往覆勘此時正遇大汛見在柴塘足資抵禦沿塘各工俱屬穩固惟潮神廟前大盤頭西藏字號起柴塘朽腐將盡潮水臨塘殊關緊要見在石塘採料興建尙須時日應將此處趕緊鑲修築塘百丈至柴塘四千二百餘丈改建石工自應籌度萬全見今柴塘旣臨大汛未便更動而退後多係田廬臣與司道等面加籌酌似應緊靠柴塘內下椿築砌石工以柴塘爲外

護捍衛更爲得力民居亦屬相安俟秋汛後擇吉興工又諭旨
指示應修海甯城之石塘內有工二十九丈地勢較高兩旁魚鱗
舊塘原十六層其城東八里文字號至陳文港密字號百五十餘
丈地勢稍低兩旁魚鱗舊塘原十八層今應各照舊層數以期一
律鞏固諭曰前因浙江海塘改建石工恐該處民或視柴塘爲
可廢任意拆毀竊用致損城郭田廬會明降諭旨令該督撫嚴飭
地方文武各官將見在柴塘照前加意防護以爲重關保障將來
石工告竣之時亦可留爲外衛此旨尙未據三寶奏到茲據三寶
摺內乃稱與司道等面加籌酌緊靠柴塘之內下椿築砌石工既
可以柴塘爲外衛則捍衛更爲得力等語三寶此摺與朕降諭旨

相符其是否曾經接奉前旨著據實覆奏三寶尋奏前因石塘工
鉅會飭該管廳備悉心籌畫先據稟請從柴塘退後數丈建築石
工須拆去民房八百餘間殊非仰體 聖恩保護田廬至意臣逐
一履勘似應於緊靠柴塘內築砌石工嗣於五月間恭讀 諭旨
杭州老鹽倉一帶改築石塘仍畱柴塘以資保障臣當卽欽遵飭
地方文武將柴塘加意保固報 聞六月 命來京入閣辦事八
月兼正藍旗滿洲都統十月充經筵講官四十六年正月因王直
望在浙江巡撫任內聲名狼籍未行奏參議革職得 旨從寬畱
任四十七年四月繕寫清字 粵壇祝版模糊部議革任 詔寬
免十一月在 上書房總師傅上行走四十八年調鑲藍旗漢軍

都統四十九年五月隨 駕熱河以疾歸六月卒 諭曰大學士
三寶歷任督撫宣力有年簡擢綸扉謹慎供職方資倚任此次扈
從熱河因其邁疾卽遣太醫診視并令回京調養茲聞溘逝殊爲
軫惜其任內降革處分均予開復所有應得卹典著該部查例具
奏尋 賜祭葬如例諡文敬

右 國史館本傳

余外舅三文敬公寶以繙譯進士出身任兩湖閩浙總督入拜東
閣大學士幼讀宋儒書大節不苟癸未夏 純皇帝巡幸承德府
公時任直隸布政使至密雲霖雨數日河水驟發上欲乘騎渡河
公叩馬諫曰千金之子坐不垂堂況萬乘至尊豈可輕試波濤使

御駟有失雖萬段臣等之軀何可追悔 上以滿洲舊俗宜親習勞勤以揚武勇爲言公曰 皇上此行奉 太后乘輿同至卽使 上渡河安便獨不識 太后之輿安奉何所 上動容爲之回轡又督閩時浙撫王直望旣丁艱自以督辦海塘爲言奪情視事又不遺眷屬回籍公惡其蔑倫密疏劾之王因此獲罪其爲上書房總師傅時嘗集古今儲貳之事曰春華日覽教授 諸皇子不失師保之體故卒後 上親謚文敬蓋取責難於君之義也

右錄宗室昭棟撰

國朝耆獻類徵初編卷二十九目錄

宰輔二十九

程景伊

傅恆

蘇凌阿

梁國治

朱珪

國朝耆獻類徵初編卷二十九

通奉大夫前署江西巡撫江西布政使司布政使湘陰李桓輯

宰輔二十九

程景伊

程景伊江南武進人乾隆四年進士改庶吉士十年散館授編修十三年三月充會試同考官遷侍讀六月大考二等遷侍讀學士十四年正月命在上書房行走十五年丁母憂十八年七月補侍讀學士仍在上書房行走九月充日講起居注官十月充武會試正考官遷詹事十九年遷內閣學士二十年擢兵部侍郎二十三年十二月民人潘濬控天津鹽商牛兆泰欠引地價銀鹽道王

愷伯之壻張曾效持京札十餘封爲兆泰囑託經大學士傅恆查奏各札與本案無涉 諭曰朕斷不以尋常書札往來之故處分伊等但侍郎程景伊札中有承乏中樞晨夕內廷殊多曠廢今秋來與木蘭之役稍得專心職業等語亦可謂無可致之殷勤訴中情之充誦者矣大約小翰林輩方進本衙門行走則以入直內廷爲捷徑及積久受恩滿志又以晨夕入直爲苦此卽韓愈所謂丁甯婢子者也今程景伊自問兵部之事朕果賴彼以理乎本不過旅進旅退可有可無之人伊豈不自知而覲顏爲是語乎似此居心安可授經皇子著解退其上書房行走俾其專心部務以觀其作何盡職二十四年閏六月調禮部右侍郎七月鄉試屆期八旗

大臣子弟應試者並不循例自陳程景伊與禮部尙書伍靈安等代爲請 旨朦混具奏部議革職 詔改革職畱任十一月以西陲大功告成 命祭告炎帝虞帝陵二十六年九月充武會試正考官二十八年四月奏言外簾官有年老抱病難勝任者已派員幫辦嗣後請令該堂官開送時將老疾者驗明扣除 上是之十一月充續文獻通考副總裁二十九年二月疏言壇廟致祭向例俱有撰定成文其中亦宜因時變通如本年三月祭 歷代帝王廟 皇上親詣行禮上年奉 詔廟易黃瓦典禮攸崇應請 敕翰林院另擬祭文進呈 欽定以申昭格如所請行三十年正月署吏部侍郎十月授吏部右侍郎兼署工部左侍郎三十一年正

月調工部侍郎十一月仍調吏部侍郎三十四年擢工部尙書充
經筵講官三十五年調刑部尙書三十六年二月調吏部尙書三
十八年八月協辦大學士九月充三通館副總裁十月 命紫禁
城內騎馬十一月充國史館副總裁三十九年十月充四庫全書
館總裁十二月覆勘各省鄉試卷奏四川頭場首題又日新康誥
曰六字牽上連下全無義理卽欲避熟趨生以防雷同勦襲何至
如此割裂請 敕禮部定議有似此命題小巧者據實查參議處
上是其言下部議四川考官罰俸如例四十年教習庶吉士四
十一年四月 上東巡回鑾駐蹕黃新莊景伊與在京大臣官員
迎 駕未候 召見俱已退班 上以景伊係協辦大學士永貴

係吏部尙書二人既散眾人遂尤而效之 命交都察院議處尋
議降二級畱任 上責都察院徇情改爲革職畱任四十二年五
月 命景伊與修明史各本紀十一月 諭曰前因四庫全書館
呈進各書每多稽緩經總裁等議設總校六員分司校勘各總裁
仍隨時抽閱以專責成本日召見程景伊據奏應進各書經總校
閱看後如總裁等全爲檢閱不特耽延時日且總校等轉得有所
推諉若不將如何抽看之處定有章程亦非覈實之道此後總裁
等於每十本內抽閱二本黏貼總裁名簽其未經抽閱者於書面
黏貼總校名銜如有錯誤各無可諉等語所奏自屬可行嗣後四
庫館校閱各書卽照此辦理各總裁等務宜悉心校勘毋致再有

舛誤十二月充 玉牒館副總裁四十四年十二月晉文淵閣大學士兼吏部尙書暫兼管吏部事務並充文淵閣領閣事國史三通館總裁是月濟甯州參革知州藍應桂呈請捐復景伊未詳覈情節率標先行侍郎和珅以應桂身爲州牧縱兩壻冒籍實屬私罪不應准其捐復奏參 諭曰程景伊於藍應桂捐復一事不與各堂官商酌竟標先行准其捐復辦理實屬錯誤朕姑不深究著交都察院議處尋議降一級抵銷四十五年正月 上南巡 命景伊畱京辦事三月教習庶吉士五月 上回鑾 召見景伊病後衰弱 溫諭安心調理勿勉強行走七月卒 諭曰大學士程景伊品行端醇老成練達歷膺部務懋著勤勞簡任綸扉正資倚畀

昨因其抱恙未痊特命加意調攝並屢次存問方冀速痊今聞溘逝深爲軫恤著派散秩大臣帶同侍衛十員前往奠醑應得卹典該部察例具奏 賜祭一壇諡文恭

右 國史館本傳

文恭瞻於詞章兼精吏牘初不以道學名而濂洛五子之教素所服膺故肫誠樸實頗知大體其見於詩者冲和真淡雖非風騷正則不愧有德之言

右蒲褐山房詩話王昶撰

國史文獻通考卷一百一十一

四

傅恆

傅恆滿洲鑲黃旗人姓富察氏曾祖哈什屯內大臣祖米思翰戶部尚書父李榮保察哈爾總管俱追封一等公傅恆李榮保第十子乾隆五年授藍翎侍衛歷遷頭等侍衛七年授總管內務府大臣管理圓明園事務八年擢戶部右侍郎十年六月軍機處行走十一年七月轉左十月授內大臣十二年二月充會典館副總裁三月晉本部尚書議政處行走兼鑾儀衛事六月充會典館正總裁十三年授領侍衛內大臣四月加太子太保協辦大學士六月充經筵講官時大兵征大金川逆酋莎羅奔經略訥親總督張廣泗等久無功九月命傅恆暫管川陝總督經略軍務尋晉保和

殿大學士 賜詩曰壯齡承廟略一矢靖天狼番部蕞爾蠶王師
武必揚慰予西顧久嘉汝赤心良捷伐枚么寇撫循集眾長斯能
成偉績用幹不庭方佇看銷兵氣敷天日月光 賜花翎二十藍
翎五十銀十萬兩備犒賞軍前諸將奏章許沿途開看 上御瀛
臺賜食及將士 詩曰大清聲教暨遐陬豈有來王稽蜀酋黷武
開邊非我志安良禁暴藉卿謀行軍吉值初陽復賜食恩同湛露
流轉瞬明年擒娑虜還教凱宴侑封侯十月傳恆啟行 上親詣
堂子行告祭典禮 遣皇子及大學士來保等送至良鄉視傳
恆飯十二月 諭曰經略大學士傅恆自奉命以來公忠體國殫
竭相忱紀律嚴明軍行甚速途次衝風冒寒晨夕馳驅兼辦一切

諮詢機務刻晷鮮暇常至徹夜無眠今日披覽來奏甫入川境馬匹遲誤減從星發竟至步行苟非一秉丹誠心擊金石安能若是將來迅奏膚功自當優議酬庸之典而目前之勞瘁實屬超倫著交部從優議敘部議加太子太傅 特命加太保仍加軍功三級傳恆疏辭不允初小金川土舍良爾吉奪其兄澤旺印烝於嫂阿扣莎羅奔之侵沃日也良爾吉實從之後詐降爲賊謀張廣泗惑漢奸王秋言使良爾吉領蠻兵我師舉動賊輒知之是月傳恆使副將馬良柱誘良爾吉來迎至邦噶山聲其罪斬之阿扣王秋並伏誅事 聞 諭曰前據張廣泗力言良爾吉王秋不可輕動卽軍前諸臣皆明知其罪而疑畏不敢先發今經略大學士傳恆甫

至軍營卽取兩年逋寇如檻豚豕以快人心而警番眾非謀猷明斷識力堅定曷克臻此卽此已當優敘但經略大學士於從前議敘之旨具摺懇辭若仍交部議敘無以善體冲挹之美其卽以前日所賜雙眼孔雀翎爲此番酬庸之典如仍執意謙讓是不遵朕旨也是月傅恆奏臣於十月二十一日抵卡撒軍營所云左右山梁不過兩坡相對地非甚廣賊所守各礮亦不甚大不知何以用兵二年不能進取及閱營地規模狹小與賊相望且雜處番民市肆中無以示威嚴占地利臣相度移舊壘前令總兵治大雄總理營盤以肅軍紀臣惟前之誤在於專攻礮卡賊險礮林立大兵至守益嚴毋論攻其有備克取爲難卽數日克一礮亦數年不能

竣事今當奇正兼施因機制勝或以奇兵繞出其後或以偏師另
行取徑賊出則直挫其鋒不出則專擣其穴又各路剋期齊進腹
背皆兵寢食無暇自必內潰而酋可擒矣疏入 俞旨報聞是月
傅恆率總兵哈攀龍哈尙德等攻右山梁下巴朗平礪及色爾力
石礪連克之 上以金川水土惡劣馳 賜傅恆人蔴三斤並及
諸將帥有差十四年正月 命班師 召傅恆還朝 諭曰金川
用兵一事朕本意欲禁遏兇暴綏輯窮番並非利其人民土地而
從前訥親張廣泗措置乖方屢經貽誤是以特命經略大學士傅
恆前往視師傅恆自奉命以至抵營忠誠勞勩超出等倫辦事則
鉅細周詳鋤奸則番蠻懾服整頓營伍則紀律嚴明鼓勵戎行則

士氣踊躍且中宵督戰不避風雪大著聲威誠克仰副委任朕思
蕞爾窮番何足當我王師經略大學士傅恆乃中朝第一宣力大
臣願因荒徼小醜久稽於外朕心實爲不忍即使擒獲渠魁掃蕩
巢穴亦不足以償勞此旨到日傅恆著卽馳驛還朝 詔封傅恆
一等忠勇公 賞給紅寶石帽頂四團龍補褂嗣傅恆請從卡撒
一路直攻噶拉依又言攻克賊巢旦夕可必一簣之虧誠爲可惜
堅請進兵並懇辭公爵繳還 原旨俱不允 諭曰經略大學士
忠勇公傅恆帥師進剿番酋忠誠奮發志期殄寇執奏再三朕揆
勢度理以允降班師休兵息民爲經國遠計彼匈奴未滅何以家
爲者乃驃姚貳師輩武人銳往立功之概大學士輔弼元臣抒誠

贊化名耀旂常正不必與兜鍪閫帥爭一日之績 示以詩曰三
面姑開格蜀夷來調說鼎佇期之集思廣益卿誠踐勤遠勞民我
不爲武豈黷兵應戒彼績惟和眾孰同斯功成萬骨枯何益壯志
無須效貳師又 賜詩二章其一曰安邊底績本丹忠請命番酋
勢已窮上將有心期利執大君無物不包蒙那須一月聞三捷早
覺千忻達 兩宮晉國勤勞子塵念速歸黃閣贊元功其二曰鷗
鳥何庸盡覆巢好生天地德含包歌成宵雅八章句善得同人九
四交兵洗蓬婆春澹蕩首稽獫狁面顏頤蜀民安撫勤籌畫心契
元良泰陞交是月逆酋遣頭人至卡撒稟訴乞降並畏死意傳恆
令曰莎羅奔郎卡親縛來營者當待以不死逆酋復遣頭人至丹

壩乞降總統提督岳鍾琪入賊巢擊酋目等由勒烏圍噶拉依至
經略軍二月初四日莎羅奔郎卡除道營門外設壇翌日率眾降
傅恆升帳受之莎羅奔等焚香作樂泥首請罪誓遵六事無犯鄰
封歸土司侵地獻馬爾却兒酋資送內地人納軍械供徭役傅恆
傳旨赦其罪莎羅奔等獻傅恆佛像一白金萬傅恆卻其金不
受初六日傅恆發軍營奏至諭曰經略大學士忠勇公傅恆奏
報莎羅奔郎卡俯首就降獻捷班師朕不勝欣悅此皆上蒼孚
佑宗社貽休有以默相朕躬皇太后懿訓詳明有以啟迪
朕志荷茲福庇感慶實深經略大學士忠勇公傅恆丹忠壯志
勇略宏猷足以懷柔異類迅奏膚功卽諸葛之七縱威蠻汾陽之

單騎見虜何以加茲實爲國家嘉祥上瑞前已晉爵封公酬庸更
無殊典所賜四圍龍補服著祇受服用再照元勳揚古利額駭之
例加賜豹尾槍二桿親軍二名優示寵章俱不必懇辭自去歲之
徵兵命將與今歲之決策班師初不意番酋畏威懷德革面革心
一至於此固朕宵旰憂勤事無大小先機籌畫恰合機宜亦由經
略大學士忠勇公傅恆秉心忠亮克承訓示成此殊勳可見作善
者昌將來數十年贊化調元懋襄邦治實嘉賴焉其傳諭諸王滿
漢文武大臣並宣示中外知之 製詩曰止戈爲武信其然我澤
如春經略宣其喜捷音來玉闕何殊俘虜自金川番酋路左心傾
服軍士行間氣倍鮮單騎汾陽休比擬都因忠赤格穹天嗣傳恆

疏辭四團龍補服 諭曰經略大學士忠勇公傅恆因朕賞給四團龍補服具摺奏謝並請於朝賀大典之日遵旨服用其尋常仍服公品級補服此固出於大學士忠勇公傅恆謙沖本意然朕此番獎賞實出至公且具有深意不可不爲明晰宣示蓋論大學士公傅恆平定金川之功自不可與揚古利額駙開國之功並論但彼當開拓四征之始今屬守成無事之時以大學士公傅恆之忠誠智勇練達宣力令與同時同事亦必能懋建殊勳可信其易地皆然也夫軍旅之事國家不能保其必無大臣身係安危爲社稷所倚賴如張廣泗不過封疆外吏其人亦不足論至訥親爵位旣崇又任用有年朕之加恩超越儕輩上年命伊視師實寄以心膂

如朕親行不意辜恩貽誤一至於此爲大臣者若惟是儉安自逸
任意乖張國事其何賴焉朕旣用以自愧更因以滋懼是以明正
典刑不肖曲宥而大學士公傳恆見朕縈懷西顧欣然請行仔肩
重任自奉命西征冒涉風霜均勞士卒登陟巖阻晨夕辛勤拜發
封章裁決軍務常至達旦且事事妥協周詳至則申明紀律誅賊
腹心雪夜督師攻碉毀卡必期焚巢掃穴一舉蕩平大振聲威賊
番震懼始稽顙歸命出於三誠迨承朕旨納降班師星馳就道諮
詢庶務仍係丙夜辦理奏覆此所謂誠貫金石信格豚魚是以時
未七旬兵不血刃而番酋洗心革面永矢歸誠從此邊徼敉甯閭
閻樂業而中外大臣咸知所取法股肱一體休戚相關夙夜匪躬

緩急足資倚任實我大清萬年無疆之慶國家酬庸盛典原非朕
所得私今茲疊沛殊恩昭示風勸亦爲朝廷遠大之計不爲金川
平定一時一事而然大學士公傅恆實應欣承無愧否則莎羅奔
番蠻小醜卽迅奏膚功亦與當年岳鍾琪之樹績青海大學士鄂
爾泰之綏靖苗疆等耳朕於臣工刑賞大典悉有權衡銖黍不爽
天下臣民宜所共悉所賜大學士公傅恆照宗室公式之朝帽頂
及四團龍補服並於朝賀典禮之時時常服用不必懇辭其尋常
入朝入部辦事應從所請隨宜卽用公品級補服以成謙挹之美
三月傅恆凱旋 命皇長子率諸王大臣等郊勞旣至 上御殿
受賀行飲至禮 賜傅恆詩曰卡撒功成振旅歸昇平凱宴麗晴

暉兩階下拜欽虞典六律宮商奏采薇湛露應教頌朵殿甘霖更
慶徧春畿持盈保泰咨詢切偃武修文懍敕幾又 諭曰朕賜大
學士忠勇公傅恆四團龍補服先經大學士傅恆奏請於朝賀大
慶之日遵旨服用尋常仍用公品級補服朕諭以入朝入部辦事
姑從所請以成謙挹之美今日朕升殿禮畢後大學士卽易補服
朕思章服之榮原以旌有功而勵臣節從前勳舊大臣蒙賜者皆
時常服用若僅用於朝賀典禮之時而尋常入朝又旋易本爵服
色殊覺參差非禮嗣後入朝著卽遵前旨時常服用其入部及在
家聽其自便以終成大學士之謙吉尋 敕照勳臣額亦都佟國
維例建宗祠祀傅恆曾祖哈什屯祖米思翰父李榮保春秋官爲

致祭追謚李榮保曰莊恪 賜傅恆第東安門內落成 賜詩曰
驃姚賜第落成新歌凱歸來得意春上將鷹揚今奏績諸軍崑藻
久懷仁攸芋君子熊羆夢畢駭酋渠匍匐臣從此坐調熙世鼎敷
予教澤萬方均二十年六月準噶爾平 諭曰西路興師之舉人
心狃於久安在廷諸臣惟大學士傅恆與朕協心贊畫斷在必行
著加恩再授一等公爵以爲力矯積習爲國任事者勸傅恆疏辭
諭曰大學士公傅恆以加賞公爵具摺奏辭情詞懇摯及召見
又復面陳再四至於泣下並稱金川之役叨封公爵已爲過分觀
其不自滿假信出至誠實將來可以永承恩遇之道朕心轉爲嘉
慰俯允所請用成厥志所有平定金川及準噶爾奏捷兩次功績

著併於見封忠勇公敕內以昭懋典仍從優加等議敘部議加六級後圖功臣百人像於 紫光閣傅恆冠首 御製贊曰世胄元臣與國休戚早年金川亦建殊績定策西師惟汝予同鄩侯不戰宜居首功七月克平定準噶爾方略正總裁三十二年 命經略雲南軍務至師期前往 御製言志詩曰征緬非人事竟乖重資經略重臣差待之一歲無消息懾以三軍或畏懷中止誠難存國體邊防欲靖豈兵佳佇期指日大勳就後舞前歌振旅皆三十四年二月傅恆啟行懇辭 親遣經略儀注 命閣臣頒敕命於太和殿 上賜傅恆及出征諸將士食卽席 製詩曰緬酋弗靖擾滇邦螳臂居然試筵撞健騎重驅厄魯部驍材兼選黑龍江弼予

中國原無二平彼今時豈有雙就事熟籌應一往於浮得挈勝千
扛必能合眾成城奏早具牽牛肉袒降湛露和風士冕藻佇看飲
至酌金缸三月傳恆抵雲南四月至騰越 上親書扇以賜之曰
炎徼熾煩暑軍營區畫頻大端應悉記細務不辭親世上誰知我
天邊別故人勛斯風到處揚武並揚仁初 上以賊踞老官屯之
險 敕造舟並奪賊船順流直擣副將軍阿里袞等以邊外峽紆
湍險舟楫不通沿江亦無辦工所奏止者再後 特遣傅顯佐三
泰往視所言與阿里袞等同傳恆至軍詢之撫夷李景朝土司線
官猛等知變暮近地有山曰翁古多木旁有地曰野牛壩野人所
居地涼爽無瘴野人樂受值執役甚恭使傅顯佐莅事滿洲綠營

兵並從行奴僕更番運料至江岸七月竣狀 聞 諭曰所辦甚是他人斷不能似此滿洲兵騎射素嫻進剿時自宜資以馬力至於習勞之事則與綠營兵丁既同隸行閒原不應區分彼此向特因綠旗惡習恇怯無能臨事每多退避是以有犯必懲若其服役辛勤當與滿洲兵一體愛惜以均勞逸前此領兵大臣惟知體恤滿洲而於奔走服役專派綠營不復念其獨勤豈一視同仁之道今傳恆於運送船料令滿洲兵輪流乘騎分擡不使綠營偏於勞瘁並以大臣官員跟隨之家奴等乘馬安行於理未協亦同例分派輪擡籌辦實爲公當綠營兵稍具天良有不知感激奮勉願爲國家出力者乎此實從來所未籌及自非公忠體國與朕同心之

大臣豈能酌理揆情均平妥協若此凡有領兵之責者皆當奉以爲法傅恆如此存心必蒙上天所垂佑迅奏膚功自可預卜朕深爲嘉悅至於造船一事水陸並進實征緬最要機宜乃朕屢次詢問而阿里衮並以該處崖險淵窄難行船爲詞卽朕今年特派傅顯佐三泰等前往專辦此事亦以沿江一帶實無造船處所覆奏傅恆至永昌卽遣人往勘則於銅壁關外野牛壩地方卽係成造船隻之處樹木足供船料且氣候涼爽可以屯聚兵丁而野人又極恭順服勞無異內地編氓同此沿邊僻壤非自今日始通何以前此並無一人見及而傅恆得之便於取攜可見事無難易人果專心致力未有不成者無如諸人皆預存畏難之見於胸中

遂以爲隔闕不可行以今日傳恆所辦觀之向所謂斷難籌辦者
然乎不然乎將此宣諭中外知之 上賦造舟行曰造舟造舟何
處禡乃在銅壁關外野牛壩緬匪險據老官屯必資水軍順流下
用是屢敕預刳木率以難成中止罷經略盡心博訪諮得地得材
命工價猶然邊外豈異區事在人爲語非假野人效順氣爽涼頗
覺炎瘴輕往夏忠誠 天佑有如斯我亦爲之額手謝昇至蠻暮
乃入江諸事從公堪獎藉閩人使船如使馬鼓勇艤艫凌波駕水
陸兼進緬豈當定知肉袒牽羊迓安民和眾武常經不爲所欺不
妨赦猛拱大頭目脫猛烏猛及所屬達羅頭目脫猛殼來降請備
船濟師傳恆令脫猛烏猛齎檄諭各土司八月師發騰越渡戛鳩

江據西岸遂抵允帽九月脫猛烏猛以夷目賀丙之父賀洛及擺夷四十戶來降請探賊猛拱後土司渾覺亦率頭目滲籠籠滲籠朋降貢馴象四 上賜傅恆詩二章獎之其一曰猛拱輸誠舟濟師朱波早自失藩籬烏梁海譬先收附準噶爾斯易埽夷身先諸軍其辛苦心嘉碩輔佛肩仔秋霖中喜瘴江渡巴僂兵行兩月期其二曰伊犁耆定久戈弢詎緬昏狂事疥搔昔實謨猷贊帷幄今資奔走效弓刀東山那學謝安逸上蔡還過裴度勞佇待紅旗飛報捷重開紫閣勒勳高十月傅恆取道猛拱破猛養寨獲臘泥拉賽誅之設臺站畱瑚爾起兵七百駐之遂至南董干攻南準寨獲頭目等木波猛等三十五人師次暮臘猛養頭目扎達布棗猛拔

營逸哈坎大兵長驅至新街賊遁傅恆夾攻於東西岸射殺賊目
一斬級五百餘獲纛一船一寨三糧械無算西岸奪寨三斬級五
十奏至 諭曰此次初與賊人接仗卽射殪頭目殺賊眾多又連
破賊壘奪獲纛幟軍械米糧等物軍行甚爲順利且官兵俱各勇
往朕心甚爲嘉悅應加恩示獎送部分別議敘傅恆以所獲緬纛
進 上賦誌事詩曰師會新街可進航賊人迎拒據蘆塘數番斫
陣賊鋒挫兩隊奪舟我武揚斬將舉旗嘉此眾水凶土劣慮其方
老官屯得當振旅觀象玩辭易義長十一月傅恆進圍老官屯克
毛西寨酋情駁遣頭目諾爾塔乞降傅恆以其地候惡劣疏請允
降 諭曰緬甸僻在炎荒中朝以化外置之乃歷任總督自張允

隨廢弛邊備嗣是愛必達吳達善等亦因循致滋邊釁而劉藻辦理莽匪侵擾九龍江事由思南退回普洱輒行畏懼自戕緬匪遂鳴張無忌此歷來貽誤情形也至命楊應琚前往調度乖方致賊匪入關騷擾土司其種種欺謾屢飭不效取罪實在於此及再命明瑞前往仍命以總督經理邊情並未速欲興師遠涉而所統八旗勁旅一萬二千又分其半與額爾登額由旱塔一路取道合剿迨明瑞自錫箔蠻結拔寨殺賊乘勝深入轉戰至小猛育爲時已久屢促額爾登額移兵往援乃敢抗延不赴又復紆道內地明瑞等猶沿途接仗期殿全師竟以策應不前捐軀以殉其事遂難中輟彼時緬酋懵駭雖曾具書軍營懇停進剿而所遣乃內地被雷

之兵丁許爾功等八人並未專派大頭目齎表乞降此則國體所關豈宜輕納是以置之不答然猶冀其悔罪輸誠尙可宥其既往非必欲勞師動眾爲犁庭掃穴計也詎待一載逆酋猶頑梗怙終我國家當全盛之時豈可任小醜跳梁不示懲創況滇省綠營惟怯積習久爲賊匪所輕而阿里袞等亦未能相機部署是以調遣吉林索倫等慣能殺賊之人並閩省水師同赴滇省水陸夾攻又因大學士傅恆屢請前往督辦其實心體國經畫有方體察形勢所言始爲可信遂命爲經略往莅其事此朕不得已用兵之苦心也至傅恆於七月間自騰越進兵視前此師期較早兩月賊匪未及預防因得由夏鳩一路統兵直進收取猛拱猛養而其所經山

徑崎嶇江河紆阻越險濟軍備嘗勞瘁且刈敵糧不藉內地轉餉及至新街會兵策勵將士無不買勇爭先於江岸沙洲連奪賊寨殲賊五百餘並殪其頭目獲取舟航器械皆望風披靡如此殫誠宣力不畏艱險實從來大臣所罕覩者及進次老官屯率眾攻勦而賊所拒甚固遂克毛西寨誅戮賊眾絕其糧援復悉力圍其大寨勢可計日而取但其地水土惡劣官兵多生疾病卽領隊大員亦間有染患身故者將士等不用之戰陣而徒令其嘗試毒厲於心實有所不忍是以半月前卽迭傳諭旨決計撤兵今傅恆等奏緬酋憤駁奉有蒲葉書遣老官屯大頭目諾爾哈齊詣軍門籲請貸其聲討傅恆等移檄使受約束義正詞嚴姑從所請賊眾甫經

創卹諒不敢遽萌故智至傅恆請罪一摺以爲力違眾議執意請
行將此次出兵引爲一人罪殊爲未喻朕意此次出兵非好大喜
功而傅恆承命經略職分應爾設以爲辦理非是朕當首任其過
其次方及傅恆豈宜獨以爲己責昔 皇祖於吳三桂一事 諭
令廷臣集議而主撤藩者惟米思翰明珠數人後逆藩抗命眾皆
歸罪議撤之人 皇祖諭曰朕自少時以三藩勢燄日熾不可不
撤豈因吳三桂反叛委過於人大哉 聖言足爲萬世法守傅恆
此事卽可援以爲例前於傅恆收服猛拱時曾賜三眼孔雀翎以
示褒寵傅恆懇俟功成後再用今旣未經攻克賊巢前所賜翎卽
著繳回仍用伊原戴之翎卽此於伊請罪之意適足相當想王大

臣等亦當誠心允服也 上賦誌事詩曰大勝新街武略張勵師
進取靖豺狼雖云示創蠻江地適有相求貝葉章已自畏威而懷
德底期內袒與牽羊樊鄉悉怛非嘉畫渾覺優恩俾樂康十二月
緬酋懽駁遣大頭目十四人獻方物於軍三十五年二月班師三
月傳恆還至京七月卒 諭曰大學士一等忠勇公傳恆才識超
倫公忠體國德心孚契襄贊深資自早齡侍直禁近親覘其器宇
非常洵膺委任旋以金川建績錫爵酬庸用是擢冠綸扉綜理庶
務盡誠靡懈罕有其比西旅之役獨能與朕同志贊成大勳及崇
爵再加堅讓不受尤足嘉焉昨歲進剿緬甸傳恆堅決請行朕以
萬里懸軍情難深悉而廷臣更無可當斯寄者因授爲經略統率

勁旅專征傅恆白夏鳩濟師以後身先士卒艱瘁備經用能收服
猛拱迨會師蠻暮襲擊新街斬馘擐旗賊皆潰竄遂進攻老官屯
時傅恆已身染沈疴猶力疾督勵兵眾晝夜兼攻剋期可下逆酋
畏懼具書懇請解圍而朕亦因其地水土惡劣軍中多病先期降
旨撤兵並遣醫馳驛往視春間傅恆於天津行在復命見其形神
頓異隱慮難以就痊猶冀其安居調理以臻勿藥詎自五月以後
病勢日益加劇漸成不起每朝夕遣使存問賜以內膳羹糜俾佐
頤養復間數日親臨視疾見其有增無減軫念彌殷今聞溘逝深
爲震悼所有衾襚之屬業經從優頒賜似此鞠躬盡瘁允宜入祀
賢良祠賞給內帑銀五千兩治喪並著戶部侍郎英廉經理其事

朕仍親臨奠醑其應得卹典著該部察例具奏 上親臨其第酌酒 製詩曰瘴徼方欣輿病迴侵尋辰尾頓增哀鞠躬盡瘁誠已矣臨第寫悲有是哉千載不磨入南恨半途乃奪濟川材平生忠勇家聲繼汝子吾兒定教培又 命喪葬儀節視宗室鎮國公例行 賜祭葬有加禮諡文忠十一月 諭曰大學士忠勇公傅恆曩者金川奏績時以其祖父世篤忠貞流光鍾慶曾諭令建立宗祠自其曾祖哈什屯以下官爲春秋致祭傅恆令其一體入祠酬庸俎豆三十六年 上巡畿輔 駐蹕天津行宮傅恆前歲復命處也追憶之 詩曰去歲滇南力疾回恰斯面晤憶生哀樸齋卽景依然也前席言人何往哉自古同爲閭世客祇今誰是作霖

材自憐無助涓埃者後進方當竭力培三十九年 上以 蹕途
所經 賜奠其墓賦詩曰佳城咫尺蹕途旁莅土因之酬桂漿已
歷廿年資輔弼又驚三載隔陰陽先茲與汝應相恨後此顧予轉
自傷無忘昭陵雖有例那教賜奠痛文皇四十五年 上賦懷舊
詩以傳恆在綸扉二十三年日侍帷幄盡誠素著年未五十鞠躬
盡瘁以喪甚傷惜之詩曰世臣更近戚丹誠素所信命之習政
事幹材亦日進金川往經略旌旗改觀奮然其時其勢未宜深入
迅耶卡既怖誓特許歸降順凱旋贊黃閣章服三錫晉西師兩用
兵同心卻眾論坐謀無不協用藏大功建其後征緬甸力請往扞
盡猛拱既收服官屯進圍困祇以水土劣兵役多病頓值彼悔罪

請爰撤師旅振然因受瘴深兼悔墮功悶遂以永辭世飾終典空
綵嗟我社稷臣所期甯在近年少長於余騎箕惜且恨傳恆子四
人長福靈安多羅額駙乾隆二十一年傳恆請派往軍營效力授
三等待衛在 乾清門行走如所請往軍前二十四年從定邊將
軍兆惠剿賊於葉爾羌敘功擢二等待衛八月 詔來京準噶爾
大功告成 上以福靈安非披堅執銳之歲卽能奮勇行陣屢著
勤勞擢頭等待衛 賜緞六端銀百兩二十七年 給雲騎尉世
職三十二年授正白旗滿洲副都統署雲南永北鎮總兵四月赴
木邦軍營守龍陵會緬匪犯猛卯檄副將哈國興馳援賊退遮罕
事聞 上嘉之六月卒於任 諭曰副都統福靈安去冬奉命前

往雲南朕因其從前征勦回部宣力行間諳習軍務是以暫畱彼處令其察看軍務以便回京時面奏嗣以其行走奮勉勇往任事特授爲副都統並令署永北鎮總兵統兵進勦今據明瑞奏福靈安前從永昌力疾趨赴木邦中途病勢加劇復回永昌調理不痊於六月初旬身故朕心深爲軫惜著加恩交部議卹所有應得卹典該部察例具奏其靈柩還京著官爲照料辦理 賜祭葬如例所遺雲騎尉世職以其姪襲傳恆次子福隆安和碩額駙封一等忠勇公官兵部尙書別有傳又次子福康安見官協辦大學士吏部尙書仍畱兩廣總督任封一等嘉勇公又次子福長安見官工部尙書隆安子豐伸濟倫見襲一等忠勇公爵官副都統在 御

前侍衛行走

右 國史館本傳

金川爲漢冉駝地隋置金川縣唐屬雅州至明隸雜谷安撫司其地高峰插天層疊迴複中有大河用皮船筏橋通往來山深氣寒多雨雪所種惟青稞蕎麥其番民皆築石砌以居與綽斯甲布等九土司壤相接康熙中內附後莎羅奔以上舍率兵從岳威信公征羊崗有功雍正元年授爲安撫司莎羅奔旣得官號自號大金川以舊土司澤旺爲小金川於是有兩金川之稱莎羅奔尋以女阿扣妻澤旺旺懦爲妻所制乾隆十一年莎羅奔劫澤旺歸十二年又攻革布什咱及明正土司時制軍慶復用兵瞻對土司草率

完局頗不當 上意巡撫紀山覬覦其位遂主用兵進剿之說
純皇帝壯其請紀山因命副將張興倉卒進兵反爲所敗 上知
紀山不足有爲慶復又以班滾事被逮因 命滇督張公廣泗改
督川陝主勦金川張故老將初隨鄂文端公征苗所向披靡因易
視金川與諸苗寨相等夷遂慷慨覆 旨謂旦夕可以奏功調兵
三萬分兩路由川西進者攻其河東噶依諸巢穴由川南入者攻
其河西諸碉卡副將馬良柱已乘勝攻克遜克遜賊眾讐服累具
稟請降張公以小醜故毀書辱使務期擣其巢穴又因馬未請命
而戰因檄調馬還改以他將賊乘勢建築巨碉蓄糧養銳我兵阻
於險隘終不得進張公泥於前奏不敢據實入告仍以期於冬盡

殄滅醜類爲言至十三年春諸將反多失事張興爲降番所誘被
戕噶固士兵與賊交鋒游擊孟臣死焉張公復以增兵練餉爲請
上疑其妄乃命大學士訥公親往督師岳威信起自廢籍授總
兵銜命岳公由丹壩取勒烏圍張公由昔嶺取噶喇依議甫定而
訥公至訥故近臣望族負上恩寵銳意滅賊遂諭軍中期以三
日取噶喇依違者以軍法從事諸將身蹈鋒火總兵任舉副將賈
國良噤焉訥自是不敢言戰仍倚張公辦賊張公復輕訥不知兵
而事權出已上陽奉而陰伎之諸將無所稟承率觀望不前訥復
密劾張公袒庇黔兵輕信胡士勇諸款時莎羅奔之弟良爾吉在
我軍中張公爲其所愚倚爲心腹反爲賊之耳目軍中動息賊悉

先知早爲之備故兵老氣竭株守半載無尺寸功 上大怒立逮
張訥二公先後明正典刑 命傅文忠公爲經略將八旗勁旅復
調吉林黑龍江諸趨捷之士以從傅文忠臨行時 上親禱明堂
張幔以宴公 親酌之酒 命於御道前上馬設大將旗鼓軍
容頗肅 命將之典實近代之所罕覩者公既至軍任治軍門大
雄爲總統凡張訥誤算者咸更置之壁壘爲之一新又偵知良爾
吉之奸召至幕中責其貳心之罪立置於法人皆畏懼又於雪夜
攻克堅砌數處察其道路險峻非人力之所易施據實奏 聞
上亦知羣鼠穴鬪無須勞我兵力會 孝聖憲皇后降懿旨以休
兵息民爲念賊亦畏懼具稟於岳威信公代爲乞降傅文忠公命

岳公來會師岳公乃袍而騎從者十三人直入蕩喇依賊巢莎羅奔等稽顙膜拜衷甲持弓矢近公公目莎羅奔故緩其轡笑曰汝等猶識我否眾驚曰果我岳公也皆伏地請降爭爲馬前導入帳中奉茶湯進公飲盡卽宣布天子威德待以不死之意羣番歡呼頂佛經立誓椎牛行炙畱公宿帳中公解衣酣寢如常次日莎羅奔率子郎卡入傳文忠公營投降傳公擁蓮幕諸將士佩刀環侍岳公引二酋入跪啟事傳坐受岳公拜始呼二酋入撫以威德二酋戰慄無人色匍匐而出謂其下曰吾儕平日視岳爺爺爲天上神祇傳公何人乃安受其拜天朝大臣固未可量如此金川遂平傳岳二公凱旋上郊勞於黃新莊行抱見禮封傳文忠爲

忠勇公 賜雙眼花翎四團龍補服寶石頂紫韁轡並復岳公舊爵加威信二字以寵異之立碑太學大赦天下 詔與民休息焉
上既誅訥親知大權之不可旁落然國無重臣勢無所倚以傳文忠恆爲椒房懿親人實勤謹故 特命晚間獨對復 賞給黃帶四團龍補服寶石頂雙眼花翎以示尊寵每遇事必獨攬大綱文忠承 旨奉行毫不敢有所專擅 上尙時加訓迪一日 御門文忠後至踉蹌而入侍衛某笑曰相公身肥故爾喘吁 上曰豈惟身肥心亦肥也文忠免冠叩首神氣不甯者數日故當時政治寬厚無侵擅之弊焉

錢文敏公維城中乾隆乙丑狀元選爲清書翰林公性聰敏以

國書爲易學遂不復用心至散館日輒曳白 純皇帝大怒曰錢維城以國語爲不足學耶乃敢抗違定制若此將置於法傅文忠公代請曰錢某漢文優長尙可寬貸 上召至階下立命題考之公倚礎石揮毫未踰刻輒就 上異其才命南書房供奉後遂游升至戶部侍郎寵眷甚渥云

傅文忠公恆以椒房勳戚當朝軸者幾三十年惟以尊奉前輩引擢後進爲要務故一時英俊之士多集於 朝如孫文定嘉淦岳威信鍾琪盧巡撫焯等皆起自廢棄田里畢制府沅孫文靖士毅阿相國爾泰阿文成桂皆公所賞識者後皆爲封疆大吏其子文襄王復以英年擁節屢鎮邊隅累世三公門多故吏殊有袁氏之

風聞公款待下屬每多謙沖與其同几其榻毫無驕汰之狀汪文
端公死公爲之代請得廕其子承霈爲部曹舒文襄公籍沒遣戍
公代贖其宅俟其歸而贈之故人皆感佩其德久之不衰然恩怨
分明頗奢靡視盧懷慎之布衣脫粟呂蒙正之休休有容殊有愧
於昔也

國初諸勳臣以開拓大功 賜紫者不乏其人乾隆中閣臣則傅
文忠恆福文襄王康安阿文成桂和相珅勳戚則福駙馬隆安福
尙書長安超勇親王拉旺多爾濟海超勇蘭察皆 賜紫色輿服
嘉慶中慶文恪公桂德繼勇楞泰額經略勒登保以平定三省教
匪功亦 賜紫焉

國初勳臣功績偉茂多有 賜雙眼花翎者乾隆中 賜雙眼花翎者閣臣爲傅文忠公恆尹文端繼善兆文毅惠舒文襄赫德于文襄敏中阿文成桂和相珅福文襄康安孫文靖士毅勳臣爲富勤勇德伊□□勒圖海超勇蘭察永制府保覺羅制府吉慶和制府琳嘉慶中得 賜者閣臣爲保文恪甯慶文恪桂勒相公保勳臣爲明參政亮額經略勒登保德繼勇楞泰那制府彥成惟彭軍門承堯王軍門得祿以綠營將佐得雙眼花翎之 賜尤爲 寵遇優隆以槃之不肖於九齡時卽蒙 純皇帝賜雙眼花翎實爲千古榮遇至今思之猶感激涕零云

右錄宗室昭槃撰

蘇凌阿

蘇凌阿滿洲正白旗人雍正十三年由監生考授內閣中書乾隆六年中式繙譯舉人十年由中書擢江蘇鎮江府理事同知調江甯十六年遷揚州府知府丁母憂回旗十七年在吏部員外郎上行走十八年授江西贛州府知府二十四年升福建糧驛道二十七年因失察邱子位私刻偽印議降尋以閩浙總督楊廷璋保題送部引見奉旨仍以道員用尋授甘肅甯夏道二十九年因奏銷造冊遲延議褫職奉旨發往甘肅以知府用三十年補涼州府知府三十一年擢浙江溫處道四十一年調江蘇蘇松糧道四十三年調安徽廬鳳道旋調江西南贛道時全德權九江關稅

爲發其弊卽調廣饒九南道兼管九江關監督四十四年因造報積備補平銀兩冊內作爲備帶添平未能聲晰部議降一級調用恩賞三等待衛銜赴英吉沙爾辦事四十九年回京補吏部員外郎五十年正月署正白旗漢軍副都統三月署兵部侍郎五月調鑲白旗滿洲副都統五十一年授工部右侍郎九月調戶部侍郎十一月奏言大通橋額設車戶運送各倉漕糧分別道里遠近給與腳價向係車戶自雇民車應用近年以來草料昂貴車價倍增而大通橋拉通屏值較少民車惟利是趨以致雇覓維艱明歲到塘漕糧較之全漕年分尙多百餘萬石似此亟應量爲置辦官車二百輛設廠四處專供起運照運例給與腳價漕竣之時仍聽

其自行攬載仰懇 聖恩先行賞借通庫銀兩辦理卽於車戶等
應得腳價內分年勻扣歸款 上命軍機大臣議奏從之旋因收
兌漕糧辦理妥速奉 旨議敘者再五十七年擢刑部尙書兼鑲
紅旗漢軍都統五十八年正月管理戶部三庫五月調正藍旗滿
洲都統五十九年授兩江總督十一月奏挑濬丹徒丹陽二縣運
河以利漕運得 旨嘉獎時邪匪首逆劉之協煽惑愚民 上命
各疆臣訪緝蘇凌阿奏稱大張告示懸賞緝拏奉 諭申飭先是
劉之協經豫省另案關提安徽太和縣差役余洛等解至徐溝縣
逃逸嘉慶元年正月 敕諭曰蘇凌阿今年八十曾於上年命軍
機大臣存記俟伊生日題奏加以賞賜今蘇凌阿於審訊余洛一

案未能悉心研鞫余洛等所控情節從前亦未據奏聞蘇凌阿辦理此事既如此草率不應再受渥恩是以伊生日竟不加以賞賚著傳旨諭知蘇凌阿嗣後惟當益加儆惕亟圖改勉七月豐汛隄工六堡漫溢籌辦堵築宣洩事宜嗣因既合復開請治罪上命奮勉堵合將功抵過二年正月江西巡撫陳淮緣事被劾命會同戶部侍郎台布按之署江西巡撫讞定回總督任十月授東閣大學士兼署刑部尚書四年正月諭蘇凌阿年老龍鍾和珅因係和琳姻親且利其昏憤充位藉顯己才伊年逾八旬起跪維艱豈能勝綸扉重任著以原品休致三月命守護裕陵十月卒

右 國史館本傳

梁國治

乾隆丁未秋八月大學士梁文定公之喪歸於浙適珪將按試湖州遇之於塘西旣哭公於舟其孤以公年譜泣而請銘珪不獲辭案梁本羸姓其先出於伯翳由新昌而遷於豐山之梁巷邨者曰國鎮公稱東梁至公十有七世爲會稽人曾祖諱廷仁祖諱一能考諱文標官刑部陝西司主事後皆以公貴累 誥贈如公官妣陳太夫人初公考官刑部司獄恤囚有陰德曰彼自麗於法耳何爲瘼苦之下獄者皆德梁君已而生公諱國治字階平號瑤峯有兄國泰早卒事嫂馮甚謹官戶部侍郎時以己官封焉公年十歲居陳太夫人喪如成人十四以制義書法見賞於學使崔公紀籍

順天通州入學第一人十七丁外艱十九舉乾隆辛酉科鄉試明年考取內閣中書改歸本籍戊辰會試中式殿試一甲一名賜進士及第授職修撰珪登公榜同爲翰林官未幾以繼母吳太夫人憂歸乾隆十六年散館十九年遷國子監司業二十一年充丙子科廣東正考官復命奏對稱旨命往廣東以道員用明年補惠潮嘉兵備道二十六年恭祝皇太后萬壽至京以卓異引見特旨署都察院左副都御史以魏科清望出試吏事至是超擢卿貳聞者翕然明年主壬午科江西鄉試視學安徽擢吏部左侍郎三十年調江蘇學政提唱羣雅鑑別茂異江南北士蔚然宗之會以署廣東糧道失察折色事牽連落職就勘明年事白

授山西冀甯道三十二年授湖南按察使時珪司臬湖北公道經
武昌登蛇山巔浮白談契闊終日不及塵壘事三十三年授江甯
布政使明年擢湖北巡撫兼署湖廣總督及荊州將軍印是時官
兵征緬甸振旅過境公躬勞拊且鎮之序行無譁奏定施南府屬
宣恩來鳳咸豐利川學增額有差三十六年調湖南巡撫公以經
術飾吏治清風惠氣不媿以孚三十八年 特旨內召直軍機處
署禮部侍郎珪致書於公曰閣下以封疆大吏入贊密勿願以清
吏源培民脈端士氣三言爲獻公不以予爲迂也三十九年 命
直南書房補戶部侍郎自是 召對扈從無閒昕夙充經筵講官
賜紫禁城騎馬第宅冠服之 賚便蕃有加四十二年典順天

鄉試擢戶部尙書四十七年加太子少傅明年以原官協辦大學士歲庚子甲辰再以扈 駕南巡 賜假省墓鄉黨榮焉五十年與千叟宴於 乾清宮殿上夏授東閣大學士兼戶部尙書以文學受知在 帝左右敬慎縝密寵利不居潔躬冲度粹然儒者在昔有宋龍首入黃扉者九人有明一代十有七人而我 皇臨御五十餘年以來邁其三焉公躬際 文德武功之盛雍容大雅退食澹泊有不愧讀書宰相者其天性學養皆不可及也公體素清癯五十一年仲冬望日疾作 上遣醫官暨侍衛傳 旨存問越月十三日壬子考終奏 聞 上軫悼晉贈太子太保 命皇子往奠 賚白金千兩治喪 賜諡文定公始終承 眷惟其端醇

勤慎信之者深也詩文著錄若干卷彙藏於家配徐夫人生一子
和凝先卒筮唐孺人生子五承輿議敘州同爲世父後卒承雲
欽賜舉人承翼卒承綸承福女幾人孫幾人某某公生於雍正癸
卯年十月二十一日卯時終於乾隆丙午年十二月十三日巳時
年六十有四某年月日葬於紹興南門外乾溪之五臺山銘曰
文曜降斗麟題鳳苞守器在 廟天球赤刀元功無名大美不佻
當無有用去來逍遙芑爾世德稽山之椒

右墓誌銘朱珪撰

世祖撫定華夏習知前明闈宦之弊故立鐵牌於 交泰殿戒內
官不許干預朝政其官不過四品皆隸內務府總管歲時謁見如

堂司制頗有周官冢宰統攝之制 純皇帝乾綱獨攬防馭內官
尤嚴有高雲從者稍干涉外事 上遵 章皇旨立時磔死若輩
皆懷然敬畏利相雖貪黷無狀然制內官最嚴其軍機隨侍嘗有
背呼梁文定公名者和聞之奮然曰梁爲 朝廷輔臣汝輩安可
輕之立杖數十命與梁叩謝乃免故當時寺人頽首惟命是從近
日內務府大臣多由僚屬驟遷又無重臣兼領故敬事房總管輩多
與諸大臣分庭抗禮無復統轄之制至蘇大司空楞額曾對眾曰
今日尙未見吾都堂雖一時之謔語亦可覘風氣矣

右錄宗室昭棟撰

朱珪

朱珪順天大興人乾隆十三年進士改庶吉士十六年散館授編修十七年大考二等擢侍講二十二年充日講起居注官二十三年大考二等擢侍讀學士二十四年三月京察一等記名八月充河南鄉試副考官十月以平定回部奉命告祭南嶽衡山二十五年三月充會試同考官七月授福建糧驛道二十八年十月升福建按察使二十九年九月丁父憂三十二年二月服闋補湖北按察使時大兵征緬甸奏言滇省軍報由楚省南境經襄陽縣之漢江呂堰等驛出楚省北境臣逐站選驗夫馬度量遠近分設腰站十六處並查勘南北大江及小溪渡河共九道分設船隻

國朝通志卷之二十一
於渡口晝夜輪候並飭各站較驗時刻明立賞罰俾緊件隨到隨
遞得 旨嘉獎三十三年三月調山西按察使三十四年二月升
山西布政使七月奏保護城工事宜略言晉省土性不一宜修築
者爲粘土黃土立土不宜修築者爲鹹土沙土黑土又取水有遠
近或近水有鹹遠水無鹹承辦不力不得辭咎查原辦官保固三
十年立法至爲詳盡而各員多已易任接任之員以爲責有攸歸
漫不經意漸致隕朽嗣後責令見任各員勤加葺護按季報明上
司如有因循玩愒將原辦官及見任地方官一體參處分賠奏入
下部議行三十六年十月 命護理山西巡撫旋以入 覲時
上諭巡撫鄂寶居官如何奏對失實虛詞延譽傳 旨申飭十二

月奏平陽府屬之霍州踏溝孔道政務衝繁直隸州吉州一缺所屬鄉衛一縣僻處山陬民瀛事少請將吉州改爲散州與鄉衛縣並隸平陽府管轄又奏籌土默特當差官兵盤費並新開牧地米石請改准折色以便民除弊均得 旨下部准行四十年五月命來京陛見尋授翰林院侍講學士充明紀綱日纂修官復充日講起居注官四十一年五月 命在上書房行走侍 今上皇帝學時初置文淵閣直閣事以珪充之四十三年三月充會試同考官四十四年二月充四庫全書館總閱五月 命爲福建鄉試正考官四十五年京察一等記名八月授福建學政進五箴於 今上皇帝其曰曰養心曰敬身曰勤業曰虛己曰致誠四十七年九

月升詹事府少詹事四十八年 命稽察右翼覺羅事四十九年
扈從 南巡授內閣學士兼禮部侍郎 命閱召試卷四月充殿
試讀卷官十月充武會試總裁五十年三月升禮部右侍郎六月
充江南鄉試正考官八月授浙江學政五十二年五月轉禮部左
侍郎五十三年八月調吏部右侍郎五十四年十月 命充經筵
講官五十五年三月充會試副總裁七月授安徽巡撫五十七年
二月以安徽民人程菊刀傷胞兄程紹章身死案律應擬斬立決
聲請從輕 諭曰此等不過刑書開脫故智最爲外省陋習各督
撫皆所不免但朱珪本係書生尤好爲此迂闊多活一人積陰德
之見遇事從寬所謂婦寺之仁實屬非是朱珪著交部議處七月

奏請修臨淮鄉土壩埝添建五孔石橋一座宣洩水勢奉 旨派山西巡撫長麟由驛前赴鳳陽會同朱珪確加履勘尋查出橋工經知縣墊銀修竣前任巡撫何裕城批飭不准橋壩同時修辦故未經據實申報珪誤認尙未興工冒昧具奏自請交部治罪部議降一級調用得 旨從寬畱任五十八年十二月 諭曰昨日安徽巡撫朱珪進御製說經文閱其後跋以朕說經之文刊千古相承之誤宣羣經未傳之蘊斷千秋未定之案開諸儒未解之惑頌皆過當但歷舉朕敬 天法 祖勤政愛民各大端見諸設施者與平日闡發經義實有符合語皆紀實並非泛爲諛詞朱珪於御製古文紬繹推闡能見其大跋語尤得體要殊屬可嘉著賞給筆

墨等件以示獎勵五十九年四月 諭曰朱珪進御製論史古文
後跋以朕論史之紬繹推闡有用史成經紹六爲七之語朱珪跋
語固非鋪張揚勵泛爲諛詞究屬稱頌過當觀其文義尙爲典嚴
著賞給紗扇筆墨等件以示獎勵此冊並著皇子皇孫各繕一部
豫備觀覽五月調補廣東巡撫九月 諭曰朱珪進御製紀實詩
十二函內編排門類列敘案語具見用心審密所撰進書表文摘
詞比事亦屬典嚴惟過於頌揚於朕兢業自持維日孜孜之意尙
覺歉然觀其屬辭命義尙爲雅則茲賞給御筵扇一柄紗匹筆墨
等件以獎其勵學十二月 諭曰朱珪進呈御製幾餘詩一部朕
略加披覽係繕錄御製詩章分門別類編輯成帙可謂用心細而

措詞當該撫應辦地方要務甚多若專用心於筆墨之事恐致政務轉不免疏漏豈朕簡畀封圻之意除頒賞荷包筆墨鏤錠外著傳諭朱珪務須盡心政務以察吏安民爲重不可緩其所重用心於無用之地嗣後亦無庸再行纂辦進呈惟當悉心民事以期無負委任六十年二月 上釋奠 文廟禮成 臨幸辟雍 御製詩四章 特命珪恭和進呈又以辦理盜案認真得 旨交部議敘尋 命兼署兩廣總督四月授都察院左都御史暫畱巡撫任八月升兵部尙書仍畱巡撫之任十二月奏英吉利入貢使臣有送總督禮物一分告以天朝大臣例不與外夷交接得 旨嘉獎嘉慶元年恭值 授受禮成珪撰進詩冊 諭曰朕閱朱珪所進

詩冊措詞冠冕得當其頌揚處不忘箴規尙得大臣之體且二十五有韻內難押者居多今百韻成篇不致牽強是其學問素優著賞給顧繡蟒袍大小荷包以示優眷二月 諭曰朱珪奏擊獲洋盜審明定擬二案既引立斬梟示之例而於文昌縣擊獲之犯僅將陳阿養一犯先行立決其餘四犯及另案三犯皆擬斬決聽候部議以致往返稽遲朱珪近日督緝洋匪屢獲多犯朕方喜得人曾加獎勵何以此二案辦理拘泥又不脫書生習氣著傳 旨申飭六月擢兩廣總督兼署廣東巡撫尋奉 旨朱珪著來京另候簡用七月 諭曰昨據和琳奏孫士毅在四川西陽州病逝將來大學士缺意欲卽以朱珪補授但此缺須一月後方始題請特先

降旨諭知朱珪不必因有來京之旨心存疑慮見在京中並無應辦之事朱珪不必急於來京兩廣總督仍應朱珪署理朱珪在廣東巡撫任內辦理一切本爲熟悉今復奉有恩旨尤應感激奮勉倍加認真不可存五日京兆之見有負委任一切洋盜更應嚴辦大學士員缺除俟屆期明降諭旨外將此先行傳諭知之八月諭曰前因大學士缺出朱珪科分較深學問素優人亦端謹是以降旨令其來京原欲將伊補授大學士乃節據魁倫奏到粵東艇匪駛至閩浙洋面肆劫是朱珪於署總督任內不能認真緝捕咎實難辭本當治以應得之罪姑念其操守尙好前任安徽巡撫辦理尙無貽誤茲特加恩仍令補安徽巡撫十一月諭曰吉慶奏

緝捕洋匪設立章程俱合機宜朱珪等從未見似此之奏鈔寄閱看並將在粵時何以不照此章程之處明白回奏嗣奏言臣兼署總督辦洋盜粵閩夷匪同案同船者不少俱奏明正法前督臣長麟製米艇九十三隻分作東西中三路配足兵械於冬令委員駕巡臣以米艇纜索桅蓬日久不能堅固趕修驗明連幫出洋此臣辦理之大略也又臣於本年五月因調修出洋米艇曾捐銀五千兩茲請再捐養廉一萬五千兩解交廣東藩庫爲隨時修理之用報 聞二年三月升兵部尚書八月調吏部尚書均仍畱安徽巡撫之任三年 諭曰本年京察屆期朱珪以尚書署理巡撫有年且學問尙優著交部議敘四年正月 諭曰朱珪著來京供職珪

行抵王桂卽馳於日竊臣於正月十一日接奉 諭旨召臣還京
見封面標用藍筆手掉心搖不知所措因未奉明文不敢冒昧謹
將交印起程日期馳奏忍泣銜哀見星奔路十七日行抵王莊臣
齋捐差官回跪闕 諭旨詢實 太上皇帝龍馭上昇膽裂呼天
角前投地欽惟 大行太上皇帝十全功德五福考終傳器愜心
於昭在 上我 皇上純性超倫報天罔極竊聞定躬行三年之
喪此舉邁千古而行萬世至於 郊壇 宗社越縉行事禮有明
文並行不悖然而以繼志述事爲大親政伊始遠聽近瞻默運乾
綱濟施溪號陽剛之氣如日重光惻怛之仁無幽不浹刻刻以
上天之心爲心 祖考之志爲志思修身嚴誠欺之介於觀人辨

義利之防君心正而四維張朝廷清而九牧肅身先節儉崇獎清廉萬物昭蘇天佑民歸自然盜賊不足平而財用不足阜也臣早蒙先帝特達之知擢遷中外舊侍皇上承筆之側親切光輪十載睽離五中鬱勃聲隨淚涌忱豈言宣惟願我皇上恆久不忘堯舜自任之心臣敢不隨時勉行義事君之道既至 召見於承恩殿 命直南書房管理戶部三庫事務 賜 大行皇帝遺服四團龍褂四開襖袍一件奉 旨在紫禁城騎馬 賜第一區於西華門外加太子少保銜充 實錄館正總裁兼國史館副總裁三月 命充經筵講官會試正總裁五月 命教習庶吉士八月 命管理武英殿御書處事務以編修洪亮吉投遞書札語涉

狂悖未卽呈出奉 旨詢查自請嚴議得 旨朱珪平日人品端正從寬交部察議議上降三級調用奉 旨從寬畱任十月調戶部尙書時屢奉 諭旨清釐漕政嚴禁浮收等弊外省俱以旗丁運費不敷需索州縣州縣不得不取諸民於是江督有上江加增贈銀下江加增耗米之請事下部議珪以小民未見清漕之益先受加賦之害力議主駁 上是之十二月 命爲上書房總師傅五年三月議駁長蘆鹽政奏請加增鹽價閏四月議駁廣東藩司奏請將濱海沙坦地畝照上中二則民田一律升賦均奉 旨依議五月尙書彭元瑞下直墜馬珪與同行徑命人舁輿入西華門乘坐而出經御史周枻奏參奉 旨交部議處是月署兵部尙書

八月兼署吏部尙書九月諭曰順天鄉試尙書朱珪之孫朱涂入場應考未經中式朱珪前在上書房行走曾授朕詩文且敷歷有年恪共厥職見在伊孫祇朱涂一人其試卷文理亦尙無大疵著加恩賞給舉人一體會試朱珪當益勤課訓俾伊孫力學上進以副朕恩施造就至意是月失察轎夫與門兵爭毆奉旨交部嚴加議處議上諭曰朕惟敬勝者吉古訓昭然朕寅承大寶於天人交感之際朝乾夕惕以主敬爲本卽接待臣工猶時存敬大臣之念況人臣奉上恪恭佐理尤當各循止敬之道不可稍有疏忽年來屢降諭旨整飭朝儀申嚴門禁初非欲過示尊崇實以堂廉之分本自秩然近年過於忽略幾不知君臣之辨若不判以等

威何以爲萬世子孫臣民法守朱珪前在上書房行走小心恭謹於在書房之皇子皇孫無一不出於敬上年內召來京朕疊施優眷朱珪亦深以謙抑自持惟本年夏間因彭元瑞在禁城內墜馬跌傷將彭元瑞所乘之轎喚入西華門昇出彼時朱珪見彭元瑞墜馬昏迷難以扶掖又因其轎祇數武遽行喚入雖一時倉卒不暇詳思殊不知咫尺禁門不容稍越究難辭疎忽之咎旋經御史周棻劾奏其言甚正是以將朱珪交部議處今朱珪復有轎夫在西闕門禁地酗酒爭毆戩打護軍擻斷槍杆之案卽由伊轎夫滋事而西闕門禁地僅距西華門咫尺可見平日恪謹如朱珪者造次之際稍不自檢不數月閒遂有此事未必非默倣其疎忽轉爲

朱珪之福此據感應之理而言非徒神道設教之謂大小臣工可不共知懍惕收斂身心斯須不忘恭敬乎部議將朱珪降二級調用本屬咎所應得惟念朱珪平日爲人謹飭此案祇因約束不嚴致望吏議其轎夫向銀庫廚役折給飯銀亦屬失於查察朱珪著革去太子少保不必管理三庫事務仍加恩改爲降三級從寬畱任尋以部議粵東省歷任督撫司道捐廉成造米艇巡緝洋匪得力遵 旨分別議敘查得珪任兩廣總督時捐銀二萬兩以上准加三級奏上奉 旨朱珪著加三級畱任六年四月充會典館副總裁十一月 賜元狐端罩七年充殿試讀卷官八月奉 旨以戶部尚書協辦大學士仍加太子少保銜八年二月 上謁 陵

命畱京辦事六月兼翰林院掌院學士並以原銜充日講起居
注官七月 上幸避暑山莊復 命畱京辦事九年正月晉太子
少傅二月 上幸翰林院聯句 賜宴 御書天祿儲才額 賜
珪並摹刻懸院中七月暫攝管理國子監事務十月 命進所刊
知足齋詩集二十卷十年正月授體仁閣大學士管理工部事務
上以是命也實遵 高宗純皇帝諭 命叩謁 裕陵謝恩並
賜題知足齋集四首詩曰丙歲承 恩手敕傳待時 考澤敬
敷宣科名翰苑推元老學業綸扉倚大賢定卜 示慈千載久執
經蒙訓十年先調羹贊化資師相一德臨民體 昊乾三天受業
邁恆榮廊廟班聯冠六卿黃閣新春開黼座絳帷昔日共書城德

崇益勉虛能受任重彌思寵若驚名選金甌早 簡在亮工熙績
總無營新築沙隄董庶官七旬頌彥願加餐惟公常勛爲君要顧
我深知莅政難無欲神全三壽永有容德大九霄寬蒼生竚待施
霖雨啟沃推誠求治安健筆千章涅不緇雄詞夙荷 聖人知日
新三德新宣室時進五箴舊講帷學杜師韓言有物說經詠史論
無私精研六義諧風雅游夏誠難贊一辭旋充國史館會典館正
總裁三月充會試正總裁旋以奉 命帶管二阿哥師傅不應具
摺謝 恩退出上書房行走十一年七月 上幸避暑山莊奉
旨畱京辦事九月 賜玉鳩杖並頒 御製詩云憶昔丙申年三
天從函丈身心受益多識見資開廣舊承講論功今賴絲綸掌鶴

髮望飄蕭丰神倍清爽始近下壽旬康強久培養健步固未妨視
履應策杖入朝領班聯佳話羣欣仰廊廟多老臣啟沃善日長願
彥冠瀛洲純嘏期頤享旋奉 旨以天氣漸寒朱珪俟日出後入
直遇臨幸離宮不必復來卽御門句到奏事日期俱不必侍班閒
二三日入直書房候召對十一月 上在乾清宮將御座珪忽病
眩暈不省人事御前大臣恐其失儀命太監等扶出太監等卽用
木凳自月華門昇出 上遣醫官診視旋經領侍衛內大臣奏參
交部嚴議部議革職奉 恩旨念其衰病趨直一時昏迷從寬畱
任並賞假兩月調養十二月初五日卒奉 上諭大學士朱珪持
躬正直砥節清廉經術淹通器宇醇厚受 皇考高宗純皇帝特

達之知由詞垣補授道員洊歷兩司內用爲侍講學士 特命入直上書房朕講貫詩文深得其益嗣以卿貳出任封圻有守有爲賢聲益懋迨擢至正卿 皇考卽欲用爲大學士朕親政後召令還朝在上書房侍直有年簡任綸扉深資啟沃凡所陳奏均得大體服官五十餘年依然寒素家庭敦睦動循矩法不愧爲端人正士倚畀方殷本年入秋以來因患病稍久氣體就衰朕優加眷念賜杖賜輿時加存問朱珪感戀彌殷時時力疾進內朕鑒其誠悃特行給假兩月俾得安心調養疊遣御醫診視冀得就痊正擬日內親至伊邸宅視疾茲遽聞溘逝深爲悼惜朕於初六日親臨賜奠先派總管內務府大臣阿明阿齋賜陀羅經被並著慶郡王永

璘帶領侍衛十員前往奠醊追維舊學良用軫懷著晉贈太傅
祀賢良祠賞給內庫銀二千五百兩經理喪事其任內一切降革
處分悉予開復所有應得卹典著該部察例具奏次日 聖駕親
臨哭奠既旋宮復 諭曰昨因大學士朱珪溘逝業經降旨加恩
因思乾隆年閒惟故大學士劉統勳蒙 皇考高宗純皇帝鑒其
品節 賜諡文正易名之典備極優隆顧劉統勳於總督任內曾
經獲咎褫職復蒙 皇考施恩錄用至朱珪在朝六十餘年外而
敷歷督撫內而存直綸扉身躋崇階從未稍蹈愆尤絕無瑕玷靖
恭正直歷久不渝猶憶伊官翰林 皇考簡爲朕師傅爾時朕於
經書已皆竟業而史鑑事蹟均資講貫其所陳說無非三代唐虞

之言不特非法弗道卽稍涉時趨之論亦從不出諸口啟沃良多
揆諸諡法實足以當正字而無愧毋庸內閣擬請著卽賜諡文正
本日朕親臨奠醑見其門庭卑隘清寒之況不異儒素嗟念遺風
愴懷未已著於本月初九日由內務府備辦飯卓派二阿哥前往
代朕賜奠俟殯送時派慶郡王永璘前往祖奠日送以示朕眷懷
舊學哀榮備至之至意並御製詩十二韻曰丙歲從函丈相依
三十年清風常晉接正誨日敷宣先帝褒忠直百僚仰俊賢贊
襄期永弼啟沃願長延抱疾猶趨侍養痾冀速痊忽驚千古別難
遣寸衷悃攀馭朱邱表騎箕絳闕邊棄子辭禁苑隨聖麗霄躔
德化銘心久良猷篤志堅半生惟獨宿一世不貪錢述實五言挽

抒悲三爵連臨喪虛設醴痛結淚傾泉 命南書房翰林黃鉞敬
錄於初九日往靈前焚之先是珪病亟時作芻獻詩二首歿後
上召對諸大臣詢珪臨終有何遺言諸臣以芻獻詩對 上卽命
以手書草藁呈覽並 詢年例應貢冊葉向有跋語令進呈 賜
祭葬十二年三月 諭曰朕展謁 西陵道經畿甸原任大學士
朱珪之墓距蹕路數里追維哲輔逝已三月瞻眺松阡中心愴惻
著派侍郎英和於本月初五日前往賜奠以達朕懷 御製詩曰
碩彥嗟頽壞臨風歎奈何經邦言總正論道益誠多代奠心隨往
躬行禮寶過雲煙結神想西嶺望嵯峨是月 高宗純皇帝實錄
告成 諭曰前大學士朱珪在館八年懋著勤慎著加恩賜祭一

壇伊長子朱錫經原任戶部郎中俟服闋後以四品京堂用二十
年二月 諭曰明春朕恭謁 西陵回鑾時蹕路總由北惠濟廟
拈香因懷故大學士朱珪墳塋坐在該處附近面諭那彥成查明如
距御道五里以內卽親往茲據那彥成覆奏在御道四里以內屆
期朕由黃新莊至北惠濟廟紆道親行賜奠用達眷懷舊學之意
二十一年三月二十一日 上臨珪墳園賜奠 御製誌感詩曰
講帷昔年共五箴誨早垂入閣贊機務輔治惠澤施方期久論道
豈料身騎箕永別候十載路便親酌卮荒村不封樹儉德後代遺
灑淚乘驢去回望縈悲思 篤念舊學光及泉壤 恩遇之隆古
所未有也子錫經洵官太僕寺少卿十五年卒孫涂江蘇候補道

右 國史館本傳

嘉慶十有一年冬十有二月甲戌朔越五日戊寅大學士大興朱公薨春秋七十有六 天子震悼 賜禭 賜賻追贈太傅祀賢良祠 賜諡文正翌日 乘輿臨奠慟哭賦抒痛詩越四日 命皇次子代設饌醴及殯 命慶郡王詣邸祖送戊戌葬我文正公於西山呂邨之阡與陳夫人同兆禮也公之孤錫經既敬立 賜碑於墓遂致書公門下士某請表神道嗚呼公以文學受知 高宗而爲 今皇帝師 兩朝一德孚嘉至神其造膝前席丹青於錄圖讒鼎之側喉舌於金椎玉鏡之間者不可得而詳也其經德秉哲爲夷夔之女聽女明兼僑肸之遺愛遺直者乃可得而述也

公諱珪字石君號南厓先世浙江蕭山人曾祖必名祖登俊知長陽縣有惠政復知珙縣內遷中書科中書考文炳始籍順天大興知盤屋縣除無田浮糧且萬家陝人賴之公以神童連掇高第與叔兄筠齊名通籍翰林再更大考累踐華資出入極地爲糧驛道一按察使三布政使一學政二巡撫三總督一翰林侍講一學士二少詹事內閣學士吏禮侍郎左都御史吏戶尙書各一兵部尙書二管理工部一經筵講官太子少保二掌院學士太子太傅協辦大學士體仁閣大學士各一河南福建江南考官各一會試同考官二總裁三殿試讀卷官二乾隆四十一年還自山西行省高宗以公貞良方幅 命傳 今上發揮 聖智緝熙天光嘗進

五箴曰養心曰敬身曰勤業曰虛己曰致誠每違承華輒叨 手
札委曲綢繆家人恩禮其後輯爲寶軸百三十有九件恭納廣內
直石渠 臨制雲臺入對 先帝敷巾機盤孟之訓公亦講尹誥
說命之篇 天心愉悅願語 上曰此汝師傅講說最高授安徽
巡撫 謂軍機大臣曰朕今日所擢得人嘉慶元年授兩廣總督
將相公尋以治安南艇盜緩左遷復爲安徽巡撫四年正月 上
在諒闇首 召公還道中上疏曰臣聞天子之孝不以毀形滅性
爲奇而以繼志述事爲大 親政伊始遠聽近瞻默運乾綱霧施
渙號陽剛之氣如日重光惻怛之仁無幽不浹孜孜以 上天之
心爲心 祖考之志爲志思修身嚴誠欺之介於觀人辨義利之

防君心正而四維張朝廷清而九牧肅身先節儉崇獎清廉萬物
昭蘇天佑民順則盜賊不足平而財用不足阜也惟願 陛下恆
久不忘堯舜自任之心臣敢不隨時勉盡仁義事君之道是時
上方未明求衣倚公如棟不數年卒相公公見 朝廷捐金沈珠
損上益下而軍役煩耗彙謀補苴故毅然以黜抑言利爲先務居
戶部日江南大吏議漕請加上江贈銀下江耗米章下省皆畫諾
矣公獨奮筆糾駁以爲按較舊徵數實逾倍漕政未清民力先病
奏 可於是江淮無漕患五年春長蘆鹽政請增鹽價公首駁之
以爲比年蠲緩商力漸息故事鹽稅以錢易銀錢賤或量增鹽價
項錢已貴不可議增奏 可於是畿輔無鹽患夏廣東布政司請

升賦沙田視民田上中二則公又駁之以爲濱海淤洲朝溢夕減
令甲科賦至輕以招闢墾否則輸納必困民將自危奏 可於是
海南無沙田患九年冬倉場侍郎請豫徵民稅四五十倍准作義
監生賜復終身公又駁之以爲名乖實傷甚於枉尋直尺奏 可
於是人知法制定而名器重凡累駁議手草存省中公之持重爭
大體略如此其苞涵也仁義甘於芻豢忠信寶於金玉山川在抱
桃李不言天球赤玉國之寶鎮慶雲景星天無濁氛少失恃養於
庶祖母李事之如母祿養無桷棘之傷喪哀有蓼莪之廢恭兄而
旦暮參問睦族而榮獨波及閨門友悌人無閒言其綴學也壺奧
先聖筮簣百家探奄中之墜簡餐東杼之祕寶遇 國有大慶祝

釐獻愷辟雍巡守之儀驅染河海吐納嵩華 先帝諷相如之文
覽崔駰之頌未嘗不撫華寒實壯其瓌璋數 命皇子皇孫錄副
陳設文集及奏御之作八卷已刻者知足齋詩集二十卷 今上
賜詩爲序其砥節也身無奇衣室無嬖侍宦五十年寒素同儉按
察福建時海澄公黃仕簡劾疆吏受賂洋商 朝遣尙書舒赫德
侍郎裘曰修治之惟公不染當路傾風及藩山西撫安徽廣東府
藏關市天下脂膏未嘗受山陰之一錢愛黎陽之一璞是以清白
可遺祭醑無所 玉步莅止蠶然傷悲其賦政也清淨循黃老優
緩近寬霸髦髦然求與所部去奢從儉克己勤民六計斯察百城
咸勸其有水旱饑饉處業賑贍奔走勞徠腹我邦人曷不眾母其

謚刑也於閩治僞官逆書獄於楚治聚眾獄於粵治海盜獄皆不
爲繳繞多所全活丹筆無枉黃沙幾空是以觀里端之籍而惡子
懼思芟舍之仁而甘棠愛其造士引賢也慎湛於蘭茝屏繡於鞞
悅見一善則揚眉遇一才則扼腕瞻山淵而識珠璞被咳唾而生
毛羽試四五百人數日便決有房暉達之敏焉條七十二事古學
遂行有謝文儀之功焉嘗謂爲國莫重得人事君莫大薦士故推
轂長者抽拔廉吏前後表舉口薦遂登臺閣擁節旄負聲才望者
不可一二數先是公墜坎傷左脰 上遣醫視使者存問八九至
去年復病因乞休 上慰勞不許 賜杖 賜輿病篤給假居第
易簣前三日作詩二章曰芻獻嗚呼可謂忠愛終始矣公感 兩

朝眷寵職在論道閭閻惻惻動出至誠然而入則告謨出不言政
天下想聞風采求多於公意其儒服醞藉蹢躅雞廉而已比卒
上再下詔褒公正直其所陳說無非唐虞三代之言又流涕謂羣
臣曰師傅每言多從寬大然後知公所以股肱堯舜甄陶周召陰
福天下施於無窮非 聖人孰能鑒公之微耶 清興以來公卿
大臣謚文正者睢州諸城及公三人而已舊學厯臣道豐遇渥蓋
莫若公之盛焉某咨度禮制竊謂閎閎次第賚予恩私門屬之籍
政事之蹟冊誅之詞則紀諸國史家牒乃若甄綜言行近慰後昆
罔極之思遠照絲世罔門人小子事也嗟我宿德如何勿銘銘曰
於戲我公五辰陽春九州伊維繩中煬和體大物博鬱爲時棟尊

爲 帝師 前聖 後聖股肱是毗公之溥厚 純皇信之曰朕
得人擢之方鎮泰山出雲雨人不知餒者得哺寒者得衣公之簡
易吾 君親之 純皇卜甄遺於朕身子弼于迪三代唐虞但覺
嫵媚幡幡贊贊公翔瀛洲萬篇琳琅天下譽公謂公文人公據槐
鼎祿階垂紳天下訾公謂公具臣公究參同黃庭金經有諂公者
仙佛前身諂豈公好訾豈公校譽豈公知我求諸道靈沒夙夜憂
國忘老上質於天旦爽允蹈天不憖遺奪公猶早謙論無聞 帝
心則悼生榮死哀尸祝其報高山景行永晞堂奧

右神道碑銘陳壽祺代某撰

懿夫唐虞之際仲尼致歎堯舜之道孟氏所陳然則際兩朝授受

之盛備元輔公孤之隆謨明弼諧非道不言 聖天子納所啟沃
以爲帝德且極尊師重道之誠徹乎始終乎於中外者非太傅朱
文正公曷克膺此公諱珪字石君號南厓晚號盤陀老人元至元
閒遠祖福三居浙東明洪武閒德三遷蕭山黃閣河遂爲黃閣河
朱氏八傳至公高祖尙綱明末官游擊曾祖必名祖登俊我 朝
官湖北長陽縣知縣中書科中書父文炳陝西整屋縣知縣始遷
籍於順天大興三世皆以公貴 贈光祿大夫太子少保戶部尙
書曾祖母白祖母何馮母徐皆一品夫人公以雍正九年正月十
二日生於整屋縣有兄三堂垣筠公祖與高安朱文端公同省爲
知縣相友善清名亦相埒公父受經於高安故公十一歲卽傳高

安之學年十三丁母艱孺哀毀疔服除補附學生年十七科試第一舉於鄉與叔兄齊名震都下公卿爭延之次年會試中式 賜梁國治榜進士出身改庶吉士習 國書座師阿文勤公劉文正公鄂剛烈公皆以學行重之乾隆十六年散館第一授編修明年大考二等授侍講二十三年大考二等授侍讀學士公所撰進文冊陳宮中 高宗純皇帝亟賞異之特達之知實始於此二十四年主河南鄉試復 命旋奉 使告祭南嶽登祝融峯明年充會試同考官秋授福建糧驛分巡道抵閩兼攝福州府事毀和台等諸淫祠民大驚服二十八年 特旨擢福建按察使兼署布政使閩人裘白位假平臺灣功請武職獄連數十人公誅正犯一人諸

受欺者皆不坐有告家譜妄逆者讞之僅戮一撰譜者屍不坐其子孫二十九年秋丁父憂戴星奔至京口阻風哀號祭江風驟轉抵京治葬於二老莊阡三十二年服除補湖北按察使時緬甸用兵公司驛務無遲誤無擾累楚北亂民聚眾公鞠之不少縱然脅從者皆得免三十三年調山西按察使明年授山西布政使秋奏立保固城工法令後任隨時修護如隕在三十年內與原築官分賠下部議行三十六年暫代巡撫事奏改吉州爲散州與鄉甯并隸平陽府改霍州爲直隸州以趙城靈石隸之又奏撥歸化綏遠二城穀十萬餘石配放兵糧以省採買而免紅朽奏免土默特蒙古私墾之罪以所墾無礙牧地三千一百餘頃許附近貧苦兵民

認耕納租歲六千餘兩增官兵盤費奏太僕寺牧地苦寒宜改徵
本色爲折色以便民除弊皆下部議行三十八年勘歸化城水災
奏撫卹之且予修費借穀種其民種蒙古之地并請卹之三十九
年按察司黃檢奏公終日讀書於地方事無整頓明年入 覲授
翰林院侍講學士四十一年 命上書房行走侍 今皇帝學時
初置文淵閣官 特授公直閣事主福建己亥鄉試四十五年督
福建學政將行上五箴於 今皇帝藩邸曰養心曰敬身曰勤業
曰虛己曰致誠 上力行之及 親政亦常置座右四十八年冬
還 朝明年扈 蹕南巡授內閣學士兼禮部侍郎閱浙江江蘇
召試卷五十一年授禮部侍郎主江南鄉試督浙江學政五十四

年置蕭山祭田百畝作圭田記冬還 朝充經筵講官五十五年
經筵進講時諸 皇子侍班 高宗純皇帝顧 今上曰此汝師
傅講之善春總裁會試秋授安徽巡撫 命馳驛賑水災乃攜僕
五人乘小舟與邨民同渡賑宿場山靈壁泗五河盱眙民以糧借
懷遠鳳台壽民以糧及種築決隄六十餘丈民乃安復請展春賑
分廠親給於民五十七年奏鳳潁水災 恩賞糧種免民欠萬五
千兩祁門縣築城成輕騎往驗之至新嶺有欲巡撫怒其歛縣令
屬掌亭人以饒餉進者公恬然飽之五十九年調廣東巡撫六十
年兼署兩廣總督旋授都察院左都御史兵部尙書皆畱巡撫任
英吉利國入貢呈土物於總督卻之嘉慶元年征苗調兩廣兵萬

二千親閱遣之夏授兩廣總督兼署巡撫六月降 旨內召曰將
欲用爲大學士也俄以閩浙總督魁倫奏粵東艇匪駛至閩浙乃
公總督任內不能緝捕之咎寢前 命仍加 恩補安徽巡撫鳳
陽等州有水災蒙 恩賑親給之官吏無敢侵者時楚豫多邪教
流言安徽有隱伏者公曰疑而索之是激之變也乃親赴界上籌
防禦徧莅穎亳等州城鄉聚長老教勸之徧張告示簡明諄切民
大感化故數年閒安徽無以邪教倡亂者明年授兵部尙書調吏
部尙書皆畱巡撫任宿靈壁水合肥定遠巢來安全椒旱親賑之
民無逃亡凍餒之苦明年蒙亳復水卹賑如之 高宗純皇帝上
賓於天 今皇帝初親政卽馳驛召公公哭且奔先上奏曰聞

太上皇帝龍馭上昇膽裂呼天角崩投地欽惟 大行皇帝十全
功德五福考終傳器愜心於昭在上我 皇上純性超倫報天罔
極竊聞定欲躬行三年之喪此舉邁千古而欽萬世然而天子之
孝不以毀形滅性爲奇而以繼志述事爲大親政伊始遠聽近瞻
默運乾綱濤施渙號陽剛之氣如日重光惻怛之仁無幽不浹思
修身嚴誠欺之介於觀人辨義利之防君心正而四維張 朝廷
清而九牧肅身先節儉崇獎清廉自然盜賊不足平財用不足阜
願我 皇上恆久不忘堯舜自任之心臣敢不隨時勉行仁義事
君之道 上嘉納之及至京哭臨 上執公手哭失聲旋 命直
南書房管戶部三庫自是凡 國家大政有所咨詢皆造膝自陳

不草一疏不沽直不市恩軍機大臣不相關白公第在外城遠且隘 賜第西華門紫禁城騎馬加太子少保充寶錄館總裁國史館總裁己未會試總裁冬調戶部尙書時 上禁浮收漕米之弊外省以運丁費仰資州縣州縣取民不得不浮於是安徽有加賦銀江蘇有加耗米之請部議將擬行矣公思之不寐綜其數較原徵加倍乃決計駁曰小民未見清漕之益先受加賦之害不可行並令漕司以後凡事近加賦皆議駁以體 皇上損上益下之意長蘆鹽政奏鹽價一斤加錢二文公駁曰前蘆東因錢價過賤已三加價又免積欠二百六十萬兩餘欠展三年商力自寬且今錢價漸貴所奏應毋庸議廣東布政司奏升濱海沙地賦公駁曰海

沙淤地坍漲靡常是以照下則田減半賦之今依上中田增賦是與沿海民計微利非政體且民苦加賦必多坍豁別有漲地亦不肖墾不可行後倉場衙門復請預納錢糧四五十倍准作義監生公駁曰國家正供有常經而名實關體要於名不正於實有傷斷不可行凡駁議皆親屬稟奏 上皆聽之五年秋兼署吏部尚書公之輿夫毆傷禁門兵免太子少保解三庫事復以彭文勤公墮馬西華門內公呼其輿入門舁之違例議降二級仍畱任六年陪祀祈穀壇未曙誤行墜甬道下傷左胯 賜醫 賜食絡繹於道遣內監齋 殊諭至第視病詢事公隨時覆奏三月小愈卽趨朝夏充會典館總裁閱殿試卷七年秋扈 蹕灤陽宣 制以戶

部尙書拜協辦大學士仍加太子少保銜公謝摺云豈有嘉謨嘉
猷入告我 后於內勉期無欺無隱仰惟上質於 天八年兼翰
林院掌院學士以原銜充日講起居注官春夏皆爲畱京辦事大
臣闕大考翰詹卷九年春用乾隆九年故事 幸翰林院先期晉
公太子太傅及 幸院 賜宴聯句 御書天祿儲才扁摹刻院
堂以墨蹟 賜公第公在翰林爲二十四科前輩資最深且掌院
事領袖清班瀛洲典故盛且榮焉十年正月宣 制拜體仁閣大
學士管理工部事 上以是命爲遵 先帝遺詔也命詣 裕陵
謝明年春公感寒多痰嗽步遲蹇肝火觸右目微眚 上曰此火
盛也可以游覽散之乃赴西山呂郵二老莊祭墓過戒壇潭柘諸

寺秋復祭墓游西山時公年七十六矣九月奏乞休 上曰待八十當爲壽旋 命戶部尙書戴公衢亨齋 賜詩十韻及玉鳩杖諭天寒間二三日入直且俟日出後至南書房候召對每 召對則 預定召對後期十一月庚午寒甚乾清宮 召對畢降階忽痰壅歸第 上遣侍衛領醫官來視疾疾少差 賜假兩月十二月乙亥坐外軒作芻獻詩有云天道神難測民心惟一中知人可安眾居所自持公 上將親臨公第丁卯復 命戶部尙書戴公來夜逾子痰盛氣微遽薨是五日戊寅也報 聞 上震悼泣諭朝臣 降制曰大學士朱珪持躬正直砥節清廉經術淹通器宇醇厚蒙 高宗純皇帝特達之知由詞垣擢補道員洊歷兩司

丙用爲翰林學士 特命入直上書房朕講貫詩文深得其益嗣以卿貳出任封圻有守有爲賢聲益懋迨擢至正卿 皇考卽欲用爲大學士朕親政後召令還朝在南書房倬直有年簡任綸扉深資啟沃凡所陳奏均得大體服官五十餘年依然寒素家庭敦睦動循禮法洵不愧爲端人正士倚畀方殷本年入秋以來因患病稍久氣體就衰朕優加眷念賜杖賜輿時加存問朱珪感戀彌殷時時力疾進內朕鑒其誠悃特行給假兩月俾得安心調養疊遣御醫診視冀得就痊正擬日內親至伊邸宅視疾茲遽聞溘逝深爲悼惜於初六日親臨賜奠已派總管內務府大臣阿明阿齋賜陀羅經被並著先派慶郡王永璘帶領侍衛十員前往奠醑追

維舊學良用軫懷著晉贈太傅入祀賢良祠賞給內庫銀二千五百兩經理喪事其任內一切降革處分悉予開復所有應得卹典著該部察例具奏己卯 上親臨奠三爵哭不止 回宮不待內閣擬諡 特賜諡曰文正復 降制曰昨因大學士朱珪溘逝業經降旨加恩因思乾隆年間惟故大學士劉統勳蒙 皇考高宗純皇帝鑒其品節 賜諡文正易名之典備極優隆顧劉統勳於署總督任內曾經獲咎褫職復蒙 皇考施恩錄用至朱珪立朝五十餘年外而敷歷督撫內而游直綸扉身躋崇要從未稍蹈愆尤絕無瑕玷靖其正直歷久不渝猶憶伊官翰林時 皇考簡爲朕師傅爾時朕於經書已皆竟業而史鑑事蹟均資講貫其所陳

說無非唐虞三代之言不特非法弗道卽稍涉時趨之論亦從不出諸口啟沃良多揆諸諡法實足以當正字而無愧毋庸內閣擬請著卽賜諡文正本日朕親臨奠醑見其門庭卑隘清寒之況不異儒素睠念遺風愴懷未已著於本月初九日由內務府辦飯一卓派二阿哥前往代朕賜奠俟殯送時派慶郡王永璘前往祖奠目送以示朕眷懷舊學哀榮備至之至意復撰抒痛詩十二韻命南書房翰林黃公鉞於殯前焚之丁辰 命禮部尙書承恩侯恭阿拉 諭祭公第距內西華門僅半里許 御蹕時出入禮不久殯乃以甲午啟殯庚子葬於二老莊呂邨舊阡陳夫人耐焉明年 御製碑文刻石阡門上巳日 上謁 西陵蹕路距公墓數

里 上遠眺松楸追懷愴惻 命工部侍郎英公和詣墓賜奠
高宗純皇帝實錄成以公總修八年 賜祭一壇長子錫經服滿以
京卿用禱哉 上之重賢傳任名臣納哲輔之益隆飾終之典至
矣非公之清介忠正師表人倫上致君下澤民曷克膺乎此哉公
豐厚端凝中和醇粹爲仁若渴抗義不撓坦白公誠絕無城府於
經術無所不通漢儒之傳注氣節宋儒之性道實踐蓋兼而有之
取士務以經策校四書文誠心銳力以求樸學經生名士一覽無
遺海內士心向往悅服佳士之文未薦被落者讀而泣之才士黃
景仁張騰蛟死稱悼之通人寒士必揚其名於 朝秦誓一个臣
之心公斷斷有之公領試事不受外僚贈遺不畱貧生銀布政數

省平餘銀鉅萬悉不取撫安徽裁蕪湖關陋規閩省洋商陋規事發欽使莅治獨公不受一錢公官於外厓岸廉峻中朝大官絕無所援管部事持大端不親細事數十年清操亮節人皆仰之公以孝弟爲仁之本事父愛敬本於天性父杖兄跪而以身蔽受之慟母氏早歿事庶母謝幾如母語子輩曰古人祭必有尸倣之以申吾慕非過禮也庶祖母李撫公有恩馳贈一品夫人事諸兄悲愉如一體別則夢見聚則聯牀兄之喪哭之咯血幾致毀事寡嫂盡敬撫諸兄子如己子三郤故交靡不周卹教子孫讀書敦行皆誠篤有公之風公嘗曰吾三十九歲夜坐忽腹間自暖由脊上貫於頂甘液自罅下注由是流轉至老不絕實因自致非關學力

乃知朱子注參同契本非虛語公年四十餘卽獨居迄無一妾
御製抒痛詩有云半生惟獨宿一世不貪錢知之深也公爲文筆
奧博沈雄 國家有大典禮撰進雅頌詩冊文跋 高宗純皇帝
必親覽之以爲能見其大頌不忘規或陳坐隅或 命諸皇子皇
孫寫爲副 聖製詩或寄示 命和公官督撫時 上在書房常
頌手札積一百三十九函裝六卷歸朝繳進 上亦書數年懷公
詩數十首爲二冊上冊題曰蒹葭遠目下冊題曰山海遙思以示
公公跋曰臣之蕪陋何足以當非常眷注惟有此心不敢欺耳於
大學義利之辨通鑑治亂之由天命呼吸可通民情憂樂無間反
覆敷宣不以爲迂闊而遠於事情也公文集若干卷知足齋詩集

三十餘卷元請刻公詩公命元選爲二十四卷 上命以刻本進
賜題七言律詩四首於卷首公被 先帝特賜蟒袍筆墨荷包
等物 今上賜大珠綠縫鞞黑狐裘袍 先帝御用四團龍褂四
開襖袍等物其餘 恩賚多不具書公配陳夫人宛平人思南府
知府邦勳女乾隆十四年來歸有婦德四十年八月以疾卒 贈
一品夫人生二子錫經己亥舉人一品蔭生官刑部員外郎遷戶
部郎中次錫緯附學生先公卒女子子一適通州馮秉驥秉驥官
張掖縣知縣孫涂庚申 欽賜舉人錫緯生女孫一適萍鄉劉元
恩吏部侍郎劉公鳳誥子也錫經生曾孫三甘霖香霖貫霖元不
才爲公門生受知二十餘年矣會持父服居鄉公之子書來命爲

碑文不敢辭秋免導服當執心喪敬按年譜及平日所知者泣爲敘銘曰

星精嶽神蔚爲 帝傳學正文明道深性固 先帝任公決於一
顧授鉞卜甌久隆知遇公遇盛時佐祁輔媯 君爲堯舜臣爲皋
夔經邦之道坐而論之非 帝宣綸世祕未知 帝曰調元資於
師相舊學交修天工寅亮溫樹之間青蒲之上蒼生被澤黃扉乎
望公之保民敷政優優公之儲材其心休休德如霖雨清比江流
庭不旋馬路無喘牛公有恆言並舉二事曰不嗜殺曰不言利公
之講史長編資治公之執經十章衍義幡然三公邁榮軼光乃不
愁遺而覲 先皇 帝憑和軾愴眺阡岡勒碑墮淚西山蒼蒼

右神道碑阮元撰

余里中吳孝廉重光乾隆辛卯閒謁選山西太原繼調陽曲陽曲故稱繁劇難治時大興太傅朱文正公任布政司使吳善屬文公不以俗吏待之時呼至署論文賦詩吳爲公搜訪金石古蹟修晉詞樹碑石極謹一夕急呼吳吳趨入公持一券謂吳曰吾奉命入朝計行李資需二百金特立券向君謀之吳唯唯不敢受其券公正色曰不受券是以賄交我也吳唯唯受券返明日以二百金面致公公欣然吳奉公之訓治陽曲頗有聲旋爲代州忽一騎自都中來齎二百金並公手書至索券去吳有門人范華春者亦余里中士也居吳幕親見其事己亥范歸里偕余應秋試渡江坐舟

中談及此事出公手書示余且曰自公去吳之治乃日窘矣越二十年嘉慶壬戌夏四月初四日余謁公於西華門之北池門外車如織大半皆海內寒士入門闐然如無人持刺至左閒門塾中告以求謁意一閤人起持刺入卽出曰主人坐待客君自入遂入左側門行花樹見公衣緋色舊袍凝立階上一童子扶之拱曰不可揖吾足病未愈也令坐於左公遂縱論經學理學旁及詩文無一外語余受教退公降階送出左側門至門塾外呼閤者曰更有何客來今日偶暇但延入吾必見也公命車余唯唯長揖退出巷外乃登車歸嗟乎如公者真所爲休休有容者也歲丁卯夏五月余病新愈阮大中丞使來以所撰公神道碑見示讀數過穆然於公

之爲人公主鄉會試余皆以故未與而獲居荅問之列亦用自幸也因述所聞見以附於不賢識小之義云

右神道碑後記焦循撰

參政兄弟少入翰林卽以高文典冊照耀蓬萊華蓋之間爲藝林所仰垂三十年然其尙名教敦清節世或未盡知也任山西布政使以方正爲巡撫所嫌謂其不能諳吏治由是仍改官翰林久之上深知其公正廉潔累擢用爲巡撫入長吏戶二部而愛才下士士以此望而趨之昔韓忠獻爲中正所歸而於元祐諸賢未嘗偏徇葉文忠爲清流眉目而於東林君子亦無私好參政蓋深得此意者也

同書考正類後不類
卷二十一

右蒲褐山房詩話王昶撰

三一

國朝耆獻類徵初編卷三十目錄

宰輔三十

劉墉

明亮

國朝耆獻類徵初編卷三十目錄

國朝耆獻類徵初編卷三十

通奉大夫前署江西巡撫江西布政使司布政使湘陰李桓輯
宰輔三十

劉墉

劉文清公墉爲文正公子少時知江甯府頗以清介持躬名播海
內婦人女子無不服其品誼至以包孝肅比之及入相後適當和
相專權公以滑稽自容初無所建白年八十餘輕健如故雙眸炯
然寒光射人薨時毫無疾病是日猶開筵款客至晚端坐而逝鼻
注下垂寸餘亦釋家所謂善解脫者余初登朝猶及見其丰度
一日立宮門槐柳下余問朱文正公五矢之目朱未遽荅公喟然

曰君子務其大者遠者君今以宗臣貴爵所學者自有在奚必津
津於象物之微者哉宜朱公之不荅也老成之見終有異於眾也

右錄宗室昭榘撰

英相國云公早歲迴翔館閣內通掌故中年敷歷封圻外嫻政術
故其言瀏然以整而又貫串乎經史宏覽乎諸子百家佛老小說
故其言高而不擷華而不緝雄而不矜透迤而不靡世徒震耀公
之書名疑若詞章非所兼擅者豈其然哉又云公初見和時卽詔
曰子他日爲余作傳當云以貴公子爲名翰林書名滿天下而自
問則小就不可大成不能年八十五不知所終和起立負牆曰願
吾師爲召康公公曰貪也迨嘉慶甲子歲公年八十五矣臘月二

十二日倮直南書房適和在 懋勤殿作書公呼至告以雍正至
乾隆初南齋舊事復理前作傳語且云昨已屬瑛夢禪鐫印記曰
洞門童子以當息壤今爲期已迫豈展限耶既行復還坐縱談良
久起曰吾去矣毋戀是月二十四日晨興飲啖如常至未申閒端
坐而逝嗚呼若公者不洵稱生有自來死有所歸者哉

右正雅集符葆森撰

劉文清書初從松雪入中年後乃自成一家貌豐骨勁味厚神藏
不受古人牢籠超然獨出

右松軒隨筆張維屏撰

諸城文正文清兩公非徒爲宰相且爲賢宰相天下仰之此 聖

翰所以特許爲海岱高門第也

右攀經室集張維屏錄

文正公清德重望雅不欲以詞章自見先生如之先生手書近詩見示清新超悟有香山東坡風格十餘年所得甚夥門人陳子韶因合梁侍講同書書鐫於西湖上名劉梁合璧

右湖海詩傳張維屏錄

明亮

明亮富察氏滿洲鑲黃旗人曾祖米思翰官戶部尚書以孝賢
純皇后祖追封一等承恩公祖李榮保一等承恩公各有傳父
廣成正黃旗蒙古都統明亮由文生員乾隆十八年指爲多羅額
駙十九年授整儀尉累遷鑾儀衛鑾儀使三十年授伊犁領隊大
臣隨將軍明瑞等平烏什逆回三十一年四月旋京授正白旗漢
軍副都統六月授吉林副都統三十三年調甯古塔副都統三十
四年大兵征緬甸明亮在事有功三十六年小金川逆酋僧格桑
攻圍鄂克什土司地抗拒官軍金川逆酋索諾木陰與通謀上
命先討小金川大學士溫福出西路四川總督桂林出南路三十

七年二月 命明亮以護軍統領率侍衛官音吉圖等往南路隨
剿三月至達烏軍營四月桂林使參將薛琮等潛師由墨壘溝襲
取僧格宗至甲爾木爲賊所要截薛琮戰歿兵練三千人死亡殆
盡桂林匿不以 聞前四川總督散秩大臣阿爾泰劾之 命尙
書福隆安往援以明亮世臣勳親於桂林乖張欺罔隱忍不言並
褫職候訊旋 賞頭等侍衛銜帶兵自效時參贊大臣阿桂代總
桂林軍七月令明亮出賊不意仍自墨壘溝潛襲甲爾木奪其第
一道山梁以地勢高寒難駐守不俟令輒撤兵還阿桂劾奏降職
銜一等十月復攻甲爾木山梁山延袤數十里中兩峯尤峻險明
亮乘雪夜直上山巔盡克其木城礮卡移兵駐守補二等侍衛

賞還原銜遂進攻眞登梅列築卡斷賊糧道十一月克之遷頭等侍衛加副都統銜尋督兵由都恭進破噶察丹嘉諸寨降番民六百餘與阿桂會於僧格宗遷副都統復進克古嚕收服僧則諸寨十二月阿桂授副將軍 命明亮爲領隊大臣官軍旣克僧格宗由科多渡河而東直擣美諾侍衛德赫布等爲前隊明亮繼進敗賊於池木追至美都喇嘛寺力戰克之遂圍美諾賊衛巢死拒相持一晝夜明亮俟其稍懈突前奮擊破美諾官寨及其旁礮卡温福之軍亦自明郭宗來會小金川地悉平捷入下部優敘大軍未至前一日僧格桑由美卧溝遁入金川因分兵三路進討金川將軍温福自功噶爾拉入爲西路以海蘭察哈國興爲參贊副將軍

豐昇額由綽斯甲布攻宜喜爲北路以舒常爲參贊副將軍阿桂由當噶爾拉入爲南路以明亮爲參贊三十八年正月兵抵當噶爾拉其山爲金川界址縣互二十餘里賊自西至東築十四礮中聯以木城石卡防守甚堅二月明亮乘閒攻奪第五礮三月又克第四礮修營設卡橫截賊眾之間相拒數月會溫福攻功噶爾拉扼險不得進改攻昔嶺駐營木果木六月逆酋索諾木遣其黨自美卧溝潛出煽結小金川降番擾我軍後木果木師潰溫福陣亡底木達美請明郭宗相繼陷參贊海蘭察退駐日隆阿桂聞變使明亮盡戮降番之爲內應者賊眾屢窺伺後路皆擊敗之全師出駐翁古爾壘上以阿桂爲定西將軍赴日隆別籌進取調滿洲

索倫勁旅及各省兵會剿八月授明亮廣州將軍旋授定邊右副將軍駐師南路以富德爲參贊十月整兵進復小金川阿桂自西路連克資里阿喀木雅五晝夜直抵美諾復之明亮南路亦剋期同發自思紐順河攻取得里得木甲諸寨惟河南宅壘未下遣守備張芝元往諭降乘其未定襲破之進取僧格宗與阿桂會於美諾盡復小金川地上以成功迅速疊 旨嘉獎 賜御用黑狐冠十二月偕阿桂奏聲討金川更籌進兵之路阿桂改由谷噶明亮改由巴旺布拉克底土司境內進攻馬奈馬爾邦 上是其議三十九年正月各路訂期會剿明亮以馬奈山勢險惡必分兵夾攻方得勢而河南斯第博堵之上地名思覺爲賊境克舟九寨屏

幃尤當扼其要害乃令參贊富德以兵六千由駱駝溝繞出馬奈後領隊大阿奎林以兵四千攻河南斯第博堵而自攻馬奈之前乘夜進兵克其礮卡富德之軍已截出山後與明亮合馬奈中山梁五礮之賊皆潰其拒守西山者次日攻克之合軍前奪絨布寨移營駐之奎林以皮船渡河而南至斯第山梁亦克其木城二二月明亮進攻卡卡角選銳兵循絕壁而登據其地卡卡角之前曰庚額特爲賊南境第一險隘其西危峯壁立于仞正面山址直插河流惟山半羊腸一線賊左右扼以石礮其後復以一礮護之屢攻不能下乃於山西河灘連築五礮以衛河南糧道而東南攻穆谷諸寨欲截出其前賊拒守益力上以奎林所據山梁下臨克

舟九寨河北既不能進或迅趨河南合剿屢諭明亮籌辦時奎林以山雪漸消軍行乏水移師暫駐深嘉卜分土兵據守山梁三月明亮探聞斯第之上班得古地有暗泉可資汲爨令富德奎林等先據水泉以兵六千分三隊直取斯第將至斯覺賊前後並出斷我兵爲數處復據險以阻援軍奎林等鏖戰逾時合而爲一侍衛阿爾都從險絕處逾山入火其卡賊亂官軍遂破圍而出得旨獎慰明亮以河南北之師皆阻於險欲由正地進攻五月雷富德駐絨布寨而自統兵渡河六月至正地使人哨賊深入數十里寂無所見而山谷迴互慮其設伏於險以要我駐兵不進上深是之先是阿桂之攻谷噶也移豐昇額之軍夾攻凱立葉雷舒常

於宜喜以綏賊豐昇額旋赴阿桂軍至是明亮以正地無罅隙可乘欲移師往攻凱立葉會舒常在宜喜攻得賊卡阿桂以西路無俟增兵而宜喜有可乘之隙札明亮由彼進取明亮遂至北路七月攻達爾圖山梁賊於東北堅立四礮以拒其下連築十四礮西南直接俄坡明亮列兵前敵督眾力戰而潛師直取中七礮令諸將各攻其一冒雨進戰同時摧破其下七礮派屯士兵練分攻亦以次克獲移營駐守 上以達爾圖要隘明亮能迅獲全勝 特旨嘉獎予優敘時逆酋增眾來援達爾圖東北四礮我兵攻得其一餘猶堅拒不下明亮欲自西南進兵八月攻木克什克數礮九月別攻日旁山由周叟繞出山坳圍前山拒守之賊殲之進軍帶

石十月分兵東取谷爾提礪卡十一月西攻沙壩山潛軍深入焚礪卡寨二百餘賊據險斷我歸路官軍覓別徑撤出時阿桂大軍已逼勒烏圍賊穴 上以功屆垂成 諭令慎重復 諭以從達爾圖下壓日旁之賊必當不攻自潰明亮旋奏達爾圖木克什本進兵正路但達爾圖前敵堅礪林立既難致力而木克什以下箐深林密左右皆可抄截非兵多不敷分布惟自帶石攻過隘要下至臨河與阿桂軍相去甚近自可勢如破竹奏入報 聞是月復攻沙壩焚其山半礪寨十二月間正地之賊多調守他處分土兵乘虛往襲路與賊遇乃還四十年正月逆酋索諾木令頭人斯丹增獻被擄官兵及軍械至營投稟乞恩明亮不拘畱嚴訊縱之使

還 上降旨切責二月阿桂奏明亮一路因帶石山脊險窄賊眾
垢汙難於直入而宜喜山梁正與西路大營相對若增兵數千繞
路直截其後可期必克擬分調富德之兵往攻宜喜 上然其策
諭富德速抽兵往並以明亮自克達爾圖總未籌勦得利 嚴
飭之 命馳赴宜喜迅速進攻三月明亮自至阿桂軍面籌機宜
旋回日旁阿桂令參贊海蘭察等率勁兵千往助所調兵亦次第
至四月明亮合兵萬餘攻宜喜偵知甲索僅餘老弱使總兵敖成
率二千五百人往攻克其十四碉宜喜之兵分十餘路奮攻得楞
以下諸碉卡明亮與海蘭察舒常往來督率諸將人自爲戰殲賊
數百人盡奪其地進攻薩克薩谷克其山梁於是達爾圖得楞沙

壩山之眾爲我兵圍截於中先後奔潰并得日旁溝測斯年木咱
諸寨捷 聞授內大臣得楞東南曰基木斯丹當噶山勢迤邐直
至臨河賊於其前連築五卡我兵攻克之焚茹寨以前各寨落賊
又乘雨雪接築戰礮復爲官軍所奪海蘭察旋回西路明亮由基
木斯丹當噶進剿賊棄壘而逃奪茹寨麥田十餘里進至札烏古
其山上連甲索下至沿河賊憑險死拒勢難仰攻五月別攻曲碩
木未下明亮以基木斯丹當噶之前山趾兩分西爲額爾替東爲
石真噶得之皆可轉出扎烏古山前乃攻額爾替破其山前石城
而礮卡累攻不得入六月改攻石真噶賊抵禦愈力明亮以軍中
運礮人聲誼雜賊習聞之不爲備適礮成輓運密令奎林等率兵

國朝通志卷之三十一
繼進賊不之覺遂破石真噶七月盡克山半礪卡攻破沙爾尼諸
寨乘勝奪據扎烏古第一山梁賊之屯聚各寨者猶眾明亮患兵
不敷調遣欲北取琅谷直壓納木迪官寨以清西南後路八月克
琅谷移師駐其地攻斯第葉安及克爾瑪履賊又於其上連築城
卡相爲犄角明亮復至阿桂軍請兵助攻阿桂已克勒烏圍賊遁
守噶拉依老巢阿桂謂宜徑擣腹心不當復分力於枝節乃約河
東西同時進兵自攻達思里而令明亮攻礪占以分賊力九月自
甲索進攻礪占賊守甚嚴別攻巴札木亦無路可入明亮請自率
精銳赴西路併力 上以將軍參贊責有專司自應就本路調度
熟籌以期集事斷無舍己從人之理降 旨切責 命加意嚴防

切不可輕離北路九月復自琅谷進攻克什札古及烏岳木城列
柵而前直逼納木迪寨下閏十月阿桂調美諾防兵千餘來助明
亮計賊并力於納木迪札烏古之備必疏乃率兵於山下分路仰
攻而令奎林等閒道襲之深溝一線夾於兩山之底將士皆蛇行
而前直出山頂上賊方與山下軍拒見之驚潰合軍奮擊盡奪札
烏古碉卡復分兵爲二上至日斯滿下至阿爾古山梁二十餘里
悉攻克之納木迪之賊焚寨潛遁乘勝破斯第葉安明亮以日斯
滿高據山巔賊立十七碉隔我甲索兵路擬先取之日斯滿之南
曰得耳谷又名上巴布里爲日斯滿後路分兵襲據其地斷日斯
滿之眾於中賊恃其險猶潛匿不去令副都統和隆武等夾攻破

之遂自巴札木上通甲索與敖成兵會曲碩木諸寨之賊至是亦
遁官軍下至臨河盡撤達爾圖得楞諸防兵列營攻碾占碾占爲
乃當山頂其北爲中巴布里下巴布里及阿爾古地其南爲甲雜
又其南爲獨松明亮先攻碾占賊併力來拒十一月督兵襲破阿
爾古出對河科布多之南十二月進兵達撒谷礮毀其堅礮夜遣
兵緹峭壁奪據山梁分埽東南諸礮及沿河寨落遂攻乃當乃當
之賊皆潰進圍甲雜缺其臨河一面賊潰逸我兵自後蹙之多斃
於水頭人思達爾結等率眾降俘賊目庸中旺嘉勒及邁布星根
上嘉其調度有方屢戰克捷下部優敘時西路兵已圍噶拉依
明亮乘勝直前取獨松降卡拉爾舍斯滿之眾發兵趨正地正地

番眾乞降馬爾邦之賊亦降於富德河西賊境皆平明亮令奎林等營於巴布朗谷隔河會圍噶拉依自至西路偕阿桂奏言官軍合圍噶拉依布置已極嚴密逆酋之母阿倉姑阿青及其姊妹均已自歸見令招賊酋兄弟出降如能生致更爲妥善否亦可計日克取四十一年正月 諭曰金川賊境均經大兵勦洗所餘噶拉依叢爾彈丸自可卽日掃蕩征勦金川之役已屬葳功褒績酬庸宜頒渥典副將軍明亮抒誠勵勇協力宣勞著封一等襄勇伯賞戴雙眼花翎二月官軍克噶拉依索諾木出降盡獲其母子兄弟僧格桑已前死先於遜爾克宗獲其屍大小金川底定圖功臣像於紫光閣明亮列第三 御製贊曰獨統一路頗有斬獲嫺戚少

年世承恩澤建績抒忱是用褒嘉俾司將印永靖笮巴時議設成都將軍駐雅州統轄番地文武三月特命明亮補授畱川經理善後事宜請奏將軍總督時有會籌之事不宜兩地相懸而雅州地勢逼仄於滿兵挈眷亦不相宜請移四川提督往鎮其地將軍仍駐成都又言大小金川畱兵六千五百名駐守增設副將參將各員安插各降番於河東西與官兵相錯而處復奏屯種各番應設頭目擇土弁等之出力者給以職銜隸於綠營之下皆從之四月大兵凱旋上郊勞筵宴賜明亮及將軍阿桂副將軍豐昇額等銀幣鞍馬五月奏金川通藏大路增兵駐守巡哨八月奏番地屯墾牛種艱難陸續由內地購買可以無誤春耕並籌運鹽

鐵應用 上嘉之十月奏成都將軍有統轄地方之責文案需承
辦專員請於綠營調撥設軍標副將都司守備等員撥兵六百餘
名以資操防差遣 命軍機覈議如所請行十二月率各土司入
覲 賜紫禁城騎馬 命在軍機處行走四十二年二月回將
軍任四月兼署四川提督十二月奏川省提督前議移駐雅州雅
州去省三百餘里距西路較遠提督統轄番夷週邊要機宜必須
面議請仍駐省城下部議行四十三年二月以特成額爲成都將
軍改授明亮四川提督五月以在將軍任內失察土守備阿忠強
奪屯田侵蝕卹賞銀兩得 旨嚴飭九月奏兩金川駐官兵屯練
六千五百鎮將弁備一百七十餘員今番夷傾心向化彈壓無事

多兵請裁減官兵二千名改阿爾古總兵爲副將其餘將弁以次酌減從之四十四年奏屯防經費情形每歲約需銀六萬餘兩諭兩金川俱經蕩平新設鎮營屯駐足資控制自應將川省腹地各營兵數酌裁以抵新疆兵費卽行詳晰妥議速奏旋奏酌定長駐兵三千名於內地各營裁撥卽以額餉移給其每年各項經費尙需銀三萬餘兩擬裁內地額兵一千五百名並酌減新疆駐兵馬乾銀可敷抵補部議如所請行四十五年率土司入覲四十六年三月甘肅撒拉爾回匪蘇四十三叛據河州城進犯蘭州省城陝撫畢沅札明亮帶川兵自鞏昌堵剿官兵旋克復河州賊眾攻省城者爲我兵所敗退保城西華林山憑險自固明亮至軍

營 欽差大臣阿桂畱令協剿四月敗賊於水磨溝斬獲二百五
月偕海蘭察等攻奪賊卡直逼其營四面合圍賊眾惶急六月冒
死出突明亮等督眾力戰斬首惡蘇四十三等得 旨議敘七月
殲餘匪於華林寺時 上幸木蘭明亮赴 行在旋授烏魯木齊
都統九月劾承辦糧務各員侵吞浮冒鞠實均治罪如律四十八
年六月 命署伊犁將軍九月以在都統任內爲屬員蒙蔽私釋
永遠枷號官犯開泰致令自戕逮問入京擬絞監候四十九年四
月甘肅固原回民復聚眾滋事攻破通渭縣城踞守石峰堡 命
大學士公阿桂往剿釋明亮於獄 賞藍翎侍衛隨往效力七月
大軍攻破石峰堡擒首逆張文慶等賊黨悉平阿桂奏明亮奮勉

投頭等侍衛五十年五月擢鑲黃旗護軍統領八月調正紅旗護軍統領授伊犁參贊大臣十二月調烏什參贊大臣五十一年十二月移駐喀什噶爾五十三年遷鑲紅旗蒙古都統五十五年正月以緝獲劫奪安集延回民馬匹要犯 特旨嘉獎八月授刑部尚書仍畱原任九月喀什噶爾遣犯珠德彌什越獄潛逃明亮仍擬以改遣 上嚴飭之五十六年八月以失察遣犯王子重在配傳習邪教與內地隱通信息下部嚴議部議革職 恩予畱任十二月改授黑龍江將軍五十七年授內大臣五十八年授伊犁將軍六十年二月調正紅旗漢軍都統 賞戴雙眼花翎九月黑龍江總管舍爾圖控將軍舒亮等令兵丁交納貂皮減值市物各款

欽差福長安按鞫得實明亮任內亦有賤價購買之事革職留
烏魯木齊效力是年黔苗石柳鄧楚苗石三保等煽結爲亂攻陷
乾州雲貴總督福康安四川總督和琳先後奉命督剿嘉慶元
年二月命明亮往湖南軍營效力會湖北教匪聶傑人等於正
月倡亂陷當陽鄖縣鄖西匪徒相繼起陝督宜縣自商南來剿路
遇明亮畱於軍四月偕宜縣破賊於孤山大寨獲賊首王全禮等
授頭等侍衛領隊大臣賊眾窺襄樊宜縣令明亮往援至樊城與
總統大臣永保等合擊賊退據雙溝移營東竄明亮等進至棗陽
時孝感賊匪楚金貴等蠢動屯聚胡家寨明亮率兵往剿六月
命以副都統銜署廣州將軍七月至孝感營於潼川鋪去賊巢二

里許賊屢來擾明亮分兵堵禦乘虛襲據西面山岡擊破賊伏兵於黃金廟進攻賊寨破其重城縱火焚廬舍殺賊眾略盡餘賊干人逸出皆獲之捷 聞 予輕車都尉世職八月移師與永保會剿鍾祥之賊永保以兵九千軍其北明亮率三千餘人軍其南營於土門衝賊屢來犯逆擊大破之擒賊目張家瑞等得 旨恩賚下部敘功賊移營西北走明亮等追及雙溝復敗賊眾賊分爲二一東由棗陽赴唐縣一自白河而西欲由襄陽呂堰驛趨鄧州明亮等兼程先扼呂堰賊至永保遏之於前而明亮從旁夾擊大敗賊眾餘黨竄匿山林中悉爲官軍所殲永保等遂移兵追東竄之賊會大軍征苗匪已復乾州進圍平隴苗寨總統福康安和琳相

繼卒於軍 上命明亮馳往湖南接辦十月攻克平隴苗寨首逆石柳鄧先遁糾合餘匪於山後扼險拒守十一月連奪養牛塘剛息衝諸險進逼平隴後山別遣兵通保靖永綏之路降諸苗五千餘戶 上嘉賚之十二月圍平隴後山攻破馬頭衝餘錦坡苗眾聚守石隆官軍四面蹙之陣梟首逆石柳鄧賊之竄伏者殲戮無遺首逆吳廷義先於貴魚坡受傷潛竄旋爲降苗吳廷梁縛獻盡獲石柳鄧家屬苗境蕩平復封二等襄勇伯仍 賞戴雙眼花翎是時川陝楚教匪不靖達州逆匪徐添德等乘間蠢起攻破東鄉勢頗猖獗 命以勝兵赴四川與督臣宜縣併力滅賊二年二月明亮由永綏赴川宜縣已克復東鄉賊眾退據金峩寺分屯清溪

國朝通志卷之三十一
場姚家壩連營數十里三月明亮偕宜縣攻克寺後馬伏山賊卡
分兵襲奪清溪口姚家寨四月破清溪場擒賊目王學禮進奪冉
家壩口焚金峩寺賊首徐添德王三槐遁踞重石子香鑪坪五月
明亮偕德楞泰等攻克分水嶺火石嶺諸卡三面進臨賊巢賊出
數千人佯欲南渡而王三槐等率其醜類分五路直衝北面營卡
我軍併力勦殺賊眾大敗王三槐中槍逸擒其義父賀宗盛及賊
目鄭文禮盡奪重石子香鑪坪諸寨殺獲萬餘人賊走陳家壩進
軍圍之得 旨嘉獎是月 命宜縣爲總統以明亮德楞泰副之
六月敗賊於精忠寺擒僞總兵熊泳明及徐添德王三槐之母賊
棄其眷屬西走會襄陽首逆姚之富齊王氏等先後渡漢江入川

分擾大甯西鄉通江太平巴州境旋與徐王二逆合賊勢復熾姚之富齊王氏稱黃號徐添德稱青號王三槐稱白號設掌櫃元帥先鋒總兵諸僞稱分屯肆擾齊王氏姚之富據開縣南天洞明亮等攻破之賊等走雲陽萬縣追敗之於大涼山雲陽教匪高名貴聚眾應賊明亮與宜縣等計擒之殲其黨於徐家山七月賊自雲陽向夔州屢攻白帝城明亮等赴援賊東竄入楚擾歸州巴東破興山縣治欲向襄陽明亮順江而下直趨宜昌與德楞泰分路夾剿敗之八月賊趨荆門州官軍截擊折而旁竄直犯宜昌明亮等敗其眾追至獨樹塘會湖廣總督景安等率東三省勁旅自北來扼其去路明亮等與合剿斬獲甚多逼賊入南漳山內 上嘉賚

之時屢獲賊謀言賊欲誘官軍入山而乘間渡漢江北走豫省明亮令總兵長春循漢江南岸赴穀城防堵自統兵由隆中進截其前賊果北出茨河鎮明亮偕德楞泰東西夾擊賊眾敗潰退屯穀城縣南 上嘉其調度合宜 賞用紫韁九月賊由穀城西走均州屢爲官軍所敗不能北渡自房縣竄陝境平利楚匪李全先自川入陝至是與齊姚二逆合折而南竄明亮等追至界嶺聞賊欲由雞心嶺入川先令掘斷山路賊折回鎮坪與官軍遇明亮連戰克捷逼至樹河口設伏奮擊先後殺六千餘人賊復北走紫陽明亮追至白沔峽齊姚二逆偕其黨張漢潮又合白號高均德股匪西奔漢中分爲四股入川省通江太平齊姚二逆竄入廣元甯羌

高均德之眾遂由南鄭渡江而北三年正月偕德楞泰奏言高均德既已渡江恐其東竄與安迫近西安省會帶兵入漢中迎截上以明亮舍大股賊匪於不問輒帶前隊勁兵追剿高均德調度失宜命拔去雙眼花翎奪世職及所賜紫韁畱本任戴罪圖功齊王氏姚之富旋相繼渡江與高逆合東走漢陰廳李全亦竄入城固南鄭詔褫職逮訊子二等侍衛德倫藍翎侍衛鄂倫並革職遣戍旋以軍務急命畱營作爲領隊帶兵三月偕德楞泰窮追齊姚二逆自山陽直至鄖西急擊敗之二逆窮迫投崖死恩釋德倫鄂倫罪仍令敘用諭明亮速剿高均德子副都統銜賞戴花翎四月高均德遁入秦嶺明亮等由華州截剿賊西

向五郎與李全同走漢陰入甯羌山後六月德楞泰追賊入川明亮軍於西鄉杜高均德入陝之路時黃號逆匪張漢潮與藍號詹世爵白號李槐合眾萬餘由竹谿入平利旋至太平七月明亮入川追剿敗之於池子山斬詹世爵李槐張漢潮走南鄭欲過漢江官軍邀擊果有斬獲賊往來奔竄復入西鄉石泉疊奉 旨嚴飭命拔去花翎十一月張漢潮渡江入陝明亮自後追襲賊由商州入河南攻盧氏縣城明亮督兵截剿賊復回陝境竄伏五郎四年正月 上申明軍紀 特授勒保爲經略大臣以明亮素諳軍旅著有勞績授副都統與額勒登保並爲參贊大臣二月張漢潮西入甘肅兩當縣界旋折而東竄明亮追至進口關殺獲甚眾擒

賊日李淮復敗之於涼沁河因兵力單咨勒保增兵協剿四月勒保令永保至陝與明亮夾擊成都將軍慶成與永保合軍五月永保失利於華林山賊東西竄走乘間復入盧氏尋折回陝境得旨嚴飭七月以川匪肆擾楚境逮問勒保 命明亮接任經略事遷正紅旗漢軍都統 上旋聞明亮與永保不和恥居勒保之下挾私玩寇并在湖北軍營得受餽送 密旨查詢改用額勒登保爲經略大臣革永保慶成職 遣尙書那彥成往按九月明亮奏永保自八月駐兵大山岔總未移營永保自陳兩次移兵均奉明亮札止 上命那彥成訪察虛實尋革參贊大臣都統任降副都統銜十月那彥成鞫訊永保呈出明亮手札並訐明亮奏報軍功

詞多不實 命革職交陝甘總督松筠嚴訊時明亮追賊入子午
谷斃張漢潮於張家坪生獲賊目李潮十一月松筠奏提訊明亮
等質對明確其奏永保及前後移書因兩路不相關會彼此參
差並非有心傾陷所報殺賊名數因總彙入奏故未能詳細分晰
至收受餽送實爲分賞兵勇之需尙非入己明亮之罪在布置乖
方耽延貽誤依失誤軍機律擬斬解京候 旨五年正月 諭曰
明亮帶兵著有勳績征剿大小金川曾任副將軍功成受賞辦理
湖南苗匪係伊接手蒞事勦辦湖北孝感賊匪亦能迅速殄除嗣
在陝境因辦理遲延降旨拏問明亮旋將張漢潮殲斃雖餘匪尙
未淨盡而辦理遲緩不獨一人明亮功多罪少況係宿將必應保

全著加恩釋放賞給金頂領催往湖北隨松筠帶兵剿賊三月授
藍翎侍衛領隊大臣四月敗青號徐添德之眾於穀城石花街遷
三等侍衛閏四月賊東趨當陽遠安敗之於斑竹園復戰於遠安
鎮明亮親冒矢石督勵將士 上嘉之以五品翎頂補宜昌鎮總
兵五月賊窺荆襄明亮敗之於斑竹鋪賊復走當陽爲河水所阻
自荆門折而西北六月至穀城七月渡黃龍灘西走吉陽關至陝
西洵陽白河明亮扼七星關賊復東竄明亮自保康南漳逆擊大
敗其眾於朱家嘴擒僞總兵熊方青獲牲畜器械甚眾 賞加三
品頂帶八月賊渡黃龍灘復走陝境明亮奏言聞川匪唐大信苟
文明等先後入楚請至房縣與撫臣倭什布合剿 上嚴旨切責

命姑如所請九月黃號樊人傑藍號冉添士及白號線號各匪由川接續入楚擾至遠安總兵李紹祖陣亡上累飭明亮愧勵圖功十月擊賊於房縣上龕大敗之賊眾俱竄回川省旨嘉賚之命赴川勦辦明亮旋奏陝匪高二馬五等漸近竹谿馳往迎勦諭曰徐逆竄往陝境明亮以川匪竄楚爲詞置徐逆於不問今四股賊匪折回川境又以陝匪竄楚爲詞置四股賊匪於不問巧於趨避負朕矜全重恩著革去總兵降爲藍翎侍衛隨長齡防堵不必再具摺奏事並諭長齡如明亮尙知愧懼立功自贖卽行具奏若尙不肯認真出力或實因年力衰邁不能振作亦據實奏聞明亮旋敗高馬二逆於竹山縣之保豐殲獲甚眾擢三等侍

衛作爲領隊大臣十一月徐添德復東趨入楚高二等旋與合營
明亮偕長齡等分路攻擊殲擒千餘人扼其東竄之路遷二等侍
衛 恩賜佩囊賊尋復分竄明亮追躡高逆敗諸陝楚之界賊遁
入平利書麟以徐添德屯聚西南山內慮其蔓延爲患奏令明亮
回楚勦辦 上允所請六年正月徐逆爲官軍所敗折而東趨明
亮等敗之於壽陽坪賊衆大潰 命仍准列名奏事二月川匪苟
文明由陝入楚明亮敗之於獅子巖因徐逆欲竄均穀兼程扼勦
伏兵柰家河擊破其衆下部議敘復授宜昌鎮總兵三月敗賊於
南漳房縣時參贊德楞泰移師入楚諸逆合衆西奔楚氛略靖
上念明亮年老五月 諭令回京授二等侍衛在乾清門行走六

月以前在烏魯木齊都統任內有應繳賠項請於俸銀內坐扣
恩予寬免十二月明亮患病 上溫旨慰諭加副都統銜令安心
調理七年正月病痊授正紅旗漢軍副都統五月調正藍旗滿洲
副都統七月授烏魯木齊都統十二月以三省教匪戡定論功行
賞 上追念明亮前勞 特封一等男爵九年四月內授鑲藍旗
蒙古都統六月轉兵部尙書九月 賜紫禁城騎馬十一月兼內
大臣十年五月 晉封一等子八月調鑲白旗漢軍都統十二年
京察 特旨交部議敘十三年以保送寶泉局監督徇情部議降
調 上改爲降四級畱任十四年正月 上以本年五旬萬壽
恩加太子少保銜九月 晉封三等伯十二月調鑲藍旗滿洲都

統十五年二月 賞還雙眼花翎五月授協辦大學士十六年六月以失察轎夫賭博有 旨詢問陳奏復迴護欺飾削太子少保銜盡革協辦大學士尙書諸任畱三等伯爵單眼花翎降補正黃旗蒙古副都統七月調鑲藍旗滿洲副都統十七年授西安將軍十八年三月回京授正白旗漢軍都統旋調鑲白旗蒙古都統九月授都察院左都御史十一月轉兵部尙書十二月復 賜紫禁城騎馬十九年二月調鑲藍旗漢軍都統復授內大臣三月加太子少保復 賞還雙眼花翎調都察院左都御史以 御門典禮入直遲誤交部嚴議部議降五級調用 恩子畱任八月復授兵部尙書協辦大學士二十年七月 上幸木蘭 命明亮偕王大

臣留京辦事二十二年六月授武英殿大學士管理兵部事務尋
晉太子太保二十三年 諭曰大學士明亮屢歷戎行著有勞績
簡擢綸扉見年八十有四精神矍鑠步履強健若令節勞頤養必
更益壽延齡長資倚任明亮著不必分日赴內閣閱本亦不必進
內直班所管兵部遇有奏事間一二次不到亦可引見官員毋庸
承旨用示朕優眷耆臣之至意二十四年正月 上以本年六旬
萬壽復 加恩中外 賞還紫韁十一月 晉封三等侯二十五
年正月復 諭令於本旗直日照常來圍餘加班奏事引見之期
俱在本衙門辦事三月兵部遺失 行在印信部臣均降罰有差
明亮亦議革職 詔改降五級畱任道光元年以老病乞休 上

溫旨褒獎 命以大學士三等侯致仕 恩予支食全俸二年卒
年八十有七 諭曰予告大學士三等襄勇侯明亮屢歷戎行仰
蒙 皇祖高宗純皇帝擢置崇班懋膺封爵並繪像紫光閣以旌
勲績至嘉慶年間 皇考仁宗睿皇帝優加倚任特簡綸扉載錫
恩綸晉封侯爵宣力垂七十餘年資深望重寵眷優隆二十五年
冬閒陳奏衰老情形籲請開缺朕再三慰問上年四月復以老病
乞休特降旨准其致仕仍令支食全俸並頒賞淺斤俾資調攝以
冀獲享期頤遽聞溘逝深為悼惜著賞給陀羅經被派鄭親王烏
爾恭阿帶同侍衛十員前往奠醊朕於本月二十三日親臨賜奠
加恩入祀賢良祠賞廣儲司銀一千五百兩所有任內降革處分

悉子開復應得卹典該衙門察例具奏尋 賜祭葬 予謚文襄
孫聯順見官禮部左侍郎正紅旗護軍統領曾孫恩昌見襲三等
襄勇侯世爵

右 國史館本傳

明參政亮謂余曰兵家之事宜於乘銳直進若不審敵勢坐失機
宜使兵心至於潰敗雖欲振起不易得也往昔溫將軍木果木之
敗可爲殷鑒昔宋總兵元俊乘勝直擣美諾若當時厚集兵力一
鼓殲滅金川可以早定乃溫公狃於易勝不復檄調各路兵馬惟
日與董提督天弼輩置酒高宴額駙色布騰巴爾珠爾屢次勸阻
溫公反以其煽惑軍心致登白簡 上召還額駙護軍統領伍黨

者遼東驍士也見溫公所爲浩歎曰吾聞拙速未聞巧遲焉有屯兵賊境而日以宴會爲務者吾固遼海健兒未審兵法有若此而能致勝者也溫公大怒羅織伍以他罪遣戍以致人心不服溫公性復卞急遣綠營兵三五十人共攻礪卡有致傷者溫反督責之人心益爲忿懈海超勇公蘭察至扣刀謂溫公曰身爲大將而惟閉寨高臥苟安旦夕非夫也今師雖疲老使某督之猶可致勝若公終不肯出戰不若飲刃自盡使某等各竭其力可也溫公拂袖起亦無有所指揮也又遷延月餘賊人偵知我疲弱乃整勁旅數千直抵營寨我兵不戰自潰海公初對敵卽詫曰雲氣已頽散不可與戰余馬首欲東可與諸公期會於美諾寨也因馳馬破圍去

溫公方雅臆督戰爲賊擒董公天弼牛公天畀張公大經等皆死
之師遂大潰我兵自相踐蹋終夜有聲渡鐵索橋人相擁擠索崩
橋斷落水死者以千計吾方結營美諾見潰兵如蟻往來山嶺間
吾遣人止之潰兵知吾在止者數千吾爲之收畱犒賞兵方安眠
適有持銅匣沃水者誤落於地有聲鏗然潰兵卽驚曰追者至矣
因羣起東走勢不可遏其喪膽也若此故吾與阿文成公收兵養
銳至逾二載後軍心始振然後用以克敵大將用兵慎勿使其心
頹喪至此也明故宿將非久歷戎行者不能作此語因筆記之以
爲易於談兵者戒

癸酉秋余掌棘闈搜檢事與明參政亮同事數日聞其談孝感戰

事頗詳故隱括其詞於卷中明云嘉慶丙辰夏湖北孝感滋事毗
連三省賊眾蟻聚數萬總統永公保屢爲所敗先後徵兵數千皆
全軍覆沒余方獲罪以待衛銜自西域歸 純皇帝命余往代余
行至當陽路謁畢制府沅時惟有固原西甯兵五百人畢全畀之
余曰今孝感嘯聚數月已傷官兵數千是其賊中必有知兵之士
若不十倍其眾難以破敵此王翦之所以請益兵破楚也今若不
謀而後進以零丁積畏之兵禦銳氣方剛之賊是驅羊入虎投刺
待縛也畢無以對適陝安鎮德公光率其兵三千人至隨余往畢
大喜曰此天助將軍以成功也其糗糧器械吾願任之余大喜過
望鼓勵以行數日至楊鎮民已逃竄街市空闕賊聞余至皆領兵

守其寨余率眾守橋笑謂眾曰此羸張飛尙可禦幾許敵也眾故
余舊部下皆談笑以荅余命諸將鳴鼓吹角以致賊師賊果鑿涌
至余據地勢殺傷頗相當賊詫曰吾儕與官軍鬪未有不聞聲而
潰者此老子殊耐戰乃爾嗣聞爲余皆相顧唏噓曰此老尙無恙
耶此吾儕命蹇故也次日賊繞道上北山據建飯以覷我德鎮請
戰余曰賊勇狠而銳未易藐視因以千人付之德故未經戰陣旣
見敵未鼓而火槍驟發余聞其聲驚曰孺子誤乃公事此軍殆矣
非出奇萬無以勝之因怒馬獨出率將士數十人行荒畦間繞出
數里畦間屍骸縱橫皆永公兵潰死者適有江西潰卒二百自德
安至三五散坐黃金廟側方熱火聚食余笑曰雖余幕中謀士所

資余力者未必如是之巧以此破敵必矣遂呼其將士至慰以善言諸軍聞余名爭先踊躍請戰余授以旗鼓命掩伏山側余遂趨賊壘其壘外松棚下餘賊方瞭望余驟發矢傷數人賊錯愕聞江西兵展旗鳴笳以進賊互相踐蹋曰伏兵至矣賊中有紅巾者聲揚於眾曰慎毋驚恐速發大礮以禦我兵聞皆披靡余誑曰礮炸矣賊固烏台不解用礮礮果裂聲震山谷我兵突煙而入余因縱火焚其松棚火光燎然山上賊聞之皆退歸巢因闔其四門爲避守計時德鎮所率兵亦振旅還其固原士卒皆爭先用命奪其西壕梁進賊當門拒之兵無以入德鎮請用蔡人擒公孫翩計述左氏多則死二人之語余曰彼一勇夫故可施此計今賊至萬人徒

傷勇夫非計也因命積柴時他門外賊未覺察適大風霾因風施火俄見萬廈驟焚我兵合圍其壕賊無路行突煙出者咸墮於壕哭聲震天火光竟夕火三日始燼於焦骨中取賊首屍其賊遂平捷聞純皇帝大喜復余職而責永永遂恚恨至己未歲余方逐張漢潮於漢中永爲松尚書筠所劾私度爲余漏言乃密疏劾余上命那尙書彥成代領余眾余已擒張漢潮方振旅而被逮致使功敗垂成殊可惜也其言顛末若此明故宿將談戰鬪事形狀如繪簡兵儲糗咸如兵法非他人所易及者余記丙辰夏間潘箬舟侍御名紹經聞明復起用笑謂余曰吾鄉人方新製肩輿請明入楚吾甘心願爲其輿夫也雖一時戲語亦可覘公之威望已

嘉慶戊午夏教匪張漢潮自秦竄入楚境勢甚猖獗楚督景安畏
懦遠避武昌賊如風飄豕突無所抵攔漢潮欲渡漢江以窺全楚
時漢陽最爲富饒市廛毗連數十里甲於天下聞警商賈驚避有
老賈某祈於關帝廟會大風驟起飄泊賊人舟楫斃於江者如鷺
也漢潮亦落水得拯因狼狽返秦中自是不敢東下逾年乃爲明
參政亮所擒當時假使賊得濟蹂躪江淮其禍不可問矣信夫
國祚昌熾水伯得以默爲佑護也

明參政亮金川孝感諸戰功已詳言之矣其少時尙履懿親王郡
主夫婦勃谿王頗厭之王母定太妃薨奉移之東陵秋閒道
路積潦昇夫皆憚行公時襄事因以巨杖擊昇夫自先行泥淖中

昇夫乃娓娓從命往行數日隊仗整肅如行軍焉王大喜曰誠吾佳婿也他日可爲名將是公少時舉止已不凡矣又公入闈鄉試純皇帝偶問傅文忠曰汝家有與試者無文忠以公對上曰世家子奚必與文士爭名因擢藍翎侍衛命從征西域甫出闈卽慮思就道亦一異也公雖以武功顯然嫻文墨吟小詩善寫墨竹故屢歷文階人不以爲過

丁丑夏松相公以久旱策免拜明參政爲首揆公旗乾隆丙子丁丑間卽從征西域久擁旌節董太保居政府二十餘年視公猶爲後進年已大耋乃登台席自涓濱鈞璜之後實爲再見信昇平人瑞也

人臣死綏古今通義然必有濟於國始爲可貴若如趙括邱福之徒非不與尸殉死不爲世所重也聞明相公言木果木之戰海超勇公實預其事甫交綏海公卽大呼曰軍氣頽敗此潰師之兆因勒馬歸故身不預難其後卒以滅敵蓋畱身有待也春將軍甯亦世代擁旄者言對敵如角牴然稍覺勢異卽放手再與之撲不然必顛仆矣自古如邲鄢之役九節度之敗皆師老之故也二公皆久經軍旅者其置論乃如是此與楊存中舍淮守江之論相似非親身經歷者必以其言爲懦矣

右錄宗室昭榘撰

國朝通志卷之三十一

三十一

三

國朝耆獻類徵初編卷三十一目錄

宰輔三十一

紀昀

慶桂

彭元瑞

書麟

保甯

劉權之

補錄

紀昀

國朝耆獻類徵初編卷三十一

通奉大夫前署江西巡撫江西布政使司布政使湘陰李桓輯
宰輔三十一

紀昀

紀昀直隸獻縣人乾隆十二年第一名舉人十九年成進士改庶
吉士二十二年散館授編修洊擢詹事府左春坊左庶子充日講
起居注官昀官編修於二十六年京察一等以道府記名三十三
年二月補貴州都勻府知府 上以昀學問優外任不能盡長
命加四品銜畱庶子任四月擢翰林院侍讀學士六月前兩淮鹽
運使盧見曾獲罪有 旨籍其家昀與盧爲姻漏言於見曾孫蔭

恩革職逮問戍烏魯木齊三十五年釋還三十六年 上幸熱河
十月的迎 鑿密雲 御試士爾扈特全部歸順詩立成五言三
十六韻以進得 旨優獎復授編修三十八年二月 命儒臣校
覈明代永樂大典 詔求天下遺書開四庫全書館選翰林院官
專司纂輯大學士劉統勳以昉名薦充纂修官後又奏全書浩博
應斟酌綜覈以免挂漏參差舉昉及提調官郎中陸錫熊爲總辦
搜輯大典中逸篇墜簡及海內祕笈萬餘部釐其應刊應鈔應存
者依經史子集部分類聚撮其大凡列成總目爲提要二百卷上
之 諭曰四庫全書處將大典內檢出各書陸續進呈朕詳加披
閱閱予題評見其考訂分排具有條理而撰述提要粲然可觀則

成於紀昀陸錫熊之手的學問本優校書亦極勤勉甚屬可嘉著
加恩授爲翰林院侍讀以示獎勵十一月補侍讀三十九年七月
上以總目提要卷帙繁命紀昀輯簡明書目一編 上求遺書
凡中外所獻擇其珍本 製詩弁於首昀進書部凡百 御題所
進孫覺春秋經解有邵張珍弄今歸紀汲古深心有足多之句十
月以子汝傳詰逋負呈議降調 詔改降三級畱任故事降畱官
遇升缺不予開列四十年吏部請除翰林院侍讀學士無昀名
上以昀於四庫全書盡心哀輯 命一體列名四十一年正月擢
侍讀學士充文淵閣直閣事九月復充日講起居注官四十二年
館臣校書錯誤應議昀以 特旨免四十四年三月擢詹事府詹

事四月擢內閣學士兼禮部侍郎四十六年提要成進 御 上
嘉其詳覈 命優敘四十七年擢兵部侍郎四十八年轉左侍郎
四十九年 上南巡行在發 御製濟水考寄昫 命據各說經
家及輿地家詳考之五十年正月擢都察院左都御史四月員外
郎海昇毆斃妻吳雅氏詭言自縊死事覺 命昫鞫其獄覆檢不
實部臣議鑄職 詔改革職畱任五十二年遷禮部尙書充經筵
講官五十四年 賜紫禁城騎馬五十六年再調左都御史五十
七年畿輔歲歉饑民多就食京師昫奏言直隸河間等府二麥歉
收 命截漕五十萬石備賑而領賑百姓有極貧次貧之不同次
貧之戶可以支持待賑不肖輕去其鄉至極貧之戶一聞米貴不

能不就食他方近京之處多先赴京城傭工餬口恐聚集日多未必能人人得所又業已扶老挈幼拮据得至勢難卽返就糧是此項流戶以極貧之故離其鄉井轉不能同沐 皇仁似爲可憫定例每年自十月初一日起至次年三月二十日止五城原設粥廠十處每日領官米十石由坊官煮粥外來流戶原可同霑但自夏至冬爲期尙遠恐貧民迫不及待且人數較多米數亦未必能敷伏思偏災不過四府賑米有餘請於原額五十萬石內酌撥京城數千石自六月中旬爲始每廠煮米三石至十月初一日後則於原額十石之外加煮米二石仍均以三月二十日爲止其米先於京倉支用將來於截漕數內撥還庶貧民就食者得以在京存留

不致閒關遠去明春易於還鄉不誤耕作卽各處聞有此信來者較多伊等本係應賑之人此間多一人領粥則本地少一人領米計人數米數仍屬相當亦不慮本處給散之不足如此一轉移間所需賑米仍在截漕原額之內而貧民在鄉在外皆得均霑於賑務更爲周到疏 聞下廷臣議 從之八月復遷禮部尙書仍署左都御史十二月奏考試春秋向用胡安國傳而胡傳一書中多有經無傳出題之處不過數十卽如本年鄉試竟有一題而五省同出者其三四省相同不一而足士子不讀全經不知本事但記數十破題便敷入試之用且胡安國當宋南渡時不附和議作是書以諷高宗而斥秦檜其人品正而借經立說與孔子意不相比

附恭讀 聖祖仁皇帝欽定春秋傳說彙纂駁胡傳者數十百條
皇上御製之文亦多駁其說而科場所用以重複相同之題書
偏謬失當之論殊覺無謂請嗣後春秋題俱以左傳本事爲文參
用公羊穀梁之說在三傳親承聖教既較千年後儒學家之論爲
得其真而士不讀左傳不能成文亦足以勸經學而裨文風疏入
得 旨允行六十年與千叟宴嘉慶元年六月調兵部尙書十一
月復調左都御史二年遷禮部尙書四年充 高宗純皇帝實錄
館副總裁七年昀年八十生日 命署上駟院卿 賞賚珍幣至
昀家賜之六月署兵部尙書七月上 孝淑皇后奉安事宜陳奏
失詞部臣議鑄職 詔改革職畱任又以咨送議處司員祇宋其

沅一人爲御史鄭敏行所劾部臣如前議 詔改降三級畱任其
後 孝淑皇后奉安禮成 命再予量減有差十月奏定例凡婦
女強姦不從因而被殺者皆准旌表其猝遭強暴細縛受污不屈
見戕者則例無旌表伏思此等婦女舍生取義其志本同徒以或
孱弱而遭獷悍或孤身而遇多人此其勢之不敌非其節之不固
卒能捍刃捐生與抗節被殺者無異譬如忠臣烈士誓不從賊而
紮縛把持強使跪拜可謂屈膝賊庭者乎請 敕交大學士九卿
科道公議與未被污者略示區別量予旌表尋議如兇手在兩人
以上者顯係孱弱難支與強姦被殺者一體 予旌令各督撫勘
明奏請 上裁報 可是月昀有疾 命軍機章京富蘇率醫官

王詔恩視之十年正月以禮部尙書協辦大學士加太子太保管
國子監事二月卒 諭曰紀昀學問淹通辦理四庫全書始終其
事十有餘年甚爲出力由翰林洊歷正卿服官五十餘載甫經擢
襄綸閣遽聞溘逝深爲軫卹加恩賞陀羅經被著散秩大臣德通
帶侍衛十員前往祭奠並賞廣儲司庫銀五百兩經理喪事其任
內降革處分悉予開復應得卹典該衙門察例具奏尋議 賜祭
葬如例 予諡文達昀官庶吉士時應 制圓明園及扈 蹕熱
河行圍皆與賡和 天章洎纂輯四庫全書 賞賚同內廷翰林
又以侍讀 特召入重華宮賦詩與宴後乃歲以爲常其兼文淵
閣直閣事自侍讀學士至尙書皆如故所纂輯如熱河志歷代職

國朝三才集卷之三十一
官表河源紀略八旗通志暨方略會典三通諸館咸總其事子汝
傳江西九江府通判嘉慶十二年 高宗純皇帝實錄告成敘昫
功 恩賞汝傳同知後補江南江甯府同知汝似分發廣東縣丞
孫樹馨一品廕生官刑部雲南司郎中見任宜昌府知府

右 國史館本傳

嘉慶乙丑二月協揆獻縣紀公薨於位其冬公子汝傳孫樹馨以
狀略來請銘珪隕然老矣同年同官失我老友吾何以表公哉顧
誼無可辭按狀公紀姓諱昫字曉嵐一字春帆晚號石雲行四世
爲河間著姓祖考諱天申行德於鄉里歲饑出粟數千石活人無
算考姚安太守諱容舒嘗督責公曰汝何知吾父罄家資輸粟活

一方故食報於汝汝以爲能文名解元耶先是郡爲九河入海故道天雨則汪洋成巨浸水中夜夜有光怪公王父夢見光入樓中已而公生光遂隱人以爲公實此靈物化身也少而奇穎目數行下夜則暗室閃閃有光照見一切物了然可辨比知識漸開光亦斂矣故公自喜言之不諱應學使試輒冠軍年二十四乾隆丁卯科遂發解初闈中擬珪首卷得公卷因書經二場表儷語冠場乃定公第一珪第六主試阿文勤公劉文正公榜發皆以得人賀二公復 命遂以兩人姓名上 聞故公與珪皆早受 特達之知所由來也明年珪捷而公遲至甲戌乃與先兄竹君同榜 廷試二甲第二人 賜進士出身改庶吉士丁丑散館一等授編修旋

辦院事己卯充山西鄉試正考官庚辰充會試同考官辛巳京察一等以道府記名壬午充順天鄉試同考官 命視學福建癸未升侍讀明年丁父憂服闋補侍讀充日講起居注官晉左庶子戊子授貴州都勻知府旋以四品畱任擢侍讀學士緣事呈誤發烏魯木齊效力時遣戍單丁五年積至六千人爲都統具奏彙得旨咸釋爲民辛卯 召還授編修三十八年擢侍讀時開四庫全書館 命爲總纂官搜羅逸書與 內廷一體宴賚同事者陸君錫熊提調則陸君費墀而公寶總其成丙申擢侍讀學士充文淵閣直閣事日講起居注官丁酉京察一等己亥擢詹事旋晉內閣學士總理中書科壬寅授兵部右侍郎仍兼直閣事改任不開缺

異數也公館書局筆削考數一手刪定爲全書總目裒然巨觀弄
之七閣眞 本朝大手筆也癸卯轉左侍郎甲辰充會試副考官
知武會試貢舉乙巳晉左都御史丙午轉禮部尙書充經筵講官
丁未管鴻臚寺印鑰戊申 賜紫禁城騎馬充武會試正考官後
爲總憲者五大宗伯者三壬子以畿輔水災奏請截畱官糧萬石
設十廠賑饑得 旨六月開廠後增五廠自季夏至明年四月全
活無算嘉慶元年丙辰充會試正考官授兵部尙書己未充武會
試正考官癸亥六月以八旬開秩 上遣官賚多珍教習壬戌科
庶吉士奏婦女猝遭強暴捆縛受污不屈見戕者例無旌表臣謂
此其志捍刃捐生與抗節被殺者無異如忠臣烈士誓不從賊而

紮縛把持雖使跪拜可謂之屈膝賊庭哉請 敕交大學士九卿
科道公議與未被污者略示區別量予旌表經大學士保甯等議
奏如兇手在兩人以上顯係孱弱難支與強姦被殺者一體予旌
飭交督撫勘明情形請 旨定奪報 可乙丑正月奉 旨調禮
部尙書協辦大學士加太子少保管國子監事初珪與公同舉於
鄉先後同官翰林公之典閩學也珪先爲福建糧道兼攝福州府
爲公府試提調及遷閩臬明冬與公同丁外艱辛卯珪任晉藩公
賜環過晉署宿留數日及官京師先後衡文公有文人相輕意
與珪不肖相下及辛酉珪病臥牀公來視疾見予所爲文歎服以
爲向不知公昉過矣比甲子忽語珪曰昉自辛酉十月三日夢中

覲公覺而驚悟此後心悅誠服雖燕居他處不肖道公一不字矣
予大奇曰何前疑而後然耶其後往來日親公之協揆珪所遺缺
也二十六日同拜 恩命二月四日連騎入內閣同上翰林院中
堂任十日而公病十三日昃予過門視疾見公於牀執手曰昃無
他病苦痰涌耳明日酉刻公薨協揆纔十八日耳十五日早遺摺
聞奉 旨紀昃學問淹通辦理四庫全書始終其事十有餘年
甚爲出力由翰林洊歷正卿服官五十餘載本年正月甫經擢襄
綸閣晉錫宮銜遽聞溘逝深爲軫惜加恩賞陀羅經被派散秩大
臣德通帶同侍衛十員前往賜奠並賞庫銀五百兩經理喪事任
內處分悉予開復應得卹典查例具奏 賜祭葬 予謚文達公

生於雍正甲辰六月十五日午時終於嘉慶乙丑二月十四日酉時壽八十有二配馬氏 封一品夫人子四某某某孫十一曾孫一某年月日葬於某銘曰

九河之尾馮夷宮或噓金闕珠光熊緋衣遊戲波濤東紀氏陰德英產鍾蔚爲文伯氣吐虹與我訂交金蘭同五十九年寅協衷離合疏數惟化工表公之石磨桓豐

右墓誌銘朱珪撰

紀昀字曉嵐一字春帆晚年自號石雲獻縣人也世爲河間著姓祖天申有善行父容舒官姚安太守河間爲九河故道天雨則窪中汪洋成巨浸夜有火光天申夜夢火光入樓中而公生火光遂

隱人以爲公乃靈物託生也少而奇穎讀書過目不忘夜坐暗室
內二目爍爍如電光不燭而能見物比知識漸開光卽斂矣年二
十四乾隆丁卯科解元甲戌成進士授庶吉士散館授編修己卯
充山西鄉試正考官庚辰充會試同考官辛巳京察以道府記名
壬午充順天鄉試同考官 命提督福建學政於癸未授侍讀明
年丁父憂服闋充日講起居注官擢左庶子戊子授貴州都勻知
府以四品畱任晉侍讀學士緣事望誤發烏魯木齊效力至戊所
時遣戍單丁五年內積至六千人爲都統具奏稿得 旨咸釋爲
民辛卯 召還授編修三十八年擢侍讀 命爲四庫全書館總
纂官丙申授侍讀學士充文淵閣直閣事日講起居注官己亥擢

詹事旋晉內閣學士壬寅授兵部右侍郎仍兼直閣事改任不開
缺乃異數也又轉左侍郎甲辰充會試副考官知武會試貢舉乙
巳晉左都御史丙午轉禮部尙書充經筵講官戊申 賜紫禁城
騎馬充武會試正考官壬子畿輔水災奏請截畱南漕萬石設十
廠賑饑全活無算嘉慶元年丙辰充會試正考官轉兵部尙書己
未充武會試正考官癸亥六月以八旬開秩 上遣官齋 上方
珍玩 賜之是年奏婦女猝遭強暴捆縛受污不屈見戕者例無
旌表臣謂捍刃捐生其志與抗節被殺者無異如忠臣烈士誓不
從賊而縶縛把持雖使跪拜可謂之屈膝賊庭者哉請 敕交大
學士九卿科道公議與未被污者略示區別量子旌表大學士保

甯等議奏如凶手在兩人以上顯係孱弱難支與強姦被殺者一體予旌飭交各督撫勘明情形請 旨定奪報 可乙丑正月奉 旨調禮部尚書協辦大學士加太子少保管國子監事二月十五日卒於位年八十有二奉 旨紀昀學問淹通辦理四庫全書始終其事十有餘年甚爲出力由翰林洊歷正卿服官五十餘載本年正月甯經擢襄綸閣晉錫宮銜遽聞溘逝深爲軫惜加恩賞陀羅經被派散秩大臣德通帶同侍衛十員前往賜奠並賞庫銀五百兩經理喪事任內處分悉予開復應得卹典查例具奏 賜祭葬予謚文達公於書無所不通尤深漢易力闢圖書之謬四庫全書提要簡明目錄皆出公手大而經史子集以及醫卜詞曲之類

其評論抉奧闡幽詞明理正識力在王仲寶阮孝緒之上可謂通
儒矣胸懷坦率性好滑稽有陳亞之稱然驟聞其語近於詼諧過
而思之乃名言也公一生精力萃於提要一書又好爲稗官小說
而嬾於著書少年閒有撰述今藏於家是以世無傳者今錄公所
作戴氏考工記圖序一篇以見梗概序曰戴君東原始爲考工記
作圖也圖後附以已說而無注乾隆乙亥夏余初識戴君奇其書
欲付之梓遲之半載戴君乃爲余刪取先後鄭注而自定其說以
爲補注又越半載書成仍名曰考工記圖從其始也戴君語予曰
昔丁卯戊辰間先師程中允出是書以示齊學士次風先生學士
一見而歎曰誠奇書也今再遇子奇之是書可不憾已戴君深明

古人小學故其考證制度字義爲漢以降儒者所不能及以是求之聖人遺經發明獨多詩三百尙書二十八篇爾雅等皆有撰著自以爲恐成書太早而獨於考工記則曰是亞於經也考證雖難要得其詳則止矣余以戴君之說與昔儒舊訓參互校覈穀末之軹明其當作軹不得與輿人之軹樹二名溷淆今字書竝軒字無之車人徹廣六尺以鬲長車廣當相等兩轅之間六尺旁加輻內六寸輻廣三寸綆寸合左右凡二尺則大車之徹亦八尺字譌八爲六弓人膠三錡一弓之膠不得過兩有十銖二十五分銖之十四正其當爲三鍤此皆記文之誤漢儒已莫之是正者後鄭謂軹輿後橫木戴君乃曰軹人言軹閒左右名軹之證也加軹與鞮弓

長庇軫軫方象地前後左右通名軫之證也。輶人任正衡，任鄭以當軌與衡而謂軌爲輿，下三面材，輶式之所樹，戴君乃曰：此爲下當兔圍軸圍發其意也。若輶式之所樹，宜記於輿人，今輶人爲之，殆非也。鄭以戈胡，句倨外博爲胡，上下戴君曰：此不宜與已倨已句字義有異。鄭引許叔重《說文解字》及東萊稱證，鍤鈔數同，戴君乃曰：鍤之假借字作琕，鈔之假借字，史記作率，漢書作選，伏生尙書大傳作饌，數小大相懸合爲一，未然也。戟刺長短無文，鄭氏旣未及賈公彥云：蓋與胡同，六寸戴君則曰：戈一援，戟二援也。中直援名刺與枝出之，援同，長七寸有半寸，刺連內爲一直刃，通長尺有二寸，猶夫戈之直刃，通長尺有二寸也。挑氏爲劍，中其莖，設其

後鄭訓詁爲大謂從中已後稍大之戴君曰不當與設其旋設其羽之屬異義後謂劍環在人所握之下故名後與劍首對稱矣鍾之鈺閒無文鄭以爲與鼓閒六等而合舞廣四爲鍾長十六戴君乃曰鍾自銑至鈺自鈺至舞斂綢以二準諸句股法銑閒八鈺閒亦八是爲鍾長十六舞者其上覆修六廣四蓋鍾羨之度不當在鍾長之數玉案以承棗栗莫詳其制戴君引枌禁及漢小方案定其有四周而局足廬人句兵欲無彈刺兵欲無蛸鄭皆訓之爲掉戴君讀彈如死蟪之蟪轉掉也蛸搖掉也其所以補正鄭氏注者精審類如此他若因嘉量論黃鍾少宮因玉人土圭匠人爲規識景論地與天體相應寒暑進退晝夜永短之理辨天子諸侯之宮

三朝三門宗廟社稷所在詳明堂个與夾室之制申井田溝洫之法觸事廣義俾古人制度之大暨其禮樂之器昭然復見於今茲是書之爲治經所取益固鉅然戴君不喜馳騁其辭但所存是文略又於駟人龍旗烏旗之屬梓人筭虞車人大車羊車之等圖不具其言曰思而可得者微見其端要畱以待後學治古文者之致思可也斯誠得論著之體矣余獨慮守章句之儒不知引伸膠執舊說沾沾然動其喙也是以論其大指以爲之序首

右漢學師承記江藩撰

昉在詞垣奏請將永樂大典內人間罕覩之書鈔錄流布旣而詔求天下遺書開四庫館 命昉與陸錫熊爲總纂撮其大凡撰

爲提要未著錄者則爲存目以識之其應制之作爲詞苑所宗

右名人尺牘小傳梁同書撰

嘉慶年間 實錄館奏請議敘有以過優爲言者 上以語公公
不置可否但云臣服官數十年無敢以苞苴進者惟親友倩臣爲
其先代題主或作墓誌銘雖厚幣無不受者 上輒然曰然則朕
爲 先帝施恩亦有何不可遂置不議又某科考試差後外有宣
布前十人詩句姓名者御史某密以陳奏 上召公論其事公奏
曰臣卽漏洩者 上問其故對曰書生習氣見佳作必久吟哦閱
卷時或記誦其句出而欲訪爲何人手筆則不免於漏洩矣 上
含笑其事亦寢

右勸戒近錄梁恭辰撰

紀曉嵐先生在烏魯木齊數年辛卯 賜環東歸畜一黑犬名曰
四兒戀戀隨行揮之不去竟同至京師途中守行篋甚嚴非主人
至前雖童僕不能取一物一日過七達坂車四輛半在嶺北半在
嶺南日已曛黑不能全度犬乃獨臥嶺巔左右望而護視之先生
爲賦詩曰歸路無煩汝寄書風餐露宿且隨余夜深奴子酣眠後
爲守東行數輛車空山日月忍飢行冰雪崎嶇百廿程我已無官
何所戀可憐汝亦太癡生後被人毒死先生爲冢祀之題曰義犬
四兒之墓

右隨園詩話袁枚撰

或言紀文達公博覽淹貫何以不著書余曰文達一生精力具見於四庫全書提要又何必更著書今人目中所見書不多故偶有一知半解便自矜爲搢獲不知其說或爲古人所已言或爲昔人所已駁其不爲牀上之牀屋下之屋者蓋亦鮮矣文達之不輕著書正以目逾萬卷胸有千秋故也或又言文達不著書何以喜撰小說余曰此文達之深心也蓋考據辨論諸書至於今已大備且其書非畱心學問者多不寓目而稗官小說搜神誌怪談狐說鬼之書則無人不樂觀之故文達卽於此寓勸戒之方含箴規之意託之於小說而其書易行出之以諧談而其言易入然則閱微草堂筆記數種其覺夢之清鐘迷津之寶筏乎觀者慎無以小說忽

之

右聽松廬文鈔張維屏撰

姜西溟不食豕紀曉嵐不食鴨自言雖良庖爲之亦覺腥穢不下咽且賦詩云靈均滋芳草乃不及梅樹海棠傾國姿杜陵不一賦以梅花海棠爲比鴨又何其幸也嗟乎嗜好愛憎之間有難強者豈惟口味哉詩文亦然

右聽松廬詩話張維屏撰

慶桂

慶桂章佳氏滿洲鑲黃旗人大學士尹繼善之第四子尹繼善自有傳乾隆二十年慶桂以廕生授戶部員外郎旋充軍機章京三十年五月調顏料庫員外郎旋擢內閣學士兼禮部侍郎三十二年命往庫倫辦事尋遷理藩院右侍郎三十五年授正白旗滿洲副都統三十六年命在軍機處學習行走三十八年閏三月充四庫館副總裁四月授伊犁參贊大臣七月調塔爾巴哈臺參贊大臣四十年六月哈薩克巴布克自稱經阿布勒畢斯將伊授爲圖爾屯鄂什克之阿克拉克齊偕阿布勒畢斯之子博普前來貢獻馬匹慶桂以巴布克並未與博普同來不可深信飭駁以

聞 諭曰巴布克爲人狡詐若不飭駁伊回去必又謊告阿布勒畢斯慶桂自抵塔爾巴哈臺以來辦理諸事各就條理無不慮到伊係尹繼善之子不比他人能如此辦事朕又得一能事大臣矣嗣後尤當勉力學習以副朕眷愛之至意九月調鑲黃旗滿洲副都統四十二年二月授吏部右侍郎四十三年四月哈薩克台吉薩尼推斯因失馬遣來卡倫尋覓慶桂並未明白究問將其逐回辦理失宜部議降調 上從寬改爲畱任四十四年轉左侍郎四十五年十一月調烏里雅蘇臺將軍遷正黃旗漢軍都統十二月諭曰前經降旨將慶桂授爲烏里雅蘇臺將軍令其由彼前往但慶桂在外年久伊母年高慶桂在烏里雅蘇臺將軍游牧事務

與巴圖辦完時令巴圖暫署將軍印務伊卽來京陛見俾得奉養
伊母數日俟慶桂回任後巴圖再回游牧四十六年以病 命來
京調理四十七年四月授盛京將軍八月奏巨流河城工業於上
年八月告竣查巨流河新建城垣東西北三面緊接山坡每逢雨
水俱沿城基南路入河城基不無受損擬於城外東西北三面開
挖洩水溝三道城內南北亦挖水溝一道水由溝行城垣得以堅
固並建石橋四座以便行旅共需銀一千二百兩歸入城工案內
覈銷報 聞九月調吉林將軍四十八年七月奏獲私挖濬犯一
百餘名 上以封廠停採原期護養濬苗今私挖人犯至一百餘
名之多有封閉之名而無其實不如仍准開採 命慶桂一面嚴

擊一面放票開採十月續獲偷窆人犯六百餘名濫二百兩奏入
上嘉之四十九年閏三月調福建福州將軍入 覲五月擢工
部尙書仍直軍機旋調兵部尙書正藍旗滿洲都統十一月充經
筵講官十二月山東巡漕御史佛喜保奏濟甯州知州王道亨承
審旗丁于士祥一案意存開脫及巡撫明興迴護該州並虧缺倉
庫苛斂地方各款 上命慶桂往鞫惟該州失察差役私受使費
並馬號採辦料豆辦理不善屬實餘坐誣請分別交部嚴議五十
年二月署黑龍江將軍五月帶管理藩院印務九月 命陝甘總
督福康安帶總督印赴阿克蘇一帶安輯回眾 上以慶桂前在
塔爾巴哈臺辦事頗爲歷練調度軍務悉所熟習 命帶欽差關

防馳往甘肅暫署總督印務十二月復授塔爾巴哈臺參贊大臣
五十一年回京補兵部尙書五十二年十二月湖北省監生羅正
榜控漢川縣知縣王蕙元侵蝕賑銀 命慶桂偕侍郎汪承霈往
讞之尋奏該縣辦理遲延致招民怨又於書吏勒索票錢調息事
實屬故縱餘屬虛誣兩造均定擬如律報 聞十二月署盛京將
軍五十三年署吉林將軍五十四年四月署烏里雅蘇臺將軍十
月侍衛齊巴克札布控察哈爾總管伊勒庫剋扣俸餉苦累兵丁
慶桂奉 命勘訊屬實律以重辟五十六年丁母憂五十七年九
月廓爾喀平 上以慶桂在軍機處承旨書諭夙夜宣勤交部議
敘列十五功臣內圖形 紫光閣 御製贊曰所謂故國賴有世

臣量材授職非卑逾尊本兵習政元長子子跨竈是乎圖形始爾
十二月兩淮鹽政全德奏參運司柴楨那移商課銀二十二萬兩
解補浙江鹽道庫內虧項 上以浙江巡撫福崧兼管鹽政柴楨
虧空庫項豈毫無聞見恐有通同染指情弊 命慶桂同調任浙
江巡撫長麟赴浙查辦訊出柴楨在鹽道任內福崧曾婪索金銀
及派辦物件不發價銀十一萬五千餘兩又福崧侵用掣規值月
差費等項銀六萬六千餘兩請將柴楨於犯事地方正法福崧亦
擬斬下軍機大臣大學士九卿議 從之並 命將福崧毋庸解
京卽命慶桂於押解所帶地方會同該督撫監視正法五十八年
授荊州將軍五十九年二月調正紅旗蒙古都統四月兼鑲藍旗

滿洲都統十一月河督蘭第錫奏高家堰一帶風損石工段落較多水底根腳難於估計請築壩厚水俾根腳顯露以便勘估興修命慶桂往勘奏稱祇按段拆補勿庸厚水查驗 上是之十二
月回京奏今歲夏秋雨多淮水盛漲兼西北風甚大以致浪拍堰工幾致滿溢幸而風勢斗轉得以搶護平穩誠爲神佑理宜重新廟貌以答 靈庥得 旨允行六十年二月管宗人府銀庫九月調鑲黃旗漢軍都統嘉慶元年五月 仁宗睿皇帝奉 高宗純皇帝駕幸熱河 命慶桂留京辦事二年三月調鑲紅旗滿洲都統十一月復調正藍旗滿洲都統三年四月山東武生戴雲龍控齊河縣知縣侵蝕舞弊各款 命慶桂同大學士劉墉往讞之惟

修倉勒派及車輛漕糧折價三款事屬有因餘坐誣問擬如律四年正月 高宗純皇帝龍馭上賓 仁宗睿皇帝命慶桂恭理喪儀調刑部尙書協辦大學士入直軍機尋授內大臣充國史館正總裁二月恭纂 高宗純皇帝實錄 命慶桂充監修總裁官加太子太保銜三月授文淵閣大學士總理刑部事務 賞海澱寓園四月充殿試讀卷官九月 奉安 裕陵禮成 命偕大學士董誥恭點 高宗純皇帝神主晉太子太傅尋管理吏部及理藩院事務六年正月調正黃旗滿洲都統二月管理戶部三庫事務三月三省邪匪賊首王廷詔就擒 上以慶桂贊畫軍機夙夜不怠加軍功一級七月奏每年應賞 御前乾清門侍衛軍機章京

並三庫官員養廉共需銀八萬餘兩因各省所解飯銀不敷支給請將戶部寄存捐納飯銀歸入銀庫借支備用 諭曰此等賞項從前原因三庫飯銀爲數較多是以每年格外分賞各處原非正俸及養廉可比年來外省應解錢糧俱因撥給軍需隨解飯銀短絀除三庫官員養廉動支外其餘應賞各處之項自當酌量撙節俟軍務告蕨各省飯銀解部充裕仍著照前例給賞十一月充會典館正總裁 賞黑狐端罩遇有祭祀慶賀大典准其服用七年六月參贊大臣德楞泰勦斃賊首 上嘉慶桂等承旨書諭周到勤勉交部優敘十二月 上以川陝楚勦捕逆匪大功勘定 特沛恩綸 諭曰軍機處行走之大學士慶桂經 皇考簡用多年

克盡忠悃自用兵以來承旨書諭勤慎小心朕敬惟皇考之恩
著賞給騎都尉世職八年七月賞戴雙眼花翎九年十一月
上以慶桂年屆七旬御書濟美延禧扁額賜之並御製詩曰龐
眉皓首冠朝紉大雅雍容德業醇名重三朝三相國勳隆一代
一賢臣蟠根深固天香遠調鼎平和庶政均喜屆古來稀有壽祥
徵麟趾頌振振十一年授領侍衛內大臣十二年三月高宗純
皇帝實錄告成上以慶桂在館八年終始其事賞用紫韁九
月仍管戶部三庫事務十四年正月晉太子太師七月充崇文門
正監督十五年十二月纂輯平定三省邪匪方略告成加一級十
六年八月扈蹕熱河止念慶桂年逾七旬見在骹疾命不

必隨進木蘭旋以骸未愈 賞假先期回京並 賜醫調理十七年正月加太保銜九月 諭曰大學士慶桂荷蒙 皇考高宗純皇帝簡用在軍機處行走朕親政以來復令人直內庭十有餘年夙夜在公奉職勤慎今年近八旬步履遲鈍每日樞直內廷朝入暮歸高年精力殊非所宜慶桂著不必在軍機大臣上行走輪班赴內閣閱本其所兼文淵閣事管理戶部及正黃旗滿洲都統均仍其舊伊所兼領侍衛內大臣見已開缺著仍授爲內大臣嗣後遇所管部旗引見人員均無庸帶領每屆值日奏事呈遞膳牌亦無不可慶桂所管事旣簡庶得頤養延齡用副朕體卹老臣之至意十八年九月 上以慶桂年老多病 命原品休致給予全俸

十九年十一月 上以慶桂年屆八旬 特予優賚二十一年六月卒 諭曰休致大學士慶桂自乾隆年間蒙 皇考高宗純皇帝簡用外任將軍內管部務朕親政後復擢贊綸扉在樞廷行走多年小心謹慎前因年老休致嗣值伊年屆八旬經朕賞坐生日優加寵賚茲聞溘逝軫惜殊深著賞給陀羅經被派奕紹帶侍衛十員前往奠醊照大學士例給予卹典尋 賜祭葬謚文恪子福同原任刑部員外郎孫培成見任二等待衛

右 國史館本傳

彭元瑞

彭元瑞江西南昌人父廷誥康熙癸巳恩科副榜貢生星子縣教諭本生父廷訓康熙丙戌科進士由編修擢贊善入直南書房元瑞以乾隆十八年舉於鄉二十二年中式進士改庶吉士二十三年丁母憂二十六年服闋二十八年散館授編修充武英殿提調三十二年入直懋勤殿命寫經爲孝聖憲皇后祝釐三十三年四月廷試翰林詹事等官特旨免考尋奉諭日中允曹文植編修彭元瑞沈初董誥學問俱優因內廷有承辦事件考試翰詹降旨停免未得與諸臣一體升轉著加恩各加一級九月充日講起居注官十二月遷侍講三十五年恭遇上六旬萬壽

進 萬福集成讚十章用唐懷仁所輯聖教序晉王羲之書排次
成文 上嘉之 命以內府所藏宋搨本摹勒 頒賜內外臣工
三十六年五月擢詹事府少詹事六月入直南書房旋充江南鄉
試正考官九月奉 命提督江蘇學政初松江府屬有金山衛學
起自明代爲勳屯軍戶舊設學額十二名而隸籍生童散處各縣
冒混煩多難於稽覈疏請裁汰將原額十二名散歸松江所屬各
學遵照通例不分民衛進取下部議行三十八年十月遷內閣學
士兼禮部侍郎三十九年受代回京署工部右侍郎兼管錢法堂
事四十年三月充三通館副總裁四月充殿試讀卷官旋丁本生
母憂四十一年服闋署工部左侍郎四十二年充浙江鄉試正考

官尋奉視學浙江之 命四十三年十月 頒賜聖製全韻詩元
瑞排集梁周興嗣千字文恭跋 御書獎諭曰向爲全韻不過欲
補黃綾本篇葉卿所知也然頗謂無能重構者今見排千字文之
疏所爲急則智生咄咄僂人以中多頌言故不復書今賜古研御
墨並貂裘以旌異想逸材四十四年二月授戶部左侍郎四十五
年 上南巡 賜詩曰江南兩名士汝今爲貳卿是因敦實行非
特取虛聲司此盛文處要當明道衡學修民自化匪所重詞英
命隨至江南閱召試卷三月調江蘇學政八月恭遇 上七旬萬
壽 御刻古稀天子之寶獻 古稀頌蒙 恩賞賚其明年 聖
製古稀說勒石 命以頌附於後是歲各省學政受代奉 旨仍

留江蘇學政任四十七年四月調吏部右侍郎四十八年五月調
兵部右侍郎十月回京充國史館四庫全書館副總裁四十九年
正月調吏部右侍郎十一月充經筵講官五十年正月 詔開千
叟宴元瑞年五十五亦叨 宴賞如一品例撰進千叟宴樂章
命工歌之尋奉 敕撰擬 甯壽宮 皇極殿鐙聯稱 旨 聖
製詩曰凡事曾聞豫立銓嘉稱元瑞製鐙聯東西次序南而北左
右分明後與前神以通靈氣以運六爲之儷四爲駢雙撐寶柱輝
皇極虔祝天恩待八年越十年重荷 御題詩云八柱鐙聯元瑞
彭豫教琢句十年成東西南北方隅列左右後前次第呈詰武敷
文勤實政撫遐惠近戒虛名恐難符願竟如願頌以爲規燭照明

元瑞以是年正月丙辰 詔舉十叟宴越月丁亥辟雍告成釋奠
講學越月辛亥 親耕藉田一時而三大禮行焉進三大禮賦五
十一年正月擢禮部尙書舊無以新銜請封之例茲奉 特旨予
一品封典八月充順天鄉試正考官五十二年正月調兵部尙書
充武英殿三通館總裁四月充殿試讀卷官五十三年二月 賜
紫禁城騎馬五十四年二月京察屆期奉 上諭尙書彭元瑞夙
夜宣勤著交部議敘尋議加一級三月調吏部尙書管理國子監
四月充殿試讀卷官五月教習庶吉士十二月 賜第於宣武門
內五十五年四月充殿試讀卷官五月教習庶吉士八月恭遇
上八旬萬壽敬集 聖製詩爲 萬壽衢歌三百首偕工部侍郎

臣鄒奕孝填註宮譜奏進得旨優獎詔於聖節日自圓明園入宮樂工歌以導駕又以是年歲陽在庚進入庚全韻詩冊上親加裁定賜題曰羣臣所進萬壽詩詞自當以彭元瑞此冊爲巨擘愛其用意巧而不纖文正而胥實因自首聯讀至末惜其尾聯平仄不諧蓋長律格調所最重也翌日召見元瑞言及之實亦驚惶無措于當下恍然有悟庚韻一百八十有九字讀至尾聯自當不諧首句因卽口占將尾聯上句之庚移爲首句用韻去一聯將三句諧平仄卽爲全璧此實西清佳話不可不紀因命董誥書冊後元瑞跪誦感服重繕一冊恭附跋語云自古人臣以文章受知者若楊徽之之選十聯柳公權之賡一韻卽已詫爲殊榮傳諸

詩話從未有臣下之詩仰邀 天章筆削者不材之木露滴露而
向榮在礦之金入紅鑪而成器臣以禱昧仰邀 誨育有言偶獲
一知半解皆由 曷迫之恩三生多幸 君以作師執經請業正
未有艾所爲服膺者真服而心悅者真悅也謹重繕一通附識末
簡以彰詩教以寫感銘又敬集 聖製文爲 聖德頌均蒙 寵
錫十一月加太子少保十二月奉 上諭吏部尙書彭元瑞供職
內廷勤勞夙夜學問優長本日朕至甯壽宮見其所製鐙聯莊雅
典切見在詞臣無出其右者協辦大學士員缺久未簡用有人彭
元瑞著加恩協辦大學士尙其益勵操修勉勤職業以副朕造就
成全至意五十六年四月以從子良昇爲其子頂冒吏員職名事

覺未將容隱之處據實檢舉經御史初彭齡劾奏部議奪職奉
旨彭元瑞辜負朕恩徇情容隱本應按例懲辦念其學問素優堪
任編纂書籍之事姑免其全行斥退著革去太子少保協辦大學
士吏部尙書仍加恩降授侍郎南書房行走予以自新而觀後效
尋補禮部侍郎十月遷工部尙書仍 賜紫禁城騎馬十二月以
太學石刻十三經暨石鼓文 命充副總裁五十七年十月授翰
林院掌院學士充經筵日講起居注官五十八年五月教習庶吉
士五十九年九月石經告成恭編考文提要十三卷得 旨褒獎
晉太子少保 賜賚有加旋充文淵閣領閣事 上以廓爾喀歸
降武功告蒞計自初定金川至是而十 御刻十全老人之寶

聖製記元瑞推廣 聖意恭集 聖製詩爲十全詩十章恭跋進
呈茲 恭輯 聖製詩文凡係武功爲 聖製詩文十全集表
進之六十年五月教習庶吉士八月充順天鄉試正考官敬排
御極六十年紆蠲賑貸 御製詩章纂爲孚惠全書六十四冊具
表進 呈蒙 恩優賚嘉慶元年 授 受禮成 太上皇帝御
皇極殿舉千叟宴元瑞恭預耆筵敬集 聖製詩爲衍 聖製千
叟宴詩八章並進千叟宴樂章四月充殿試讀卷官五月教習庶
吉士十一月充武會試總裁二年 命管理詹事府四年正月
高宗純皇帝龍馭上賓奉 旨總理喪儀四月 命充 高宗純
皇帝實錄副總裁專司編纂九月 高宗純皇帝奉安禮成奉

上諭工部尚書彭元瑞敬擬祝文措詞得當著晉太子太保嗣因
長子翼蒙官江南鹽巡道緣事被劾自以不能教訓疏請議處

上宥之五年四月充 實錄館正總裁初元瑞與翰林院掌院學
士那彥成保舉編修繆晉堪勝道府 上以繆晉爲平陽府知府

至是以贓削職遣戍元瑞等濫舉匪人部議鑄二級得 旨削加
二級免其降調六年二月京察屆期奉 上諭尚書彭元瑞恭辦

高宗純皇帝實錄盡心編纂著交部議敘尋議加一級三月充
會試總裁七年四月充殿試讀卷官五月教習庶吉士七月管理
御書處充會典館總裁十二月奉 上諭翰林院掌院學士例
應滿員在前見在彭元瑞以尚書兼充英和係屬侍郎其班次在

彭元瑞之後嗣後衙門一切應奏事件彭元瑞著列銜在英和之前遇有引見人員專著英和帶領彭元瑞年逾七十兼有骸疾著不必帶領會川楚邪匪蕩平論功 上以元瑞雖未入直樞廷亦能畱心軍務每有敷陳 命交部議敘尋議軍功加一級旋以實錄館奏請議敘聲明總裁總纂不敢仰邀敘錄奉 旨尙書彭元瑞專勘彙本尤爲出力此次卽著交部議敘元瑞以旬日之間疊被 恩命具疏懇辭得 旨俞允八年正月以疾請解職 温諭慰畱至六月始得請開缺仍畱充 實錄館總裁食尙書俸九月疾益劇半載以來仰蒙 眷念命軍機大臣遣章京往視者三命侍衛同太醫往視者二至是復 命軍機大臣遣章京汪彥博

往詢所服藥餌及病增減狀猶口授子翼蒙等繕摺奏謝逾時卒
遺疏不陳官閔不言子孫惟依戀 恩德籲請 皇上治益求治
安益求安訓大臣以實心飭外吏以勤事官多缺壅惟堅持資格
以正士趨詢事考言惟嚴辨公私以厚風俗疏入 上震悼 諭
曰尙書彭元瑞由詞臣洊歷正卿學問素優供奉內廷幾四十年
行走勤慎仰蒙 皇考高宗純皇帝特達之知疊膺 寵眷凡進
呈文字每邀 獎賞彭元瑞遭逢 恩遇感激倍常迨朕親政後
卽派令恭纂 皇考實錄開館以來各總裁中惟彭元瑞專司彙
本一切章程俱係伊一手經理見已將乾隆三十三年之書次第
辦竣甚爲妥速上年冬月因二十年書成降旨將伊議敘彭元瑞

具摺懇俯曾允所請俟 實錄全分告成再予優敘數年等語辦軍
務每有敷陳多可採納眷倚方深乃本年春間伊染患痲疾賞假
調理遣醫診治嗣因伊久病未愈准予開缺仍畱充 實錄館總
校並給予尚書正俸銀米節次存問俾安心調養以冀速痊茲聞
孟逝殊爲軫惜彭元瑞著加恩以工部尚書加贈協辦大學士並
賜緋被一襲著乾清門侍衛總管內務府大臣孟住帶侍衛十員
前往賜奠並賞廣儲司庫銀一千兩料理喪事所有任內降革處
分均予開復其應賠銀兩亦著概予寬免應得卹典該衙門察例
具公禮臣議上 賜祭葬如例 予謚文勤元瑞少負雋才多讀
書上詞翰迥籍後以文字受知 兩朝入直南書房垂四十年

內廷排架如視殿珠林石渠寶笈編續西清寶鑑甯壽鑑古天祿
琳瑯諸書皆與編纂所爲文章自敷陳典禮歌頌 功德恭和
震章申謝 恩命及奉 敕跋題 內府珍藏卷軸蓋奏 御書
千有餘篇手輯爲經進彙四十五卷屢荷 褒嘉駢蕃錫賚計
賜御用紅絨結頂冠四 御用十二章蟒服一全玉如意一黑狐
端罩一黑狐長褂一其尋常蟒服鑲玉如意暨文綺豐貂筆墨牋
研之類不勝書其 恩遇優渥罕有倫比飾終之典亦綦隆焉十
一年以疆臣請 命入祀鄉賢祠長子翼蒙乾隆四十三年進士
改庶吉士散館改部掾擢江南鹽巡道被劾奪職蒙 恩錄用授
七品小京官遷主事嘉慶十二年三月 高宗純皇帝實錄告成

奉 上諭原任總裁前任工部尙書贈協辦大學士彭元瑞從前開館之時一切章程體例皆出其手茲當告蒞未預觀成殊深惻念著加恩賜祭一壇入祀賢良祠其長子彭翼蒙係原任禮部主事著以員外郎卽用補刑部員外郎次子翔履由一品廕生授刑部員外郎三子習恆西城兵馬司指揮見任雲南趙州知州孫邦疇嘉慶十年進士改庶吉士見任編修

右 國史館本傳

公諱元瑞字掌仍一字雲楣南昌人父贊善公 贈光祿大夫諱廷訓康熙丙戌進士直 內廷公幼孤所生母繆太夫人辛勤鞠育既長盡通經傳百家之書乾隆癸酉選拔貢生本科舉人乙亥

國朝文獻通考卷之三百三十一
考授國子監學正學錄丁丑成進士由庶吉士散館第一授編修
累官協辦大學士工部尚書嘉慶癸亥卒年七十三謚文勤公壯
歲受 主知司天下文章之柄爲學者所宗踰四十年供奉 南
書房 恩遇之盛無與倫比有所進輒蒙 獎賚或 丹毫點定
每京察必居一等任乾隆辛卯江南正考官江蘇學政丁酉浙江
正考官亦畱爲學政任滿仍改江蘇丙午乙卯順天鄉試正考官
教習己酉庚戌癸丑乙卯嘉慶丙辰壬戌六科庶吉士辛酉會試
正考官其在浙江鄉闈首場卷幾盈萬公竭二十晝夜之力一晝
夜披閱五百卷卷各有評少一二字多或數十字悉舉其人常時
作文之利病友朋所切磋而未能改者指出之榜發兩浙之士譁

然頌亦帖然服江南順天卷尤多凡萬餘卷各有評皆中冓絮及
會試亦如之公莅事精審以直南書房故不能至部而公事無所
闕然竊謂公之明於取士所以上報主知國家三歲一舉行
直省試又閒遇覃恩之歲士之覓舉者十餘萬登名於禮部僅
千餘人使典試盡如公士知無可倖獲必爭自淬磨於學夫士者
四民之首士勤於業而閭閻其有不靖風俗其有不醇者與公所
著書經進文彙外曰考文提要奉敕所作集南宋以來諸家校
勘十三經之大成曰知聖道齋跋尾跋家藏書籍多所考證曰培
英集爲試體詩賦自取士增八韻詩能文之士多窮極工巧論者
謂爲公所作如初寫黃庭恰到好處曰策問爲公任學使時科試

國朝文獻通考卷之三十一
錄遺考貢之作所問皆目前事然皆自有策問來所未經繹思學者由其問目加意討尋可以爲格致之助又有宋四六選又補註五代史用功最多未葉行公三子長翼蒙洎次子之子邦峻邦疇皆出庶吉士起家彭氏自光祿公而下官翰林者凡七人

右小傳趙敬襄撰

文勤少年敏慧早直 西清應奉文字婉麗清新出人意表所進無不被蒙 獎賞者而恭跋 御製全韻詩乃集千字文爲之又撰乾清宮前鐙詞駢體尤佳 上賜之貂裘端硯中外榮之故恩眷始終不替嘗輯宋人四六爲藝林傳誦

右湖海詩傳張維屏錄

書麟

書麟滿洲鑲黃旗人父大學士高晉自有傳乾隆二十三年授鑾儀衛整儀尉累遷冠軍使三十六年五月授西安副都統三十八年以金川逆酋僧格桑索諾木滋事命爲領隊大臣七月領滿洲兵二千赴軍營十一月隨參贊大臣豐昇額攻勦沙壩山礪卡超眾先登賞戴花翎三十九年隨豐昇額帶兵二千由卓克采至薩爾赤鄂羅山將南面雪山占據攻開要隘復隨豐昇額率侍衛瑪爾吉等領兵一千五百進抵凱立葉山根遇賊三百餘人潛出迎擊之殺六十餘人餘皆竄四月隨參贊大臣五岱等領兵五千守羅博瓦山梁以牽賊勢旋管達爾扎克莫爾敏山等處駐兵

九月十一日夜賊潛擾莫爾敏山營卡千總嚴倫都司袁敏擊走之十三日夜賊侵達爾扎克北山溝營卡前鋒校德興擊走之十一月同副都統福珠里總兵特成額等分攻榮噶博最高峯頂及薩康爾山半賊碉四十年三月同福珠里副都統倭星額等攻木思工噶克碉卡四月同侍衛格勒爾德等攻木思工噶了口碉卡時副將曹順等分四路進攻書麟偕福珠里倭星額特成額等帶兵爲各路援應五月二十二日克之七月進克巴占之石碉九月同五岱侍衛彰靄等攻科布曲山碉座科布曲山與勒烏圍前相對中隔大溝崖礮陡峻書麟等分兩隊從正面進攻復於山坳設伏以斷賊援潛率兵躡水而過搶上山梁先得碉前大卡一座石

礮分三層賊番用梯上下並無門戶我兵進抵礮前拋入火彈空掘礮根賊眾來援我兵分頭迎擊斃賊甚眾十二月與特成額等攻克爾古什拉斯在科布曲山側我兵合力取峯頂兩礮及山峯西面礮卡隨進攻勒隈勒木通山脊石礮三座又克在後之兩大礮石卡九座尋奪據則郎噶克山梁四十一年正月大兵攻圍噶拉依逆酋索諾木等乞降金川平加三等議敘尋授廣西提督命圖形前五十功臣於紫光閣 御製書麟贊曰本非習戰遇戰卽奮恐孤父名偉哉後進功成事定提督鬱林攻則壯志守則小心四十三年丁父憂來京四十四年四月署兵部左侍郎十二月調署倉場侍郎四十九年授安徽巡撫五十年安徽旱奏請截留

漕糧五萬石畱關稅銀三十五萬兩有奇備賑 從之並 命酌
借籽種口糧尋奏以安徽秋成歉薄請將乾隆五十一年輪免漕
糧改於本年蠲免 從之十一月請設法清釐荒地疏曰查舉陽
縣賦役全書開載荒地六千餘頃僅據報墾三千餘頃其餘已墾
未報自必不少屢次飭查未經清釐斷無任其以熟作荒不行查
辦之理臣再四思維惟有稍寬年限立法清釐俾令漸復舊額庶
事不煩而民不擾查阜邑民間買賣田地率多照契開界過戶納
糧並不施弓查丈間有丈交者亦不過相沿舊例以繩索縱橫經
丈往往與糧額不符致啟爭訟而該縣悉皆旱地更非水田有墜
畔可比其毗連荒地之處未必無逐漸侵墾以熟包荒者日久無

稽職此之故應請將部頒官弓丈明畝數載入契內如有多餘之地照議定價值減半加增仍以所增之價一半入官一半給主則賣戶照額升科亦得糧清地實以免糾纏自所樂從其有自行清丈據實報升者免其已往之罪並獎以花紅儻過割時不用官弓丈量私自成交一經察出卽照欺隱律治罪如此則民間有所勸懲無不自圖保業樂於首報升科以杜後患仍於每歲年底將清出報升頃畝應徵錢糧彙冊題報數年之後自可漸復舊業於國課民情兩有裨益奏入 上嘉獎之五十一年正月 上以書麟悉心經理旱災飭部從優議敘尋部議加一級紀錄二次三月 上以兩江總督李世傑於河工未悉 命書麟於伏前往淮安

靖江一帶與李世傑河道總督李奉翰熟商河防事務加意料理
閏七月黃運兩河漫口書麟同李世傑李奉翰等奏曰本年江省
黃河漫口共有四處內墩口門雖寬而水勢尙緩卽有堵合李家
莊水勢亦緩逐漸挂淤口門下深處不過七八尺亦易於辦理湯
家莊漫口雖不免分大河之溜而正河水深無虞奪溜至司家莊
漫口溜勢流入口門較多先經臣等於對岸抽引挑河引溜北趨
並於西壩先行進占挑溜歸入正河則大河水勢自見增長口門
既有分洩壩工亦不至著重已飭各廳州縣購辦料物分段興工
其毛城鋪天然峯山等閘並茅家隄引河已次第堵閉務使黃流
併力東趨以冀刷深河底其束清禦黃兩壩頂用柴鑲作以期堅

實俾資攔蓄復奏請培高黃運兩河卑矮隄工修整臨湖浪掣石
工皆從之十月同李世傑李奉翰等奏江省桃源境內河形從
前由高家灣折至玉皇閣卽由東南直至惠濟祠下會清東注近
年以來順黃壩西北生有淤灘大河溜勢至玉皇閣隄前卽偏向
南崖直抵順黃壩迤上木龍之前復向北折至陶莊新河始自西
而東會淮歸海水勢紆折流行不能暢利查玉皇閣下河勢有向
東北坐灣之處若於該處迎溜抽挑引河一道俾黃河從此直注
歸入陶莊新河東注會清形勢較爲徑捷上年伏秋黃水長發惟
桃源境內存水較高未必不因玉皇閣一帶河勢紆迴所致自應
於該處抽挑引河預備明年開放備開放後大河溜勢全掣由茲

東注則順黃壩一帶埽工盡可淤閉卽一時未能全掣而有此分
洩之路可免存積過高之病且中河隄工以南又有縷隄一道將
來加高培厚作爲黃河北隄亦不大滋勞費報 聞旋奏司家莊
湯家莊漫口合龍復以安徽五河等十七州縣水災請賑得 旨
允行五十二年二月薦舉知府錢金殿臧榮青二員堪勝道員
諭曰朕召見錢金殿見其才具中平年已衰老臧榮青亦屬拘謹
並非出色之員書麟平日小心謹慎是以於屬員中亦擇其謹慎
者加以甄拔不知地方官有察吏安民之責必須才猷出眾通達
事體方稱特令保薦之意若循分供職之員設遇地方要務豈能
措置裕如且督撫鑒別人才不宜預存偏見如專取謹飭則巧詐

者皆有心迎合貌飾醇謹以邀識拔書麟在巡撫中尙堪造就其
查辦賑務協理河工亦能實心實力是以降旨教導開其識見嗣
後不可以一格取人以副朕訓勉飭勵至意十一月擢兩江總督
五十三年六月 諭曰朕聞各督撫內惟李世傑書麟於出巡時
輕騎減從尙能不累地方各督撫受朕重恩養廉優厚何不以李
世傑書麟爲則倣而必踵不肖督撫之覆轍乎十一月兼署江西
巡撫五十四年二月京察加一級六月同河道總督蘭第錫奏睢
甯南岸周家樓漫口二百餘丈自請治罪 上特免之旋以江西
糧船行走遲誤交部嚴議部議革職得 旨改爲降三級畱任十
一月周家樓漫口合龍交部議敘五十五年四月高郵州巡檢陳

倚道揭報查獲私描假印填給串票重徵之書吏具稟府州撫藩俱未批發經欽差尙書慶桂侍郎王昶鞠實 上以書麟瞻徇朦混交部嚴議並革去翎頂五月又因失察句容縣書吏侵用錢糧命革職交刑部治罪七月發伊犁效力八月起爲山西巡撫十一月內閣學士尹壯圖奏州縣虧空督撫派累惟李世傑書麟獨善其身奉 諭李世傑書麟尙能督率屬員畱心民事五十六年仍授兩江總督五十七年閏四月同江蘇巡撫長麟奏曰海州暨所屬沭陽縣地勢極爲窪下雨水稍多卽被淹成災近緩賑兼施殆無虛歲與其徒存糧賦虛名不若別定賦則以歸實在請酌減十分之三如海州上則地向例每畝徵銀一分八釐五毫零今徵

一分四釐八毫零流陽縣上則地向例每畝徵銀三分二釐五毫
零今徵二分六釐八毫零其極窪地畝改種蘆葦應納錢糧列爲
下則於百姓實有裨益 從之七月與蘭第錫奏瓜洲江岸坍塌
請於柴壩之外拋砌碎石鑲作護埽八月請添設江防把總裁山
清汛千總十月請移建淮安道署於清江浦均下部議行五十八
年正月兼署江甯織造並龍江關稅務五十九年正月兼署漕運
總督七月與蘭第錫奏伏汛水勢工程平穩奉 上諭辦理尙爲
妥速賞給大小荷包旋因徇庇兩淮鹽政巴甯阿與商人交結交
部嚴議奪職九月奉 旨賞給三等侍衛赴新疆換班效力嘉慶
元年署烏魯木齊都統書麟以恭遇 覃恩烏魯木齊地糧應否

國朝通志卷之三十一
三十一
蠲免咨戶部奏上奉 旨加恩蠲免四年正月授吏部尙書正紅
旗漢軍都統二月加太子少保銜三月 命協辦大學士授閩浙
總督八月以弟廣興奉差四川滋事獲咎奏請將廣興從重治罪
並自請交部嚴議奉 上諭春間書麟進京召見會面奏伊弟年
輕未經閱歷恐其高興多事書麟自請嚴議之處著加恩寬免仍
著書麟於家信中諄切教誡勉令時加檢束改過自新以觀後效
十月調雲貴總督兩江總督費淳奏參雲貴總督富綱任總漕時
貪婪各款 諭交書麟嚴密尋鞫實將富綱解京治罪又雲南巡
撫初彭齡奏參前任巡撫江蘭諱匿鹽井被淹 命交書麟查辦
五年正月奏江蘭有心諱災 上以書麟辦事素稱公正所奏皆

實奪江蘭職又奏確查江蘭於猱匪一案奏事不實辦理草率臣不敢稍有袒護亦不敢意存附和文致江蘭之罪奉 硃批所奏甚公二月馳抵黃草壩剿捕猱匪親督將士分兵兩路進攻猛白山巔焚燒大小賊寨數處殺賊六十餘人奉 上諭所辦好摺內所稱因探聞賊匪於山梁下紮營書麟卽馳回北路策兵冒煙進剿一節書麟前在金川帶兵時正在壯年其爲勇力朕所夙知見在任重封圻爲通省領袖而年逾七旬亦非少壯可比且賊匪俱於深林密箐中藏匿窺伺書麟於督剿之際自當持以慎重切不可稍涉冒昧致有疏虞旋經官兵攻克猛白南路山梁並剿洗賊寨潰匪竄丙別街場屯聚書麟分派提督烏大經蘇爾相等帶兵

將丙別街房屋概行剷洗攻破賊寨三大小賊營五殲斃賊匪無數奉 上諭所辦可嘉書麟著賞給黃綬大荷包四鑲寶石玉火鑰一鑲玻璃銅盒一至摺內有親身督陣之語書麟係協辦大學士不值因此等么磨躬冒矢石惟在調度得宜仍於奮勇之中寓持重之意勿致稍有疏失爲要是月官兵剷洗壩卡生擒起意勾結之賊目李文明李小老及丁小八等分別正法示眾奉 上諭所辦甚屬可嘉書麟著從優議敘尋議軍功加一級四月官兵南北兩路會合圍攻焚燒草窠寨二百餘間傷斃賊匪甚眾又令曉事順傑入箐招諭曉以利害旋據魯傑羅黑二老羅成才等率領稔恩蠻糯數木等五十二寨八百四十餘戶男婦老小來軍營叩

頭乞命並呈繳槍弩器械書麟受降並查明土司前此苛派緣由立碑申禁奉 上諭所辦甚好書麟辦理此事勦撫機宜均爲得手見將官兵營卡歸併所辦俱是閏四月奏謝 恩賞奉 硃批卿老成持重爲國宣猷蠻煙瘴雨之鄉切勿過勞加意珍攝佐朕治理勉之又奏降猓等隨同委員安插降寨清查地畝搜繳器械頗爲出力其和尚銅登銅金俱悔罪投誠並曉諭銅登等安分焚修奉 上諭所辦甚是尋加太子太保七月奏封茂隆銀廠 從之九月請將黔省總兵以下官照浙江之例交巡撫節制 從之十月調湖廣總督時教匪未平 諭將徐添德一股竄匪迅速勦捕殲除淨盡十二月書麟抵襄陽聞賊匪情形馳往勦辦並請暫

留江西撥運陝省兵米一萬石以備接濟 從之奉 上諭書麟甫到軍營卽以防堵爲見已得要領其勸諭居民築立堡寨更替疲兵均於軍務有裨摺內所稱無分疆界併力合擊深得大臣之體是月書麟會同倭什布前抵竹谿帶領吉林索倫兵兜剿青藍黃三號賊匪先經長麟明亮孫清元在瓦房口分兵夾擊大獲勝仗書麟因東川保豐一帶爲糧運要路虞賊匪折回親往截剿敗之 諭曰書麟係協辦大學士湖廣總督非從前出師金川僅爲領隊可比且年已七十尤當持重惟應遵照節降諭旨將團勇築堡安撫難民及善後等事悉心經理毋令川陝竄匪闖入楚境卽爲不負委任摺內所稱山勢險峭僅有仄徑一綫書麟扶掖步行

覽奏深爲懸慮賊情詭詐深山窮谷之中難保無賊匪藏匿伺閒竊發書麟領軍之人惟在調度得宜指示策應不必以帶兵殺賊見長冒險輕試書麟以徐添德等大股在竹山邊界泉溪一帶縱火逃竄飭鎮將分路搜捕均有斬獲六年正月書麟同明亮倭什布孫清元等由竹山房縣進剿徐添德三路合擊先後殺賊八百餘人生擒五十餘人 賞鑲寶石帶頭玉扳指大小荷包疏言剿賊之法先以固結民心培養民氣爲第一要務撫輯得宜則賊卽是民任其失所則民卽是賊奉 硃批此數語包括盡矣卿如此忠勇必能成功勉之又奏楚省被賊擾害民力拮据請將截存漕米暫緩搭解以備賑卹 從之二月川匪苟文明李彬由陝西平

利縣越老林欲竄房縣書麟與長麟明亮督兵倍道進擊與賊遇於獅子崖大敗之殲僞總兵興昂僞先鋒魏鍾鈞旋分兵伏余家溝高尖山伺徐添德張允壽來襲營起擊之殺賊千餘人適房縣北境別有賊三千餘人攻撲寨礮令孫清元等分隊進剿斃五百餘人生擒賊李魁聖等百餘人奉 旨交部議敘尋奏請於襄陽添設提督並移駐防協鎮於鄖陽竹山二處 從之三月徐添德苟文明等在茅倫山一帶屯聚經孫清元吉林泰等督率將弁分爲六隊奮勇攻擊斃賊無算奉 上諭書麟雖未帶兵打仗其一切調度均合機宜著賞給四喜玉扳指金盒黃辦珊瑚豆大荷包是月京察加一級四月以病軀委頓恐誤軍務疏請解任調理

上命乾清門侍衛孟住帶同太醫並書麟子吉郎阿馳往看視並諭令緩程回京初九日卒於軍以勦賊未盡囑身後以行衣入殮遺疏入 諭曰書麟老成練達體國公忠敷歷有年久著勞績本係宣力舊臣精神未形衰邁設不調任湖廣尙不致因勞成疾茲聞溘逝深爲軫惜著加贈太子太傅賞給一等男爵令伊子吉郎阿承襲准再襲十次仍令孟住前往賜奠卽令吉郎阿迎柩回京俟入城時再行加恩尋禮部議卹上 予諡文勤七月 諭曰據額勒登保德楞泰前後奏參倭什布辦理湖北糧臺遲誤書麟正在總督任內深知其事並不陳奏未免心存徇隱於末路稍覺模稜見在靈柩到京因此不親往奠醑但念書麟平日居官清廉

公正聲名久著節次辦理軍務均有成勞仍加恩派孟住帶領侍衛十員前往賜奠以示朕軫念舊臣之至意子吉郎阿襲一等男見發兩廣以副將委用

右 國史館本傳

保甯

保甯圖伯特氏正白旗蒙古人祖拉錫官領侍衛內大臣父納穆札勒以靖邊將軍平回部盡節 贈三等義烈公俱有傳保甯於乾隆二十四年由親軍襲公爵授乾清門三等侍衛二十七年遷二等侍衛三十八年隨征金川四月授陝西興漢營參將十一月隨參贊海蘭察等進據斯達克拉阿噶爾布里等處山梁十二月署陝西興漢鎮總兵三十九年正月隨將軍阿桂進攻登古山賊寨帶兵接應以次攻克旋取羅博瓦山峯碉卡奮力迎擊賊再潰五月隨阿桂克喇穆喇穆十一月克達爾札克四十年五月掃除勒吉爾博一道山梁碉寨十月隨大軍分攻西里山梁黃草坪先

行踰水渡河奪獲大礮一座石卡二座十二月阿桂奏保甯節次打仗無不勇往綠營事宜亦俱練習得旨保甯著實授興漢鎮總兵四十一年七月調河南南陽鎮總兵四十二年二月調直隸馬蘭鎮總兵兼管內務府大臣四十三年三月奏昭西陵大紅門西向有居民自乾隆十年圈禁西峯口此內地民久經移徙請將原設紅椿四十撤交石門工部存用並將東西各堆撥移設要地從之四十五年九月奏向來聖駕謁陵圍牆內外橋道俱係綠營弁兵修搭惟西便門內盤龍嶺迤北有河二道河身寬闊令石門工部搭橋河水消長無常而石門工部拘泥舊例不論水之大小但按一定丈尺修搭需料甚多請嗣後仍令弁兵不拘丈

尺隨時酌辦以省糜費其圍牆遇夏雨坍塌定例年終彙奏次年春閒始派員修理做曠經年大礙觀瞻嗣後請隨時查辦得旨如所議行四十六年二月奏孝陵神路右邊儀樹一段地勢甚窪請開洩水明溝一道俾儀樹不致淹浸又西峯口天臺山一帶向僅指山梁爲內外界迄今樹株稠密山前均屬民地打柴捕牲難免荒火延燒應於週圍開豁大道二十丈並立紅椿明示禁限其每年芟割卽用附近堆撥兵毋庸另派四十七年三月請將馬蘭鎮屬官弁養廉名糧二百四十分挑補實兵以濟差防圍牆內外應添堆撥地方照數添設上俱是之是月擢江南提督四十九年正月授成都將軍五月勦辦甘肅石峯堡逆回上命保甯

挑選成都屯練番兵二千名帶赴鞏昌安定協剿七月事定撤兵回川是月偕總督李世傑提督成德等疏稱前奉諭旨以鳥槍實軍營利器應令槍兵一體拔補馬戰及外委把總等官俾知上進有階爭相鼓勵嗣經定議槍兵遇拔補馬兵准三缺後用一人拔補外委把總准二缺後用一人惟查定例考馬糧及挑選外委把總均須兼看弓馬是以槍兵未習弓箭者多不能入選嗣後輪應拔補時卽專閱鳥槍無庸兼試弓箭俾壹志凝神悉心講究不致藉口兼營稍有生疎之慮至由鳥槍拔至千總後六年俸滿仍校閱弓箭方准照例保送以昭激勸奉旨以實爲之母爲虛言十一月奏請將沃克什土司改歸懋功同知及懋功協副將管轄

又請將懋功協專管新疆各營不必令松潘鎮兼轄卽照阜和永甯等協營之例歸提督統制其撫邊營應請添設額此外委二員卽於該營馬兵內拔補均得 旨允行五十一年三月授四川總督 諭曰保甯平日辦事尙能小心謹慎操守亦尙可信是以特加簡用但不免自滿之見稍涉高興川省外通金川西藏內地尙有咽喉滋事保甯惟當實心任事嚴加管束庶不負簡用之意六月疏稱上孟董下孟董九子寨等寨生齒日繁定額員弁不敷委用請照雜谷乾堡二寨之例各增守備一員並於五寨內各寨增千把總各一員外委二員卽於曾經出征著有勞績之屯練內依次拔補遇缺出隨時充選毋庸頂襲下軍機大臣議行九月奏川

省直隸州廳遇軍流以上重案向例先解本道然後解送臬司惟地方寥闊有距本道數百里至千餘里者輾轉解送恐有疎虞請嗣後徑解臬司以免稽遲脫逃 從之十二月奏請改修打箭鑪城仍照舊例建立東南北三門各築牆四十五丈於內外扼要處酌築卡房駐兵捍衛得 旨嘉獎五十二年六月因平定臺灣先後奉 旨採辦川米五十萬石運閩緣川船不敷裝載請將湖廣商船封雇備用 上以商船盡行封雇川米卽不能轉運各省米價必致騰貴保甯務須設法妥辦陸續撥運期於要需無誤而商販仍不致有妨礙方爲妥善九月以川省秋審案犯誤入緩決九起奉 諭申飭是月奏派松潘鎮總兵穆克登阿率領屯練降番

二千名赴臺灣協勦報 聞十一月授伊犁將軍五十三年戶部
議前任四川總督保甯奏新疆五屯請增給茶引一千張又改黃
梁大定白雞白鹿等八寨熟苗編入茂州民戶管轄皆得 旨允
行五十四年五月晉內大臣是月奏伊犁地方極邊請增設委前
鋒參領 從之五十五年六月來京 陛見 命於途次馳赴四
川署理總督時潼縣營遊擊張世紳駐防察木多臺站未及一載
捏病乞休保甯奏請革職枷號半年再行釋回 上以暫署督篆
不避嫌怨嘉之十一月加太子少保銜五十六年正月授 御前
大臣初汗山察罕烏蘇以內游牧之鄂羅斯所屬烏梁海等潛往
哈屯河外汗山地方 上慮其滋生事端 諭保甯應否帶兵擊

逐會同伊犁參贊大臣恆瑞詳議三月保甯馳至烏里雅蘇臺科布多等處查看情形奏言烏梁海居住以來甚屬安靜無事並查看杜爾伯特罕瑪克蘇爾札布亦屬安靜烏里雅蘇臺科布多所屬邊卡暫且無庸添兵惟暗中防範 上聽其言是月請增天全州茶引二千五百張五十八年三月拏獲偷竊哈薩克馬匹之察哈爾兵丁拉克巴及土爾扈特噶綉審明正法奏入 諭曰新疆大臣等辦事往往袒護內地民人致外藩心不悅服保甯此舉足以服哈薩克之心著交部議敘五十九年七月奏伊犁效力原任理事官宗室蒙泰懈於職事俟十年限滿再畱二年 上嘉其據實入奏賞玉扳指大小荷包並交部議敘八月因請補放總管等

缺僅止各保一人並無擬陪人員得旨嚴行申飭交部議處十
二月授吏部尚書諭俟新任伊犁將軍明亮到後來京六十年
正月奏言土爾扈特和碩特等閒散台吉例得補放協理台吉惟
向來俱照原銜頂帶請嗣後照內札薩克蒙古例補放協理台吉
時卽奏換二品頂帶上允所請閏二月補鑲黃旗漢軍都統五
月因發遣伊犁人犯例在鉛廠交納銀兩內有殘廢不能交納者
請免治罪原保官員亦免查議上以其瑣屑具奏邀名市恩交
部嚴議尋改革職畱任九月仍授伊犁將軍先是浙江布政使歸
景照爲巡撫福崧代購銀兩發遣伊犁至嘉慶二年再畱三年期
滿保奏應否釋回諭曰歸景照身獲重咎之員自可毋庸查辦

乃軍機大臣及該部奏擬再畱三年准其捐贖釋回實屬錯誤而保甯卽爲是奏尤屬徇庇著交部嚴議部議無級可降應革任奉諭從寬畱任十一月因伊犁之索倫成丁閒散甚少不敷挑取甲兵請將錫伯一百六十戶入於索倫挑取又遵旨賞給察哈爾滋生銀兩派員代爲置產見據較前繁盛奏入上以其辦理妥善晉協辦大學士十二月授正黃旗漢軍都統三年五月請將伊犁積貯銀內撥一萬兩生息以備該處鰥寡孤獨養贍從之四年正月擢大學士仍暫畱伊犁將軍任三月晉太子太保十二月授爲閱兵大臣五年閏四月仍授伊犁將軍十一月調補鑲紅旗滿洲都統六年正月命充文淵閣提舉閣事是年京察上

念其久任伊犁鎮靜安詳藩部悅服交部議敘三月奏請開採塔爾巴哈臺所屬處金沙 上以該處金礦久經嚴禁今若官爲開採勢必招集多人奸良莫辨並恐內地遊民紛紛踵至於邊地殊有關係傳 旨申飭仍著嚴行封禁七年五月回京授正黃旗領侍衛內大臣六月管理戶部三庫事務尋兼管兵部事務七月充國史館會典館正總裁八年七月因承辦 孝淑皇后奉安事宜會奏摺內措詞不經 上以保甯更事有年不應疏忽若此著革去太子太保領侍衛內大臣文淵閣提舉閣事戶部三庫事務仍帶革職畱任九月兵部會題大功全竣本內於 世宗憲皇帝擡寫之處錯誤未校對更正部議褫職奉 諭改爲革職從寬畱任

九年七月鑲白旗滿洲有放米舞弊一案以保甯曾署該旗都統奉旨降一級畱任十年二月會典館進呈事例內於世宗憲皇帝擡寫之處繕寫錯誤保甯等自請革職上仍加恩改革職畱任十一年五月因病奏請開缺上不允十月復請解退職任從之仍命在家食公爵全俸十三年二月卒諭曰予告大學士公保甯老成端謹練達有爲由侍衛宣力戎行洊膺專閫兩任伊犁將軍鎮撫邊陲克臻甯謐茲聞溘逝深爲軫惜著派榮郡王蘇億帶同侍衛十員前往奠醊並加恩特賜陀羅經被仍賞銀一千兩治喪尋賜祭葬諡文端四月伊犁將軍松筠奏請保甯於伊犁入祠致祀得旨照所請行子祥慶襲義烈公見調烏魯

木齊都統慶惠見任馬蘭鎮總兵兼管內務府大臣

右 國史館本傳

劉權之

劉權之湖南長沙人乾隆二十五年進士改庶吉士二十六年散館授編修二十七年充順天鄉試同考官三十二年丁父憂三十五年服闋三十六年充貴州鄉試正考官三十七年三月充會試同考官五月擢左春坊左中允十二月遷司經局洗馬三十九年充江南鄉試副考官四十二年提督安徽學政四十三年丁母憂四十六年服闋四十七年四庫全書總目提要告成議敘以侍講借補四十九年五月補翰林院侍講九月轉右春坊右庶子五十年大考二等五十一年正月擢大理寺少卿二月遷大理寺卿五月遷都察院左副都御史五十二年三月奏大挑各直省舉人上

屆派出之王大臣係於十日之前豫行奏派爲日既久恐外閒有借名指騙等事請令承辦衙門於前一日奏派並令王大臣等聞命後卽至朝房住宿不得攜帶多人以杜弊竇 諭曰大挑舉人原爲疏通寒畯俾得及時自效必當秉公揀選以杜夤緣撞騙情弊其如何定立章程嚴防弊竇之處著軍機大臣會同該部議奏尋奏將大挑各直省舉人之王大臣於前一日奏派惟朝房在午門之外官員人等出入必經不能概行禁止轉恐滋弊請照驗看月選官例奏派滿漢御史各二員監視稽察並令步軍統領衙門會同五城御史一體嚴密訪查 從之復 諭曰此次大挑舉人著在午門內挑選並添派護軍統領一員稽察所有派出之王

大臣俱著在內閣住宿以昭嚴肅五月提督山東學政五十六年擢禮部右侍郎五十七年轉左侍郎五十八年充殿試讀卷官六十年六月充江南鄉試正考官八月提督江蘇學政嘉慶三年二月調吏部左侍郎仍留學政任九月還京四年正月遷都察院左都御史三月充會試副考官八月奏採買倉穀地方官奉行不實往往藉端肥橐各情 諭曰據劉權之奏買補倉穀宜赴鄰邑採辦以免派累一摺所奏自屬可行採買倉穀向來原有定例今據奏地方官輒在本地派買不論市價貴賤祇發銀四五錢不等並勒令出具照市價領票兼之差役需索使費以致領票花戶皆不願上納穀石惟求繳還原封銀另外加倍交價較交穀尤爲省事

甚至有力富戶賄囑書吏將本名下之穀飛灑零星有田之戶富戶轉得少領竟至善良之貧民衣食難周深受採買之累地方官祇圖折價入己遇當平糶之年仍無存貯之米一旦協濟鄰省則著米鋪倉猝購辦照時價尤有剋扣及起運收米押運之家人胥役又向鋪戶百端勒指等語種種弊端實所不免特此通諭各督撫嗣後遇應買補倉穀年分務飭令所屬在豐稔鄰縣按照市價公平採辦不許向本地派買並將向來胥吏等串通舞弊積習嚴行查禁隨案重懲以期倉穀皆歸實貯小民不致擾累至社倉原係本地殷實之戶好義捐輸以備借給貧民之用近來官爲經理大半借端那移日久並不歸款設有存餘管理之首士與胥吏亦

得從中盜賣儻遇歉歲顆粒全無以致殷實之戶不樂捐輸老成
之首士不願承辦是向來良法徒爲官吏侵肥自應一律查禁並
著各該督撫等將各省社倉仍聽本地殷實富戶擇其謹厚者自
行辦理不必官吏經手以杜弊端而裕民食各該督撫務須董飭
所屬實力奉行如有前項弊端卽行據實參奏儻仍視爲具文復
蹈前轍一經訪聞或被科道參奏必將該督撫重治其罪將此通
諭知之尋以編修洪亮吉投遞書札語涉狂悖未卽呈奏降旨
查詢權之自請嚴議上以權之人品端正節次陳奏之事尙能
切實著加恩改爲議處旋議降三級調用上從寬改爲畱任十
月轉吏部尙書賜紫禁城騎馬五年八月充順天鄉試正考官

九月以前在江蘇學政任內保薦知縣黎誕登失實自請嚴議

諭曰黎誕登於劉權之保奏後朕降旨詢問費溥等該員平日居官聲名如何該督撫亦經保奏並請升署太倉州知州至黎誕登在任虛博聲名自敘實政令紳衿等具呈勒石等事該督撫近在省城尙未深知況劉權之係在學政任內接見數次其官聲得自傳聞焉能究悉底裏若因其採訪未確卽加以嚴議恐將來大臣等心存顧慮不肖舉薦人才但竟置之不議又恐開濫保之端劉權之著加恩改爲議處旋議降調 命畱任六年充會典館副總裁七年四月派閩庶吉士散館卷六月 命在軍機大臣上行走 賜宴海淀十二月三省剿捕逆匪大功戡定 上以權之素日

陳奏時有所見 敕部議敘八年三月派閱大考翰詹卷六月充
國史館副總裁七月三省餘匪剿捕淨盡復交部議敘九月管理
戶部三庫事務九年二月京察 諭曰尙書劉權之在軍機處行
走小心勤慎著交部議敘六月調兵部尙書十月調禮部尙書協
辦大學士加太子少保銜六月因保奏軍機章京瞻徇情面欲將
中書袁煦列入經戶部侍郎英和劾之 命廷臣嚴議尋議革職
諭曰此次軍機處保奏章京袁煦係於挑入後奏補實缺業經
邀恩劉權之卽欲將伊保奏亦當向慶桂等會同商酌乃輒以袁
煦係房師紀昀之壻紀昀在日曾經託過爲詞師生誼屬私情部
院大臣僉同辦理公事本不應心存私見何況揚言於眾罔顧公

議劉權之屢次瞻徇情面實屬溺職本應照議革職第念劉權之
在各部院供職有年資格較深且在軍機處行走業已三載尙無
錯誤著加恩降爲編修仍帶革職畱任遇有國史等館纂修缺出
令其充補十二月 諭曰劉權之於保奏軍機司員一事並未舉
行祇係空言念伊科分較深本日御門所出翰林院侍讀員缺加
恩著劉權之補授尋遷侍講學士十一年三月遷光祿寺卿四月
命充國史館總纂官五月 命偕侍郎瑚素通阿往勘通州官
剝船隻虧損數目並嚴禁封雇民船之弊會正定縣生員王之選
以知縣盛安徇縱吏役包攬車輛折收草料等情赴京具控仍
諭權之偕瑚素通阿往按之鞫實官吏依律擬罪有差六月權內

閣學士兼禮部侍郎九月遷都察院左都御史十二年正月轉兵部尙書十月仍 賜紫禁城騎馬十四年巡視濟甯漕船御史英綸受贓伏法權之以濫保英綸干議因無級可降部臣請革任 上加恩寬免十五年正月擢協辦大學士五月再充會典館副總裁七月 上行秋獮禮 命偕儀親王永璇尙書明亮勒保畱京辦事八月充順天鄉試正考官十六年正月充國史館副總裁 上幸五臺派畱京辦事王大臣權之復與焉四月充殿試讀卷官 五月授體仁閣大學士管理工部事務充國史館會典館正總裁 六月復加太子少保銜十七年二月派閱大考翰詹卷五月管理 戶部三庫事務十八年二月京察 上以權之襄贊綸扉夙夜匪

懈交部議敘九月權之患目疾 賞假調理並 賜醫診視旋以
逆匪林清滋事 諭曰大學士劉權之年老多病著以原品休致
給予半俸二十三年七月卒於家 諭曰休致大學士劉權之於
乾隆年間通籍詞垣歷升卿貳經朕用至協辦大學士緣事降調
復經海擢卿貳簡任綸扉管理部務嗣因老病休致回籍賞給半
俸俾資頤養茲聞溘逝殊爲軫念著加恩照大學士例給予卹典
該部察例具奏所有任內一切處分悉予開復尋 賜祭葬諡文
恪子若璿廕增生貴州直隸州知州若珪見任工部員外郎

右 國史館本傳

公姓劉氏諱權之字德輿號雲房先世爲誠意伯次子仲景公後

曾祖君輔始由江南遷楚隸籍長沙配彭氏祖或配彭氏父暉潭
雍正庚戌進士歷官戶部主事廣西泗城府知府配熊氏任氏自
曾祖以下皆以公貴 贈如其官配皆 贈一品夫人兄弟五人
公居季與從昆弟齒行七居會城小東街生而穎異資質過人及
長爲文風發泉涌下筆滔滔如有神助年二十一由縣冠軍入泮
時邑宰爲關西楊子安先生有知人鑒局門五試之拔置第一公
嘗曰此某生平第一知己也終身佩戴不敢忘是年領鄉薦次年
庚辰科聯捷成進士二甲選庶吉士習清書謁學士秦澗泉先生
倒屣以迎一見遂定交語人曰此湖南第一人物也後當以文章
政績名顯天下次年辛巳散館授編修壬午乙酉兩科俱充順天

鄉試同考官丁亥丁父憂辛卯充貴州鄉試正考官壬辰充會試同考官是年冬遷右中允旋遷司經局洗馬癸巳充四庫全書纂修兼協刊總目官甲午充江南鄉試副考官丁酉提督安徽學政按試各郡釐剔諸弊凡傳遞代倩頂冒者胥斂蹟焉尤諄諄以正文體端士習爲要務戊戌冬丁母任太夫人憂己亥庚子在籍督修嶽麓書院辛丑仍充四庫全書總目協刊官先後同事者皆遷轉出館公獨任其勞甲辰全書總目告成議敘以講讀通補秋授翰林院侍講旋遷左庶子乙巳大考翰詹列二等丙午春正月遷大理少卿逾月遷大理寺卿四月遷左副都御史敷陳剴切多見采納丁未大挑直省會試舉人條陳積弊請奏派王大臣於命

下之日卽赴內閣挑選是日各衙門司員不許持橐入閣畫諾並請添派科道四員稽察 上覽奏深爲嘉納悉報 可此次挑選輿論帖然都人士咸稱之蓋公意亦有所指也夏五月提督山東學政益矢公慎地方大吏悉敬佩之明年例舉拔萃科屏絕羔雁惟拔真才選士百餘人皆山左之薦一時翕然稱得人辛亥遷禮部右侍郎壬子充順天鄉試監臨官癸丑充殿試讀卷官甲寅巡幸天津充召試閱卷大臣秋充順天鄉試監臨官乙卯充江南鄉試正考官旋提督江蘇學政訓飭士子約束僕隸悉如任安徽山東時尤加意廉訪地方官吏之賢否及民間之利弊丙辰 今上登極 恩廕一子轉吏部左侍郎己未 上親政之初整飭官

常激揚彰瘴首擢公爲左都御史隨時敷奏多不令外人知雖至親骨肉亦不得與聞惟湖南省向以採買累民奏請嗣後向鄰封採買倉儲無虧胥吏無所售其術從此閭里免派累之苦今鄉曲間猶嘖嘖傳頌之是科充會試總裁 賜紫禁城騎馬遷吏部尙書與同寅和衷商推疏通選法如部院截取人員向祇歸單月銓選議添京升一班庶常散館改知縣向係五缺後選用一人議令到班時卽行選用俟散館人員選畢方選各班大挑舉人向除新科中式者不計外截止近三科不得與挑議以截止三科應連新科一併計算以及翰詹科道國子監各衙門遇缺升轉開單進呈比較資俸深淺權衡公允以免偏枯今悉載入例條遵行如四川

舉人朱琬條陳軍務前後萬言悉爲代奏此其一端也庚申充順天鄉試正考官壬戌充會典館總裁晉太子少保經筵講官充殿試讀卷官並朝考直省選拔貢生充閱卷大臣秋特旨投軍機大臣賜直房於圓明園癸亥管理戶部三庫事務秋命往河南查勘河工輕騎減從無絲毫擾累地方與河督悉心商畫相度機宜俾得及早蒞事乙丑遷禮部尙書協辦大學士充殿試讀卷官朝考進士充閱卷大臣夏因保舉軍機章京與同官意見不協各有所舉稟未盡諾俟再商推適奉派入城驗看月選官同官乘間單銜入奏諭旨同日俱罷加恩仍授編修冬遷翰林院侍讀旋遷右庶子丙寅春遷侍讀學士旋遷光祿寺卿命往

天津鞠獄丁卯遷內閣學士兼禮部侍郎戊辰 命往正定鞠獄
兩次往來畿輔吏民俱無滋擾原情定讞悉得其平遷左都御史
旋遷兵部尙書己巳 朝考進士充閱卷大臣庚午復授協辦大
學士充順天鄉試正考官辛未充殿試讀卷官 朝考進士充閱
卷大臣晉太子少保經筵講官體仁閣大學士管理工部事務兼
管戶部三庫事務秋 上駐蹕木蘭充畱京辦事大臣壬申復充
畱京辦事大臣癸酉夏因目疾上疏乞假秋初目疾益劇復上疏
乞假先後奉 恩諭給假調養九月 命以原官致仕在籍食俸
旋赴 宮門謝 恩奏繳圓明園 賜第甲戌夏赴 宮門奏請
回籍由水路緩程歸是冬抵里守先人敝廬僅數椽杜絕賓客晏

如也懸前後 賞賜福字於庭遇 朝賀節瞻仰行禮越二載復
蒙 恩馳驛 賞賜福字並如意一柄戊寅夏薨於里第遺疏入
奏 諭祭葬 賜諡文恪公生於乾隆四年己未歲九月初七日
亥時薨於嘉慶二十三年戊寅歲六月初八日申時享壽八十元
配湘潭胡夫人笄室何恭人子二長若璫廕增生任刑部主事娶
湘潭翁氏胡夫人出次若珪嘉慶癸酉科副榜候選員外郎娶巴
陵方氏何恭人出女四一適茶陵拔貢生任廣東連州州判譚德
潤一適湘陰候選同知李文燮一適清泉生員丁世鏐俱胡夫人
出一適巴陵任刑部司務方宗斌何恭人出孫三長曾鏐娶四川
秦氏次曾鏐俱若璫出次曾鏐若珪出俱幼未聘孫女四長適長

沙周其餘未字曾孫承沛幼未聘葬於湘潭十都雙板橋地名見龍坡枕子趾午兼癸丁嗚呼公自弱齡釋褐通籍五十有九年荷高宗純皇帝知遇之隆由詞垣洊歷卿貳今上親政伊始首蒙擢用仰承寵眷至優極渥偶呈吏議無不曲賜矜全計自登朝以來侍講幄直樞廷重入綸扉再遊芸館三掌臺諫敷歷各部寺院悉皆恪恭盡職而疊掌文衡尤爲臣工未有之異數視學各直省者三主禮部試者一主京省鄉闈者五分襄會鄉闈者三監臨京闈者再讀卷殿廷者四其朝考召試覆試考差及考取御史教習等事奉派閱卷者復難以枚舉門下士幾徧天下培植人才誘成後進好善之心常若不及至於進言無隱行事

以忠寓精明於渾厚挽澆薄以寬和上以是結 主知下亦可以
告無愧於僚案此海內搢紳先生所共聞共見者也厚均生同梓
里久列門牆凡公之遺言遺行得之於目染耳濡者謹述其大略
送交湖南志館爲之立傳庶不至一代名臣遺漏失載至於勒成
年譜垂之家乘以備 國史采擇則以俟公之哲嗣焉時嘉慶己
卯歲

右行略歐陽厚均撰

國朝文獻通考卷之二十一

五

國朝耆獻類徵初編卷三十一補錄

宰輔三十一

紀昀

乾隆中修四庫書紀文達公以侍讀學士總纂文達故不喜宋儒其總目多所發揮然未有如宋名臣言行錄之甚者也曰茲錄於安石惠卿皆節取而劉安世氣節凜然徒以嘗劾程子遂不登一字以私滅公是用深慙是說也於茲錄發之於元城語錄發之於盡言集發之又於宋如珪名臣琬琰錄發之於清江三孔集發之於唐仲友經世圖譜發之昌言捭闢沆再沆四昭昭國門可懸南山不易矣雖然吾未知文達所見何本也茲錄前集起宋初後集

起元祐而劉公二十餘事在焉羔羊之節曾史之行明夷之貞凜然起懦夫炳萬禩故南宋黃震日鈔品隲茲錄諸人亦廁劉公於王巖叟范祖禹閒次第昭符是宋本今本五百年未之有改也吾未知文達所見何本也且朱子於劉公也推其剛則視陳忠肅爲得中劾伊川非私心述折柳必非妄語養氣剛大歿致風雷皜然秋霜烈日相高焉而謂其百計抑之終不能磨滅然耶然耶尋其由來文達殆徒睹董復亨繁露園集之瞽說適愜其隱衷而不暇檢原書遂居爲奇貨夫董氏不學固無論卽其以蘇黨及禪學二事爲劉公所以不登之由則錄中取二蘇言行不下二十餘事而所臚宋初諸公雜禪學者又十而七何耶矧是書成時朱子悔黃

魯直之孝友篤行而遺之則卽四科不列曾氏尙未足爲記者闕
失矧未見顏色而言乎夫忠定與文公皆百世師原非後人所一
畚增嶽一蠹損渤而文達方以記醜言辨尸重名余恐耳食者流
或眩其信仰前哲之心而靡從之則是益重文達過也至文達謂
南宋亡於諸儒不得委之侂冑東林起於楊時遂至再屋明社則
固無譏焉固無譏焉

末二條見四庫書目慶
元黨禁楊龜山集下

右書宋名臣言行錄魏源撰

三才圖會卷三十一
五車二一「一系卷二一

國朝耆獻類徵初編卷三十二目錄

宰輔三十二

王杰

孫士毅

國朝耆獻類徵初編卷三十二目錄 一

日本書紀卷之二十一

一

國朝耆獻類徵初編卷三十二

通奉大夫前署江西巡撫江西布政使司布政使湘陰李桓輯
宰輔三十二

王杰

王杰陝西韓城人乾隆十八年選拔貢生 朝考一等一名引
見以教職用二十五年中式舉人二十六年以一甲一名進士授
修撰二十七年充湖南鄉試副考官二十九年提督福建學政三
十二年擢侍讀三十三年六月授右庶子十月遷侍講學士三十
四年擢少詹事充武會試總裁三十六年充日講起居注官南書
房行走晉內閣學士兼禮部侍郎充江西鄉試正考官旋督學政

三十九年署工部右侍郎十二月轉刑部右侍郎四十年充會試副總裁四十一年仍督學浙江四十二年回京署禮部右侍郎轉吏部右侍郎仍兼署禮部右侍郎 命充四庫全書館暨三通館副總裁四十三年充會試副總裁四十四年二月轉吏部右侍郎五月奉 旨添派閱看大清一統志八月充浙江鄉試正考官十月二月充武英殿總裁同辦明史充國史館副總裁四十五年奏劾武英殿提調官少詹事陸費墀遺失四庫全書各原本奉 旨所辦甚是復奉 命督學浙江四十七年授左都御史旋京充四庫館副總裁 上詢及其母年歲 御書南陔承慶額賜之四十八年丁母憂回籍四十九年三月 諭曰王杰著補授兵部尚書仍

在家守制俟服滿來京供職時 上南巡杰赴 行在謝蒙 恩
召見 諭曰汝來甚好君臣久別知爾應念我次日復 諭曰汝
理學中人朕不欲奪情畱汝供職即可還家五十年八月服闋進
京充三通館總裁十一月充經筵講官五十一年正月 賜紫禁
城騎馬四月 命充上書房總師傅十二月在軍機大臣上行走
五十二年正月授東閣大學士兼管禮部事務三月充會試正總
裁 賞海淀直廬五十三年平定臺灣 賜圖像紫光閣 御製
贊曰典學七閩肅正士風臺灣民俗頗悉心中山海險夷參畫具
通有佐樽俎圖貌紀功五十四年三月充會試正總裁時廓爾喀
平再 賜圖像紫光閣 御製贊曰司學閩疆臺灣事曉海洋進

退頗亦了了短詩長紀晝夜膳章無暇贊策人各用長十一月因
上書房各師傅曠班七日奉 旨交部議處並退去總師傅上
行走五十五年三月充會試正總裁十一月加太子太保銜五十
六年奉 命仍充上書房總師傅五十九年杰年七十生辰 御
書贊元錫淑額臚名芸館魁多士耆福台階引大年聯句及壽佛
如意 御用冠服帶佩諸珍物以賜嘉慶元年骹疾乞退上書房
南書房軍機處及兼管禮部各任得 旨允如所請專在內閣看
章疏三年四川總督勒保奏生擒首逆王三槐 諭曰王杰見雖
未在軍機處行走而軍興之時曾隨同辦理著交部從優議敘四
年正月 高宗純皇帝升遐 命總理喪儀二月充 實錄館總

裁五年四月杰患脾泄 命公明安率醫官視之並 賜內庫人
澆九月杰以病乞休奉 旨慰留並許扶杖入內右門六年九月
充順天鄉試正考官十月充會典館正總裁七年七月以病請致
仕 諭曰王杰因病具摺乞休著不必開缺如調理就痊照舊供
職杰再請開缺得 旨允其致仕加太子太傅銜在籍食俸又
諭曰予告大學士王杰任內所有罰俸處分著加恩均予開復本
年秋冬正俸銀米准其照常支給八年二月杰疏言略曰竊惟
皇上親政以來宵旰勤勞 恩威並濟內外臣工無不洗心滌慮
其砥廉隅臣年齒既衰智識愈鈍更何有千慮之得惟是積弊相
沿有極重難返而又不可不亟加整飭者一各省虧空之弊起於

乾隆四十年以後州縣有所營求卽有所餽送往往以缺分之繁
簡分賄賂之等差此等贓私初非州縣家財直以國帑爲資緣
之具上司旣甘其餌明知之而不能問且受其挾制無可如何閒
有初任人員天良未泯小心畏咎不肯接收上司轉爲之說合懦
者千方抑勒強者百計調停務使之虛出通關而後已一縣如此
通省皆然一省如此天下皆然於是大縣有虧空十餘萬者一遇
奏銷橫徵暴斂那新掩舊小民困於追呼而莫之或恤靡然從風
恬不爲怪至於名爲設法彌補而彌補無期清查之數一次多於
一次完繳之銀一限不如一限輾轉相蒙年復一年未知所極竊
謂嘉慶四年以前之州縣此時或遷他處或經物故原難責之見

任補償然從前州縣用度不節因而侵那倉庫 今皇上飭紀整
綱大吏皆以廉節相尙豈從前上司專講酬應州縣盡屬從容今
茲上司各矢清廉州縣轉形拮据耶乃州縣則任催罔應上司亦
一籌莫展意或有苦樂不均未之調劑與有賢否不分因以觀望
與固宜廣求整飭之法以冀倉庫漸歸充實也一各省驛遞設立
驛丞專司驛遞凡有差使各按品級乘騎之外加增不過二三騎
多則驛丞不能派之民間也照常給廩之外一無使費使臣及家
人等亦知驛丞之位卑俸薄無可誅求也迨後裁歸州縣百弊叢
生請先言其病民者州縣管驛可以調派里下於是使臣乘騎之
數日增一日有增至數十倍者任意隨帶多人無可查詢由是管

號長隨辦差書役乘閒需索差使未到火票飛馳需車數輛及十餘輛者調至數十輛百餘輛不等羸馬亦然小民舍其農務自備口糧草料先期守候苦不堪言又慮告發也則按畝均攤甚而過往客商之車羸稽畱賣放無可告訴無怪小民之含怨也至於州縣之耗帑又有無可如何者差使一過自館舍鋪設以及酒筵種種糜費並有夤緣餽送之事隨從家人有所謂鈔牌禮過站禮門包管廚等項名類甚繁自數十金至數百金多者更不可知大抵視氣燄之大小以爲應酬之多寡其他如本省之上司及鄰省之大員往來頓宿亦需供應其家人藉勢飽慾不饜不止而辦差長隨浮開冒領本官亦無可稽覈凡此費用州縣之廉俸不能支一

皆取之庫帑而虧空之風又以成矣議者謂驛站裁歸州縣當時
自爲調劑郵政起見每年一驛錢糧自數百金至數千金付之微
員旣非慎重之道抑且遇有緊要差使及護送兵差之類額馬不
足必須借用民力是以定議裁改夫驛站未歸州縣以前豈無緊
要差使豈無護送兵差之類當其時要已另設臺站或調撥營馬
或籌項購買事竣各有報銷與驛站兩不相關若州縣管驛則平
常供應卽有不可數計者然則虧空之弊大半因之欲杜虧空先
清驛站當亦由漸轉移之策也況體恤民隱尤爲急務乎今當軍
務旣竣我皇上勤求治理似無大於此二者但以積重之勢不
可不思至當之方或追溯舊章或博訪眾論斟酌盡善斷自睿

國朝文獻通考卷三十一
裁從此倉庫盈而郵政肅天下幸甚奏入 上嘉納之閏二月杰
起程有期具奏 陛辭 諭曰大學士王杰宣力綸扉歷有年所
上年秋間以老病陳請乞休經朕降旨慰留嗣後再三陳懇不得
已俯允所請今今歲春融後從容就道當經加太子太傅銜並在
籍食俸用昭恩渥茲據奏擇定行期將次起程朕心彌深眷注因
念 先朝耆舊今當予告歸里特將 皇考高宗純皇帝御前陳
設玉鳩杖一枝加恩賞給俾得敬承 遺澤朕賦詩二章親書條
幅並書聯語以寵其行再加內府人蔭一斤用資頤養派工部尙
書緞布疋送前件并頒饌品賜餼仍著馳驛回籍所過地方官員
在二十里以內齊安爲照料以示朕優眷老臣至意 賜詩曰名

冠朝班四十年清標直節永貞堅樞廷久直宣綸綽講幄昔從授
簡編歸里先參天上佛杖鄉共仰地行仙期頤福壽增康健紫禁
重來赴叟筵又曰屢蒙 恩旨秉文衡藝苑羣瞻桃李榮直道一
身立廊廟清風兩袖返韓城 先皇手澤長承福東國靈蔭好衛
生西望渭川雲渺渺鱗鴻時達慰離情聯語云詔宣恩禮崇耆宿
詩賚林泉養大年五月杰抵里奏謝 硃批云覽奏俱悉一路平
安竇深欣慰京中見望雨澤未能霑足川楚軍務略有頭緒亦未
全靖特諭卿知又 頒扇套香袋藥錠等物賜之六月具摺陳謝
硃批云覽奏俱悉卿在家頤養努力加餐益增康健矣京中自
四月半得雨陸續霑足麥收不過五六分晚禾日見芘芘川楚軍

情甚好大約六月內可全靖矣嗣是杰每有陳奏必奉 硃批垂
問八月奉 硃批云卿在家頤養想益康健京中今夏兩暘時若
百穀繁茂中元日經略奏報邪匪全靖朕承 天恩 考佑實深
欽感特諭卿知同深欣慰二十日起程幸山莊見住兩閒房行宮
遙望西秦彌增想念十月 硃批云卿在家安善覽奏欣慰今賜
卿神饈並如意願永茂遐齡長延福壽十二月奉 硃批云嚴寒
沍凍諸惟珍攝用迓春祺益綿福履正月 硃批云新春介祉福
履益綿遙望關雲曷勝記念親書福字並荷包等物付使帶去賜
卿以迓鴻禧益增純嘏是月十日杰夫婦年皆八十 御書福綏
燕喜額并壽佛如意等珍物 命陝西巡撫方維甸於其生日齋

至家賜之並 賜詩曰輝騰紫極耀韓城海至籌添鶴算贏地近
西池增福祿星明南斗燦晶瑩 兩朝調鼎文思被八秩齊眉壽
域宏德業久敷俾戩穀期頤雙慶衍長庚十一月杰起程進京先
是杰陳謝摺內有卽日脂車之語 上諭令自行酌量杰因戀
闕情殷急行就道於十二月抵京 諭曰予告大學士王杰見在
來京謝恩伊從前入直本係紫禁城內騎馬今年已八旬恐乘騎
未能便適著加恩准其乘坐肩輿至隆宗門外扶杖進內預備召
對以示朕優眷老臣至意 召見後屢有食物之錫並疊前韻
賜詩曰西來紫氣滿都城八秩仙翁數倍贏趨禁仍隨鵷侶列杖
朝爭覩鳳池瑩願卿永享修齡慶勛我當思治業宏眉壽無涯益

康健千春旋轉樂同庚十年正月初七日 召見 諭曰明日出
城卿不必到園子去俟二十後京城再見初十日杰卒於邸舍奏
聞 諭曰子告大學士王杰 先朝耆舊久直內廷宣力有年
忠清直勁老成端謹前年以老疾乞休經朕再三慰留因累次陳
懇肫切勉從所請朕曾親製詩章優加錫賚以寵其行歸里以後
屢有批章詢問知其起居無恙上年十月間爲伊夫婦八十同庚
特製詩章扁額並賜以如意文綺等件用迓福綏嗣據王杰謝恩
摺內有卽日脂車詣闕之語朕惟慮其衝寒遠涉諭令自行酌量
緩程行走旋於臘月初抵京特令肩輿進朝扶杖入對察其精神
尙健賦詩誌喜並留俟春後再行起程回籍旬日以來屢經召見

看其氣體稍形疲軟疊經諭以在寓靜攝方冀春和增健安愈言歸俾得頤養林泉壽躋大耋不意究以年高氣弱不勝嚴寒凜冽遽爾溘逝聞之良深悼惜著加恩晉贈太子太師入祀賢良祠賞給陀羅經被派榮郡王綿億帶領侍衛十員前往奠醊茶酒並賞給廣儲司庫銀二千兩經理喪事所有應得卹典該部察例具奏其靈柩回籍時著沿途地方官照料妥爲護送尋 賜祭葬如例謚文端子塉時嘉慶元年廕生授兵部武選司員外郎見任江南道御史

右 國史館本傳

韓城王相國受 兩朝恩遇嘉慶七年年七十有八矣以老疾屢

陳告休 上鑒其誠俞所請明年公歸 上存問不絕甲子冬公
年八秩先期 上命陝西巡撫方公維甸齋捧 御製詩額珍服
就 賜其家公拜受驚寵諏日啟行及臘抵京謁謝 命肩輿入
朝扶杖 召見 賜以詩乙丑正月七日面對敷陳無隱翌日之
夕珪猶就食於公寓十日以考終 聞 上驚悼加贈太子太師
賚白金二千兩治喪諡文端嗚呼公可謂忠清上達矣其孤塋時
塋時奉柩歸塋時以狀請珪爲文表其墓珪不得辭案狀公諱杰
字偉人號惺園晚號葆澗王氏先自洪洞遷韓城五傳至光祿公
石門主簿諱廷詔娶吳夫人生子三公其季也四歲隨考至浙八
歲能書大字十八入學從武功孫酉峯游聞關閩之學癸酉拔貢

引 見以教職用丁父憂尹文端公總制兩江聘入幕司書記文
端內 召薦之蘇撫桂林陳文恭公聞性命躬行之說益自信己
卯中副榜庚辰舉於鄉辛巳成進士殿試 高宗純皇帝擢第一
人見諸詩受 知之始也壬午充湖南鄉試副考官甲申督學福
建丁亥授侍讀戊子晉左庶子十月擢侍講學士己丑遷少詹事
充武會試主考官辛卯充日講官直南書房晉內閣學士典江西
鄉試督學浙江甲午署工部右侍郎授刑部右侍郎乙未充會試
副考官丙申再視浙學丁酉署禮部右侍郎轉吏部右侍郎充四庫
三通國史諸館副總裁戊戌充會試副考官己亥轉左侍郎典浙
江鄉試充武英殿總裁庚子三視浙學壬寅授左都御史癸卯丁

母憂甲辰卽家擢兵部尙書趨赴行在謝恩高宗曰汝來甚好君臣之情當如是然汝儒者朕不欲奪汝情歸終制可也公感泣時珪扈駕相遇於行帳歎曰上待公不薄哉乙巳服闋充經筵講官丙午賜紫禁城內騎馬是夏充上書房總師傅冬直軍機處丁未拜東閣大學士總理禮部充會試正考官賜花園住房各一所戊申臺灣平圖形紫光閣己酉充會試正考官平廓爾喀再圖形閣中冬罷上書房行走庚戌充會試正考官加太子太保辛亥仍直上書房甲寅冬賜聯額如意珊瑚珠冠服爲之壽丙辰以足疾辭退兩書房軍機禮部事戊午仍直軍機己未高宗升遐上親政命總理喪儀充實錄館正總裁以腹疾請

休奉 旨慰留 命扶杖入朝辛酉充順天鄉試正考官壬戌再
以疾固辭 予告在家食俸加太子太傅癸亥回籍 賜御杖人
蔭 御製詩寵其行歸里後奏摺 批荅如家人禮明年公與程
夫人齊眉開秩謝 恩赴 闕兩旬而薨於邸公生於雍正三年
乙巳十月二十七日寅時終於嘉慶十年乙丑正月十日子時壽
八十有一其少壯備嘗辛苦三十七成名洊歷魁台四十年受
兩朝知遇始終無間持文柄者十二次人不敢干以私在軍機相
位和而不同耿直清介正色直言可謂有守矣珪於公忝先進而
公洊九列珪稍迴翔故往來蹤跡頗疎男錫經再喪偶未斂曹慕
堂宗丞適爲公女相攸某氏公不欲曹曰有一人遲則將爲他姓

得耳公問爲誰曹曰朱石君之子弦斷矣公曰石君前輩我重其人必有後君其爲我謀之曹來弔曰有一言郎君必將續娶作伐者待我可乎子怪之已而子妻弟陳奉璽至其言與曹同子益詫問乃知出韓城意子曰姑待期年後再言可也子感公之相知明年問名焉嗚呼公以素心相質重以昏媾眞直諒友也嘗以爲學品似王魯齋甲第同康對山著錄若干藏於家側室姚黃子四堦時主事銜埽時監生先公卒埽時廕生兵部武選司員外郎埽時廩生孫九駟駒驥篤駉騶馴十一月十一日卜葬於縣北原高沙岸新阡銘曰

龍門之陽黃河之西實生偉人魁枕參觜金華文憲武功對山品

第兼之三達孰班齊齊色言介介進退不磷不淄寡尤寡悔 兩
朝知遇人秩去來篤賁光輝生榮死哀夏陽北京豐碑屹屹何以
表之 如綸如綍

右墓誌銘朱珪撰

公諱杰字偉人姓王氏先世居山西洪洞遷陝西韓城居五世至
石門縣主簿諱廷詔公之考也以公貴 贈光祿大夫東閣大學
士公妣吳太夫人生子三長濬仲澈公爲季端凝好學見於幼稚
長以拔貢生得教諭未任遭父喪服終貧甚爲書記以養所居幕
府尹文端公繼善陳文恭公宏謀之爲江南督撫時也兩公皆名
知人而最賢公謂爲正士乾隆庚辰 恩科中鄉試次年 恩科

中會試殿試讀卷官列第三 純皇帝親拔爲第一引 見風度
凝然 上益喜授翰林院修撰由修撰四轉得詹事府少詹事日
講起居注官直南書房旋晉內閣學士歷工刑禮吏四部侍郎都
察院左都御史母喪回籍在籍擢兵部尙書 詔服闋赴職充經
筵講官 賜紫禁城騎馬爲上書房師傅直軍機處乾隆五十一
年正月拜東閣大學士公爲人廉靜質直誠於奉職其居位與和
珅同列公以大體接之不爲壯頰悻悻之事而遇所當執終不與
和珅附公素行無疵瑕 純皇帝知公深和珅雖厭公亦不能去
也如是數年及 今上臨政公意益得發摠矣然公嘗念大臣所
當爲者非盡於所能言獨居意嘗邑邑深念而不怡蓋公之心人

不能具識而至其入陳 禁陞裨益 朝廷者又非人所得聞故
不可得而述也嘉慶七年公以老病乞休 詔予在籍食俸加太
子太傅 御製詩送之有云直道一身立廊廟清風兩袖返韓城
茲足以盡公生平矣嘉慶九年公與夫人八十歲又有 御詩及
頒賜諸物公季冬入都謝 恩畱至十年正月十日薨於京邸
命榮親王奠醑 賜銀二千兩治喪又 賜祭葬 贈太子太師
祀賢良祠諡曰文端公爲乾隆庚戌科會試總裁官又嘗爲湖南
江甯浙江考官一督福建學政三督浙江學政所進多佳士其於
門下士相愛甚篤然未嘗少涉私引教之必爲君子而已夫人程
氏乃子主事埏時監生埏時武選員外郎埏時廩膳生埏時孫九

人公葬於韓城北原既立神道之碑乃刻銘曰

科第士首爵位朝頌德器優優以居無忤大臣之度遠思邈邈去
名釋功匪矯以激事賴其休物被其澤惟其志宏歎而不懌天
子知之降予載赫著厥儀形紫光之閣顧思德音公逝弗作過墓
思敬瞻此穹石

右神道碑文姚鼐撰

余登朝最晚不及見諸先達惟王文端公杰尙未去位逾年公始
致仕歸故時瞻其丰采公高不踰中人白鬢數莖和靄近情而時
露剛堅之氣其入軍機時和相勢方薰赫梁文定公國治爲其挪
揄若童稚公絕不與之交除議政外默然獨坐距和相位甚遠和

相就與之言亦漫應之一日和相執公手笑曰何其柔荑若爾公
正色曰王杰手雖好但不會要錢耳和赧然退然 純皇帝深倚
任之和亦不能奪其位 今上親政公爲首輔數年遇事持大體
竭誠進諫 上亦優待之其致仕歸日 上賜以詩有清風兩袖
返韓城之句 命皇次子親爲祖餞以榮之癸亥春陳德之事公
時已致仕急入內請 安謂余曰德爲庖廚之賤安敢妄蓄逆謀
此必有元奸大慝主賄以行明張差之事殷鑒猶存吾見 上時
必當極力言之以除肘腋之患聊以盡老臣報 主之心可也後
上召見公應對如前 上深然之會某相國恐株連其戚急治
其獄草率完案致癸酉秋有林清突入 禁門之變 上深思其

言命有司特 賜祭焉

右錄宗室昭種撰

孫士毅

孫士毅浙江仁和縣人乾隆二十六年進士歸班候選二十七年
上南巡 召試第一授內閣中書洊升侍讀三十四年春緬匪
不靖隨大學士傅恆督師雲南主章奏師還敘勞遷戶部郎中四
十年擢大理寺少卿旋授廣西布政使調雲南四十四年授雲南
巡撫時總督李侍堯以贓獲罪士毅坐不先舉劾落職發軍臺效
力臨行 上念其學問優 命纂校四庫全書 特授翰林院編
修四十七年書成擢太常寺少卿復出爲山東布政使次年遷廣
西巡撫又次年調廣東尋署兩廣總督時陝甘總督福康安議於
各營挑選壯兵勤加訓練 上以雲貴四川兩廣福建等省係沿

邊沿海重地應照行之士毅奏曰臣伏思法貴歷久可遵兵以制宜爲用各省形勢不同卽一省中地方險易亦復懸殊似宜略爲變通以收實效廣東營制水陸參半率係沿海要區廣西悉屬陸營多半沿邊重地督撫提鎮各標兵額本多挑選易於足數此外各協營額兵較少或有護餉守隘派遣既多存營自少似未便概令對半抽撥致於地方形勢稍涉周章查廣東水陸各標營其實操兵六萬二千六百二十五名內水師兵一萬四百零七名共計水陸可備徵調兵二萬八千五百三十二名緣廣東是處濱海訓習最要且水師兵額旣多又非如陸路兵之常有差遣是以所挑之數未便從減廣西各標營其實操兵二萬二千六百八十五名

今挑備徵調兵一萬一千二百九十六名俱令慎選人材精壯技藝優嫻送總督衙門備查遇有徵調卽可按冊而稽一呼卽集其未挑各兵誠恐無知備弁視爲弁兵已經挑選此外無關緊要卽可以老弱充數是因挑選勁旅而轉使通省一半額兵虛應故事耗糜糜餉更爲營伍大弊應責成統率大員按律分班查驗如有貽誤操防一體嚴懲以絕濫充之漸至槍礮爲軍營利器必須施放有準方克制勝四十三年欽奉 諭旨通飭綠營倣照京營健銳火器營陣式練習準頭就臣本標而論槍兵技藝雖有可觀但其間高低不齊亦復不少今令多備火藥不拘出數總聽臨時號令則熟極生巧自必益就精純其出師訓練原與陸路無異而水

師所重則在熟悉風雲沙線把船守篷等事平日操演止在內河
近海地方其於涉歷外洋衝風抵浪是否戢折靈便究難隨時考
驗廣東向分上下兩班輪巡外洋臣已飭行鎮將督率訓練以期
一律精熟至裹帶乾糧兩粵地氣炎蒸炒麪存貯數日卽微變不
堪下咽因地制宜似改用炒米爲合用查甘省原議因裹帶粟米
如無薪水之處不能爲炊是以每兵一名預備炒麪十五斤足供
半月口糧兩粵山溪錯雜水陸豐腴無論僻徑衝途皆可隨時炊
爨若每兵一名裹帶炒米十五斤得水便可泡食并省炊爨之煩
雖未經安設糧站以前亦隨便可以療飢此項米石卽在各州縣
碾支兵米動支存營收貯仍於各營應得兵糧內逐加換給出陳

易新似此一轉移閒設遇徵調仍可旦夕啟行督撫提鎮俱係蒙
恩簡昇之人本應未雨綢繆整頓營伍今復仰蒙 聖慈諄切
訓示一切定有章程若果認真訓練士卒自可悉成健銳儻因循
積習不能實心訓練則名雖有征兵緩急仍歸無濟負 恩曠職
莫此爲甚應請嚴立科條以示懲創得 旨此可徐徐爲之而必
以實廣東舊有民欠銀米州縣不能催徵及奏銷屆期設法措墊
狡黠者遂延抗不繳積弊旣久欠戶恃爲得計士毅奏請遣試用
州縣丞倅等官擇最多之地逐戶查對並令通省儻造四十年以
後民欠清冊詳報覈辦所有將來追出銀米如係見在州縣本任
所欠甫經墊解尙無別項情弊仍請給還本任 諭曰粵省民情

國朝... 三... 二...
獷悍從前李湖素稱風厲而於此民欠一事何以竟未能辦及孫
士毅由廣西調任廣東朕謂其人尙屬細心曉事不料其竟能如
此辦理實屬可嘉至所奏追出銀米仍請給還本任此則不可州
縣催徵錢糧是其分內專責乃平時不能振作致民間積漸拖欠
及至奏銷時冀免處分私行墊補報解全完此等人員不治以捏
報之罪已屬寬典若將追出銀米仍行給還私橐則將何以示儆
所有此項錢糧將來自應充歸公用不得因欲杜該員等藉口虧
賠爲此以公便私之舉廣東菱塘地方夙爲盜藪屢治不悛復糾
眾至三四十人拒捕傷官士毅悉擒之有 旨優獎 賞戴花翎
五十二年總督富勒渾縱僕婪索事 聞 嚴詢士毅士毅訊知

有據以實奏富勒渾時已解任奏上 申飭諭曰富勒渾氣本粗率性情乖張孫士毅奉旨飭交查詢伊家人受賄皆已供證明白乃不知愧惡輒敢怨及承審之人看來孫士毅不免意存畏憚試思朕爲何如主而能任人徇隱翻案乎頃之讞成 上嘉其不避嫌怨所言皆屬公正授兩廣總督先是富勒渾奏廣東鹽務添設運艘按季徵收餉價及頂補革商清釐積欠 上命士毅覈辦士毅奏曰富勒渾於整頓鹽務立意未嘗不善無如果於自用不肯採訪輿情又意存迴護加以粉飾措詞多涉影響臣謹就見在應行酌辦情形逐條剖析一艘船短缺則關鹽不繼各商守候需時節需貼補飯食而各商自雇民船運腳較帑艘加倍糜費較多富

勒渾所奏艘船二百五十七隻及本年春季共配過鹽二十八萬餘包並無此數查省河舊有艘船連各商自置者數止七十二隻此外六十三隻名爲淇澳小船又新募民船一百二十二隻其中半係臨時封押勉強應募並非帑艘長年領運者可比卽富勒渾批准運鹽一次聽其出關攬載別貨而摺內竟稱已有艘船二百五十七隻並非確實查辦理之初已有蕭恆利等一十八船爭先告退經富勒渾□□□□□□□□再查省商定額每季應配鹽一十六萬四千餘包計本年春季缺額五萬有餘富勒渾截自上年十一月以後凡有到關及商配之鹽均歸入本年春季以見籌辦裕艘駁驗如此其實前後到關月日歷歷可查並非添設艘船

以後運回關鹽卽有三十餘萬之多也臣實力籌辦去其封押之
擾酌以經久之規務期新舊船戶各皆樂從以收實效一粵東餉
課雖例應按季催完但向來總以年終奏銷爲準富勒渾請按季
盤查原爲整頓積疲起見但粵商力微貲少而埠銷時衰時旺情
形又不能畫一儻遇旺銷之時原可以數月之有餘補終年之不
足若時值鈍銷又責其按季完餉勢必以長年營運之貲本儘此
一季完餉轉致徒手坐困乃富勒渾明知竭蹶因陳奏在前輒令
那移墊完卽將春季未完餉銀作爲全數完庫具奏是發令那移
墊完開捏報之弊見在夏季已滿而所欠春餉尙復不能清完臣
察看情形四季勒限一事實多窒礙請仍照向例歲底奏銷庶定

期不致過迫可以截長補短勉副例限一富勒渾因有疲埠三十
九處請一併另召新商頂辦嗣和平龍川信豐永安嘉禾江浦七
埠召有新商頂補樂昌永興興甯宜章郴州恭城連州七埠詳由
鄰商兼辦其從前官辦之龍門花縣等處十四埠及委員赴辦之
桂陽臨東之埠俱仍其舊另將見無承充之乳源翁源永安始興
封川五埠亦檄飭暫歸官辦此外尚有鉛山南康上猶英德四埠
雖經檄飭鄰商就近兼辦而各商均以力難兼顧不肯配運至今
尙屬虛懸富勒渾欲作三十九埠均有著落遂約略具奏致於實
在頂補兼辦之名數迥不相符伏思埠地虛懸而官辦亦非良法
臣查有從前殷商公辦數年輒藉故脫卸者又有力能辦埠附在

各商名下詭託幫辦者此等規避取巧頗不乏人容俟逐一清釐
如果身家仍前殷裕自應著令領回鹽埠出身辦理除將鉛山南
康上猶英德四埠趕先頂補其餘暫歸官辦之埠亦可漸次撤換
庶召頂均歸著實一富勒渾上年奏明商欠餉銀共四十一萬七
千五百餘兩均請分限帶徵維時僅查出商欠數目並未分別有
著無著嗣本年四月查明因疲革退之三十九埠實共欠銀二十
三萬餘兩見無著落又另查得此三十九埠有隨埠輸息之賞
借本銀七萬三千七百五十餘兩亦歸無著隨據商人何茂才等
呈請照雍正元年之例每額鹽一包輸銀一錢約計三年半限內
此三十餘萬兩無著之欠可以依限攤完經富勒渾據情入奏臣

查得分限帶徵有著春夏二季應完四千九百五十餘兩見據各
欠商完交過銀一萬一千五百五十餘兩覈計應完之數尙屬有
盈無絀其通綱攤認無著銀計本年春夏兩季應完銀四萬七千
七百二十餘兩距應完之數甚爲懸絕臣以該商等旣呈請代完
於先何以又觀望遷延於後細加詢訪始知富勒渾所辦亦有未
能盡服人心者查各疲商旣經革退則應完之欠自應先儘查追
必家產實已盡絕方令通綱攤認伊等自覺心平乃任其逍遙事
外甚至數月以來清查革埠業經交出之銀約共四千餘兩又聽
其存貯運庫不將攤賠之數目隨時減除以致通綱代完不能踊
躍臣嚴飭署運司嵇承志卽將此項清查交出之四千餘兩歸入

通網代完數內此外仍將未至家產盡絕之商嚴切查追一有成數亦卽均派通網俾攤賠之數藉以輕減庶積欠可望依限清完矣下部議行五十二年臺灣林爽文反士毅以閩省海道相接備兵潮州王師渡海預派粵兵前赴所需軍資器械辦理無誤屢邀議敘加太子太保賞戴雙眼花翎世襲一等輕車都尉明年臺灣平會安南國王黎維祁爲其臣阮惠所逐其母妻幼子斃關籲救士毅與廣西巡撫孫永清前後以聞上卽命士毅檄諭安南各路士毅時在潮先已馳赴龍州奏至上深嘉之士毅自請統兵出關並查奏黎維祁在其國良才縣境亦招聚義兵圖恢復遂詔士毅由廣西直抵黎城別命雲南提督烏大經由

蒙自一路進勦夾攻阮惠遣其將拒於壽昌江又分兵屯嘉觀士毅至壽昌擊破之過江進兵至市球江賊守禦甚固十一月十六日日暮我兵隔岸排列槍礮與相持士毅令義民陽於下游造浮橋作欲渡狀以牽綴賊勢密遣總兵張朝龍於上游暗渡繞出賊後賊眾亂士毅卽勒兵乘筏占橋鼓勇直進賊棄寨奔逸我兵過江分路勦殺江岸及江中積屍幾滿生擒四百餘人悉斬之其嘉觀一路爲遊擊張純等擊退副將慶成守備黎致明設伏要害擒其僞指揮黎廷僞內衛栗全及已服復叛之陳明炳等十九日黎明乘勝至富良江江在國門外賊悉眾拒守盡收戰艦泊南岸江中礮聲不絕士毅察知賊陣弗整急覓船筏夜載兵僅百餘人先

勦江心賊奪大船一賊稍退少閒復來凡五六戰殺賊百餘人生擒十七人賊膽落時覓船不得而沿江竹爲賊斬盡士毅因昏黑中賊不知我兵多寡遂以所有船筏盡載兵令提督許世亨等率二百餘人於次日五鼓直衝彼岸賊不知所爲奪其小船三十有餘急駛回更番渡兵二千人過江黎明分路追奔賊死者不可勝計有十餘船順風而逸遊擊張純追及之賊反拒我兵我兵圍其船焚而沈諸江賊數百人無得脫者獲僞印三遂克復黎城黎氏宗族及百姓等俱出城伏迎道左阮惠先遁歸富春是役也士毅親統大軍入其國境所向披靡士卒無不用命雲南烏大經之師但遙作聲援而已士毅旣入黎城出示安撫是夜黎維祁至營士

毅傳 旨令襲封國王並馳報孫永清送其家屬歸國奏上 諭
曰阮惠等逐主亂常竊據黎都一經大兵聲討望風奔竄該國當
殘破之餘得天朝爲之興復黎氏國祚重延并不利其寸土於字
小存亡之道仁至義盡實史冊所僅見孫士毅力肩重任調度有
方不及一月卽已迅奏膚功克副委任著加恩晉封一等謀勇公
賞戴紅寶石頂以示優眷士毅懇辭 上不許並 諭令班師五
十四年正月初二日士毅偵知阮惠復糾眾將奪黎城遂與許世
亨前進次日遇賊力戰賊敗退黎維祜聞阮惠至攜家屬潛遁國
內無主民皆感賊勢復聚士毅知黎城不可久駐先領兵渡市球
江奪據北岸以待後隊之至總兵李化龍行至浮橋失足溺水橋

隨斷許世亨等沒焉士毅遂入鎮南關黎維祁與其母子俱至關內送南甯安置事 聞 諭曰安南國內因土酋阮惠等構亂黎維祁藏匿民間其母妻親來控訴是以命總督孫士毅就近籌辦出關後屢奏克捷成功實爲安速漢大臣中有此全才能爲國家帶兵宣力者自應特沛殊恩復念安南向有瘴癘兵夫人數眾多若在彼久駐轉於新造小邦多有不便況安南雖叢爾一隅然黎氏立國已久其興廢未必不關氣數黎維祁巽懦無能或者 天厭黎氏不加護佑朕從來辦事無不順 天而行是以諭令孫士毅作速撤兵該督若遵前旨此時早已進關乃在彼耽延一月有餘致賊眾乘閒復發蓋由孫士毅冀阮惠等投出或被旁人縛送

國朝通志卷之二十一
未免意存貪功因有此意外之變朕與孫士毅均不能辭咎阮惠
既經逃回復率眾前至必非旦夕所能糾合其中未必盡係賊黨
自係附近黎城反側之徒從而附和孫士毅在彼何不畱心偵察
預爲布置乃待賊至始行迎堵致損官兵究係孫士毅成功後不
無自滿之心有此挫折不特難邀懋賞卽令其仍畱兩廣總督而
威望已損亦不足彈壓海疆因命來京另候簡用以福康安代之
先是阮惠奪黎城時屯兵富良江據其險士毅見賊眾蟻聚欲渡
江勦殺誓以身殉許世亨力阻之且語以國體攸關令千總薛忠
挽其韉而退至是請罪 上但撤回所封公爵及紅寶石帽頂仍
令戴單眼花翎駐鎮南關調兵阮惠既復據黎城自知得罪 天

朝悔懼求內附時福康安至士毅與嚴斥之既察其誠並以黎氏
督亂不堪立國遂借奏安南不必用兵狀上從其議旋授兵部
尚書充軍機大臣供奉南書房恩賜紫禁城騎馬是冬命署
四川總督次年實授蜀素多盜鑄百物騰踊士毅奏請發價收繳
以杜其弊上韙之下其法於他省未幾江蘇高郵句容書吏冒
徵事覺總督書麟獲罪上以江蘇爲財賦重地官吏最易滋弊
必老成幹練者始克勝任非孫士毅不可遂調兩江總督士毅初
到江南民遮訴者多涉官吏奏請別其重輕親提研鞫上鑒江
省吏治廢弛已久敕士毅毋稍徇隱以整官方徐州王平莊漫口
未合士毅馳抵毛城鋪修築隄堰碭山蕭縣宿州靈璧及睢甯之

十三社皆被水力籌疏洩與撫卹事胥稱 旨五十六年夏授吏部尚書協辦大學士秋九月西藏巴勒布以貿易構釁奪據聶拉木之地四川總督鄂輝領兵赴藏 命士毅往攝其事士毅先駐打箭鑪籌辦軍精 上善其周詳 命一人總理之次年春因臺站牛病轉運多遲自請親赴察木多嗣以我兵已進後藏復馳至前藏途路險峻馱載甚艱士毅督催奮勉由是大軍得迅奏膚功八月廓爾喀平授文淵閣大學士仍偕福康安和琳駐前藏籌畫善後事宜 上以其所定章程可期經久嘉獎之五十八年軍務告竣覈辦奏銷 上念士毅年老且藏內甫經安輯正資整飭之時而該省地通西路統轄地土各番非威重大臣不足以資鎮撫

以福康安調四川總督嗣福康安率金川土司入 覲仍 命士
毅權署並 諭曰孫士毅年逾七十以實授大學士本應卽令來
京供職但伊前次辦理糧餉事務不無遲誤且軍需款項皆係經
手支發今令畱川數月查辦奏銷俾不致有浮冒亦可將功補過
五十九年秋福康安已調雲貴和琳初授四川總督例當入 覲
士毅請畱二人會覈報銷適有邪教私鑄二案因 諭曰此次報
銷原係孫士毅一手經理福康安雖在軍營帶兵和琳在前後藏
往來催趨其中情形均未深悉今交與孫士毅辦理正可駕輕就
熟止須分別准駁實用實銷覈明具題有何不能爲者卽或有須
與和琳福康安商酌之處亦無難往返札商何必伊三人同在省

城久駐會覈著傳諭孫士毅上緊趕辦不必再思委卸至孫士毅
屢署督篆所屬邪匪私鑄等事未能覺察已難辭辦理不善之過
其摺內稱福康安到任兩月地方已大覺改觀試思伊爲此言問
心甯不自愧卽雲南錢局百弊叢生孫士毅曾任雲南巡撫藩司
此弊端又誰之咎今令伊署四川總督印務一切惟當認真料理
稍贖前愆不可存五日京兆之見致負委任又因覈奏所奉 諭
旨聲敘各案未得要領并附奏內有戀主情殷語蒙 諭申飭向
來辦事尙爲諳練何以近日漸不如前六十年春湖南苗反延及
四川秀山境士毅卽馳赴秀山以遏其衝督辦糧餉及藥丸營帳
之屬無不周備 敕部優敘者再冬十一月賊爲福康安和琳所

蹙潛窺秀山士毅率兵擊之斬首二百餘級擒賊目二防禦愈嚴
嘉慶元年二月湖北邪匪滋事侵擾四川西陽州界士毅馳抵來
鳳屢勦賊三月賊屯小坳士毅由間道進攻伺賊不備夤夜冒雨
先登分兵奪其坐仙坪賊驚竄我兵斬殺甚多是時天明賊喊聲
四起我兵不及賊十之一士毅令參將何元卿等固守山梁自領
二十人馳回苗容調防守兵六百人率都司馬瑞圖等前赴小坳
遂殺三四百人元卿見賊隊忽動知士毅已到大呼馳下賊前後
受敵眾大亂元卿痛勦直至小坳與士毅合聲勢愈壯賊驚急無
措遂殲之焚其巢奪獲刀矛千八百有餘牛羊雞犬之屬無算分
賞士卒及難民等以功 晉封三等男爵四月士毅以賊寨林立

惟茶園溪最多必分路進勦始可集事時大雨旬日火藥不然俟其霽恐賊得預爲備乃乘夜兵分爲四人持短兵至浦而入呼聲震山賊俱竄聚茶園溪率眾抗拒千總張超執長矛先登斬其魁我兵望見勇氣百倍賊敗追奔四十餘里積屍遍野餘從老寨渡河而遁後濟者多溺斃賊旣被大創退據紅巖堡之旗鼓寨士毅移營前進六月於軍中得疾遽卒事聞加贈公爵諡文靖長孫均襲封伯爵入正白旗漢軍旗籍從士毅意也二年均來京謝恩上以士毅宣力有年命均在散秩大臣上行走四年因均年穉未能請習奉旨回旗當差十一年均廢疾不能供職請以同祖弟玉墀承襲諭曰孫士毅前在兩廣總督任內辦理安

南軍務屢章奏捷戡定黎城蒙 皇考高宗純皇帝特封公爵彼時疊降 諭旨原令其及早撤兵而孫士毅意存貪功並不遵奉辦理以致遲延失事兵潰入關所奏情形多有虛捏隨將公爵革去迨後孫士毅因在四川總督任內辦理邪匪著有勞績復經賞給伯爵世襲此實 皇考高宗純皇帝逾格鴻施伊於病中曾札懇和珅籲請願將承襲之長孫列入旗檔亦卽取巧之一端朕仰體 皇考高宗純皇帝如天之仁於孫士毅種種欺飾之處不加追究未將孫均承襲伯爵斥革今孫均旣因病廢不能當差見在又無親子可以承襲乃具呈瀆請欲將同祖弟孫玉墀襲伯爵殊屬冒昧試思孫玉墀並未列入旗檔焉有以民籍准其入旗承

襲之理且孫士毅在軍營出力之處業已令伊孫承襲伯爵一次儘足償其勞績見在孫均病廢此外更無例應承襲之人卽係無福承受世襲之典所有孫士毅原給伯爵承襲之處著裁撤孫均並著出旗仍歸民籍

右 國史館本傳

嘉慶元年夏六月二十一日文淵閣大學士署理四川總督孫公薨於軍次春秋七十有七遺表馳上天子震悼降諭曰大學士孫士毅老成端謹練達有爲簡任綸扉贊襄機務歷任封圻屢著勞績自逆苗滋事以來防禦極爲出力復因湖北教匪延及川疆滋擾卽帶兵前赴來鳳地方督率攻剿所向克捷晉封三等男爵

本欲俟大功告竣再予崇封茲聞溘逝深爲悼惜著於川省軍需
項下賞銀五千兩治喪一切俱照公爵辦理著伊長孫孫均承襲
伯爵派妥員護柩回籍部察卹典具奏 予諡 賜祭葬如故事
飾終之典實自來漢大臣所未有也九月均迎柩於江西十月入
杭城十一月二十四日乙丑與元配張夫人合葬於西湖天馬山
之原所自卜地也公字智治號補山行第四浙江仁和人六世祖
東橋自餘姚遷蘭里高祖德卿妣胡氏曾祖鼎渠妣姜氏祖景明
自蘭里遷臨平妣黃氏自祖以上皆以字行父諱世榮妣湛氏馬
氏生妣吳氏四世並 贈光祿大夫妣 贈一品夫人公少有大
志勤學忘倦遭際盛時慨然慕古之奇節久次諸生年四十始舉

於鄉又二年成進士歸班其明年南巡獻賦召試第一補內閣中書軍機處行走遷內閣侍讀從征緬甸傅文忠公倚如左右手陳奏天下大計嘗乘馬過天生橋而墜馬忽蹶起負公以出行達於軍人益異之師還遷戶部郎中視學貴州還擢大理寺卿卽出爲廣西布政使調雲南詳請豁免銅廠鹽井積欠數十萬擢雲南巡撫總督李侍堯得罪公以不先舉奏落職戍邊特旨起用爲編修總纂四庫全書升太常寺少卿復出爲山東布政使堅請畱京效用上不許擢廣西巡撫調廣東賞戴花翎總督兩廣兼理粵海關稅務臺灣林爽文反公治兵於潮州儲軍資積芻藁先爲之備適協天心凡粵兵渡海者萬二千人臺灣平加太子

太保戴雙眼花翎世襲一等輕車都尉安南黎氏叩關告急 上
謂非公不能辦方 命前往通奏至先已馳赴鎮南關奉 硃批
得汝如此知輕重得體之大臣嘉慰之外更有何諭公以粵兵八
千人轉戰而前納黎氏入其國都 詔封一等謀勇公公還歸而
黎氏復不競乃自陳劾繳公爵與服 上以公爲兵部尙書世襲
輕車都尉如故授爲軍機大臣入直南書房是年秋充順天己酉
科鄉試正考官冬 命署四川總督明年秋調任兩江痛戒漕弊
辛亥四月 召入爲吏部尙書協辦大學士西藏廓爾喀用兵
命以大學士攝理四川總督籌辦糧餉冬十二月公馳至打箭鑪
奏請親赴察木都疏通餉道 上悅復賞戴雙眼花翎大軍已進

後藏前藏爲軍營要道奉 旨卽馳赴前藏道路之難又踰於察
木都經行七十二峰其最高者上下三百里冰山雪窖閒懸繩而
度曳皮以行每遇險巖必身先士卒勞苦共嘗廝養無不感奮人
盡其力是以運載軍糧無少遲誤 王師從天而下莫不震疊公
再蹟而 上任之益重誠思奮不顧身日究國謀其篤斐然也壬
子八月廓爾喀平九月拜文淵閣大學士之 命仍駐前藏辦理
善後事宜於後 命辦廓爾喀軍務奏銷仍署川督乙卯二月黔
楚羣苗叛蔓延川境卽時提兵搜勦殺賊甚夥扎營於平塊督理
黔楚軍營後路糧餉晝夜嚴防苗匪無一人攔入川境者元年二
月湖北教匪擾及西陽州界公乃移營來鳳縣連克賊巢進兵至

於龍嘴百八十里以內賊匪廓清六月億甚舉疾還平塊未至行
及西陽州之龍潭而卒先是蜀中見大星如斗自南隕於東北前
一夕所乘馬忽斃卒之日平塊營大風拔帳大纛中折常所登瞭
望樓亦倒士卒皆流涕曰公已矣公之爲治廉敏而仁強意在合
人情宜民事凡居處省約輿從減少用人不拘一格必盡其長能
得人死力一事之善卽加褒揚篤親念故久而不忘沒齒稱述者
不可勝數江藩康基田降職同知言其熟悉河務以見銜護淮徐
道旣乃復陟東藩四府糧道缺出已注選人專摺題請蘇守汪志
伊堪任此職將來漕弊不清唯臣是問 上爲輟前命 允所請
其在江甯迎養其兄士達陳輿衛以出將至長跪道旁以所乘輿

讓之自策馬而前金陵人歎曰宜其爲督軍也士達之子大椿知向學教督掖獎迄成進士臨歿時以所得一品廕生讓其同母兄士倫之子儀 上許之其爲諸生也被盜劫心知其人隱而不言甘肅獄起使人齎二千金量資其連被之孥俾還鄉里不令人知閱瓊州之兵向常渡海來操公以邊兵遠離未便自往就之還遇颶風揭天雲時竟達岸自謂不減於天生橋也生平無他嗜好博奕遊戲之事終身不一爲之精勤過人每篝燈起治事達於深夜猶申會書函以十數詩文灑灑千言過輒散落拾其霏屑者已號鉅製章奏文移皆出己手將哀集藏於家夫人石門張玉倫女同心操作能舉公之遺忘及其征緬也有板屋之憂甫還而疾作遂

卒生二子與大理寺評事先公卒衡乾隆己亥科舉人內閣中書
孫均域皆與出增墳皆衡出曾孫元均出 上推公遵以承襲之
支屬籍正白旗漢軍銘曰

天生俊偉際會非常於赫 帝眷爲龍爲光允矣蓋臣曰篤不忘
策之將相建之上公 叶 敷歷中外威謀靡亢文武吉甫桓桓洸洸
奚修所致何術則當揣情而言此事易明 叶 丹赤一心純臣之坊
苟竭股肱安往不臧時方賡歌衮衣繡裳於其戡亂干戈戚揚揆
厥百行不離其宗 叶 能容乃大爲善必昌裒天下德奉於 君皇
公身雖藏公烈彌彰公志未竟公心則長尙相子孫白雲帝鄉

右墓誌銘蘇去疾撰

公孫姓諱士毅字智治號補山先世爲姚江望族遷居仁和臨平
鎮父玉亭公生丈夫子四公其季也幼卽聰雋神明湛然玉亭公
爲治生計教之質鬻公所到輒有奇贏然非所好也溺苦於學窮
晝夜額頰有有子惡臥自焮其掌之風遂博通經史入泮舉於鄉
辛巳中進士 皇帝南巡公獻詩 召試一等第一授內閣中書
軍機處行走遷侍讀充戊子科四川正主考是年冬 王師征緬
甸大學士傅忠勇公素悉公才奏請同往駐軍騰越州一切羽書
章奏公指揮於矢石閒動合機宜忠勇公歎曰古所稱上馬能擊
賊下馬作露布者其孫某之謂乎亡何大軍奏凱授戶部廣西司
郎中庚寅鄉試充湖南正主考督學貴州擢大理寺卿出爲廣西

布政使謝雲南雲南有鹽銅二廠數十年來礦老山空柴薪騰貴
又白大兵過後夫馬疲曳官商多情煎情運情銷者前督撫不敢
上聞致獄囚累數公奏請豁免一時廠員沙下如荷校之得脫
咸歡呼祝延之未幾升任巡撫以失察總督李侍堯革職效力軍
臺簿錄其家不名一錢上嘉公廉未至軍臺起用爲翰林院編
修或笑謂公曰昔陸伯言爲大將軍封侯後吳主命其還鄉補舉
秀才欲其出身之正也公先封疆而後詞館天子恩公得毋此
意耶公故工文章亦覺自喜旋授山東布政使巡撫廣西調廣東
升總督兼管粵海關務廣東濱海民有占沙地者爭訟不休公設
局清釐升科千餘頃沙窠多盜有黃姓者聚眾萬餘前撫李湖擒

因事... 殺二百餘人不無冤漏公率大兵張旗鳴鼓環其窾而圍之命自
獻渠魁否則將移其民赭其地黃大懼縛盜首七人以獻不血刃
而沙變平是年冬臺灣林爽文反公以閩粵海道相通而潮州最
近先到其地備戈甲芻茭未幾 王師渡海果調粵兵徵餉遂咄
嗟而辦 上大悅晉秩太子太保賞戴雙眼花翎世襲輕車都尉
戊申安南國王黎維祁爲其臣阮惠所逐率其母妻叩關求救公
得信卽檄安南各處總兵起義而身自領兵防守鎮南關 上嘉
其能識輕重知大體 命提督許世亨領兵送黎氏母妻還國
命公率兵相助阮惠遣將抗拒擊破之進兵市球江將造浮橋以
渡探知南岸有賊據山乃於北岸列陣攻之親自督戰相持三晝

夜礮聲震天賊眾大潰乘勝直抵富良江賊驚曰江在安南國都之外王師渡江是無安南也乃盡收戰艦泊南岸拌死拒守天大霧公縛竹筏命將士大呼渡江賊不知我兵多寡自相蹂踐獲其大小戰艦數百擒斬無算是役也賊眾四萬守江我兵之先至者僅千餘人竟送黎維祁還國復位阮惠遁歸故城事聞上封公一等謀勇公賜寶石帽頂下詔撤兵公亦渺視小醜遵旨遽退而黎維祁本孱王也孤立無助阮惠率餘黨傾國而來倉卒閒眾寡不敵公欲以死報國策馬直犯其鋒參將某牽公馬泣曰損大臣有傷國體公怒擊以鞭墜其兩耳而馬首已被牽回不能再進矣公上表自劾辭公爵繳還恩賞上以撤兵太早引爲

已過釋公罪授工部尙書 賜第一區紫禁城騎馬充順天鄉試
正考官旋署四川總督庚戌調兩江未半年授吏部尙書協辦大
學士回京供職辛亥西藏廓爾喀與喇嘛構釁川督鄂輝帶兵赴
藏 上命公往打箭鑪辦理軍需其時大兵已進後藏而前藏爲
軍營要道公督理糧餉路經察木都瓦合山等處上下七十二峯
嶽崎巇曠盛夏積雪下消凝爲冰稜人馬無駐足處公令土人立
山頂以繩繫腰懸縋以下身帶精糈和雪而食每遇險輒以身先
人多感奮凡器械軍糧無不如期而至是年秋廓爾喀平奉 旨
授文淵閣大學士仍駐前藏辦事乙卯黔楚苗叛延及四川秀山
公移營平塊堵禦各隘口丙辰春湖南白蓮教反侵擾酉陽公往

來鳳紮營乘其不備分四路進兵剷除茶園溪旗鼓寨一帶屯聚之賊晴用火槍雨用短刀高處用雲梯叢曲處用鉤戟應手稱心如風掃葉有千總張超者手持丈八矛闖入賊營斬一騎赤馬而白衣者梟賊也餘賊奪氣漸漸解散公追奔九十里至龍嘴紮營將圖進取而年已七十有七瘴癘毒淫積勞成疾自知不起乃延請軍中大臣福甯交代印信軍務連夜輿至平塊軍營未半道而薨當攻旗鼓寨時賊兵號稱十萬皆虜脅良民爲先鋒公病中將所獲囚皆爲訊明判別生死以故騎箕之夕遠邇哀號 天子震悼下 詔追念勲庸復還公爵 命內臣護送其喪 賜金 賜祭 賜葬 賜諡錫典之隆爲近代大臣所未有也公五官並用

精悍之色垂老不衰每日晨起除校簿書見屬吏外一切章奏尺牘親自操觚灑灑千言詞藻法書皆可付諸石刻甲辰秋枚見公於廣撫署中蒙執後輩之禮甚恭談輒移日別後北毳南金餽遺不絕今年四月公在西藏軍中半夜秉燭而起操筆疾書眾將弁鵠立帳外驚疑有緊急軍符悚息以待俄而老兵捧墨箋出乃和隨園壽詩六章嗚呼當軍興時虜氛甚惡他人當之或飯不知口處而公好整以暇歌詠臨戎可以想見其平生之局量矣先是兩江總督官尊不甚理事公一莅任如光弼將軍旌旗變色所到撤去前站駟馬便行不拘嚴鼓之節白事者到轅卽死至今父老刊刻公所張告示傳播閭閻相與歎曰如此好官不得借寇一年江

南可謂薄福矣通判葉文麟權知通州巡撫閔公忌其慙借驛遞
事喉司道劾其遲誤公文與以革職葉飲忍數年待公到方投牒
申訴公不動聲色立發五百里馬遞取某年月日驛站號簿送轅
呈驗遂無俟發訊而葉冤已雪得復原官至今銜感次骨公雖風
裁山峻而貞不絕俗受人誣諉必委曲爲謀刻意憐才一介之士
輒與抗禮故事京師士大夫在軍機者例不見客不荅拜獨公反
其所爲與故舊周旋宴飲如平生權家本寒素能耐艱險凡繩行
沙度之地人騎瑟縮而公視若康衢然亦有天幸出於意外者從
忠勇公征緬甸時虜氛甚惡公自防一利刃朝夕摩挲天雨糧斷
公靴中藏筭脯五以其三奉忠勇公而留二以自給餓三日而糧

始通過天生橋馬駭墜山澗中澗深數十丈公昏絕良久馬忽蹶起負公掀淖以出曲折數十里竟達大軍公受主恩深嘗慕古大臣遣子人宿衛之義隸入旗下臨危時遺表倥偬竟忘及也奉特旨聞孫士毅生前曾有人旗之願著令其孫均入籍漢軍隲呼安南之敗既寬之於生前從龍之誠又慰之於死後此雖聖德如天非凡所測而亦由公平日忠誠有以格君心之深也夫人張氏賢能有德誥封夫人妾沈氏封宜人俱先公卒子二人長曰與大理寺評事次日衡內閣中書二女四孫遺表請以孫均襲封伯爵從子儀給與一品恩蔭上皆許之三代皆贈如公官以某年月日葬西湖之天馬山銘曰

奕奕孫公天人肩宇絳灌能文隋陸能武不競不綵知今知古才
揮銀毫便持蕭斧旣拔菁莪又擁貔虎左之右之無不宜之亦惟
聖人爲能知之東蕩西除十步九算長艦渡河短兵接戰黑山
舊服黃巾遠竄一紙奏聞九重嘉歎事兄如父友愛肫肫施
於寮采內厲外溫能不自恃貴不自矜勞不知倦廉不知貧才餘
於事力大於身堅持心肝上奉至尊在昔成周伯禽呂伋雖受
侯封仍衛王室天子恩公白改黃籍俾爾孫曾國同休戚一
朝星隕大風拔帳乘馬悲殉三軍悽愴鯨鯢未盡遽藏吳鉤麟閣
未畫驟掩山邱知公忠憤雖休勿休定起神兵石馬汗流

右神道碑銘袁枚撰

公諱士毅字智治別號補山先世自姚江遷海甯再遷仁和今爲
仁和人祖以上皆業農考玉亭公尤勤儉好施與三世皆以公貴
誥贈光祿大夫妣一品夫人贈公舉丈夫子四公其季也生而
穎異願暗不凡讀書日數行下初贈公以家貧欲俟其長卽服賈
學使勞青岳先生見而異之乃使習舉業將應童子試期迫公晝
則誦習夜屬文漏三下思臥則起行庭中往還數四復構思旣而
倦極沈沈睡矣夢中驚覺蹶然起以頭觸壁令極痛神氣大爽如
此者屢日遂徹夜不倦藝大進補弟子員讀益勤贈公憐之公曰
人生世上當爲天地間不可少之人若頽惰無成與草木同腐雖
生何爲贈公亦不復強蓋公一生自 樞廷倬直以及宣力邊疆

所夕罔惜勞皆少年磨厲之所致也公歲科試輒冠軍而因棘闈者二十餘載己卯舉於鄉年已四十辛巳成進士歸班候銓其明年上南巡召試第一授內閣中書升侍讀雲南緬匪不靖隨大學士傅文忠公督師主章奏師還遷戶部郎中久之擢大理寺少卿授廣西布政使調雲南旋爲巡撫總督李侍堯以賊敗坐不先舉劾落職發軍臺效力臨行命纂校四庫書授翰林院編修書成超擢太常寺少卿復出爲山東布政使遷廣西巡撫調廣東粵民多獷悍正供銀米州縣不能徵及奏銷往往墊解黠者遂延抗不繳公詳覈彙爲冊賦法以清焚塘盜藪也屢治不悛復糾眾拒捕傷官公至悉就擒總督富勒渾縱僕婪索公訊知有據以實奏

國朝通志卷三十一
卽命公獄獄成 上嘉其持正授兩廣總督臺灣林爽文反公
以閩粵海道相接備兵潮州 王師渡海所需軍資器械皆立辦
晉錫宮銜世襲一等輕車都尉會安南國王黎維祁爲其臣阮
惠所逐其母妻幼子均歸顛救 上命公往公時在潮先馳赴龍
州奏至而 旨方下公遂自請出關並詞知黎維祁在其國良才
縣境亦招聚義兵圖恢復飛驛以 聞 詔公由廣西直抵黎城
別 命雲南提督烏大經由蒙自進阮惠遣其將拒於壽昌江又
分兵屯嘉觀公至壽昌擊破之過江進兵至市球江賊守禦甚固
會日暮我兵隔岸與相持公令義民陽於下游造浮橋作欲渡狀
以綴賊勢密遣總兵張朝龍於上游暗渡繞出賊後賊大亂公卽

勒兵乘筏鼓勇前殲其眾屯嘉觀者游擊張純走之而副將慶成守備黎致明設伏要害亦擒僞指揮黎廷內衛栗全等天已明乘勝至富良江賊以江在國門外無江是無安南也遂盡收戰艦泊南岸悉眾拒守公察賊陣弗整急覓船筏載兵百餘先勦江心賊奪其大船一賊稍退少閒復來凡五六戰斬獲甚多賊膽落時覓船不得而沿江竹爲賊斬盡公因昏黑中賊不知我兵多寡遂以所有船筏盡載兵令提督許世亨等於次日五鼓直衝彼岸賊不知所爲奪其小船三十有餘駛回更番渡黎明分路追奔賊死者不可勝計有十餘船順風而逸張純追及之賊反拒我兵圍其船焚而沈諸江無得脫者獲其僞印三遂克復黎城黎氏宗族及百

姓等俱出城伏迎道左阮惠先遁歸富春是役也公親統大軍入其國所向披靡士卒無不用命烏大經之師但遙作聲援而已公既入黎城夜黎維祁至營公傳諭復其封並馳報廣西巡撫孫永清送其家屬歸上偉公功封一等謀勇公懇辭不許且令班師俄阮惠乘閒將復奪黎城公聞之與許世亨等分兵前進遇賊力戰賊敗退而黎維祁聞阮惠至輒攜家屬潛遁國內無主民皆竄賊勢復聚公知黎城不可久駐先率兵渡市球江奪據北岸以待後隊之至總兵李化龍行至浮橋失足溺於水橋隨斷許世亨等沒焉公遂入關黎維祁與其母子俱至關內安置南甯時乾隆五十四年正月初三日也公上疏自劾上以福康安代之並

允所辭公爵仍令駐鎮南關調兵阮惠之奪黎城也屯兵富良江據其險公見賊蟻聚欲渡江勦殺誓以身殉許世亨力阻之語以國體攸關令千總薛忠挽其轡而退至是黎城旣失阮惠知得罪天朝海懼求內附適福康安至公與嚴斥之旣察其誠且以黎氏替亂不堪立國遂偕奏安南不必用兵狀上從其議尋授兵部尙書爲軍機大臣是冬署四川總督次年實授蜀中多盜鑄百物騰踊公請發價收繳以杜其弊上韙之下其法於他省未幾江南書吏冒徵事覺總督書麟獲罪上擇老成幹練者謂非公不可遂調兩江總督公至民遮訴多涉官吏爲別其重輕躬親研鞠無徇隱徐州王平莊漫口未合馳抵毛城鋪築隄堰蕭碭山壑

璧宿州及睢甯之十三社皆被水力營疏洩與撫卹事習稱
旨授吏部尙書協辦大學士西藏巴勒布以貿易構釁奪據聶拉木
之地四川總督鄂輝討之公往攝其任籌軍精駐打箭鑪嗣以牛
病轉運多遲親赴祭木多途險峻馱載甚艱復至前藏藏地跬步
皆山有瓦合丹達拉利諸名其中七十二峰最高者上下三百里
而遙盛夏雪涌如潮自峰頂順流下卽成冰凌滑不受履公乃募
土人立其巔以繩繫腰繼而上稍進處則行然兩旁雪深無底一
失足卽杳不復見拉利山下有海子徑十里夏涉水春秋冬則躡
冰而渡寒裂肌骨爲運道所必經公每遇險要身先士卒人人感
奮芻糗糧得無誤大軍由是迅奏膚功壬子八月廓爾喀平

詔圖二十功臣像於紫光閣公與焉 御親製贊旋拜文淵閣大學士偕福康安和琳駐藏謀善後凡所經畫可永守公年且七十矣事未竣湖南苗反延及蜀之秀山公馳赴遏其鋒頃之賊爲大軍所蹙潛來窺公發兵縱擊斬首二百餘級擒賊目二防禦經年無一人敢入川境者嘉慶元年春湖北莠民劫白蓮教擾至酉陽州公營於苗容屢勦賊賊屯小坳公由間道進攻出不意冒雨登山先分兵奪其坐仙坪賊驚竄無何喊聲四起我兵不及賊十之一公令參將何元卿固守山梁獨率二十人回至營調防守兵六百率都司馬瑞圖等往斬賊數百元卿見賊陣忽動知公至大呼馳下賊前後受敵遂不支元卿愈奮厲殺賊直至小坳與公合聲

國朝文獻通考卷之百一十一
三
勢益壯焚其巢奪獲刀矛千八百餘牛羊雞豕之屬無算分賞士卒暨難民等以功 封三等男公念賊寨林立惟茶園溪最多必分道進勦始可集事時大雨旬日火藥不然俟其霽恐賊得預爲備乃黃夜分軍爲四人持短兵空桶而入呼聲震山賊俱竄聚茶園溪千總張超執長矛先登斬其魁我兵望見勇氣百倍賊敗績追逐四十餘里積屍徧野餘渡河遁後濟者多溺斃賊旣被大創退據紅巖堡之旗鼓寨公移營而前六月於軍中得疾遽卒年七十七 上聞之震悼加贈公爵謚文靖飾終之典有逾常例長孫均襲封伯爵入漢軍旗籍從公意也公天性孝友事兩兄如父猶子儀隨侍軍營病革遺疏上請以 恩廕與儀其篤於誼如此生

平無他嗜好確愛石有米顛之癖嘗督學黔中見山澗五色石如拳如指如鳥如蛇如梅竹枯木者雖雕鏤繪畫工巧不能過下與命僕夫拾以歸擇最佳者一百一枚貯之書齋因自署曰百一山房公精勤過人每日辨色起至中夜文檄填委應之綽綽若無事猶作酬答書或數千言未嘗起草當其下帷肆力於古大家文暇則寄意吟詠與杭堇浦吳西林諸老輩相砥礪故詩文能獨出機杼在粵東時議兵制鹽法兩疏備極纖悉皆報可再典鄉試咸稱得士云所著有奏疏若干卷百一山房集若干卷藏於家

右傳朱珩撰

孫文靖相公士毅交結權要殞師安南然其遇事明斷下屬震畏

國朝通志卷之二十一
當其時貪吏如李侍堯輩布滿天下而公獨以廉著每出巡輕車
減從不擇飲食嘗郵傳至江西時余業師程蓉江先生爲縣令往
謁之公卽呼與對食惟蔬食數盞而已又連劾巴延三富勒渾二
滿洲貪吏皆時人之所難能者余嘗比之明周忱胡宗憲信非阿
諛也

右錄宗室昭榘撰

國朝耆獻類徵初編卷三十三目錄

宰輔三十三

宗室琳甯

勤保

董誥

費淳

皇朝通志卷之三十一

--	--	--	--	--	--	--	--	--	--

國朝耆獻類徵初編卷三十三

通奉大夫前署江西巡撫江西布政使司布政使湘陰李桓輯
宰輔三十三

宗室琳甯

宗室琳甯鑲藍旗人乾隆二十六年由宗人府效力筆帖式補七
品筆帖式三十二年遷宗人府經歷三十五年升副理事官三十
九年升理事官四十一年授江西道監察御史四十三年兼宗室
佐領四十九年轉禮科給事中五十年二月署正藍旗滿洲副都
統十月授山海關副都統五十三年遷黑龍江將軍五十四年調
吉林將軍五十六年調盛京將軍五十八年偕副都統靈泰等奏

奉天省流寓閩人多在沿海駕駛漁船捕魚生理其中良莠不齊恐有不肖之徒駕船入洋勾引盜匪欽遵 諭旨將流寓閩人編立甲社以杜影射之弊但查沿海漁船有無篷桅及長寬大小向無定式請嗣後漁船有篷桅者長不得過三丈二尺寬不得過八尺腰艙不得蓋用蒙板亦不許用雙桅卽單桅不得長過三丈二尺如此定以規式卽不能遠駛入洋有不遵定式者照違制例治罪疏入議行嘉慶四年十一月侍郎鐵保祿康奏奉天旗民人等私開餘地應飭查明 上命琳甯將該處實在情形據實覆奏旋奏言盛京旗民農田其本身地畝之外稍有隙地毗連亦必帶犁開墾首出納糧者固不乏人卽隱匿不報者亦復不少且盛京戶

有首報滋生之條如所首之地較原紅冊地數多者除照數納糧外餘地卽行入官徵租復追繳花利照例治罪是以地畝浮多之戶旣畏罪戾又懼失業遂致隱忍不首冀得僥倖耕種此隱匿浮多地畝之原委也查納糧之地每畝徵糧四合有餘值銀不及二分而納租餘地按其等則折中覈計每畝尙需銀六分兩相較量納糧之數比納租輕四五分是雖有納糧之名並無加賦之累與情實所樂從合無仰懇 天恩寬伊等私種之罪予限二年令各業戶將浮多地畝自行首報照依紅冊地畝納糧之例一律入冊納糧則旗民人等旣免奪田治罪之虞又無追繳花利之累自必爭先恐後踴躍首出儻有逾限不首及限外私行開墾不隨時首

報者准令地鄰赴官首報丈出餘地卽撥給首告之人耕種納糧如此辦理所有浮多地畝似可陸續全行首出下部議行五年三月奉 諭曰前經朕訪聞盛京將軍衙門多有私增番役名爲捕盜實害閭閻又有浙江人余筠在彼處出入衙門把持地方公務特親書諭旨密令琳甯將此二事分別查辦旋據琳甯等覆奏已將番役裁減並將余筠押令回籍茲據瑚素通阿參奏琳甯查辦番役雖云全行裁退并未斥逐草率塞責看來琳甯竟年老無能諸事不能整飭著來京另候簡用四月授散秩大臣 賞戴花翎尋署正白旗漢軍都統閏四月授正紅旗漢軍都統五月授工部尙書七月 賜紫禁城騎馬六年三月兼署禮部尙書六月調吏

部尙書七年十一月授協辦大學士加太子少保銜八年八月調
正藍旗滿洲都統九年二月 諭曰本年京察屆期吏部開列在
京各部院大臣及各省督撫名單進呈請旨甄別大學士向不開
列第念琳甯參贊綸扉恪勤匪懈交部議敘六月調正黃旗漢軍
都統尋以失察吏部書吏舞弊革任仍畱都統旋授禮部尙書兼
管樂部太常寺鴻臚寺事十一月奏精力就衰懇請開缺調理
允之十年卒 諭曰原任禮部尙書琳甯服官有年勤慎供職上
年冬閒因病乞休茲聞溘逝殊堪軫惜著加恩照尙書例給予卹
典尋 賜祭葬 子謚勤儉子玉慶玉恆玉福玉昌玉英玉慶原
任二等侍衛緣事革職玉福官理藩院左侍郎玉昌官宗人府主

事玉英齊齊哈爾副都統

右 國史館本傳

勒保

勒保費莫氏滿洲鑲紅旗人父溫福大學士定邊將軍自有傳乾隆二十一年勒保由監生充清字經館謄錄二十四年議敘以筆帖式用二十七年九月補中書科筆帖式十一月充軍機章京三十三年京察一等三十四年授山西歸化城理事同知三十七年因延案不結被劾部議革職 上念溫福征金川有功 特原之以主事用仍在軍機處行走三十八年三月補兵部堂主事六月丁父憂四十年三月遷武庫司員外郎五月兼公中佐領九月服闋十月充寶泉局監督四十二年二月京察一等五月遷武選司郎中四十二年二月授江西贛南道三月調安徽廬鳳道六月丁

母憂回京七月 賞銀庫郎中銜充庫倫辦事章京四十五年五月擢辦事大臣六月遷太僕寺少卿九月服闋十二月擢內閣學士兼禮部侍郎銜四十六年七月授正藍旗漢軍副都統八月賞戴花翎四十八年調正藍旗滿洲副都統尋遷兵部右侍郎均畱庫倫辦事五十年 召來京 命仍在軍機章京上行走五十一年五月充右翼監督九月授山西巡撫五十二年七月署陝甘總督十一月奏烏魯木齊巴里坤存營兵丁每歲操演僅有四月閒曠日多技藝難臻精熟請照內地例歲以八箇月爲率火藥鉛斤加倍備辦 上可其奏五十三年七月寶雞縣民雷得本等傳習邪教僞造悖逆經卷訪獲首從各犯治罪如律 上嘉之十一

月實授五十四年十一月奏沔縣界連漢陰地廣難治請分隸漢陰通判管轄裁黃沙驛驛丞改設漢陰巡檢十二月奏嘉峪關外花海子地方緊要請撥兵駐守均下部議行五十六年大兵征廓爾喀道出西南勒保以辦理駝馬軍裝口糧及口外安設臺站諸事妥協 賞太子太保銜五十七年京察以稱職下部議敘五十八年奏涼州鎮屬莊浪營所轄俱沿邊扼要舊設參將不足以資彈壓查延綏鎮屬波羅協副將事務較簡請移駐莊浪改爲莊浪協副將卽將莊浪營參將移駐波羅改爲波羅營參將如所請行五十九年十月奏巴里坤鎮屬穆壘營牧廠弁兵向在安西河州靖逆三營內派撥查三營駐劄口外管轄十一營堡一經抽撥稽

察難周請於附近之瑪納斯濟木薩二營內改撥。從之。先是安
徽奸民劉松以習混元教戍甘肅隆德縣復倡立白蓮教惑眾與
其黨湖北樊學明齊林陝西韓龍四川謝添繡等謀不軌是月勒
保訪獲劉松及其子四兒置之法各省傳教者亦先後就獲。上
命誅其首惡餘赦免六十年二月京察以勤職下部議敘四月奏
安康縣麻柳壩滔河兩處距城遠應設營汛請移延綏鎮屬響
土堡都司駐麻柳壩漢鳳營屬草涼驛千總駐滔河下軍機大臣
議行六月調雲貴總督時間浙總督福康安統兵剿湖南逆苗石
三保貴州逆苗石柳鄧等勒保赴軍營安撫正大銅仁鎮遠降苗
並督辦軍需嘉慶元年七月以經理糧餉得宜下部議敘八月雲

南威遠廳屬黑猓札那等擾邊境 諭勒保酌帶湖南軍營所調
滇兵馳回剿辦勒保奏雲南兵丁見值攻圍平隴擒拏首逆之時
未便遽撤俟到滇後察看情形如必需兵力再爲檄調 上是之
九月抵滇會巡撫江蘭已平猓匪而湖南軍營統兵大員福康安
和琳相繼卒 上命勒保仍赴湖南偕將軍明亮提督鄂輝等接
辦軍務十月行次貴州適青谿縣教匪高承義等聚眾戕官勒保
奉 旨順道往剿十一月攻克大鬼壘賊巢擒高承義及賊目姚
世高等餘黨悉就殲獲下部優敘十二月緬甸國遣使呈請入貢
勒保以非貢期卻之 諭曰所辦大錯緬甸遠在荒徼聞本年舉
行 授受大典欣逢國慶備物申虔自不應拂其來意況事關外

藩瞻覲勒保卽不得主見亦應將來使畱關暫候請旨辦理乃竟率意徑行將表貢仍交來使帶回阻其向化之誠除已明降諭旨將勒保交部嚴議兼令軍機大臣擬寫檄文將勒保辦理錯謬緣由交江蘭知會該國王外勒保仍著傳旨嚴行申飭見在湖南苗匪剋期擒獲無須勒保再赴湖南著卽帶兵馳赴湖北黃柏山與福甯等會同剿賊立功自贖尋部議革職 上加恩改爲畱任初劉松等雖誅餘黨猶盛潛往來川陝楚三省煽亂於是湖北邪匪首作不靖延及川陝林之華覃加耀聚眾踞長陽縣黃柏山署四川總督福甯攻之不克勒保旋往會剿連戰敗之二年二月乘勝薄坡頭卡俘馘甚眾毀其卡賊巢垂破而貴州南籠府狝苗王囊

仙等叛復 命勒保回黔討之王囊仙者故洞灑寨苗婦當丈寨苗韋七縉鬣以囊仙有幻術羣苗信之推爲首以作亂分遣賊黨大王公李阿六王抱羊等圍南籠府及府屬之永豐黃草壩捧鮮新城冊亨安順府屬之永甯歸化各城冊亨旋被陷滇黔道梗三月勒保率兵五千至以關嶺爲進剿南籠要路卽分剿永豐等處亦所必經定議由關嶺進兵又防賊苗竄逸令總兵德英額扎郎阿袁敏分堵東西北三面南面界連滇粵咨兩廣總督吉慶雲南巡撫江蘭撥兵防守勒保率臬司常明副將施縉等由鎮甯進擊關嶺凡兩晝夜達關嶺對面之大坡嶺密分兵爲左右隊閒道抄至關嶺後自統大兵由中路進賊數千人方拒戰嶺後兵突登嶺

賊驚卻大兵乘之殲千餘焚兩旁苗寨殆盡遂克關嶺得 旨獎
賚四月分兵攻巴隴墾下之降葫蘆壘菜子河螞蝗箐等寨一百
五十二關嶺後路肅清乃統兵進克安籠堡抵永甯州城時副將
巴圖什里已解永甯圍都司周廷翰往援歸化廳圍亦解進抵安
南縣提督珠隆阿總兵張玉龍七格以師至勒保令珠隆阿率偏
師從花江募復司擊永豐賊自率張玉龍七格由安姑排沙口趨
新城道經下山塘賊築卡拒冒雨夜攻之立毀卡奪高伍坪等寨
八賊退踞新城外海河橋勒保命縱礮遙擊陽作進攻勢潛遣兵
從下游躡渡襲其後賊大潰新城圍解疾引兵向南籠南籠城西
北碧峯山郡扼要處前爲望城坡賊於坡上樹木城二遏我師夜

襲破之焚山下賊寨七賊奔山巔負嵎守山後魯溝卡子河普坪
等處羣賊遽聚勒保所部兵除分防外僅二千餘度難猝克珠隆
阿亦以兵少阻花江不得渡因檄令前來會剿五月與珠隆阿謀
取碧峯山戒諸軍毋動聞礮聲則迎擊別遣將設伏以待賊果糾
數千人下山犯大營礮發伏兵起營中兵出夾擊大破之焚山上
賊寨二十三乘勝奪羊腸山梁轉戰至新店焚賊寨十四復攻克
水煙坪以後路排沙口涼風坳及新城有賊苗窺伺慮其牽綴令
珠隆阿帶兵截剿親統大軍攻阿捧賊千餘匿八角崗中火熬之
悉斃阿捧寨破六月克魯溝又克卡子河前後俘馘以萬計師次
普坪降南籠東鄉阿伍箐等寨四十三西鄉那利鎖關等寨六十

一南鄉木咱牛角山等寨四新城後法泥等寨亦乞降秦入賞戴雙眼花翎旋攻克普坪大王公中槍斃師由壩弄五孔橋抵南籠城解其圍上以南籠士民被圍久能同心固守賜名興義以旌之嘉勒保功下部議敘閏六月駐軍興義遣常明施縉攻黃草壩檄前所調滇兵由黃泥河進伺便夾攻大軍從後策應克九頭山及馬鞭田擒李阿六洛美學莊等寨賊皆遁解黃草壩圍與滇兵合滇黔之路始通賊聞官軍雲集且距洞灑當丈近恐破其巢也悉眾分屯各要隘爲死守計圍捧鮮永豐益急七月勒保令德英額扎郎阿援捧鮮袁敏援永豐自率常明施縉等擣賊巢連克李景寨安有山二龍口等處賊各要隘盡失於是困守洞灑

當丈兩寨中無敢出者八月德英額等解捧鮓圍以兵來會因分
隊八五隊向洞灑扎郎阿等領之三隊向當丈常明等領之同時
進勒勒保率副將那麟泰往來督戰賊不能支縱火自焚都司王
宏信千總洪保玉冒烈燄入擒首逆王囊仙章七絡鬚以出遂克
洞灑當丈兩賊巢斬級千俘二千六百燒斃者萬餘獲器械牛馬
米糧無算 諭曰勒勒保督率調度悉合機宜用能生縛兇渠掃蕩
巢穴所辦實屬可嘉著加恩封爲侯爵用昭懋賞此時首逆旣擒
附和各苗寨望風震懾永豐冊亨之圍自可不攻而解但王抱羊
一犯與王囊仙章七絡鬚俱係起事首逆切不可使之漏網致畱
餘孽勒勒保旋率兵剿興義北鄉擒王抱羊於額老寨由北鄉趨永

豐督袁敏等攻解永豐圍吉慶亦從廣西帶兵克板蚌板塔一帶賊卡復冊亨與勒保軍台分飭諸將搜剿花江募復等處餘匪狎苗平 上嘉永豐官民堅守州城 賜名貞豐如興義例勒保以功晉一等威勤侯九月調湖廣總督十月偕貴州巡撫馮光熊陳苗疆善後四事一隨征鄉勇分撥就近營分充補兵丁一招集難民酌給農具銀兩俾資復業一籌備倉糧以利兵民就食一清查田土以靖苗漢分爭下軍機大臣議行是時川楚賊氛正熾有青黃藍白線等號又設掌櫃元帥先鋒總兵等偽稱勒保既調任湖廣四川總統軍務宜綿遂請以勒保代其任 許之十二月勒保自貴州由敘永入川三年正月至梁山縣接辦總統事值梁山賊

曾柳等新起於石壩山而白號王三槐青號徐添德與藍號林亮
功等股匪均聚開縣臨江市勒保計進剿王徐諸逆則石壩山賊
躡其後先遣兵擊破之斬賊首曾柳郭長俊伍一凱 諭曰此勒
保入川第一功可嘉之至調四川總督王三槐等聞石壩山賊懼
而宵遁勒保督兵襲擊連敗之於豐城寨白沙河等處賊北竄入
達州與藍號賊冉文儔合惟林亮功仍踞開縣之開州坪勒保令
副都統銜六十七總兵富森布剿之親率大軍追王三槐等二月
師至達州九戰皆捷賊走巴州又敗之於關智坡及蓋茶寺賊循
巴州境掠闖中蒼溪而西三月追及之於李子觀逼賊東入儀隴
勒保以賊蹤往來靡定川中居民散處易於裹脅乃畫堅壁清野

之策令百姓各依山險紮寨屯糧並團練鄉勇以自衛由是賊至居民多獲全四月賊由儀隴茨菇頂趨孫家梁欲與白號賊羅其清合勒保兵踵至借尙書惠齡將軍恆瑞分路截剿賊屢敗王三槐等南竄渠縣冉文儔遁入羅其清寨中勒保畱惠齡恆瑞剿孫家梁賊仍帶兵緊躡王三槐等五月三槐等自渠縣折竄杜市街犯大竹縣我兵奮擊大破之賊分竄梁山墊江及新甯復由新甯東奔開縣我兵沿途追襲疊有斬獲開州坪賊林亮功偵知王三槐等至出屯陳家場爲犄角勢勒保分兵擊走之追至梁山荆竹園斬其僞元帥林定相以六十七富森布剿賊遲延又縱令出巢奏褫其職六月剿王三槐於開縣陳家山聞蘭芽場有新起賊徐

添德潛往句結爲王三槐聲援亟率兵掩擊擒賊首張洪鈞餘匪潰散徐添德奔新甯王三槐失援乃率其黨冷添祿遁入雲陽安樂坪大兵圍之七月克安樂坪擒王三槐械送京師冷添祿退保祖師觀 諭曰勒保前平黔苗已錫通侯之爵茲剿辦川匪調度有方埽穴擒渠膚功克奏著加恩晉封公爵八月進圍祖師觀賊據險守閱數月弗能拔屢奉 嚴旨申飭十一月黃號賊龍紹周龔建樊人傑聞冷添祿被圍急分路來援我兵擊卻之冷添祿仍堅守祖師觀十二月官軍奪魚鱗口山梁進逼賊巢冷添祿率數百人從後山雜公梁竄新甯 上切責勒保趣速往新甯剿辦四年正月勒保至新甯適徐添德爲副都統銜額勒登保所敗竄踞

新甯仁市鋪與黃號王光祖等合勒保偕額勒登保夾擊之敗其
眾於石竹坪及老鷹場徐添德等走墊江冷添祿知新甯有重兵
亦拊竄入忠州勒保令額勒登保赴墊江截擊徐添德等總兵百
祥取道忠州追冷添祿自率大軍向梁山策應兩路並飛咨惠齡
與副都統銜德楞泰以兵來會是月上以前此各路軍營事權
不一致藏功需時特授勒保經略大臣節制川楚陝甘豫五省
軍務命其弟監翎侍衛永保齎經略印赴軍中副都統銜明亮
與額勒登保均授副都統爲參贊大臣二月勒保奏歷次總統與
各路分兵剿賊往來馳逐僅祇偏師茲臣仰仗天威授爲經略
大臣事權歸一自應通行籌畫除將陝楚兩省實存兵數分駐何

處片爲調度外川省大局臣督率額勒登保惠齡德楞泰等以合
勦徐添德冷添祿等大夥賊匪爲正路餘則視賊所向隨時督勦
查賊勢旣重在四川臣應於川省暫駐梁山太竹一帶地尙適中
可以就近督辦 允之尋督諸路兵大破徐添德等於沙平關斬
首千餘級賊分竄鄰水長壽合縣官兵復追敗之三月大軍移駐
達州遣額勒登保殲冷添祿於廣安州城頭堰又殲林亮功分股
掌櫃蕭占國僞元帥張長庚於營山縣譚家山疊奉 恩旨獎賚
時被脅難民多有自賊中來投者 上命勒保妥議安撫章程勒
保以紮寨圍練一法行之川省已著成效而陝楚豫等省尙未通
行因奏言近來被脅良民逃出不少自應詳求綏輯惟賊匪未平

往來無定凡鄉村場市屢遭焚掠田畝既已汙萊房屋悉爲灰燼如官爲授糧則日久恐其不繼官爲修屋則賊來又被焚燒迨至無食無居復爲賊擄所辦仍屬無益是以臣曾通飭川東川北各州縣令百姓依山附險營結寨落將糧食器具移貯其中賊去則下寨而耕賊來則守險而避此不但爲百姓全身保家之計並可杜賊匪擄人掠食之謀請嗣後凡有解散黨與除能殺賊立功者另請加恩外其餘或潛行散出或臨陣投降卽由各路隨營糧員及地方官訊明所隸州縣按道路遠近酌給銀米回籍歸入附近民寨仍給搭蓋草棚之費俾資棲止如此安插則從賊之民知解散可得生全其心自不致固結旣散之後有寨可居不致再爲

賊據於綏輯似覺有裨請通行湖北陝西河南等省一體遵辦
諭曰所辦俱爲周到朕以此事委卿必不遙制總之邪匪不可不
誅良民不可不撫而受撫者必使之畏威懷德出於至誠方爲盡
善勒保又奏川楚秦豫四省今歲應徵錢糧請將被賊之區普行
蠲免近賊州縣暫緩輸將此安良卽所以散賊又兵丁從征三年
傷亡病故覈之原調數目日益減少陝楚豫三省見有堵剿事宜
缺額者請咨令補足畱於各本省調遣山東雲貴兩廣等省應令
補派來川川省卽由臣就近調補 命軍機大臣議奏尋奏兩廣
距川較遠緩不濟急請先儘四川雲貴酌調餘如所請 從之四
月官兵追剿徐添德龍紹周龔建樊人傑及冷添祿分股僞元帥

張子聰等屢敗其眾賊盡遁入開縣東鄉境內旋分竄竹峪關渡口場等處意圖入陝 諭曰勒保不趁賊匪聚集之時爲一鼓殲擒之計又任其紛紛四竄稽延月日咎實難辭著傳旨申飭五月張子聰句合藍號賊冉添元北竄勒保遣額勒登保由老官山兜擊逼回南江德楞泰亦自太平進兵連敗龍紹周等於麻柳壩雙合場將竄陝之賊全數截回川境賊隨分股奔竄張子聰冉添元竄通江藍號包正洪竄雲陽青號王登廷竄東鄉徐添德龍紹周龔建樊人傑與線號龔文玉白號張添倫等先後竄入大甯老林勒保檄調諸將分往剿辦 上慮川省賊眾兵單 諭令添調新兵勒保奏添兵必須一二萬庶敷攻擊之用而命將旣難其人籌

餉亦慮莫繼與其調兵而多費莫若鼓勵見在軍心此後如得一
大勝仗竟當加以重賞自無不振作奮興臣惟有儘此兵力策勵
將士以期迅速成功 諭曰所見似有把握若能於兩三月內兵
不增而功速蒞此誠日夜所盼望者也六月令總兵朱射斗殲包
正洪於雲陽小毛坪七月令德楞泰擒龔文玉於大甯瓦房溝又
擒其僞元帥龔其位於香衝僞先鋒卜三聘於巫山羊溪河八月
令提督七十五擒龔建於開縣火峯寨賊勢稍沮會督辦糧餉副
都統銜福甯疏劾勒保一路兵餉月需銀十二萬餘兩視諸路獨
多而所辦各股賊匪有增無減 上方以勒保安坐達州虛糜厚
餉又堅執不必添兵之說致賊蔓延疊降 嚴旨詰責而徐添德

等復率萬餘眾由大甯闌入楚疆湖廣總督倭什布飛章告警上乃褫勒保職命吏部尙書魁倫入川勘問加額勒登保都統銜代爲經略大臣魁倫署四川總督勒保旋奏川省賊股雖多總係舊有之賊並非新起從前各號多至萬人或數千人近惟四五千至千餘人及數百人不等福甯謂有增無減臣實信其有減無增至不必添兵一說曾與面商福甯亦深以爲然並未敢稍存粉飾上責其狡詞迴護仍飭魁倫嚴訊十月魁倫奏勒保自到川統兵共用餉銀二百餘萬兩查係按名給領并無不均所辦賊匪見實較前大減福甯以新分賊股姓名多於從前勒保則覈其大數尙無諱飾至駐守達州雖未親歷行陣然辦理文檄調遣兵

將亦非一無所事惟此次賊眾犯楚勒保接到倭什布咨會未卽馳奏又明亮恆瑞不聽調度副都統訥音所帶兵丁誼鬧生事亦未據實參辦實爲昏愎錯謬罷職瞻徇請照統兵將帥玩視軍務貽誤國事律擬斬立決 諭曰勒保昏愎錯誤問擬斬決實屬罪所應得惟春間委任經略時朕曾有令其居中調度之旨原以經略大臣惟在決機制勝不責以衝鋒陷陣之事非令其安坐軍營不一親臨行陣也乃勒保半載以來惟在達州株守竟成一彙報軍情之員任閩寄者豈宜若此究念其係誤會前旨尙可稍從末減且勒保自總統軍務所有首逆王三槐冷添祿包正洪龔文玉等犯以次就獲雖非親往督拏究係伊所派調又前剿貴州狝苗

一手辦竣至今安靜無事其功亦尙足錄勒保著從寬改爲斬監
候魁倫接奉此旨卽派員將勒保解交刑部監禁五年正月經略
額勒登保赴陝剿賊以川省軍務移交總督魁倫接辦賊首冉添
元張子聰合黃號徐萬富青號汪瀛線號陳得俸等共五萬人乘
間由定遠搶渡嘉陵江魁倫退守潼河事 聞起勒保爲藍翎侍
衛馳驛赴川協剿三月抵金山驛聞賊已由射洪縣王家嘴越潼
河西岸欲趨成都遂偕魁倫馳赴中江縣截剿連敗之於梅子埡
象龍寨等處魁倫以失守潼河逮問 賞勒保四品頂帶及花翎
授四川提督兼署總督四月賊分擾遂甯安岳樂至各縣境勒保
偕參贊德楞泰奮力夾攻殪賊數千賊始東竄邀擊之於嘉陵江

口俘斬及淹斃者又三千餘脫難民一千四百餘汪瀛尋爲勒保所擒潼河兩岸肅清 上嘉之四月勒保旋引兵西擊敗白號高二馬五等於龍安鐵籠堡賊退入甘肅番境五月白號賊復犯龍安 上以勒保縱賊褫花翎罷提督專署總督六月賊北走甘肅遣副都統阿哈保追之遂提兵東渡嘉陵江剿川東川北賊七月白號苟文明鮮大川等由陝入川圍渠縣高寺寨勒保疾往解其圍追至太平寨與德楞泰軍合賊走墊江長壽循嘉陵江而北覲渡西岸官軍追擊百餘里至岳池之新場殲擒四千餘人鮮大川逃入巴州爲寨民鮮文芳誘斬 上嘉勒保功 賞二品頂帶實授總督八月偕德楞泰剿白號賊於東鄉太平縣境白號與青號

賊趙麻花合我兵扼之於茅坪倒流水殲其僞副元帥湯思舉九月趙麻花復率其黨王珊欲向陝境迎徐添德至川勒保由江口截剿至雲陽大水田殲趙麻花王珊亦爲德楞泰所誅下部議敘十月樊人傑等由楚竄入川東勒保偕德楞泰會剿小有斬獲賊尋北竄陝境而徐添德一股又由陝入川旋由川入楚 上責其堵賊不力降四品頂帶仍畱總督任十二月藍號李彬白號楊開第黃號齊國謨等賊眾數千自巴州南竄勒保邀敗之於渠縣境賊奔儀隴遇德楞泰兵復大敗齊國謨死餘竄營山柏林場勒保追及之斬楊開第先後殺賊四千李彬僅以數百人遁得 旨嘉獎 賞三品頂帶並 御書福字賜之六年正月移師川東敗羅

其清餘黨楊步青於大甯白馬廟會焚人傑徐萬富令藍號賊王士虎冉添士股匪竄擾廣元蒼溪勒保檄阿哈保等往援賊僞東竄儀隴陰率眾沿嘉陵江南下爲搶渡計勒保親馳至南部碑灣寺與阿哈保等合擊殲徐萬富與藍號僞總兵鮮奇林僞先鋒陳上達及賊黨二千餘人 賞還二品頂帶及花翎仍下部優敘二月藍號張士龍竄巴州後河嶺遣提督七十五擊斬之復移師川東督勦藍號陳朝觀白號魏學盛等敗之於巫山雲陽各縣境賊由太平北竄入陝勒保追之不及遂駐南江分勦楊開第及藍號張漢潮餘黨疊奉 嚴旨申飭四月復回川東勦白號湯思蛟劉朝選等股匪檄七十五由太平前來會勦奏入 諭曰摺內全係

浮詞伊在川帶兵時稱馳往川北時稱馳往川東非止一次東奔西逐不特師老力疲抑且虛糜餉項看來勒保總欲因人成事所稱趕赴川東並非認真剿賊不過因德楞泰在楚剿辦徐添德距川境不遠一經到川即可聯銜奏事藉以邀功且七十五一路兵力昨已據額勒登保奏追剿陳朝觀入陝今勒保尙稱知會七十五由太平就近進剿是川省帶兵大員追賊出境勒保尙不知信息猶望其確探賊蹤奮勉剿捕耶至樊人傑一股在川日久不知去向勒保節次摺內總未提及豈竟任其潛匿置之不辦日下麥已成熟賊匪掠食飽颺勢必裹脅多人復成大股何時始能蕝事勒保曾獲重愆經朕棄瑕錄用乃不知力圖報效勉贖前愆一味

遲滯本應革職拏問姑念該省總督屢行更換又將另易生手勒保著從寬革去翎頂暫畱四川總督之任以觀後效五月師次大甯敗湯劉二逆於萬古寺賊合青藍黃三號股匪分竄陝楚邊界勒保遣兵追黃號賊至湖北竹山縣境殲擒九百餘人六月青藍號賊回竄東鄉我兵遇之於華尖壩擒青號僞元帥何子魁殲藍號僞元帥苟文明及鮮俸先 諭曰勒保前因剿賊遲延革去翎頂此次既知奮勉著加恩先賞給四品翎頂俟川匪全行掃蕩後再加懋賞七月廣安州有新起匪徒張老五等聚眾焚掠勒保撲滅之又遣阿哈保等擊敗青藍黃三號餘匪於東鄉石叟山擒徐添德弟添壽王登廷弟登高 賞還二品頂帶八月白號高見奇

句合魏學盛竄廣元邀擊之於大茅坡賊敗走追至通江盧家灣適藍號冉學勝自東面老林竄出與之合勒保乘夜攻之殺敗賊九百餘擒冉學勝 賞頭品頂帶封三等男爵九月高魏二逆分竄南江及陝西之西鄉勒保師抵南江聞李彬股匪方掠巴州及蒼溪恐其踰嘉陵江而西亟率兵往賊已東竄通江遂請移兵大竹鄒湯思蛟劉朝選 諭曰前此勒保辦高魏股匪所贖無多因李彬在川北竄擾卽舍高魏而剿李彬及馳回川北並未與李彬接仗又稱湯劉股匪緊要趕往川東似此東奔西逐總未痛剿一次辦竣一股豈不徒疲兵力此時勒保旣已趕赴川東惟當堅持定見將川東之賊迅速辦竣再酌量移師他往以次肅清十月

勦湯劉二逆於大竹鄰水長壽各縣境先後俘斬千餘拯難民二千追至太平八臺山擒老教掌櫃蕭焜與德楞泰軍合十一月偕德楞泰奏言重慶川北兩鎮所轄營汛界連陝楚自巫山至廣元互二千餘里兩鎮駐劄較遠鞭長莫及請於太平營添設副將一員駐城內原設都司移駐城口通江縣竹峪關廣元縣黃楊堡大甯縣徐家壩巫山縣大昌等處地居萬山中爲三省要路請各添建城堡設守備一員兵二百五十名又達州爲教匪起事之地民俗刁悍撫馭綦難請升爲府治並升太平縣爲太平直隸廳卽以太平縣缺改爲府治附郭之達縣 上從之 賜府名曰綏定十二年分飭諸將勦李彬湯思蛟劉朝選等股匪均有斬獲因借額

勒登保德楞泰奏言勦辦教匪大局已爲戡定請酌撤官兵上以巨賊未除遽思將就了事嚴飭之七年正月奏川省自築寨集團以來賊勢十去其九擬將官兵分段駐劄搜勦餘匪仍激勵鄉團協力搜捕然無官統率終覺散而無紀見遴委熟悉軍務之道府及正佐各員指定段落各專責成每寨首一人管領團練若干名每佐雜一員管領寨崗若干處每正印官一員管領佐雜若干員均以各該路道府總其事兵力所不能到則以民力佐之民力所不能支則以兵力助之庶幾偵探易周賊無潛匿之地得旨允行是月督兵擒王登廷餘黨何贊於忠州白石鋪殲除天德餘黨楊掌櫃於綏定木頭市二月李彬與黃號辛文竄南江鐵廠坪

遣建昌道劉清勦擒之三月白號張添倫率其黨魏學盛等擾川
北勒保遣總兵田朝貴往勦親督大軍繼之大敗賊於巴州土地
堡殲張添倫及其僞元帥陳國珠僞總兵魏學盛五月令副都統
銜達斯呼勒岱勦白號餘匪於東鄉古佛崗擒首逆度向瑤令總
兵張績等勦青號餘匪於太平沙礮場擒首逆徐添培六月令田
朝貴勦藍號餘匪於通江貓兒埡殲首逆楊步青屢奉 恩旨獎
賚下部議敘七月劉朝選糾青藍黃號殘匪竄大甯鞞底山勒保
擊擒之并擒黃號賊目伍余元於大甯仙女溪晉一等男爵是月
遣達斯呼勒岱勦龍紹周餘黨賴飛隴於雲陽閻王塢箭瘡之下
部議敘九月白號僞元帥張長青黃號掌櫃李學坤率二百餘人

乞降奏免其死十月遣遊擊羅思舉等剿白號殘匪於東鄉陳家坪擒僞元帥張簡湯思蛟逃至縣屬之包口被獲十一月又遣羅思舉等擒黃號唐明萬於大甯石柱坪以勒保衝寒帶兵賞貂皮馬褂時川中著名首逆率就殲擒餘匪分竄老林或百餘人爲一起或數十人爲一起不復成股陝楚賊匪亦多爲額勒登保德楞泰兩路大兵所殲遂以十二月偕額勒登保等馳報歲功諭曰勒保自復任總督以來倍加奮勉督兵連獲首逆已封一等男爵見當大功戡定著加恩晉封一等伯並加太子少保銜尋又諭勒保伯爵仍用威勤名號八年正月額勒登保德楞泰移師入陝勒保畱川省辦零匪擒白號賊目苟文富於墊江冷家壩招降

黃號賊首王國賢等閏三月擒白號僞元帥張順於太平三溪子
青號賊目王青於萬縣孫家漕四月擒白號僞元帥宋國品於大
竹柏楊溝竄匿零匪搜捕殆盡七月與額勒登保德楞泰會軍於
太平飛章奏報肅清得旨嘉獎下部議敘旋奏撤東三省馬隊
雲貴官兵並本省隨征兵勇報聞嗣以陝西南山餘孽苟文潤
等復起潛越漢江擾及川界額勒登保德楞泰先後統師剿辦勒
保派兵防堵至九年八月賊始悉平十年四月偕德楞泰疏稱善
後十事一籌變各屬支贍兵糧一查撤近年新添塘站一民間見
存崗寨責成地方官稽查一州縣散貯軍裝撥歸各營汛備用一
歷年積欠兵勇糧餉清釐找領一太平等協兵米折銀按年豫支

一百姓自製槍礮器械及時收繳一被賊焚毀城垣營堡擇要佔
修一零星土匪飭屬嚴拏一出力紳士量予獎勵 命軍機大臣
議奏尋奏找領積欠兵餉易滋弊混應分晰查辦餘如所請 從
之五月入 覲 諭曰嘉慶四年三月間勒保奏通飭川東川北
各州縣令百姓依山附險各結寨落章程井井有條彼時賊匪正
被官兵四路兜剿以窮奔竄走爲能往往於所過鄉村擄人掠食
肆其兇殘久而滋蔓自結寨落後不特賊匪無由焚劫且居民等
憑依險固心膽旣壯賊至卽合力攻擊斬獲甚多其後陝楚一律
倣照賊勢日形窮蹙始能將無數兇渠以次掃蕩今三省肅清閭
閻安堵如常揆厥所由實得力於堅壁清野之策勒保首先倡議

洞悉機宜得以蕺功完善允宜懋賞酬庸勒保著加恩賞太子太保銜並賞戴雙眼花翎七月回任先是教匪旣平解散鄉勇令其入伍爲兵十一年七月陝西甯陝鎮新兵陳達順等倡亂欽差大臣德楞泰檄川兵會剿勒保遣總兵唐文淑等率兵六千應之十一月從賊蒲大芳等縛首逆乞降德楞泰受之勒保奏言叛兵罪案較教匪尤甚德楞泰率行納降令其復歸原伍該匪不知畏威安能悔罪始以兵而爲賊復以賊而爲兵起滅自由視同兒戲且恐各處兵心因此驕縱日增益難鈴束 上聽其言 諭令赴陝會辦善後事宜十二年正月抵漢中聞綏定新兵滋事亟馳回川遣副將桂涵羅思舉帶兵剿捕擒首逆王得先孔傳仕劉金定磔

於市餘黨悉抵罪如律二月陝西西鄉瓦石坪新兵周士貴等叛復同德楞秦遣兵討平之疊奉恩旨嘉獎是月京察以勤能諳練下部議敘十三年五月馳赴馬邊廳督勦涼山夷匪涼山夷先於嘉慶七八年間乘大兵方勦教匪出擾峨眉雷波馬邊各境勒保疊遣提督豐紳總兵張志林往勦賊聞兵至卽遁入夷界並縛獻首犯六兒普色求罷兵未大創也至是羅回熟夷烏卜復糾趕山坪等十二支嶺夷犯峨眉縣歸化汛又潛由山後繞至太平堡焚劫分遣賊黨擾馬邊廳閏五月勒保率兵至賊退踞土曾村挖黑等處我兵連擊破之槍斃賊目業貴進克六拔寨殲賊首神丈降賊目二蟲黑娘阿二惟烏卜逃入大木桿六月大軍移駐太平

堡督總兵馬元由平夷嶺進攻豐紳兵從月兒坪搆其後連克趕
山坪瓜家岡牛心山等處賊巢將十二支滋事嶺夷全行掃蕩得
旨嘉獎下部議敘七月師至膽巴大木桿夷目挖海等縛烏卜
以降涼山夷平奏入 獎賚有加十四年四月以勒保七十生辰
賜御書宣勤介景扁額十二月擢武英殿大學士仍畱總督任
十五年二月京察以辦事鎮靜下部議敘是月 召來京供職五
月給事中胡大成參奏勒保任四川總督時有匿名揭帖指訐督
藩款蹟 命勒保明白回奏勒保奏當時實有所聞因查詢無據
遂寢其事 上以其匿不陳奏迨奉旨詢問復不自請議處降工
部尚書六月調刑部尚書兼正白旗蒙古都統 賞紫禁城騎馬

七月充崇文門監督 上秋獮木蘭 命畱京辦事八月授內大臣十一月偕戶部侍郎英和光祿寺少卿盧蔭溥馳赴涿州房山縣一帶查辦災賑事竣回京十六年正月授兩江總督閏三月以趙運糧艘安速得 旨獎賞六月 召來京復授武英殿大學士管理吏部兼鑲藍旗滿洲都統九月御史劉奕煜參奏吏部銓選兵部主事員缺錯誤 命勒保偕大學士劉權之等詳查勒保等援引舊案謂部選無誤 上察其與例不符復派大學士慶桂尙書劉銀之查明部誤屬實以勒保舍例言案降二級畱任改管兵部十七年正月充經筵講官五月管理武英殿御書處九月授正白旗領侍衛內大臣十月 賞海凌萬國十八年正月授軍機大

臣充國史館總裁官二月京察以恪勤供職下部議敘六月兼管
理藩院事務七月 上幸木蘭 命畱京辦事八月以病乞假
允之時其子內閣學士英綬扈 蹕木蘭 命回京侍疾並 遣
御醫診視十九年閏三月復以目疾求解任 命解所管各項差
使仍畱大學士任在家食俸勒保疏辭 上慰畱之八月目疾增
劇 命開大學士缺仍在家食威勤伯全俸二十一年 諭曰勒
保之女著指與四阿哥爲福晉二十四年四月以勒保八十生辰
賜御書延年養福扁額八月卒 諭曰予告大學士勒保自乾
隆年間由軍機章京內用侍郎外任督撫剿辦黔楚逆苗川陝逆
匪教匪皆曾統領師干著有勞績洵封公爵嗣以軍務日久懈弛

視職逮問因其久歷戎行仍令統兵自效勒保與額勒登保德楞
泰齊心協力三省教匪一律殄平實伊三人之功朕懋獎成勞仍
錫封爲一等伯爵由總督調任尙書擢贊綸扉入直樞禁方深倚
任旋以目疾乞休特令在家食俸歲時存問方冀優游頤養安享
遐齡茲聞溘逝深爲軫惜著加恩晉贈一等侯卽照一等侯爵例
給予卹典將來伊子承襲時著襲封三等侯派四阿哥卽日前往
代朕賜奠茶酒其原任內降革處分悉予開復一切賠項俱行寬
免著卽予諡應得卹典該部查例具奏尋 賜祭葬 予諡文襄
弟永保兩廣總督自有傳子英惠英德英綬英奎英秀英德頭等
侍衛英綬工部右侍郎英奎吏部郎中英秀廣西慶遠府知府孫

文厚襲三等威勤侯文俊江西巡撫

右 國史館本傳

勒相公保溫相國福之子也溫以木果木僨事公統師時盡反父
政待綠營士卒頗優厚與文士論交誼如石殿撰韞玉石太守作
瑞輩皆收羅門下馬軍門瑜忠壯公全弟鎮將國銳爲全子公皆
與之論世誼故人皆樂爲之用惟滿兵切恨入骨己未之役幾受
青蠅之害賴繼起者僨事公乃復擁旌旄與額經略等先後殺賊
川楚教匪爲之盡殲公之力也公短小精悍善談諧飲酒賞賚頗
豐遇人投其所好尤卑得宜人喜與之交在軍中不喜談兵嬉笑
如常日而寄心膂於將帥使其各盡所長又力持堅壁清野之策

故賊人無所擄掠以底敗亡入閣後益斂鋒芒日事飲宴以取要
人之歡遇知大體者亦加禮貌實多智士也

右錄宗室昭棟撰

董誥

董誥浙江富陽人父邦達官禮部尙書自有傳乾隆二十八年進士改庶吉士三十一年散館授編修三十二年命入懋勤殿寫金字經爲孝聖憲皇后祝嘏三十三年四月御試翰詹時誥以寫金字經未與試上嘉其學問優長特予加一級三十四年正月擢詹事府右中允七月丁父憂三十六年服闋命入直南書房先食俸候補右中允三十七年正月轉左中允五月遷翰林院侍讀充日講起居注官三十八年十一月遷詹事府右庶子旋授翰林院侍讀學士三十九年四月充經筵講官六月充江南鄉試正考官十二月遷內閣學士兼禮部侍郎四十年十一月擢

工部右侍郎兼管錢法堂事務四十一年三月充四庫全書館副總裁並 命接辦四庫全書薈要兼充武英殿總裁四十二年六月調戶部右侍郎兼管錢法堂事八月 命輯滿洲源流考十一月轉戶部左侍郎四十三年四月兼樂部事務四十四年十二月命在軍機大臣上行走四十五年三月 賜第西直門新街口五月 命紫禁城騎馬四十九年七月甘肅石峯堡逆回平 上以誥勤勞懋著交部議敘五十二年正月擢戶部尙書五十三年臺灣逆匪林爽文就擒 上以誥等夙夜宣勤交部議敘並 命列二十功臣內圖形紫光閣 御製贊曰舊例軍務多用清文茲或用漢綠營海濱治以馬上亦頗效勤堪同福將閣表書勳五十

四年二月 命管理稽察 上諭事件處五十五年十一月加太子少保銜五十六年十月刊石經於太學以誥充副總裁五十七年九月廓爾喀平交部議敘列十五功臣內圖形紫光閣 御製贊曰儒雅搢紳本不識兵樞機久參習以盡誠地官掌職度支是司軍儲萬里調撥合宜六十年九月充國史館副總裁嘉慶元年十月授東閣大學士總理禮部仍兼戶部事務二年二月丁生母憂 特旨賞陀羅經被飾終 遣御前侍衛額駙豐紳殷德帶侍衛十員奠茶酒並 賜祭葬三年三月誥葬母畢詣 闕謝 恩 諭曰刑部尙書缺出見當辦理秋審之時一時未得其人董誥見在守制已逾小祥計明年春夏間卽屆服闋暫行署理董誥接

奉此旨亦不必來行在謝恩惟當悉心辦理秋讞及軍營紀略等事此係朕不得已用人之苦心當亦人所共諒也四年正月高宗純皇帝賓天 仁宗睿皇帝命總理喪儀仍在軍機處行走二月充 實錄館總裁晉太子太保五月服闋授文華殿大學士充國史館正總裁管理稽察 上諭事件處仍兼刑部尚書九月奉安 裕陵禮成 命誥恭點 高宗純皇帝神主加太子太傅六年二月三省邪匪首逆王廷誥就擒 詔加誥軍功一級十一月充會典館正總裁 賞黑狐端罩一襲尋加軍功三級七年大兵戡定三省邪匪 上以誥自用兵以來書諭慎勤 特予騎都尉世職八年七月搜捕三省邪匪全境肅清 諭曰董誥之子淇

本由廕生任戶部員外郎著加恩以郎中用九年充順天鄉試正考官十一年九月管理戶部三庫事務十二年三月 高宗純皇帝實錄告成 諭曰董誥前後在館八年始終其事允宜特加優獎董誥之父董邦達從前未經入祀賢良祠著加恩准其入祀十三年三月充會試正考官九月 賞密雲縣房屋一所十四年正月 諭曰本年朕五旬萬壽已頒恩詔覃敷閭澤因思大臣中有平素恪勤尤著者亦宜特加優獎大學士董誥在軍機處行走有年夙夜敬慎著加恩晉加太子太師三月以誥七十生辰 御書贊樞錫慶額賜之 賚予甚渥復 御製詩曰久任樞廷政教宣兩朝知遇一身肩 聖人早鑒才猷博願彥今資輔弼賢大衍歲

逢古稀紀期頤瑞合八旬年浙西二老同黃閣壽算縣長福履延
十五年六月以粵洋巨匪烏石二等殲擒淨盡 上以誥自勦辦
洋匪以來甚屬勤慎 命開復降罰處分仍加軍功一級七月充
上書房總師傅十六年三月充會試正考官子淇病故時原得一
品廕生子誥次子溱承廕以示體卹十七年正月晉加太保十八
年九月逆匪林清等就誅 上以誥晝夜宣勞 賞加二級十二
月攻克滑縣賊匪 飭部優加議敘十九年二月 諭曰自上年
九月逆匪林清勾結豫東教匪聚眾謀逆勦辦甫竣其時南山匪
徒因陝甘兵將徵調遠出乘虛劫掠復飭凱撤官兵分路勦除見
已一律肅清軍務全行報嚴軍機大臣贊襄樞務夙夜勤勞宜沛

恩施以昭優獎董誥之子候選員外郎董瀄著加恩以郎中用二十年十二月因病乞假尋以病未能痊懇請開缺 諭曰董誥向有氣喘胸痛證前閒兩年每屆冬間或受風寒卽行舉發一交春令旋即就痊見距封篆日期不遠此一月中並無要務董誥著在家調養毋庸開缺計至開春時天時融和病當仍愈再行銷假當差尋 上以誥因病請假復念誥年逾七旬精神不能周到軍機事務繁多不能兼管刑部 命改管兵部事務二十一年 上恭謁 東陵 諭誥不必隨扈八月充順天鄉試正考官二十二年正月 命偕莊親王縣課等畱京辦事六月復 命管理刑部事務七月 命管理行在刑部事務兼佩吏部印鑰二十三年二月

因病劇乞休 諭曰大學士董誥自乾隆年間仰蒙 皇考高宗
純皇帝簡用供職內廷嗣於嘉慶元年擢授大學士襄贊樞廷綜
理部務宣力多年近歲以來屢以老病乞休朕降旨給假慰留令
其安心調養茲復以氣體衰憊兩目昏花奏請開缺情詞懇切朕
實不忍遽允所請但察其宿疾未痊若令勉強趨公轉非以示體
恤董誥著加恩以太保大學士致仕在家支食全俸俾資頤養用
示朕眷懷耆碩恩禮優加至意十月病益篤經畱京辦事王大臣
英和等奏 聞特派御前侍衛載銓帶同御醫馳驛前往看視是
月卒 諭曰予告大學士董誥自其父邦達供職內廷渥承 皇
考高宗純皇帝知遇擢至禮部尚書嗣董誥通籍詞垣仰荷 皇

考眷注尤隆入直南書房供職書畫最勤且久洊登卿貳用爲軍機大臣以軍務兩經繪像 賜贊褒嘉朕御極後晉擢綸扉仍襄樞務宣力垂四十年奉職恪勤且聞其邸寓清貧原籍並無田宅伊服官年久家無餘資亦足徵其持躬端謹前以老病乞休經朕再四慰留今春病體增劇方開缺准予致仕俾資頤養伊仍在京居住七月間朕詣盛京恭謁 三陵啟蹕時董誥尙力疾至朝陽門外送駕朕優加慰勞諭令善自調攝計回蹕時必仍於道旁迎鑾再加存問遽聞溘逝深爲悼惜業已賞陀羅經被著加恩晉贈太傅入祀賢良祠派定親王縣恩帶同侍衛十員卽日前往奠醊十六日朕親臨賜奠酒飯賞給廣儲司庫銀二千兩經理喪事其

原任內降革處分悉予開復所有應得卹典仍著該部察例具奏
董誥見祇董涓一子著於服闋後以四品京堂卽補以示朕篤念
耆臣至意復 御製詩曰世篤忠貞清節堅 先皇恩眷倍寅虔
騎箕仙苑九秋杪染翰樞廷四十年自有文章傳子姪絕無貨幣
置莊田親臨邸第椒漿奠哀挽蓋臣 考澤宣並 命戶部右侍
郎姚文田傳 諭其家刻詩墓次尋 賜祭葬諡文恭誥自擢內
閣學士後凡閱殿試朝考並 御試翰詹及考試差卷皆與焉
巡幸秋獮諸大典罔不扈 蹕值京察俱 獎諭有加嘉慶七年
上諭曰董誥經 皇考簡任多年克盡忠悃知無不言言無不
盡蓋褒其實也誥進呈諸畫 高宗純皇帝 仁宗睿皇帝皆有

題詠並收入石渠寶笈三編子淳候補四品京堂

右 國史館本傳

公諱誥字雅倫號蔗林浙江富陽人其先自婺源來徙居世有隱德八傳至文恪公始由進士起家歷官至尙書公爲文恪公長子幼穎異受書略諷誦輒皆上口初文恪公艱於子嗣年四十五乃舉公故愛憐之不甚加督策公稍長自奮於學時歸安戴禮部文鏡以宿學負重名文恪公門下士也居相近公旦夕從之遊未逾年學盡通遂以國子生舉乾隆二十七年壬午科順天鄉試明年成進士方廷試卷進呈時公名在第三 高宗純皇帝以大臣子改置二甲第一 朝考入選改翰林院庶吉士充國史館三通館

協修武英殿纂修 皇朝禮器圖式纂修三十一年散館授編修
三十二年簡詞臣入懋勤殿寫金字經爲 慈甯皇太后祝嘏公
與焉三十三年以未與大考加一級三十四年正月授詹事府右
中允七月丁父憂三十六年服闋入直南書房先食俸候補十一
月補右中允三十七年正月轉左尋擢翰林院侍讀充日講官起
居注三十八年十一月晉右春坊右庶子再擢翰林院侍讀學士
三十九年四月充經筵講官學士得直講筵蓋前此未有也十二
月遷內閣學士兼禮部侍郎四十年九月署工部右侍郎尋正授
再調戶部左侍郎歷署吏刑二部侍郎兼管理錢法樂部諸務充
四庫全書館副總裁 高廟眷注公甚深四十四年十二月遂用

爲軍機大臣 四十五年 賜第西直門內新街口 賞紫禁城騎
馬五十二年擢戶部尙書 派稽察欽奉 上諭事件處加太子
少保銜充國史館副總裁嘉慶元年乃授爲東閣大學士總理禮
部仍兼戶部事務明年二月丁母那太夫人憂 特旨賜經被飾
終 遣御前侍衛額駙豐紳殷德帶侍衛十員奠茶酒公既奉喪
歸 高廟每見諸大臣數 詢問董誥何時可來時川楚方用兵
故望公來尤亟大臣等以書告公趣公行公私念墨經從戎此古
人之義 君上方有急而偷息田里非義也既窺窻窳事畢遂詣
闕爲當路者所遏不得 聞公於 駕入宮之途次泥首謝 恩
高廟見之喜甚未幾降 諭刑部尙書缺一時未得其人董誥

見在守制已逾小祥著暫行署理又命公素服視事諸大典禮不
必與四年正月遭 高廟大事 今天子始親政派公總理喪儀
仍在軍機處行走充 寶錄館正總裁晉太子太保時當路者既
敗猶 命承鞠王大臣以沮公事嚴詰之是年服除充國史館正
總裁授文華殿大學士仍總理刑部九月奉 命恭點 裕陵神
主又晉太子太傅五年復充經筵講官 大清會典館正總裁七
年以平定三省邪匪賞騎都尉世職十一年管理戶部三庫事務
十二年 高宗實錄告成 賜公父邦達入祀賢良祠十四年晉
太子太師三月公七十生辰 御書贊樞錫慶額 賜之 賚予
甚渥復 寵之以詩十五年充上書房總師傅十七年再晉太保

公日侍 禁闕至於 巡狩秋獮諸大典亦無役不從積勞久二十年 上以刑部事繁改總理兵部十月公已病常苦痰喘氣痛不能食蒙 恩數遣醫視至春和漸就瘥然筋力大不如昔次冬舊疾復作因屢疏乞休 上念 先朝舊臣再四慰留不肯聽之去會入春稍瘥事遂已迨是年九月疾又作加以目昏聞不能辨字蹟復乞休茲歲二月始奉 諭大學士董誥自乾隆年開仰蒙 皇考高宗純皇帝簡用供職內廷嗣於嘉慶元年擢授大學士襄贊樞廷綜理部務宣力多年近歲以來屢以老病乞休朕降旨給假慰留令其安心調養茲復以氣體衰憊兩目昏花奏請開缺情詞懇切朕實不忍遽允所請但察其痼疾未痊若令勉強趨公

轉非所以示體恤董誥著加恩以太保大學士致仕在家支食全俸俾資頤養用示朕眷懷耆碩恩禮優加至意公既解職有應繳官帑悉予蠲除七月上展禮三陵啟蹕日公力疾赴朝陽門外送上至盛京時賜存問賚予不絕於道及回蹕駐桃花寺聞公疾篤命內閣學士宗室載銓馳驛率太醫往視疾愈亟又命派軍機章京一人先回京齋賜經被十月初十日公薨年七十有九遺摺至上爲之震悼卽命定親王蘇恩率侍衛等前往奠酒贈太傅入祀賢良祠給銀二千兩治喪官其子工部郎中溥以四品京秩越六日復親臨邸第奠醊慟哭爲製詩以寫哀有世篤忠貞清節堅及祇有文章傳子姪絕無

貨幣置莊田之句蓋公父子歷事三朝竝躋膺仕乃邸舍清貧
本籍亦絕無寸椽尺土故御製及之又數日命侍郎姚文田
傳諭其家刻詩墓次以示後人內閣上諡法敬慎事上曰恭
賜諡文恭公在樞禁幾四十年凡有所獻納皆面陳未嘗用奏牘
歸亦不以語賓客子弟故世莫得聞然伏念高廟聖神文武爲
生民所未有皇上以聖繼聖於庶政罔不振飭如使公旅
進旅退僅委蛇承順其閒必不能受兩朝恩遇之隆至今不替
公前後歷十餘考皆以恪勤匪懈得優敘大兵平臺灣廓爾喀旋
公蒙高廟恩再圖形紫光閣竝親爲製贊及晉陟綸扉論資
公在第四有旨以公克盡職特先擢用其後川楚邪孽蕩平

上敘帷幄參贊功以公知無不言言無不盡 殊諭褒嘉焉知公之所以宣力於 國者多矣林清事起公以爲燒香祈福愚民無知事所常有惟從逆者不可貸凡論上皆以是定讞所全活甚衆充會試正總裁者二充鄉試正考官者三充文殿試讀卷官者十外如 朝考 召試諸闈卷事公鮮不與焉齋肅詳慎惟恐遴選不得其人天性孝友居文恪公憂哀毀骨立兩太夫人卒時公年已六旬扶櫬歸日行數十里未嘗以輿馬代步在籍時巨紳某亦持服家居來謁公車馬僕從甚盛道遇二人昇肩輿一老僕從詢之卽公也甚慚以漸斥儀從去及公門無幾存者一弟誠友愛甚至誠官閩省縣佐卒於任公迎其柩歸葬富陽撫所生子女如已

出好施與尤敦任恤同郡陳戶部本病且革遺孤纔數齡親族無
可依者以託公公令長子淇子之延師課讀既長爲之聘娶有鄭
比部者公會與同朝其子某踵門求助言公嘗受業於比部公曰
我固無此然鄭公亦鄉前輩也厚助之去若此類不可悉記生平
所學以敬爲主故遇人無貴賤處事無大小未嘗不持之以敬視
天下無不可與居之人然人亦未有敢侮之者口不言臧否而於
人之賢否邪正胸中較然若黑白分遇事謙若不及人及指陳得
失必洞見利弊能聞記尤熟於朝章故事人所不知者以諮於公
無不悉娶馮氏再娶秦氏皆 贈一品夫人秦夫人爲禮部郎雄
衰女雄衰先緣事遣戍及秦夫人卒 高廟以公故釋歸里雄衰

至京詣公謝公曰此 恩出自上且 諭令同籍至京何爲者終
不見其慎如此子四長淇以公任爲戶部郎中先公卒次承澤次
承保皆早殤次卽瀆以淇卒後 恩授工部郎中今候補四品京
職女一適兵部侍郎溫公汝适子承悌嘉慶丙子科舉人孫男二
駉驥先是文恪公以書畫受 主知公繼之亦以文學備位侍從
洎 高廟春秋旣高不能作蠅頭字皆 命公代書所進奉畫本收
貯內府甚夥竝收入石渠寶笈三編乃皆公餘事不具載謹狀

右行狀姚文田撰

費淳

費淳浙江錢塘人乾隆二十八年進士分發刑部學習三十二年補主事三十四年升員外郎旋升郎中在軍機章京上行走八月充順天鄉試同考官三十六年京察一等記名外用七月補江蘇常州府知府三十八年丁父憂四十一年服闋補山西太原府知府旋經巡撫巴延三以費淳初到晉省人地生疎奏請調蒲州府四十二年復調太原府四十四年擢冀甯道四十六年四月升山西按察使四十七年升雲南布政使四十九年以母老奏請開缺歸養五十二年丁母憂五十四年服闋仍補雲南布政使六十年四月升安徽巡撫五月調江蘇巡撫嘉慶二年奏准徐所屬及揚

四十二年復調太原府四十四年擢冀甯道四十六年四月升山西按察使四十七年升雲南布政使四十九年以母老奏請開缺歸養五十二年丁母憂五十四年服闋仍補雲南布政使六十年四月升安徽巡撫五月調江蘇巡撫嘉慶二年奏准徐所屬及揚

州府屬之高郵等州縣窪地見屆隄工合龍之後水勢已定應委員逐一履勘除水勢稍平尙堪種菱者毋庸置議外如實係極窪爲水所占卽責成該管州縣勸諭農民改種蘆葦以收地利其納錢糧卽照葦課改則徵輸得旨下部議行七月調福建巡撫尋偕總督魁倫奏海濱巖疆民俗素稱慄悍所設地方文武巡緝防守必須控制得宜聲勢連絡方足以資整飭至水師營務亦宜隨時籌辦請以建甯府同知改駐福州府屬福清縣之平潭裁撤平潭縣丞移駐南日澳漳州府南勝同知移駐漳浦縣之雲霄盤陀巡檢一員改爲同知衙門照磨兼司獄事務海澄縣丞改爲平和縣丞分駐南勝雲霄縣丞移駐車田之象牙莊延平協右營都司

移駐泉州府屬南安之洪瀨鄉酌撥邵武左營千總一員陸路提標後營外委一員汀州鎮標右營外委一員並於陸路提標各營內抽撥兵丁五百名統歸都司管轄再閩省水師提標各營戰船舵工水手僅在各營所管汛地洋面往來巡哨若至隔轄洋汛卽不能熟悉海道沙線近時巡捕出洋均係另雇商船緣該船舵工水手熟悉洋面管駕得法今各營戰船旣照商船造辦所配舵工自應另募商船熟悉各洋之人以利巡緝而商船所用舵工雇價較厚應請每船舵工除前定本身名糧炊糧外再加給守兵糧餉二分如果追捕有功並卽量與超拔用昭鼓勵均奉 旨下部議行九月仍調江蘇巡撫三年因奏請暫畱丁憂之知府李逢春幫

辦淮徐等屬放賑減則諸務 上以所奏非是交部議處降二級
畱任四年二月授兩江總督以兩淮鹽政徵瑞係兒女媼親奏明
請 旨奉 諭總督雖有監察鹽務之責但費漙居官公正朕所深
信徵瑞著不必回避六月 上聞江蘇有訐告常州府胡觀瀾一
事 諭令查奏尋奏胡觀瀾與江陰縣知縣楊世綬勒派縣民出
資修寺擾累閭閻請 旨革職永不敘用 諭曰費漙於胡觀瀾
派累之事豈無聞見乃直待朕指出情節詢問始行補參本有應
得之咎姑念其平日操守廉潔聲名尙好此事一經傳詢卽行徹
底查明參奏並不徇隱尙屬可寬費漙著免其交部議處七月參
奏江甯鹽巡道彭翼蒙奢侈糜費 上命革翼蒙職尋以審訊革

令甄廷輔擅責生員一案不將案內緊要情節及同知李焜肆意濫刑巡撫宜興學政平恕辦理失當之處據實參奏 上以其瞻徇同官情面嚴飭之並交部議處議降二級調用得 旨從寬改爲降三級畱任十一月奏徐州府屬食城河一道坐落銅山豐沛三縣境內上承豐境各路之水歸入微山等湖係宣洩要津河道淤塞應請借項挑疏以利農田得 旨允行五年正月偕漕臣鐵保奏就漕糧項下量爲調劑以濟疲丁查原徵隨漕項下應給州縣耗米錢文尙有款項可以撥出在有漕州縣分支無幾亦無大損而聚少成多頗於運丁有裨又有旗丁應領本色行月米石一項擬令州縣照定價改給折色並旗丁應領運費責令糧道親身

放給免層層剝削丁力庶臻寬裕得 旨允行七月偕河臣吳璫
奏請將蕭南通判一缺改設同知邳北同知一缺改爲通判得
旨允行九月因秋汛安瀾 上嘉其保護安穩 賞戴花翎並交
部從優議敘十一月因邵工合龍河歸故道 恩賞太子少保銜
並舒倫馬褂大小荷包六年三月因跌傷左足醫治未愈奏懇回
籍調理 上允之仍 諭毋庸開缺旋覆奏左足見已消腫步履
漸可照常若因奉 恩旨卽解任回籍轉似涉於欺蒙見已咨明
起復不交卸以免展轉遞署之繁 上以瀆並不拘泥遵旨解任
回籍能以地方公事爲重深得大臣之體仍賞給內府丹丸俾資
調治五月奏請將徐州府屬簡缺之碭山縣改爲繁缺在外揀選

調補下部議行九月奏川楚教匪指日蕩平邊界甯謐所有壽春鎮標駐防固始縣二道河及六安州防禦英山縣金家寨之官兵請撤回歸伍以重差操 上是之七年五月因上年徵收漕糧辦理不善及旗丁藉端需索 上以費瀆係統轄大員漫無覺察交部議處降一級畱任十月偕吳璈奏報秋汛安瀾得 旨交部議敘因颺汛唐家灣民堰漫塌奉 諭申飭並將前次議敘撤銷尋奏引河堵閉報 聞十二月偕吳璈奏請將淮徐道所管之桃南北二廳淮安府所屬之桃源縣海州暨所屬之沭陽贛榆二縣改歸淮揚道管轄淮揚道所管之江防揚糧廳改歸常鎮道管轄宿虹南岸應添設通判一員其宿虹同知改爲宿北同知另設宿南

通判一員豐場南北兩岸添設縣丞千總各一員蕭南廳之天然
開應改銅沛廳就近管理均得 旨下部議行是月因宿州匪徒
王潮名等糾眾戕官費瀆飛咨鎮將等帶兵勦捕並親赴督辦旋
卽撲滅八年二月吏部將文職三品以上大員從前所得降革處
分摘取案由開單具奏奉 旨總督費瀆降級畱任六案著加恩
開復六月請於宿州之南平集地方設立撫民同知將事務較簡
之甯國府總捕同知裁汰移設南平集鳳陽府司獄改爲撫民同
知照磨兼管獄務歸於府經歷兼管並應酌立營汛移撥弁兵以
資巡緝擬於徽州城守營內酌撥千總一員馬步守兵一百四十
名歸壽春左營都司管轄以四十名添駐宿州以一百名隨撥調

千總駐劄新設南平集地方得旨允行是月授兵部尙書旋因會題大功全竣之本鈔錄諭旨於應行敬謹擡寫之處書寫錯誤降一級畱任時河南衡家樓地方黃水漫溢山東張秋迤南黃水橫穿大溜直達鹽河入海有妨漕運上命費淳赴山東查勘河道并督辦要工尋奏張秋西岸舊有裏頭應幫鑲寬大東岸舊有長隄應加高培厚以防溜勢北掣南口則趁汶水北注之勢引歸河身北口則自大溜迤北分導餘流以資挽運其淤沙淺阻之處應做河南刷沙之法製混江龍鐵籠船及一切挑淤等具至張秋之北岸隄經水汕於緯道有礙者水退後分段培築報聞九年二月偕巡撫鐵保奏南糧首幫於正月二十四日俱已挽過張

秋駛行極爲安速 上嘉之 賞給瑱瑯扣帶黃瓣大小荷包仍
交部議敘六月調吏部尙書九月 賜紫禁城騎馬十年四月充
殿試讀卷官六月授協辦大學士十一年五月充國史館總裁官
八月 命偕尙書長麟審辦直隸藩司書吏王麗南等私雕假印
侵冒錢糧案研鞫得實懲治如律十月 命稽查欽奉上諭事件
處十二月充經筵講官十二年正月授體仁閣大學士管理工部
事務二月京察屆期 諭曰大學士費淳平日辦理部務均屬勤
慎著交部議敘八月兼國子監事務十三年管理戶部三庫事務
十四年二月因失察三庫兵丁偷竊銀兩奉 旨嚴加議處尋議
以降三級調用 上以費淳究係兼管加恩改爲革職畱任三月

充己巳恩科會試正考官五月 上以本年五旬萬壽臣工等祝
嘏臚歡內外一二品文武大臣降革畱任之案交軍機大臣查奏
得旨費瀆著開復山西臬司任內秋審失出降四級畱任及在兩
江總督任內失察屬員勒派同官革職畱任二案十二月因失察
工部書吏王書常等私雕假印捏款冒領戶部三庫銀兩物件事
覺奉 旨交部嚴加議處尋 諭曰費瀆前因管理三庫時係兼
管工部有失察冒領之案業經交部嚴議茲又於本年書吏冒領
三庫銀兩失察至五次之多咎無可辭著先拔去花翎不必兼管
工部事務再行交部嚴加議處部議革任奉 旨革去宮銜降爲
侍郎卽 命署兵部右侍郎仍兼國子監事務改充國史館副總

國朝通志卷之三十三
三
裁官十五年正月補兵部右侍郎五月授工部尚書十六年三月
卒 諭曰工部尚書費瀆持躬端謹辦事老成中外宣猷勤勞匪
懈前經擢任大學士贊理綸扉嗣因失察書吏王書常等舞弊之
案降爲侍郎費瀆感激朕恩倍殷報效復經升任尚書方資倚畀
茲聞染病遽爾溘逝深爲軫惜著加恩賞還大學士照尚書例賜
卹所有任內一切降罰處分悉予開復又 諭曰本日披覽原任
大學士費瀆遺摺知伊子費履升見係工部主事費瀆宣力有年
殊堪軫念伊子費履升俟服闋加恩以員外郎補用尋 賜祭葬
予諡文恪子履升舉人二品廕生見任刑部員外郎

右 國史館本傳

國朝書獻類徵初編卷三十四目錄

宰輔三十四

福康安

伯麟

章煦

鄒炳泰

國朝書獻類徵初編卷三十四目錄

國朝耆獻類徵初編卷三十四

通奉大夫前署江西巡撫江西布政使司布政使湘陰李桓輯
宰輔三十四

福康安

福康安滿洲鑲黃旗人姓富察氏曾祖米思翰戶部尚書祖李榮
保察哈爾總管俱追封一等公父傅恆大學士一等忠勇公追
贈郡王爵銜米思翰傅恆均有傳乾隆三十二年福康安由閒
散襲雲騎尉授三等待衛命在乾清門行走三十四年擢二等
侍衛命御前行走三十五年擢頭等待衛三十六年授戶部右
侍郎鑲藍旗蒙古副都統三十七年調鑲黃旗滿洲副都統大兵

征金川以溫福爲定邊將軍阿桂豐昇額爲副將軍 命齋印往
軍中授領隊大臣三十八年正月副將軍阿桂兵攻當噶爾拉山
適福康安齋印至今同領兵六月賊潛通小金川陷木達木果木
大營失事 命阿桂爲定西將軍分道再舉十月由資哩進克布
朗廓宗諸寨復據美諾三十九年二月大兵攻喇穆喇穆福康安
克其西各礪會領隊海蘭察旣取登古高峯遂乘勝克羅博瓦山
上以羅博瓦爲賊要隘攻取時將領等董率得宜 賞之三月
從羅博瓦峯下北剌克得斯東寨夜有賊七八百人乘雪霧潛登
山犯副將常祿保營福康安聞槍聲急以兵援擊賊退 上嘉之
五月賊雨中於山坡立兩礪福康安夜率兵八百冒雨毀垣入殺

數賊立毀礮 上嘉其壯軍威而破賊膽 特旨褒獎尋奪喇穆
喇穆山口木城後石卡二六月克色湖普山獲堅礮數十殲賊數
百阿桂令領隊額森特夜進兵攻色湖普南山礮福康安爲應視
海蘭察兵登山巔並力助戰天明望海蘭察至礮下疾驅眾越重
濠過冒槍石與賊持使不得他顧我兵遂得盡破喇穆喇穆卡
取日則了口七月克嘉德古礮攻遜爾克宗西北寨有賊數十潛
襲我兵後福康安擊退之賊既困於圍內且以距勒烏圍近恐破
其巢也數夜出侵木城礮臺福康安屢敗之阿桂以賊死守險隘
改道由日爾巴當噶路入令福康安攻達爾札克山下各礮克之
十一月攻格魯克古率兵裹糧夜踰溝攀崖上從山罅入取當噶

海寨陡烏當噶大礮壓桑噶斯瑪特取其木城石卡四十年三月
克勒吉爾博寨戰礮二賊從噶爾丹寺來援敗之四月阿桂分兵
一千令福康安從參贊海蘭察赴宜喜軍先取甲索進攻得楞山
下臨河賊礮拔石卡三又焚薩克薩谷大小寨數百渡河取斯年
木咱爾斯聶斯羅市二寨 上以福康安西路得力之人調宜喜
攻勦尤爲出力授爲內大臣五月克榮噶爾博山進至第七峯
賞嘉勇巴圖魯號六月於第七峯下冒槍石成木柵九接第八峯
麓賊恃險拒守攻未克七月從舍圖往卡繞截大兵進至章噶福
康安偕額森特攻巴木圖登直古腦山拔木城礮寨五十焚冷角
寺下壓勒烏圍賊巢八月旣望夜半分兵自西北攻入破其寨據

之遂克勒烏圍九月整兵直攻噶拉依初從達思里正路賊覺改
由達烏圍分隊七福康安領第一隊奪達沙布果礪當噶克底綽
爾丹諸寨又從達思里下起木柵斷科思果木與雅瑪朋所通路
十月攻達噶木率左右兵繞出克堅礪二閏十月從阿穰曲下登
前峯克大礪木城各二十十一月攻奔布魯木護起寨兵攻入礪
洞其垣擲火焚之賊無得脫者又克舍勒圖祖魯旁礪一寨二格
什格章寨一陸爾歪礪寨三阿結占寨二十二月攻科布曲正梁
由左進攻其礪卡遂盡得科布曲寨賊又於布哈爾下積木中潛
伏以拒福康安從海蘭察攻破之悉取諸寨據噶占四十一年正
月克舍齊雍中兩寺自拉古爾河圍噶拉依之右奪大石卡二移

國朝通志卷之三十一
三
破擊其寨首逆就縛金川平封福康安爲三等嘉勇男其原襲雲
騎尉以福隆安次子豐仲果爾敏襲 命獻俘馘 上幸良鄉城
南行郊勞禮 賜御用鞍轡馬一 御紫光閣飲至 賞緞十二
端銀五百兩閣上繪像列前五十功臣 御製贊曰代兄以往繼
父而奮矜許塵勵王臣之蓋登碣奪砦那須蒙甲嘉勇錫名世傳
勳業轉戶部左侍郎四月擢鑲白旗蒙古都統七月 賞戴雙眼
花翎九月調正白旗滿洲都統十月 賜紫禁城騎馬四十二年
授吉林將軍四十三年調盛京將軍四十五年授雲貴總督尋奏
銅版立法宜詳用人尤要應實稽查各廠專理兼理官任事後所
得銅數以憑甄別初試者必察其貪廉勤惰用定勸懲以冀廠內

多一得力之人卽於將來銅政有裨至私錢燬於既行之後尤須
禁於未鑄之先私鑄黑白利在多鉛少銅滇省前禁私銅未禁私
鉛是以奸民於附近鉛廠賣鬻私鉛易滋私鑄若鉛銅於官給印
券通商額鉛外有券外夾帶及無券之鉛嚴禁無漏則奸民無利
可圖勢將日止又奏滇銅多爲開采以裕其源無庸加價皆從
之四十六年七月南掌國貢象四復陳交趾等國劫掠無禦敵器
以餘象一求予礮福康安檄諭以國家法制有定不容妄求還其
象不予之礮奏入 上是之八月調四川總督兼署成都將軍
命嚴緝咽喉匪四十七年五月奏蜀中匪徒已戢陳善後事保甲則
量戶口地址立法清釐匪犯則並父兄牌甲各予治罪窩家嚴緝

查拏賭博倍加禁戢僧道傭販乞丐流民分別稽查遞籍銅鉛礦廠水手燒夫各有責成約束嚴禁持造兇刀停止海查兵役講聖諭廣訓並欽奉 上諭律例冀使返樸還淳潛消暴戾啗匪字本無意義畱此名色轉難示儆請改爲川省匪徒惡名旣已消除匪迹自無蹈襲 從之八月擢 御前大臣加太子太保四十八年四月 命來京署工部尙書五月授總管鑾儀衛大臣閱兵大臣總管健銳營事務十二月 命馳驛往廣東查鹽商公捐費買物修貢事四十九年三月奏商人所備貢物俟一二年商人充裕督臣代進洋商修物監督代進 諭曰商人等領帑經運交課不過微末之人原不得非分進貢福康安所奏督臣代進竟應議駁

洋商與鹽行無異斷不可行閏三月擢兵部尙書總管內務府大臣四月甘肅逆回田五等私起新教聚眾滋事上命福康安帶欽差大臣關防馳驛往剿五月授參贊大臣同將軍阿桂會剿是月授陝甘總督六月統兵赴隆德進剿底店賊馬文燾率眾降由雙峴小路至賊卡立卡進逼七月率兵築卡及壕斷賊水道圍益急賊思撲卡竄阿桂命參贊海蘭察設伏於隘福康安往來督戰殲賊數千遂破石峯堡生擒賊首張文慶等晉封嘉勇侯五十年正月奏回民習武者多而習文應試者少當使沐浴詩書通知禮義馴其桀驁之氣即可化其頑梗之風則教導回民洵爲善後要務請於循化廳設學校以資訓迪上嘉之七月轉戶部尙書

五十二年轉吏部尙書協辦大學士奏修甯夏各渠以興水利
從之五十二年臺灣逆匪林爽文圍嘉義縣七月 命福康安爲
將軍偕參贊大臣海蘭察往剿十一月渡鹿仔港登岸後由新埤
進兵援嘉義遇賊搜剿至崙仔頂賊於竹園中突出抵禦福康安
令兵屹立勿動率巴圖魯侍衛衝入賊中敗之攻克俾長等十餘
莊會天暮雨大至戰益力復克北社尾等處疾馳至縣慰撫畢盡
運所得賊糧入城以助民食圍旣解追賊至大排竹決溪水渡兵
悉焚賊寮餘匪皆殲焉 諭曰福康安調度有方振作士氣克敵
致果迅奏捷音著封一等嘉勇公賞紅寶石帽頂四團龍補服以
示優異初嘉義被圍時提督柴大紀奏城中食盡竭力死守蔡攀

龍奏督兵赴援殺賊通道至是福康安劾攀龍損兵多而圍不解
大紀賴眾民一心奮勉以保孤城又軍餉未絕所言詭詐不可信
上以二人守戰有功恐因提督大員屢經恩旨褒嘉或稍涉自
滿在福康安前禮節不謹致爲所憎遂爾直揭其短會浙江欽差
成德以柴大紀散法牟利狀上聞上曰柴大紀貪縱不職釀
激事變福康安前次奏到之摺竟未言及祇含糊其辭實大不是
豈欲待朕自爲揣度卽著傳旨嚴行申飭十二月勦城西大崙莊
又焚城東興化店及員林賊莊督兵勦北路時賊據大浦林中林
大浦尾三莊分兵三路並進賊同時潰又破菴古坑賊目蔡福柵
收復斗六門抵水沙連賊已遁進攻大里杙賊巢獲賊目數十賊

黨二百賊首逃入番社未獲擒其家屬初福州將軍恆瑞擁兵鹽水港不救嘉義妄請益兵 上命福康安劾之福康安袒恆瑞奏不以實五十三年正月 諭曰恆瑞自臺灣帶兵赴援觀望遷延種種玩誤又妄行奏請添兵張大賊勢若治以搖惑軍心之罪卽應按照軍法立斬朕因念恆瑞年輕無識且係宗室姑援議親之條不卽置以重典乃福康安節次奏到之摺曲爲庇護且屢經令福康安向恆瑞嚴詰妄請添兵搖惑軍心是其首罪乃福康安並不問此一條轉爲之多方開脫且稱其打仗奮勉仍請畱於軍營其意不過遇有帶兵打仗卽將恆瑞鋪敘功績冀朕加恩錄用豈能逃朕洞鑒福康安由垂髫豢養經朕多年訓誨至於成人今甫

經委任畀以軍營重寄卽見在剿捕賊匪攻克賊巢皆朕指授方略再三訓示將士等踴躍用命始能所向克捷今甫經解圍得勝朕卽優加獎賞福康安自當倍加奮勉迅速擒拏賊首剋日蕙功以期承受恩眷乃竟敢藉此微勞袒護親戚此等伎倆豈能於朕前嘗試耶本應從重治罪因念其見在帶兵剿賊業經攻克巢穴拏獲逆匪家屬姑從寬免其深究著傳旨嚴行申飭尋統兵由內山搜至打鐵寮及鰲骨合歡諸社至極北之炭窯分兵截海口及各要隘使不得遁仍恐賊首見追急自戕密令巴圖魯侍衛十人及屯練兵數百易裝入緝生擒林爽文於老衢崎俘獻京師上念福康安功親解佩囊賜之二月督兵至南路由灣裏社剿南

潭大穆殺散村寮水底寮等賊黨令福州將軍常青增兵嚴守諸海口追賊至極南之瑯嶠諭柴城隴巒居民僞畱逃賊以防驚竄分軍水陸並發至柴城陸路軍隊伍進至海岸執兇渠莊大田以獻悉除餘黨臺灣平 諭曰福康安此次前往督辦剿捕事宜遵照節次指示調度有方用心周密真能不負任使朕爲嘉許著賞黃腰帶紫韁金黃珊瑚朝珠用示優異又 命於臺灣郡城及嘉義縣建生祠塑像又繪二十功臣於紫光閣 御製贊曰金川領兵已著偉名幾處封疆吏肅政成解圍擒逆能人不能崇封殊尙嘉爾忠誠六月奏熟番募補屯丁應按番社酌挑令就近防守設屯弁以轄之給近山埔地資其養贍免其徭役清釐所墾田以

定界址點驗所製器械以備稽覈又奏善後十六事其要在於習
戎事除奸民清吏治肅郵政 上皆從之十一月調閩浙總督五
十四年正月調兩廣總督二月奏安南阮匪復糾眾滋擾若俟奉
諭旨始起程則行已緩心實不安已赴漳泉閱兵俟再得粵中
信卽兼程前赴粵西 諭曰孫士毅前於黎城退出之後朕以閩
粵境壤毗連福康安得信必卽奏請前往早向軍機大臣言及今
福康安果有此奏不出朕之所料福康安秉性公忠能視國事如
家事其才猷識見又能明敏周到如此方不愧爲休戚相關實心
任事之大臣四月奏安南阮光平恭順輸款不必用兵 上允所
請六月奏藏兵後應以煇燾營轄鎮南關汛增兵巡察沿邊各隘

口排柵開壕禁防出入以杜偷越有內地人與夷人聯姻質田者治其罪議行七月巡漕御史和琳參奏湖北按察使李天培私交湖廣糧船分運材木訊得福康安寄書索購情事 嚴旨令自劾尋 諭曰此案固由李天培假託聲勢牟利行私而其實總緣福康安託辦所致卽當治以應得之罪若見無安南輸誠求覲一事雖福康安平定臺灣功績懋著覈其情節尙不至革去公爵其所賞紅寶石帽頂四團龍服黃帶紫韁俱應革除斷不能施恩予畱第念見在阮光顯前赴熱河瞻覲阮光平又懇於明年親自來京祝嘏儻將福康安所有章服遽行更換非特觀瞻不肅且類於愛憎無恆所關甚鉅福康安自請撤回公爵章服等項及斥革治罪

之處著加恩免其撤回斥革福康安受恩深重乃不能加意謹慎致蹈愆尤亦不可無以示儆著罰總督養廉三年仍加罰公俸十年並帶革職畱任用昭愆創十月獲洋盜林亞五等二十人審明抵法五十五年奉安南國王阮光平來朝京師其返也 命仍隨福康安行八月參將錢邦彥巡洋至崖州遇盜被害 命與阮光平湖北別後回粵嚴緝洋匪五十六年二月 諭曰福康安在兩廣總督任內緝拏洋匪整飭地方諸事認真妥協殊屬可嘉前罰養廉除已交納外著加恩寬免三月獲崖州案內盜犯周元保等續獲瑩家二等又獲疊劫盜犯霍發鬆鄧全陳阿暴等先後抵法六月安南夷人請通市奏請定商人由內地出口先從原籍確查

續飭關隘察驗夫船預編清冊行館各有責成回關勒定限期進口確驗牌照在夷地則杜其逗遛於場廠則防其勾結違禁貨物加意盤查私越奸徒申明稽察責鎮道以綜理俾丞牧以專司議行十一月廓爾喀賊匪擾後藏 命福康安爲將軍偕參贊海蘭察率巴圖魯侍衛往征之 諭免所罰公俸五十七年三月抵後藏四月自第哩浪古前往絨轄聶拉木察地勢以濟隴爲進兵正路疾行向宗喀五月至轄布基時諸路兵未集先以所率眾進剿值雨夜分隊六運趨擦木黎明潛登山奪賊前礮賊守後礮不出官兵毀垣入短兵接戰殲賊目三賊眾二百生擒十餘乘勝抵瑪噶爾轄爾甲山梁山下有紅旗賊目率眾擁上因令官兵設伏雷

一路誘賊進至山半橫截賊隊奪其旗殲賊幾盡進攻濟隴濟隴
爲賊要塞大礮據險立各礮卡互相援應成犄角勢乃分兵攻撲
剪其旁寨旣淨遂並力攻中堅縛大木爲梯令屯兵蟻附登毀石
壘破擊之自丑至亥克其寨斬級六百生擒二百奏入 賜御製
誌喜詩書扇及 御用佩囊六月由濟隴進至索勒拉山下有大
石卡二大軍直前毀卡賊遁追至熱索橋賊急撤橋用火器隔河
擊之不及賊因令暫退密遣兵東越峩緣山從上流潛渡轉次賊
前卡殲賊數十正路兵渡河奪其後石卡賊蒼黃竄多墜河中者
進至密哩山頂徑益險仄日越大山數重令兵修路前進深入七
十里不見賊旺噶爾西南橫亘一河旺堆在河北協布魯克瑪在

河南迤東爲克堆寨賊各築卡死守大兵至旺堆賊扼河拒不得渡畱兵牽綴之潛從上游縛木渡直薄克堆寨分三路進攻出賊不意賊大潰旺堆兵亦濟追戮甚眾由噶多進至作木古拉巴載山梁望對峙之大覺山賊營林立中隔一河山險峻不可下令駐一軍於山以一軍從噶多魯山下渡取其近河礮卡賊自陡礮上木城繞出力拒奮擊擒其魁餘皆竄大兵冒鋒刃鼓勇登破其木城時山梁一軍亦下爲橋以渡夾攻大敗之克大小賊寨十一賊營三石卡四木城五石卡二十戮賊目七賊黨四百結營雍雅山賊首乞降不許七月進攻噶勒拉山三路並捷追賊上堆補木山奪其卡由堆補水下山爲帕朗古橫河賊扼橋拒官兵奪橋過直

攻甲爾古拉集木集兩要塞賊八千人來援且欲奪橋督兵力戰
敗之凡接戰兩晝夜越大山二克木城四大小石卡十一戮賊目
十三賊六百生擒十七賊酋畏懼乞降有旨許納款班師方福
康安之未受降也 諭曰此次督兵屢戰克捷且經越艱險冒雨
步戰手足胼胝用兵之難爲從來所未有實屬奮勇出力著加恩
實授爲大學士會十五功臣圖像成 御製贊曰百戰久經兩功
近成近之險絕前聞未曾七戰七勝度索乘桴舊勳新讓嘉許首
圖時大學士阿桂以未臨行陣奏以福康安爲首功也九月 賞
一等輕車都尉令其子德麟襲十一月 諭曰福康安進剿廓爾
喀如能直抵陽布將拉特納巴都爾巴都爾薩野悉數生擒解京

獻俘其土宇分給附近各部落其功甚大前代功臣原有生非宗室晉封王爵之例朕本擬俟紅旗遞到加封王爵以昭異數今因廓爾喀畏罪投誠福康安遂傳旨受降班師歲事是以止將福康安賞給世職不克副朕初願然由今思之受降歲功未始非上天嘉佑我君臣之意蓋福康安係孝賢皇后之姪大學士傅恆之子如果得成鉅功或可晉封王爵祇以勲勞甚大用示酬庸而天下無識之徒或謬議朕厚於后族破格施恩傳之後世亦且以爲口實幾與漢唐之寵任外戚者無異朕將何以自解而福康安父子兄弟多登顯秩福康安又荷王封富察氏一門太盛於伊家亦屬無益但福康安旣成大功朕又不得不加以殊恩轉覺兩難茲

如此竣事諸臻完善朕既免加恩后族之嫌福康安亦無盛滿難居之慮較之蕩平廓爾喀地方倍爲欣慰也惟是福康安此次跋涉險阻備嘗艱苦且調度有方使廓爾喀震懾威稜誠心向化可期永靖邊陲僅予世職尙不足以酬勞勩已授爲領侍衛內大臣將來在總管任內僅有干總等官跟隨不足以示寵異著照王公名下親軍校之例賞給六品頂戴藍翎三缺令福康安於伊得力家人內酌量給戴用昭格外加恩優眷勞臣至意十二月奏衛藏增汛練兵鑄錢通貨覈商上收支免番眾納賦又奏駐藏大臣每歲親視邊境理事應與達賴喇嘛班禪額爾德尼等禁其族屬不得與公事有大小番目缺出會同揀放前後藏應各置文員以理

錢粟定聽差兵額以實操防五十八年正月奏藏內善後十八事
一曰達賴喇嘛班禪額爾德尼與外番通信應告駐藏大臣二曰
各邊境設鄂博三曰選邊界營官視內地邊俸例推升四曰禁製
充番目五曰諸大寺坐牀堪布公同補放六曰商上銀錢出入照
新定數目畫一收放七曰濟隴聶拉木邊界收稅毋庸酌減八曰
禁私給免差照票九曰僧俗戶口造冊清查十曰蒙古延喇嘛誦
經由駐藏大臣給照往十一曰禁私用烏拉十二曰禁罰贖不公
及私抄沒家產之弊十三曰官兵所需火藥就地配造十四曰達
賴喇嘛賞噶布倫戴琿田廬不得私占十五曰禁商上喇嘛預支
錢糧十六曰各寨租賦按年收交商上逃亡絕戶免十七曰駐藏

大臣署設譯廓爾喀番字吏十八曰廓爾喀貢使往來派文武官
衛送又奏外番商人來藏者酌定次數由駐藏大臣給照往來由
江孜定日兩汛官弁察之尋常交易隨時稽驗毋得私越均得
旨議行三月安南國王阮光平卒 上慮該國人心反側 命福
康安速赴粵西四月福康安母卒於家 諭曰福康安三月甫抵
邊壩至成都尙需五十日到京已在六月下旬百日將滿已屬無
及福康安爲國家出力之人屢著勞績見因奉差在外以致伊母
大事不獲躬親料理喪用爲之惻然福康安若到京朕心轉不
忍與之相見應在途成服辦理廣西事竣卽赴廣東在任守制過
一二年朕酌量降旨再行赴闕 上又以福康安途中患病令御

醫涂景雲往視五月奏接廣西巡撫陳用敷扎知安南人心悅附
四境平甯臣到粵不過遣員前往致祭別無要務臣母撫臣成立
以仰邀 恩佑今甫遭此事竟不到京卽赴總督之任不但心實
不安且恐齷亂治事未協轉負委任且臣母每勸臣勉圖報稱不
得以定省遠違分心內顧茲既不獲侍湯藥親身含斂惟思於未
卜窀穸之前居廬數日臣悲慕之心已伸鬱結之懷亦釋犬馬之
疾轉得速痊此臣迫切私情不敢於 聖主之前稍有諱飾尋
詔許來京六月加封嘉勇忠銳公八月調四川總督是歲金川土
司年班入 覲 命福康安領之五十九年正月吉林將軍恆秀
治邊務虧缺庫項勒派民戶 命福康安往訊擬罪從輕 諭曰

福康安與恆秀誼屬姑表弟兄有心徇庇從寬定擬希圖含混了
事福康安受朕厚恩特加簡派自應秉公持正方爲無負任使乃
膽顧親誼曲庇局員本應治以應得之罪因念其辦理廓爾喀一
事不辭艱險著有勞績是以姑從寬宥但伊審辦此案種種瞻徇
豈能於朕前調停混過著嚴行申飭既至四川親至重慶獲私鑄
奸民曾石保等七月調雲貴總督九月 諭曰朕披閱廓爾喀紀
略福康安於人跡不到之處攀援登陟殊爲眷念已調任雲貴總
督此時至重慶前赴雲南時屆冬令天氣漸寒特將御服黑狐大
氅褂賞給俾資途中禦寒以示優眷六十年二月貴州逆苗石柳
鄧聚眾圍正大營嗅腦營松桃廳三城湖南逆苗石三保等圍永

綏附首逆吳半生爲亂 命福康安督兵赴剿敗賊於銅仁之盤塘坳正大營城圍解正大之東爲新寨通楚境苗寨聚焉卽率兵進剿焚大寨二十六獲糧萬石以助民食閏二月繞出高壠坡破賊柵數百自高壠坡至嗅腦皆賊寨其巖門寨地所坪尤險縱火焚之進克官舟營木城分兵取倬山等寨百餘復合趨嗅腦解其圍乘夜進兵悉焚野牛山白巖壘賊巢以清後路向松桃廳賊先於圍城時環立寮寨大兵至盡燬之城巾兵亦出應賊遁 上以福康安連解三圍迅速可嘉 賞戴三眼花翎是時福康安率黔兵旣剿淨後路老虎巖諸賊寨偵知石柳鄧據大塘汎大寨營適和琳所領四川兵亦至期於滿華寨合兵力剿焚賊寨四十石柳

鄧渡河逸入楚匪石三保黃瓜寨中三月大兵臨河賊於對岸築卡拒守乃分兵潛從上流水田壩縛木筏候渡岸上縱民牧牛令降番屯練設伏以待賊數百乘船渡河掠牛伏兵起奪船渡木筏亦順流下遂盡濟河破木城賊棄卡竄遂取石花寨進剿土室從得拉大山下壓殲賊甚眾先一日令總兵花連布間道援永綏至是復會剿凡三日永綏圍解進抵竹子山賊多聚蘭草坪西北崖板寨中僞於東南山凹樹旗示我兵出入路因其計攻之設伏對山石間藏礮焉仍督兵自凹入賊悉眾來拒伏兵望見俟其過飛礮擊之賊驚潰坪土賊棄木城退保瑯木陀山卡四月克之駐營山梁山之西爲登高坡與黃瓜山對峙坡右老虎灣亦通黃瓜山

賊寨乃分五路冒風雨進剿槍矢無虛發賊竄山後遂據黃瓜山
大梁俯臨其山夜復於風雨中下壓擲火藥焚竇燬大寨五十六
擒賊百餘皆殲訊所擒賊知首逆吳半生糾黑苗據菹麻寨石柳
鄧石三保據鴉西鴨保等寨附之遂由小紅巖徑攻菹麻奪大小
喇耳山衝入賊隊至寨外縱火燒木城賊多被焚有潛匿巖洞者
薰之悉斃燬苗寨四十吳半生遁往西梁復糾猿猿寨狗腦坡花
苗二十餘寨來拒石三保率鴨保之匪來援乃分眾攻雷公山阻
其援兵大軍左右擊西梁上中下三寨破之雷公山兵亦捷賊奔
投花苗寨中五月大兵五路分剿克大小苗寨六十木城四石卡
三十五進至大烏草河水深闊不可渡移師克沿河之沙兜諸寨

又克盤基坳山是月調浙閩總督六月克竹山坳大梁賊潛出擾我兵敗之於板登寨再敗之於雷公灘遂奪右哨營七月令兵夜列炬岸上示欲渡河賊拒守甚力密從數里外諸苗坪作木橋以濟繞賊後焚其寨賊驚竄潛聚纓木林伺隙來奪橋設伏敗之遂督兵於眾山中越險進或分或合步步爲營晝夜不少息克馬蝗衝等大小寨五十直至狗腦坡山益險兵皆附藤葛行冒矢石直據山巔從高下壓破其寨賊首匿古丈坪五路並進殲賊一千風雨暴至賊宵遁八月克蝦蟇峒烏龍巖因雨駐兵楊柳坪旣霽攻茶宅奪賊卡六抵夯乞降者七十餘寨 諭曰福康安運籌布置悉合機宜冒險進攻勤勞懋著應卽加恩優獎著仍帶榮賞四字

佳號晉封貝子爵銜卽照宗室貝子之例所有護衛官員聽其自將家人揀放此乃逾格施恩俾異姓盡臣得邀殊寵將來我八旗大臣得有似此超眾宣勞者均可援以爲例豈非國家世臣之福九月克巖碧山焚巴溝等寨二十進攻麾手寨山分兵乘積霧雨由僻徑繞出山後面背合攻賊大潰時所調粵西兵亦至今令花連布率之從長坪搜剿得苗寨四十上賞服貂尾褂賊首吳半生從鴨保至高多寨欲糾眾拒我兵偵得之遂督全軍急進圍其寨吳半生窮蹙出降上嘉其功賞其子德麟副都統銜在御前侍衛上行走十月抵鴨保賊巢鴨保之右天星寨爲賊中奇險處賊恃以爲固乃率眾夜發值雪後朔風起兵皆於陰晦中覓道進

抵木城下擲火焚其窩棚賊駭竄得木城七石卡五克垂藤董羅
諸寨 賞上用黃裏元狐端單一十一月克卧盤寨平隴賊目吳
八月就擒降苗吳隴登縛賊目隴五觔以獻大兵進攻大小天星
寨克之十二月攻克樛木營乘風雪夜進拔地良八荆桃花諸寨
賊又謀於普定寨糾眾來拒破之擒賊目二據高斗山計由平隴
以復乾州賊恃擒頭坡騾馬峒諸險隘悉力死守乃於高斗駐營
作進攻勢潛分隊魚貫進克擒頭坡諸賊卡復撥兵斷賊歸路進
取騾馬峒及兩岔河川峒諸山焚其寨三百由川峒進克金嶺衝
山擒賊目一嘉慶元年正月克吉吉寨乾州屬大隴峒等寨暨斗
角巖尾坡九十九峒苗千餘戶乞降二月大兵抵璧多山設卡賊

竊從壁多對峙之高吉陀夜出窺我營擊退之且焚巴金灣寨三
月賊伏兩叉溪欲阻我兵路爲礮所擊遁追勦至平逆坳奪石卡
三賊又集眾數千襲樑木營後路分撲擒頭坡營卡悉以有備敗
走四月克結石岡石城焚牧牛坪等大小寨七十進克官道溪攻
火麻營石城張兩翼以三面進薄之賊潰軍中製火箭數百枝遠
近齊發燬其寨益多抵廖家衝奪山嶺石卡一羣苗驟至上撲卡
十數進皆敗偵其竄伏路多從連峯坳乃夜簡勁卒間道潛發以
其半擊賊半囊土負而登且戰且築卡斷其隘賊見兵已據險四
散奔逃追戮無遺奪山梁七寨入 諭曰福康安自勦捕苗匪以
來備經艱險懋著勩勞今大兵進逼賊巢將緊要山梁俱已攻克

業距平隴乾州不遠成功當在指日允宜特沛恩綸用加懋賞因
念福康安父傅恆宣力有年屢著勞績未得身膺貝子封爵向來
貝子襲封王爵如其父未得封王者例准追贈傅恆著加恩照宗
室追封之例晉封貝子以光泉壤而昭寵錫五月福康安染瘴患
洩瀉猶督師前進夜有大星隕於營西北光芒有聲越數日卒於
軍 諭曰大學士貝子福康安秉性公忠才猷敏練敷歷中外懋
著殊勳年力富強正資倚毗乃當大功垂成之際積勞成疾遽爾
溘逝實深震悼且當患病之時猶復力疾督師親臨前敵實爲宣
勞超眾體國忘身尤宜渥沛殊恩用昭節終令典著晉封郡王爵
銜賞內帑銀一萬兩經理喪事並賞給陀羅經被仍著於伊家宗

祠之旁建蓋專祠以時致祭並推恩伊父傅恆亦追贈郡王爵銜
其子德麟著加恩晉襲貝勒派固倫額駙豐伸嚴德迎往奠醊帶
同伊子德麟馳赴前途妥爲照料俟入城治喪朕必親往賜奠所
有任內降革罰俸處分俱著開復其應得卹典並著該衙門察例
具奏以示軫恤勲勞有加無已至意 御製詩哭之曰到處稱名
將功成勇有謀近期黃閣返驚報大星流自嘆賢臣失難禁悲淚
收深思縱加贈忠篤那能酬九月 命入祀昭忠祠賢良祠從其
父傅恆配享太廟 子諡文襄 賜祭葬如例二年二月得旨
德麟承襲貝勒之爵出缺後伊子承襲貝子伊孫承襲鎮國公減
至未入八分公止世襲罔替九年 諭曰從前節次用兵時領兵

官員原無格外犒賞之需自福康安屢次出師始開濫賞之端任性花費毫無節制於是地方承辦之員迎合備送累萬盈千以及銀牌綢緞絡繹供支不過以賞兵爲名亦未必實惠盡逮戎行也卽如德麟迎其父柩地方官致送奠儀並備賞等銀四萬餘兩外省只知逢迎執袴乳臭卑鄙惡習實出情理之外竟非人類所有德麟收受銀四萬一千五百五十二兩著罰令賠繳八萬兩以示悖入悖出之天理爲治世所不容十年二月 諭曰帶兵大員本不當以一時犒勞私恩輒立賞號名目其始如傅恆等尙係將自有之物分給士眾迨後羣相效尤又不能出資購辦遂不得不向地方官調取預備而福康安爲尤甚因而承辦軍需者居然視爲

正項支銷自有賞號名目以後帶兵大員藉詞取索漫無限制而地方局員亦不免以購備爲名浮濫多糜甚至舞弊營私取肥已棄交結見好及至報銷帑項時又復多方設法希圖掩飾所有軍營賞號一項必當嚴行禁止四月 諭曰賞罰爲軍紀之要隨征官兵等果有奮勉出力者一經奏聞無不立沛恩施帶兵大員等何得擅立賞號用示施恩是以從前屢次用兵本無此項我一皇考高宗純皇帝曾經屢頒 聖訓著之令典自福康安出師臺灣等處始有自行賞給官兵銀兩綢緞之事爾時藉其聲勢向各省任意需索供其支用假公濟私養家肥己其後各軍營習以爲常帶兵大員等不得不踵行犒賞而力有不能輒於軍需項下動用

支銷以公項作爲私用嗣後設遇辦理軍需時不得再立賞需名目十三年德麟以 零壇視牲誤班 飭部嚴議議上 命降貝子在散秩大臣上行走

右 國史館本傳

嘉慶元年敬以富陽縣知縣餉貴州平苗軍五月丁巳次益陽有大星隕於西南聲隆隆然癸亥次武陵一騎自西南來白衣冠聞嘉勇貝子薨庚午次桃源同餉軍者裘烏程世璘曰吾屬在浙貝子方平林爽文凱旋自三衢方舟下嚴陵江舟設重樓陳百戲中流鼓吹競作從官舟銜舳舻並兩岸疾下頃之有譁於從官舟者乃一巴圖魯與都司飲爭酒佐貝子出坐親鞫之色甚和貝子曰

汝二人何功卽頹曰花翎通諸羅道 賜比旋役各進一官員子
曰 今天子神聖軍以功返汝二人不知謹虧 朝廷體邪然重
懲汝非優功 盛愾也目左右曰花翎不稱去之二人叩頹下卒
不問所坐何事方紹興應達曰吾聞文武事貝子貝子必優以官
頃有府經歷三年至同知試用知縣五年至分守道者鍾慈谿德
溥曰吾鄉人嘗事貝子官亦分守道矣往歲貝子與夫與守備爭
毆之傷額鄉人杖輿夫四十貝子曰若忘富貴所自邪何躡我也
鄉人懼數月不敢見語有間敬告之曰吾聞之張皋文張皋文聞
之副都御史方葆巖先生維甸先生曰貝子援諸羅時壯勇公海
蘭察前行行約百里貝子督師夜繼進大雨天黑如覆盤遇土山

駐軍山頂貝子中坐隨軍官圍貝子坐外親軍外正軍皆圍坐賊遊兵近山踐泥瀟過火炬千萬賊自炬中上窺山黝黑無所見疑有軍發銃礮擊之貝子令曰無出聲無動久之賊過盡雨霽天益明壯勇公已入諸羅城捷使至軍始起行無一傷視銃礮子歷落入山腹也先生又曰貝子征衛藏有隘道幾一里賊屯軍守隘北甚嚴大軍屯隘南三十里許貝子調軍伏隘東西而以前軍分五軍攻隘迭迭戰一日蓋數十勝負貝子在大軍中前軍軍報杳至不動及二更前軍大敗退不止賊逐前軍出隘南忽銃礮聲大震火炬盡熱照耀如白晝東西伏軍皆起賊驚退相蹂躪我軍蹙之入隘貝子急上馬萬騎齊足頃刻至隘口前軍伏軍已過隘

聞貝子至勇氣百倍大軍乘勢合攻遂夷賊屯追奔五十里而後止

右紀言憚敬撰

初蘭州賊滅李侍堯查治新教餘黨吏胥肆騷於是伏羌縣阿渾田五等藉詞爲馬明心報復仍興新教於乾隆四十六年冬葺通渭縣之石峯堡爲巢穴次年聚謀禮拜寺造旗帳兵械而吏不知也四十八年四月復殺掠起先徙其家屬於石峯堡而分屯伏羌縣之鹿廬山靜甯州之底店山潘隴山扼險號召五月甘肅提督剛塔等剿之擊賊伏羌城外略有斬獲首逆田五受創死李侍堯誅婦孺千餘賊黨馬四圭張文慶等流言官兵欲剿絕回眾煽黨

肆掠氛益熾 上以總督李侍堯於近城之賊謀叛二載毫無覺
察及是又逗遛靖遠藉審訊餘黨爲名不親赴督剿而剛塔等皆
無方略致賊四出無遏截分別殲逮 命福康安及海蘭察會討
又 命大學士阿桂領健銳火器營二千以往六月七日福康安
海蘭察抵軍議先剿隆德靖甯之賊而後進擣石峯堡十一日官
兵四千分攻底店山殺賊數百盡奪其柵降賊二千餘黨潰遁乘
勝圍石峯堡而阿桂之禁旅亦至堡踞萬山中四面削險溝塹縱
橫乃掘壕斷其水道七月初賊投出男婦千餘官兵分伏四隘夜
半賊首果冒死突圍截殪千計黎明乘堡四入盡俘首逆釋其婦
孺三千餘並分兵殲底店降回千餘賊平 詔封福康安嘉勇侯

阿桂加一輕車都尉海蘭察加一騎都尉自是永禁回民不得立新教

右記魏源撰

乾隆五十六年秋命粵督嘉勇公福康安爲大將軍領侍衛內大臣海蘭察爲參贊統索倫吉林及川陝諸路兵討藏亂其糧餉則命大學士孫士毅主藏東路駐藏大臣和琳主藏西路濟隴以外則惠齡主之五十七年春福康安由青海路進兵時青草未茂馬皆瘠疲糧餉屢絕運糧布政使受和珅指欲絕其餉以令其自斃賴福康安行走疾速於四旬至前藏以四月乙未出師先遣領隊大臣成德岱森保由聶拉木進總兵諸神保駐絨轄防其抄襲後

路福康安海蘭察二人與賊戰於捺木戰於瑪爾轄直抵濟隴成德亦由聶拉木轉戰而入凡賊所侵後藏地悉復六月庚子遂入賊境賊舉國來拒於噶多溥福康安分前隊爲三令海蘭察統之又分前隊爲二福自統之遣護軍統領台斐英阿在木古拉山與賊爭持福康安由閒道衝賊營海蘭察又繞山出賊營後與福康安合勢共克木城石卡數十追奔至雍雅俘其頭人某成德亦克鐵索橋進至利底福康安又檄諸神保亦至利底以壯軍威於是舉國洶懼遣人乞降福康安曰是緩我兵也弗可聽嚴檄斥之七月庚子裹糧再進歷噶勒拉堆補木特帕朗古橋甲爾古拉集木集處七百餘里凡六戰皆捷所殺四千餘人至熱索橋福康安以

爲勢如破竹旦夕可奏功甚驕滿擁肩輿揮羽扇以戰自比武侯也我兵皆解囊韃負火槍以休息賊乘閒入我兵狼狽而退台斐英阿死之武弁亦多陣亡者賊復遣人乞和福康安遂允其請賊獻所掠金瓦寶器等物令大頭人噶木第馬達特塔巴等齎表恭進馴象番馬及樂工一部 上鑒其誠乃許受降八月丁亥班師是役也巴忠旣辱國於前福康安復償師於後猶賴夷人畏憚爲國家威德所懾故爾獻表投誠以結其局後之用兵絕域者可弗引以爲戒歟

福文襄王康安荷父庇蔭威行海內 上亦推心待之毫無掣肘臺灣之役福戚宗室恆瑞以逗遛失機 上命入京質訊福以戚

故故緩其行乃於戰陣時首列瑞功以希免罪 上諭 嗣云使恆
瑞果將材何以汝未至時並未觀其專戰而一旦勇健若此豈以
戚晚而袒庇乎朕深爲汝惜也福文襄承 命之下戰慄失色花
翎動搖竟曰

本朝罕有異姓封王者 國初孔有德尙可喜耿仲明以泛海來
歸封孔爲定南王耿爲靖南王尙爲平南王吳三桂以請兵功封
平西王揚古利以世臣故追 贈武勳王孫可望來歸 封義王
黃芳度以殉節 贈忠勇王然皆不世其爵惟福康安以征苗薨
於軍特 贈嘉勇郡王其子德麟見襲貝勒蓋曠典也

右錄宗室昭棟撰

伯麟

伯麟瑚錫哈哩氏滿洲正黃旗人乾隆三十三年由繙繹生員考取筆帖式三十六年中式舉人補兵部筆帖式四十三年擢右春坊右贊善四十五年轉左贊善四十八年二月遷右中允五月轉左中允五十年升翰林院侍講五十三年轉侍讀充日講起居注官咸安宮總裁五十四年五月遷詹事府少詹事七月升詹事五十五年充教習庶吉士五十六年四月兼公中佐領十月擢內閣學士兼禮部侍郎銜五十七年正月兼鑲白旗蒙古副都統八月遷盛京兵部侍郎十二月調盛京戶部侍郎五十九年兼管奉天府府尹事務六十年緣協領永書擅責巡檢管景穆均請解任質

審 上以伯麟袒護旗員下部嚴議尋議降調 上加恩改爲降
二級畱任嘉慶三年正月調兵部右侍郎二月授鑲藍旗漢軍副
都統四月授山西巡撫四年以山西巡撫例兼提督銜 賞戴花
翎五年請定口鹽池鹽運行界限不使混入淮蘆引地下部議行
時方勦辦陝西邪匪 命調大同兵二千赴營協勦嗣以兵力疲
頓且多逃逸褫花翎九年二月京察以久任封圻循聲素著下部
議敘五月 上以晉省鹽務自改歸地丁後鹽禁廢弛致蒙古鹽
乘間侵越 諭伯麟籌辦尋奏改歸商運鹽價必增更恐販運貧
民失業未便議復至蒙古鹽入口應於磧石上下派員嚴查 從
之七月擢雲貴總督十年因前在山西巡撫任內失察大同鎮總

兵恩承阿侵扣馬乾銀部議降四級調用 上改爲降五級畱任
時緬甸與暹羅屬夷夏于腊構釁求助於順甯府屬孟連土司土
司刀派功私率土練往援遇害失其印伯麟以刀派功禍由自取
勿用興師問罪惟印信係 天朝所頒檄令查繳旋經暹羅繳回
先後奏 聞 上俱聽之十一年緬甸遣土目孟幹呈請預期進
貢伯麟知其爲求助地以非 朝廷柔遠至意卻之後緬甸爲夏
于腊所敗果來乞援伯麟拒弗應夏于腊旋亦敗走緬甸兵次車
里土司界伯麟令守土者戒嚴並移文緬甸訓戒之緬夷遂退十
三年緬甸四大萬頭目稟請九龍江十三板納地伯麟以外藩頭
目不得徑稟督撫飭屬駁回並示以十三板納俱屬內地毋生覬

覲 上嘉其得體十四年入 覲 賞還花翎十七年五月騰越
邊外野寨頭目拉幹糾眾焚劫傷斃兵弁伯麟派員率兵練進剿
野夷將拉幹縛獻事平七月奏言邊外野夷猥匪乘閒搶掠從前
設土練防範嗣經裁撤請於緬甯騰越等處要隘照額復設一千
六百名撥給曠土耕種如所議行先是僧人銅金從猥犯李文明
滋事後經悔罪投誠更姓名曰張輔國充南興土目至是暗招漢
奸勾結猥眾肆行侵擾伯麟檄調不至馳赴緬甯督各土司會剿
十八年正月進偪南興破其巢輔國就戮邊境肅清得 旨嘉獎
二十年請增設騰越鎮馬鹿塘大壩二汛 從之二十二年臨安
邊外夷人高羅衣謀逆脅眾至萬餘人在澧社江外肆劫復率眾

偷渡窺伺內地伯麟馳往剿平之 諭曰高羅衣係臨安江外夷民膽敢糾合夷匪漢奸封官僭號罪大惡極伯麟未及三月掃除淨盡調度有方著加恩賞加太子少保銜交部從優議敘六月授協辦大學士仍畱總督任二十三年高羅衣堂姪高老五逃赴藤條江外糾眾搶掠復渡江窺臨安伯麟馳往剿捕生擒首逆殲除餘黨事 聞交部議敘二十四年三月京察屆期 諭曰協辦大學士雲貴總督伯麟兩次辦理軍務均能迅速蒞事著加恩交部議敘二十五年五月 召來京授兵部尙書兼正紅旗漢軍都統九月 賜紫禁城騎馬充 實錄館總裁疏陳滇黔邊務六事下雲貴兩省督撫議行十二月充經筵講官道光元年授體仁閣大

學士管理兵部二年正月調鑲藍旗滿洲都統閏三月充殿試讀
卷官六月 諭曰伯麟年逾七旬素患駸疾前在雲貴總督任內
以協辦大學士來京供職朕御極以來特加簡任仍令管理部旗
事務因其步履艱難格外體恤一切引見差使有時免其帶領此
朕恩禮耆臣之心伯麟身爲宰輔自當循分盡職本日召見議及
旬到事宜據奏將來旬到尙可調養半月勉爲趨事至明日御門
典禮卽不能進跪御前因免冠叩首據稱若放外任差使不過坐
辦尙能報效等語冒昧已極伯麟如果自揣精力就衰卽當因病
求退乃旣不辭免轉生出位之思試思以大學士出就外任非昇
以封圻不可伊祇知督撫之養尊處優而不知任大責重以伊衰

暮之年卽使加以簡任尙安望其稱職無忝乎人臣進禮退義原不應竊祿希榮伯麟意欲以要君之舉堅其戀棧之心膽大荒謬莫此爲甚若再事姑容何以飭朝綱而儆寮案著以原品休致其清文諳熟仍著充 實錄館總裁並賞給半俸俾得敬專其事以示格外施恩三年八月 萬壽聖節 駕幸萬壽山玉瀾堂 賜十五老臣宴繪圖紀事伯麟與焉 御製詩有山右滇南昔受命今者懸車優禮彰之句四年四月 仁宗睿皇帝實錄成 賞食全俸 賜銀幣八月卒 諭曰休致大學士伯麟自乾隆年間歷任卿貳嘉慶年間由巡撫擢授雲貴總督加太子少保銜協辦大學士朕御極後授爲體仁閣大學士敷歷中外宣力有年嗣因

年老子休賞食半俸仍留 實錄管總裁之任本年全書告成復
給 俸茲聞溘逝殊堪軫惜著加恩晉太子太保賞銀五百兩治
喪派大阿哥帶領散秩大臣一員侍衛十員前往奠醑並照大學
士例賜卹所有任內處分悉予開復應得卹典該部察例具奏尋
賜祭葬 予謚文慎子穆克德起山西沁州直隸州知州

右 國史館本傳

章煦

章煦浙江錢塘人乾隆三十七年進士授內閣中書四十年丁父憂四十二年服闋四十五年充軍機章京四十六年補官四十七年丁母憂四十九年服闋五十年補原官五十一年四月遷宗人府主事五月充雲南鄉試副考官五十六年遷刑部員外郎五十七年七月充河南鄉試副考官十月遷郎中五十八年提督陝甘學政六十年任滿回京奏留刑部嘉慶元年三月補原官五月改山西道監察御史仍留軍機處五年截取知府經軍機大臣奏留命以四五品京堂升用六年四月擢太僕寺少卿舊制京堂不兼直軍機煦應開缺 諭曰該員在軍機處行走有年於勦辦教

匪一切事宜本係熟手此時大功指日告竣若令其卽離樞直轉不能仰邀恩敘章煦著加恩暫在軍機章京上行走俟大功告竣再回本衙門供職九月轉大理寺少卿十月以軍營屢獲首逆下部從優議敘七年三省教匪平 上以煦辦理軍務始終其事復下部從優議敘尋自請回本衙門供職 允之旋以雲南巡撫初彭齡劾布政使陳孝升迤西道薩榮安辦理維西軍務冒銷帑銀命偕兵部侍郎那彥寶往讞得實治罪如律九年二月升太僕寺卿六月遷順天府府尹稽察右翼覺羅官學十年授湖北布政使十一年擢巡撫十三年六月授刑部左侍郎八月雲南已革貢生任澍字訐告地方官冒銷軍需那移城工各款 命偕右侍郎

穆克登額往按之坐誣治罪如律九月授貴州巡撫十月調雲南
巡撫十二月署雲貴總督十四年六月調江蘇巡撫十一月署兩
江總督十五年二月 上以漕運阻滯或將本年漕米交渡海商
船灑帶來北其是否可以試行之處 命籌議以聞四月奏稱江
蘇惟大號沙船尚可帶運然約計運費每一百石需銀三百兩且
商船不能安設氣筒易致微變事屬難行 上矧之五月奏嚴上
海海口米禁四事一奸商勾通吏役於放米出洋責成蘇松太道
實力稽查一軍民探有偷放之人赴官稟報者給賞一文武員弁
能於海口內外泊船各山島起獲出洋米石加以升擢一客米入
境令將銷售米數五日一報仍責成員弁於出口要隘隨時稽查

得旨允行十六年奏設海門廳學校 允之十七年三月入
覲以年力就衰懇留京供職改授刑部右侍郎七月原任直隸涿
州知州徐用書子思曾控後任知州周景捏增其父任內虧空思
曾旋在清苑縣瘐死妻黃氏疑其中毒來京控訴 命偕戶部左
侍郎景安往按之思曾實係病故徐黃氏坐誣用書虧項因前後
任互相推移致有輾轉請將失察各上司及歷任涿州知州交部
分別議處九月回京十八年九月河南滑縣教匪李文成等滋事
直隸長垣山東曹縣等處均有賊黨應之 命直隸總督溫承惠
統兵勦賊煦署直隸總督尋擢工部尙書充國史館副總裁官仍
署總督事十月奏團練鄉勇請將口糧及製造號衣器械等費由

官支給 諭曰國家經費有常從無此例且人數聚散無時何所
稽考此必係承辦軍需劣員倡爲此議豫爲冒銷地步章煦受其
慫恿妄行陳奏著交部議處先傳旨嚴行申飭尋議降調 上加
恩改爲畱任十一月大名縣監犯李經句通逆匪田克岐製造號
旗散交匪黨霍富秋等糾約爲逆捕獲實於法十二月調吏部尙
書 賜紫禁城騎馬仍署總督事以研訊逆犯廉知滑縣首逆馮
克善竄伏直隸獻縣境內飭知縣張翔弋獲械送京師戮之 諭
曰章煦督緝要犯任事實心著加恩賞加太子少保銜仍交部照
軍功例從優議敘十九年二月回京閏二月充文穎館治河方略
總裁三月充會試正考官六月山東金鄉縣竊匪聚眾拒捕巡撫

同興率以邪教餘黨上聞命偕刑部右侍郎那彥寶往勘得實首從均問擬如律以知縣袁潔誤報褫其職時臬司程國仁參奏濟南府知府凝圖徇庇劣員通同舞弊照等查出章邱縣知縣崔起龍因催比漕糧杖斃九命凝圖徇庇屬實均治其罪上以山東吏治廢弛同興毫無整頓命照詳察劣蹟以聞七月奏山東地方凋敝倉庫空虛皆同興玩誤所致藩司朱錫爵徇私廢公終日宴樂均褫職以照署山東巡撫清查虧空九月新授巡撫陳預抵任命照以欽差協同查辦並簡戶部刑部司官四員襄其事十一月查明嘉慶十四年以前虧缺實數奏前任巡撫吉綸曾於十四年清查一次但奏報不實其原奏虧缺銀一百七十

九萬八千餘兩及弓案參追銀六萬一千七百餘兩外見又查出
 虧缺銀一百五十五萬二千餘兩共銀三百四十一萬二千餘兩
 係十四年以前虧缺實數其十四年以後虧空見因冊報不符飭
 道府分赴所屬督催盤查疏入 命嚴行懲辦十二月授協辦大
 學士二十年正月以新虧款項輾轉乞展限辦理 諭曰查辦虧
 空全在章程周妥果能斟酌盡善實力奉行自有成效山東十四
 年以前既經查有實數此時按銀數之多寡定追繳之遲速應如
 何分別辦理使帑項胥歸有著著章煦悉心覈定奏准後交陳預
 實力遵辦其十四年以後虧缺之數一時雖未能查明亦當議定
 章程將來陸續查清以次覈辦章煦斷無在彼久候之理伊總須

將章程酌擬周密無舛無漏設所議不能妥善將來行之無效必仍派章煦覆查不能置身事外也二月查自十四年以後截至十九年九月止續虧銀三百三十四萬七千餘兩新舊共六百餘萬兩其十四年以後虧項某員某任究係若干請立限一年調集離任回籍各員詳加覈計先擬章程十四款上之一清釐藩庫一嚴查交代一酌定徵解分數一嚴立追繳限期一追繳限期再分別升任及降調革職等員量予增減一酌定上司分賠限期一催徵民欠一覈減提解節省銀一確查無著虧項一攤捐各款查有無詳稟案據覈辦一流抵房屋器物勒限估變一州縣應領司庫各款儘正項扣抵不准先抵攤捐一倉項與捐項庫項一律籌補一

州縣墊辦軍需應俟查明再入抵款下部議行三月回京六月湖北襄陽縣候選訓導吳煥章控縣民易成元與河南南陽縣民易登朝等勾結謀逆並控襄陽縣知縣周以焯押斃無辜多命 命偕刑部右侍郎熙昌往鞫先抵南陽訊明易成元等並無逆謀煥章依律反坐次抵襄陽查以焯實曾押斃十四命遣戍黑龍江十月廣東雷州府已革經歷李棠訐總督蔣攸銛專擅徇私復偕熙昌往鞫以棠誣告論戍嗣有已革萬州知州李仁峻訐雷瓊道胡大成苛派屬員已革舉人劉華東等控已故洋商盧觀恆濫廁鄉賢已革貴縣知縣吳遇坤刻書詆毀上官均 命詳讞得實稅大成職罷觀恆從祀戍遇坤黑龍江十二月 命管理刑部二十一

年正月京察屆期 諭曰章煦前署直隸總督緝獲逆案要犯多名辦事認真者交部議敘四月回抵山東會江蘇已革知縣王保澄訐上官諱匿邪書仍 命偕熙昌往讞坐誣依律遣戍五月安徽阜陽縣民王勇志控捻匪王景糾搶婦女拒殺事主仍 命往鞫得實問擬如律六月署安徽巡撫閏六月回京調禮部尙書七月 上秋獮木蘭 命畱京辦事十月 命在軍機大臣上行走十一月調刑部尙書管理禮部二十二年二月因病 賞假 遣御醫診視三月奏請開缺 允之九月病痊授兵部尙書協辦大學士兼管順天府府尹事務十二月充經筵講官二十三年三月授文淵閣大學士管理刑部五月以館臣纂輯明鑑體例未合

諭令覆輯煦充總裁官七月 上詣盛京恭謁 祖陵復畱京辦事二十四年正月 上六旬萬壽加恩廷臣章煦晉太子太保銜旋值京察 諭曰章煦管理刑部事務尙屬盡心著交部議敘四月充殿試讀卷官十月充武殿試讀卷官十一月因病奏請開缺上慰留之 賞假調理二十五年二月以宿疾未痊累疏乞休諭曰大學士章煦供職有年宣力中外經朕簡任綸扉上年十一月初閒因病請假兼旬未愈卽奏請開缺降旨令其安心調養不限時日本年正月開印後復懇請解職朕以其所患祇係骸疾天氣漸暖血脈和暢仍可望痊又經賞假一月茲據章煦奏稱病在筋絡斷難脫體不敢再事因循曠廢職守情詞懇切若仍復慰

畱伊心恐有誤公轉難調攝莫若聽其解職俾得安心頤養宿疾或可漸瘳章煦歷任封圻曾在軍機大臣上行走其在署直隸總督任內並有拏獲馮克善軍功章煦著加恩准其開缺以太子太保大學士致仕賞給全俸伊或在京調理或回籍就醫均聽其便用示朕優待老臣至意三月煦乞歸 上准其馳驛 命沿途地方官在二十里內者護行道光四年卒 諭曰予告大學士章煦由乾隆年間進士蒙 皇考仁宗睿皇帝簡任封圻洊擢綸扉贊襄樞務嘉慶二十五年因病乞休予告回籍支食全俸茲聞溘逝殊堪軫惜著加恩照大學士例賜卹在任一切處分悉予開復所有應得卹典該部查例具奏尋 賜祭葬 予謚文簡子埏廣東

南澳同知坦江西候補知州孫鏞一品廕生

右 國史館本傳

道光四年九月丁巳 文淵閣大學士章公年八十薨於杭州皋
園私第十月甲申遺疏聞於 朝 皇上軫念耆臣恩卹如例

賜祭葬諡文簡凡所以飾終之典靡不備焉越二年十月公子坦
卜公兆於玉泉山麓寓書都下以誌墓之文爲請按狀公諱煦字
曜青姓章氏別號桐門其先系出唐封世居會稽曾祖諱大寶遷
杭祖諱名選考諱廷楫皆 贈如公官曾祖妣邵盧張祖妣鍾妣
吳皆一品夫人同產四公其季也幼而穎異長通經世之學乾隆
三十七年壬辰成進士釋褐內閣中書乞假歸省丁父憂服闋以

原官充軍機章京嗣遭母喪既除升宗人府主事丙午典試雲南
己酉分校會試遷刑部員外郎壬子典試河南癸丑分校會試其
秋視學陝甘嘉慶元年改山西道監察御史己未復充會試分校
擢太僕少卿轉大理少卿 特旨仍在軍機處行走蓋公入直樞
廬二十餘年練習掌故簪毫視草矢慎矢勤故有是 命而公自
此受 特達之知內而歷躋卿尹端揆綸扉外而開藩建燾屢權
大府其閒乘軒持節徧馳域內以求民瘼讞疑獄至於垂老乞身
之年思一息肩而不得者咸於是乎基之矣自時厥後赴雲南鞠
案遂往川陝兼軍務善後事宜還京升太僕卿尋尹順天十年出
爲湖北布政使洊升巡撫旋以刑部侍郎內 召復奉 命往雲

南鞠案授貴州巡撫調雲南兼署雲貴總督十四年晉都祝釐
未至署貴州巡撫調江蘇署兩江總督年衰乞內改仍授刑部侍
郎十八年九月署直隸總督弋獲林清案內助逆首惡馮克善
聖心嘉悅加太子少保銜公子挺署東昌知府是時亦以軍功
賞戴花翎秉公訓也十九年甲戌充會試正總裁隨往查辦金鄉
案先是署直督時升授工部尙書調吏部故 命以尙書暫署山
東巡撫是年十二月協辦大學士次年赴湖北廣東江甯安徽等
省訊案卽署安徽巡撫二十一年回京調禮部尙書軍機大臣上
行走調刑部仍管禮部時公年逾七旬自奉 命滇南十數載以
來輶車星駛動經萬里奔走頻年瘴雨蠻煙棧雲隴雪寒煥之或

非其宜飢飽之或違其節加以所到之區所治之事無不并心一
力勞形瘁神而公亦用是致疾矣二十二年開缺調理病愈以協
辦大學士尙書銜兼管順天府尹事尋授兵部尙書經筵講官二
十三年三月眞拜文淵閣大學士管理刑部二十四年元旦晉太
子太保銜是冬疾大作屢疏乞休 溫諭慰留明年復請乃許之
馳驛回籍甫數月驚聞 睿皇帝升遐奔叩 梓宮 皇上知公
老病仍許還山方謂怡志蠲疴期頤可卜迺自解組歸田優游林
下者纔四年耳夫何溘逝之遽也公生平當官任事一以實心爲
本綜覈庶務審慎精詳雖案牘填委而從容料簡無不就理晚年
位益崇望益重敷歷中外貴極人臣而未嘗久於其職惟撫吳幾

及三年善政畱遺至今吳人稱道之其撫滇撫黔撫楚撫皖撫山東凡所設施皆未竟其緒卽當軸亦僅年餘未足盡公之蘊良可惜已然公長於折獄明允矜慎有古欽恤風凡獄多疑實久懸莫決者 仁宗命公行而公所至必得其情無枉無縱書曰明于五刑以弼五教民協于中時乃功其公之謂與元配陳氏 封一品夫人次配陳氏卽夫人同懷妹皆先公卒子四長圻早世次挺廣東南澳同知丁公憂歸哀毀卒次坦江西候補州同次垣候選通判後於世父以公薨之年先卒女三孫七長鎬一品蔭生錚鈞錫麟錫壽錫桂錫芝降服孫二銘鏐孫女八公起家中翰歷踐台司恩禮際遇之隆行誼事業之美具載 國史本傳及公門人前

戶部尙書潘公世恩所撰行狀後之人可考而得其詳茲惟敘述
官闕略爲論次亦以見公之梗概云銘曰

玉泉之山高崔嵬蔥蔥鬱鬱氣佳哉安公靈兮山之隈 御碑穹
隆兮屹墓前名垂不朽兮稱大賢公靈永宅兮世澤長延

右墓誌銘龍汝言撰

鄒炳泰

鄒炳泰江蘇無錫人乾隆三十七年進士改庶吉士四十年散館授編修旋充四庫全書纂修官四十三年因纂書出力命優敘四十五年充文淵閣校理四十六年遷國子監司業五十二年擢祭酒五十三年充浙江鄉試正考官五十四年七月授詹事府少詹事八月提督山東學政十二月遷詹事五十五年擢內閣學士兼禮部侍郎仍畱學政任五十六年八月丁父憂五十八年十一月服闋六十年二月補原官八月充順天鄉試副考官尋提督江西學政嘉慶二年正月丁母憂四年四月服闋五月補原官旋授禮部右侍郎九月調倉場侍郎五年三月劾坐糧廳顏培天嗜酒

任性請撤回交部議處 從之六年二月京察 諭曰鄒炳泰剔
除積弊整頓漕務著交部議敘五月裕豐倉不戒於火炳泰以未
能先事防範自請議處 上以炳泰駐劄距倉較遠一聞稟報卽
馳赴該處查看尙無不合免之五月都統明安奏二月分西四旗
應領俸米見在海運倉始行支放 上以炳泰總司倉務常因事
入城可以隨時稽察何至該倉應放米石遲至數月之久毫無聞
見 命交部嚴加議處尋議降二級調用 恩准抵銷會侍郎達
慶奏報軍船回空日期炳泰未經聯銜復單銜具奏各幫虧短米
石數目 上命侍郎和甯祖之望馳赴通州查辦嗣以查明未經
會商奏入 諭曰鄒炳泰於二進軍船挂欠既經奉旨將餘米扣

補三進軍糧事同一例焉有歧視之理而鄒炳泰因與達慶意見不合輒奏稱豫防旗丁等年年積壓雖似因公起見實不免偏執使氣鄒炳泰著交部議處尋降一級畱任九年八月御史五誠額奏請各倉監督輪流率役在倉住宿 敕下倉場議奏經炳泰議以倉廩重地若令倉役時常出入或與在外匪徒勾串偷竊且嚴冬燒炕火燭可虞請仍於附近倉門官房居住輪班稽查 上是之十年二月擢都察院左都御史五月遷兵部尙書六月兼署工部尙書九月管理戶部三庫事務十二月充經筵講官十一年三月 上御經筵炳泰誤站班次未請處分 命交部加等議處尋議罰俸六箇月九月兼順天府尹事十一月 命紫禁城騎馬十

二年正月調吏部尙書十三年正月充會試正考官十四年正月
加太子少保銜四月充殿試讀卷官六月已革倉書高添鳳盜領
米石案發 上以炳泰在任最久於少收多放情弊全無覺察
命革去官銜降爲二品頂帶仍帶革職畱任尋以 萬壽慶典
賞選一品頂帶十五年十月炳泰七十生辰 御書卿雲錫祉扁
額賜之十六年正月炳泰以足疾請開缺 諭令安心調養不必
限以時日 優命御醫診視三月署戶部尙書四月充殿試讀卷
官復充朝考閱卷官五月協辦大學士仍兼吏部尙書六月 賞
復太子少保銜九月炳泰因吏部司員扣缺錯誤迴護堅執將辦
理緣由陳奏 上是之十八年充順天鄉試正考官會降調知縣

傅士奎及已革司獄夏本榮呈請捐復炳泰前後准駁與署任侍郎初彭齡意見不同經初彭齡入奏 上命大學士勒保等詳覈具奏旋經查明兩案覆奏均應議准 諭曰鄒炳泰身任尙書遇有呈請捐復者應准應駁自當準情覆議乃於傅士奎一案則已駁復准旋又改駁於夏本榮一案則已准復駁茫無定見著交都察院議處尋議降二級畱任又兵部主事姚堃在昌平州八仙莊被劫 上以該處距京城數十里爲官員商賈往來孔道盜匪膽敢糾眾邀劫實由地方官闡茸所致鄒炳泰僅將專管上司參奏亦未自請處分竟視爲尋常盜案照例辦理殊覺懈弛 諭無庸管理府尹事務九月以逆匪林清黨與多係直隸固安及黃村一

帶人 諭曰鄒炳泰在順天府尹任內平日漫無查察以致養癰貽患著以中允贊善降補尋休致回籍二十五年正月卒

右 國史館本傳

鄒炳泰字仲文乾隆三十七年進士授編修轉國子監司業援古禮請建辟雍成千載曠典尋擢內閣學士兼禮部侍郎累遷兵部尚書管理府尹事調吏部加太子少保協辦大學士屢掌文衡力勵清節遇事持正人莫敢干以私囊橐蕭然澹若寒素視學江西有隸人子濫廁學校士羣攻之前學使斥革四人炳泰至卽于開復而斥隸人子士大悅服官戶部嚴覈侵蝕同官欲變法裕國用炳泰謂是與加賦異名同實持不可乃止既掌吏部疊邀 天語

嘉獎嘉慶十八年邪教林清滋事炳泰以兼尹畿輔未能先事覺
察左遷中允致仕歸歷主鄉會試所得士如李毓昌強克捷忠義
最著子光駿二品廕生授安徽太平通判遷鳳陽府同知署徽州
知府有巨商某以三千金爲壽乞臨其喪不許清介有父風

右傳秦瀛撰

鄒曉屏參政炳泰無錫人登科後不登權要之門徜徉詞館者三
十年以資深得躋卿貳好古書畫收藏甚富嘗得化度碑宋捐本
至質衾裯以易歸曾告余曰他人以如山金帛乃易贖物滿架閣
不及余數金之真也立朝不苟洵至家宰與胡合菴圖理爭兵部
銓選事直言侃侃胡莫能奪卒以見請余是日遇公於九松山古

寺中公歷言胡變法故曰吾年及衰尙戀戀此位何爲當以去就
爭之不可使 朝廷之法自我壞也余欽服其言以爲有古大臣
風 上亦重其品望誕日 賜內府梨園部曲以榮之然性多疑
忌考待下屬嘗於政事堂謂銓部選君曰汝部中皆賣法之人何
面目入此堂也以致激怒閤部司員皆欲挂冠去賴同事者勸諭
乃止故僚屬嗟怨不以實告兼京兆數載致延林清之變而公尙
不知也是日踉蹌入 朝履聲橐橐然向人語曰事出蒼黃我亦
無法措置昏然坐軍機處階上默無一語眾皆笑之卒以是免官
歸時囊無貨裝至賣書畫以行聞法時帆言公所著午風堂叢談
皆載近日士大夫嘉言懿行頗爲富溢近所刊本皆割裂故書爲

之實無足取也公善吟詩體裁正宗頗有隨州青邱遺趣實近日公卿輩所罕能也

右錄宗室昭棟撰

國朝耆獻類徵初編卷三十五目錄

宰輔三十五

百齡

覺羅吉慶

覺羅長麟

國朝耆獻類徵初編卷三十五目錄

一三九 - 八〇〇

國朝耆獻類徵初編卷三十五

通奉大夫前署江西巡撫江西布政使司布政使湘陰李桓輯

宰輔三十五

百齡

百齡張氏漢軍正黃旗人乾隆三十七年進士改庶吉士四十年散館授編修四十一年充文淵閣校理四十二年提督山西學政五十年改江南道御史五十五年丁父憂五十七年服闋補浙江道御史尋擢奉天府府丞五十八年丁母憂六十年服闋嘉慶三年補順天府府丞四年調奉天府府丞五年二月授湖南按察使十月調浙江按察使六年擢貴州布政使七年二月貴州巡撫常

明劫糧道孫文煥侵蝕賞卹征兵銀兩兼於糧臺委員名下虛填銀數朦混報銷並抽匿印領冊卷經百齡於到黔後卽行查出上嘉之嗣孫文煥控告百齡假公勒索並巡撫常明鎔賣軍需用贖鉛丸四十餘萬斤各款 上命侍郎初彭齡富尼善赴黔嚴鞫尋據奏常明鎔賣鉛丸屬實餘坐誣 諭曰此項鉛丸既經軍需用贖自應歸入軍需項下報銷乃因幕友金玉堂向來販賣白鉛竟鎔作鉛斤運往漢口發賣希圖漁利迨藩司百齡查知常明始應允照數買還散法營私行同市僧常明著革職至百齡於孫文煥所控各款雖審全虛但百齡既經查出常明欠繳庫項並縱令劣幕私賣鉛斤各款不卽據實參奏僅以催逼押繳完結意存瞻

顧巡撫實屬有心袒庇令初彭齡等於定案時治以應得之罪尋部議降三級調用上寬之十二月調雲南布政使八年擢廣西巡撫九年四月奏廣東合浦靈山縣民句結滋事竄入廣西博白縣境拏獲馮老四定幫林青上等六月奏越南夷人阮傑等前安置江甯時私買內地百姓爲僕攜帶還國路經廣西經臣查出後卽行截留照契價贖回送還原籍 上是之七月劾武緣縣知縣孫廷標屈抑革生黃萬璆等毀屍誣告冤擬絞候一案請將廷標革審 上嘉其到任未久能平反重讞 賞戴花翎並以廣西道府等官與孫廷標半屬舊識恐互相蒙蔽 命廣東布政使廣厚赴廣西隨同百齡鞫訊尋審明孫廷標殘屍滅傷任意藐法各情

特予太子少保銜十一月調廣東巡撫十年四月陸豐縣甲子
司地方會首李崇至句結土匪洋盜滋事飭文武員弁拏獲匪黨
二十餘名並疊獲甲子司著名夥犯四百餘名奏請分別覈辦閏
六月以南海縣知縣王軾番禺縣知縣趙興武玩視刑獄濫羈人
犯並任聽蠹役官媒私押男婦致斃多命偕總督那彥成列案參
奏命加一級以示獎勵六月擢湖廣總督九月兩廣總督那彥
成以已革南海番禺二縣王軾等稟百齡在巡撫任內用聯枷致
斃二命復派家人任二傳令兩首縣代辦供給並於升任時將署
內一切玻璃紫檀物件用人夫二千餘名搬運下船又以百齡在
巡撫任內曾與總督連銜具奏各摺百齡到湖北後將摺差截畱

僅錄 硃批行文知會等款奏入 命直隸總督吳熊光吏部侍郎托津馳往查辦十月吳熊光等奏百齡在廣東曾用聯枷及將摺差截留俱經供認惟在粵省起程時將署內各物搬運下船一節堅不承認請將百齡解任質訊 諭曰批迴奏摺既係督撫會銜則總督列銜在前自應先交總督拆閱卽因係巡撫衙門主稿先行拆閱亦應將奉到硃批原摺封交恭閱況百齡已升任他省並無應辦之責乃輒將粵省會奏摺件中途截留迨拆閱後又不將硃批原摺寄交那彥成閱看祇係恭錄知照安保其不意爲增減殊屬錯謬實不料其竟敢如此妄爲至各衙門所用刑具自有定制今百齡於懲辦棍徒輒用聯枷拘繫實係非刑但百齡款蹟

所重者總在逼勒二縣供給買辦臨行搬運物件一款見據百齡供認祇係在書院寓居十二日曾交二縣買辦食物業經發銀一百兩其預備輪傘等物亦有開銷公項銀六百兩若無別項需索何至二縣用銀一萬兩之多與所供銀數大相懸殊至任二供稱起程時曾將署中置備几案等項搬帶家眷船上若如所供則器具儘屬無多何以用夫搬運多至二千餘名殊難憑信不可不澈底根究百齡見已解任如審有婪贓款蹟卽將伊革職拏問並將任所資財查抄十二月吳熊光托津等奏據任二供百齡自廣東起身時眷船隨後行走將歷年積存之物並廣東署中原備器用私自搬取下船到楚後在漢陽李姓棧房安放百齡均不知情當

已逐件查出並將百齡署內物件亦行查封內有木器挂銚等項亦係廣東之物據百齡供稱俱係任二私自安放實不知情惟自認糊塗昏瞶等語 諭曰百齡平日爲人辦事朕所素知係屬精明之人非糊塗昏闇者可比伊於家人任二在漢陽寄頓之物卽難諉爲不知焉有近在署內毫無覺察之理況任二私帶物件自必私瞞伊主何以轉運進署內豈不慮百齡看出乎總督係關防衙門當物件搬運進署時百齡豈得諉爲不知所供明係支吾狡辯卸罪於任二至伊於任二寄頓物件內又自行指出紗格瓷器等一二尠舊價賤者認爲己物以見其餘各件與伊無涉此又係百齡巧卸之術豈能逃朕洞鑒看來不但伊署內查出之木器挂

證等件係百齡自行攜帶卽在棧房寄頓之物亦係百齡所寄不
過尙未運進衙署可令百齡據實登答毋許含混以致罪上加罪
且披閱單內有買房六處買地五十餘頃爲價不少伊出京時曾
聞其盤費不敷向人那借銀兩竟似清貧有素而見查出所置產
業如此其平日所爲恐未足深信見在吳熊光已赴兩廣總督新
任百齡著革職拏問交托津會同瑚圖禮提同伊家人任二及廣
東人證詳細質訊按律定擬具奏十二月托津偕新任湖廣總督
瑚圖禮審擬百齡截畱批摺製造非刑及令屬員代辦供應致家
人任二借端需索等款請將百齡發往伊犁效力贖罪 諭曰朕
詳加酌覈百齡所犯共係三罪其截畱批摺一事係前在廣東巡

撫任內會同總督具奏之摺雖係巡撫衙門主稿但伊列銜在後且已赴湖廣總督新任卽不得與聞廣東之事何得於摺差過境時擅給驛馬令齎赴武昌省城及拆閱後並不將原奉硃批移交廣東僅止照錄移文實屬非是姑念此係尋常摺奏並無密諭查辦之件因此洩漏事尙可原其製用聯枷一事在百齡原因廣東省民風刁惡以懲辦奸徒但究屬非刑有違定例設地方官因此效尤紛紛倣造並將尋常案犯一概施用率致枷斃豈非百齡作俑乎至伊令屬員代辦供應並失察家人借端需索一節百齡在廣東巡撫任內雖無婪索贓款但委交二縣代辦食物又不駁回鋪墊以致伊家人任二借端需索兩縣家人朦混開銷數逾巨萬

而於任二私帶傢伙物件前赴湖北寄頓隱匿毫無覺察見在抄
出任二物件俱係粗重什物若百齡意在貪贓則粵中珍玩細軟
可帶者多何必攜此累重之物乎是百齡委不知情所供尙屬可
信且伊自擢用督撫以來所到之處俱能實心任事整頓地方國
家辦理刑章入議中原有議能之條百齡尙可量加寬宥著免其
發往伊犁加恩在實錄館效力行走十一年三月 上以實錄將
次告成無須另行添派見在閩省臺灣勦辦蔡逆匪黨一切軍需
糧餉須人經理 命百齡隨領侍衛內大臣德楞泰馳驛前赴閩
省幫同布政使景安妥爲辦理五月 賞六品頂帶補福建汀漳
龍道十二年擢湖南按察使 賞加四品頂帶四月調江蘇按察

使十三年二月以病請開缺回旗調理 從之五月病痊補鴻臚
寺卿尋授山東按察使九月擢布政使十二月升山東巡撫十四
年正月 命百齡以二品頂帶兵部侍郎銜補授兩廣總督四月
劾前督臣吳熊光辦理英吉利夷船擅入澳門一事遲延錯謬請
旨加罪並請俟本年英吉利國貨船到時先期偵探預籌防範
事宜 上是之五月密奏粵東廢弛情形以粵海著名盜首如張
保存等幫船甚多夥黨幾萬餘人其所以有恃無恐者總因接濟
根源不能斷絕請令地方官認真堵緝並拏獲接濟盜匪及濫息
等一百餘名 上嘉其所見深得要領六月奏歷年粵洋勦捕匪
船米艇具有成效前督臣吳熊光以米艇不能遠出外洋請改造

登花船二十號茲查登花船難以購料請將原估登花船二十隻
工料銀改設大中小米船四十號以節浮費而便駕駛又吳熊光
原奏於遂溪縣東海地方設立專營在督撫各標內抽兵防守嗣
以東海不產輒木停止復請改募水師添船緝捕茲以新造米艇
二十隻在東洋巡防二十隻在西路洋面策應其配駕巡兵卽於
通省水師內按數勻派既可毋庸建立營汛亦毋庸改募水師且
陸路口岸防守緊要原議裁撤督標後營及提標兵丁之處本與
營制不符斷不可輕議裁革得 旨允行九月奏粵東鹽船多由
外海運至省河近因洋氛未靖鹽船涉歷外洋或被擄劫或畏怯
盜匪買照放行間有不肖船戶私帶水米濟匪獲利而內地一切

情形就中暗遞消息是鹽船出海實爲目前之大患請改爲陸運以杜諸弊 從之十一月奏賊匪張保仔恃眾時入內港焚劫大黃埔甚急臣會同水師提督孫全謀合擊先後殲擒盜夥二千四百餘名並張保仔之兄生仔及大頭目三十四名賊勢窮蹙冒死衝突各兵船於港口遙堵不能連絡攔截致首盜乘閒竄出外洋孫全謀坐失機宜功難掩過請治其罪 上以水師惟怯無能命將孫全謀革職拏交刑部治罪尋 諭曰朕聞廣東數月以來洋盜充斥因百齡到任之後更張過急查辦嚴緊故盜匪登岸肆行劫掠順德新會番禺香山東莞等縣到處皆有而番禺之三山東莞之瀝園鄉俱經蹂躪人口傷至數千尤爲慘酷前據百齡奏

國朝通志卷之二十一
派兵堵剿殲擒匪夥二千餘名賊勢是否稍斂並聞該督因籌辦太急心存焦憤見患失血之證殊爲垂塵該省積玩已久並非始於今日水陸官兵幾不知有緝匪之事奸徒地棍無往非通盜之人百齡力挽頽風認真整頓飭催官兵出洋剿捕將各處口岸防守嚴密水米不能透漏該匪無所存身鋌而走險始行撲岸焚搶此正因百齡實力經理方有此等情事見聞賊匪銜恨百齡竟敢攢湊花紅三十萬兩謀致該督殊深痛恨亦可見該督在彼實爲賊中畏憚賊匪不法至此安得不大加剿辦但積玩之後不能驟然整頓而全勝之法必須部署萬全此時總當將內河未淨餘匪先行悉數辦淨各處口岸加意嚴防不任賊匪乘間竄入再將水

師官兵次第整飭船隻礮械預備齊全方可隨時酌量機宜儘力
勤辦不妨從容布置轉不可存欲速之見且該督年逾六旬平時
實心辦公本不惜殫竭思慮此時焦急過甚深恐體氣不支尤當
加意自愛仰副委任十二月奏洋匪張保仔屢思內竄俱經舟師
擊退大幫洋匪郭婁帶等率夥眾五千餘人擒獻張逆匪夥三百
餘名呈繳船隻九十餘礮四百餘座悔罪投誠 諭曰廣東捕務
廢弛日久自百齡到任之後認真整頓嚴斷接濟簡練舟師用能
壁壘一新俾賊眾膽寒見在郭婁帶率眾投誠又張保仔自赤瀝
角遁出外洋之後希圖掠食直趨官兵屯劄之固戍地方欲圖攻
撲並經百齡督飭舟師及地方官兩次迎剿大挫賊鋒此外內河

積年兇盜向來爲害商民者亦經督飭地方官擒拏分別審辦本
日摺內卽有一百二十餘名可見其辦理認真無少疎懈實爲出
力可嘉百齡著加恩賞戴花翎並賞四喜扳指翎管鼻煙壺吉祥
牌四件黃辯珊瑚豆大小荷包以示獎勵十五年正月奏潮州府
屬洋面有烏石二等幫匪船在彼遊奕經總兵胡子鉉帶領舟師
分路剿捕擒獲盜賊六十餘名並奪獲礮械等件 上嘉之三月
奏粵洋巨盜張保仔香山二等畏罪乞降率其黨二萬餘人繳船
四百餘隻聽候收驗 諭曰此等降匪皆係伊等自行來投非由
兵威震懾所致卽該督等原摺亦稱其並未窮蹙是以此時不加
恩獎若能乘此大股解散之時將烏石二東海霸股匪悉數殲除

自當立沛殊恩用獎勤勞六月奏生擒積年巨寇烏石二等首夥
各犯並盜首東海新等悉數已降 諭曰粵東盜匪在洋面肆劫
已非一日百齡自簡任後實心經理振作有爲督飭舟師紀律嚴
明將弁等無不踴躍用命粵洋著名大股盜匪除投首外均已悉
數殲除全省洋面一律蕩平允宜特沛殊恩用昭懋賞百齡著加
太子少保銜賞戴雙眼花翎給予二等輕車都尉世職並賞給扳
指句環大小荷包八月奏粵東地濱海洋水陸營務甚繁非提督
一員所能經理請添設水師提督一員駐劄虎門地方左翼鎮總
兵請移改副將守備縣丞各員酌添兵丁以重邊防而專職守下
部議行十一月奏粵東鹽斤加價原爲捕盜之需今大小匪幫俱

已辦竣應請停止並以前因籌杜接濟將粵東鹽務奏改陸運今全洋平靜請仍海陸兼運以便商力 從之十六年正月因病奏請開缺回京調理 諭曰百齡自棄瑕錄用以來感激朕恩矢圖報稱經朕節次簡用兩廣總督彼時洋匪未淨百齡力肩重任銳意經營一切隨宜布置悉能殫竭盡勞年來賊匪窮蹙投誠其怙惡者亦悉行剿滅外洋全就肅清百齡勲績懋著經朕渥沛恩施優給輕車都尉世職錫予宮銜賞戴花翎伊感奮之餘宣力不懈復將內河盜匪以及陸路上匪設法偵緝次第辦理多案地方日臻甯謐海疆大有起色克副委任見在粵省善後諸事尙多正資其一力整頓今據奏稱上年十二月望後忽然心氣作痛寢食不

爾兩耳聽語不真非旦夕所能平復所奏自係實情朕垂廬百齡積勞已久當此患病之時再若櫻心公事難資調攝著加恩准其開缺並緩程來京俾得從容調理計百齡到京之時其病體自己就愈可資倚任所有刑部滿尚書員缺卽著百齡補授五月 上以百齡病體尙未全愈刑部事務較繁改授左都御史六月病痊授兩江總督時陳鳳翔奏五月二十四日夜大雨如注河水增長王營減壩土隄坐墊口門塌開八十餘丈七月鳳翔奏減壩口門大溜側注水深三尺有餘見在東西二壩裏頭盤就之後測量口門尙存七十五丈八尺若遽行收窄進占必致水勢擡高轉礙已成二段且恐正河水路不暢致有他虞此時惟先行趕集料物俟

秋汛過後再行堵築一面先同督臣前赴海口查勘下游情形

上以百齡平日辦事明決 命會同陳鳳翔詳細履勘將應如何

籌辦之處先行據實具奏以慰廑注尋百齡奏親赴海口查勘見無高仰形跡亦無攔門沙隄至其受病處在去年挑挖河身二段內積淤三千餘丈又親至馬港口以下見所積淤沙挑費更鉅且入海路窄從前數年總不能通暢兩相比較仍以修濬正河爲便並請將甞工尾以下河身加挑寬深兩岸接築新隄夯碾堅實再於七套地方增建減水壩及修復王營減壩復建磨盤壩等工上以所議均有條理 命百齡盡心籌畫又奏邳北綿拐山及蕭南李家樓二處隄工漫溢 命會同陳鳳翔嚴飭該道廳迅速堵

築八月奏李家樓漫口見寬至一百零一丈口門水深二丈八九尺不等急難堵合擬於大隄之外繞過圈築土堰接築東西壩基盤作裏頭以爲進占地步並築攔河壩以免停淤 上是之十月

諭曰本日萬壽之辰召見軍機大臣適據口奏百齡於九月十五日得生一子百齡年逾六旬望子甚切該督連年辦理地方公事實心實力有神封疆因得上蒙 天佑老年得子繼續宗支朕聞之甚爲欣慰著加恩賞伊子名札拉芬俾得健壯長成百齡奉到此旨必感激歡欣精神奮發專意辦公心力益臻周密十二月奏長河放水暢行王營減壩合龍穩固下游諸工一律完竣 諭曰王營減壩自五月間坐墊以來下游直至海口一帶逐段淤淺

經朕節降諭旨催令挑濬堵築百齡等欽遵辦理厚積人夫工料先將下游河身一律挑通一面將口門趕緊進占開放引河溜勢順暢茲於十一月二十七日挂纜合龍堆壓穩固其洪湖仁字壩先於二十四日堵合清水全出河口見在溜歸一處滔滔東注直達海口毫無阻滯而覈計工料所需較之歷屆大工復節省孔多辦理實爲妥速百齡自補授兩江總督以來經理河工不辭勞瘁前此各工漫口皆非伊任內之事茲督率員弁奮迅趨公調度有方勞績懋著百齡著加恩先行交部議敘頒賞御書福字俾迓吉祥並賞給金線蟒袍一件大荷包一對小荷包四箇節屆新春並加賞小荷包一箇內貯金銀八寶一分以示優獎見在李家樓工

程緊要該督當倍加奮勉務將挑工趕緊督催一面相機進占期於明年正月內奏報合龍屆時再膺懋賞又奏江南原設淮安府外河同知一員守備一員經營兩岸隄埝工程道路縣遠難以兼顧請於外河北岸添設通判一員守備一員與原設之外河廳營分管南北兩岸以專責成得旨俞允十七年三月李家樓大工合龍上以百齡督率有方辦事妥速交部從優議敘並賞四喜玉扳指鼻煙壺大小荷包五月奏南糧全數渡黃諭曰南糧幫船渡黃近十餘年來皆係於五六月間報竣本年四月二十八日卽行全數渡黃百齡自簡任兩江總督以來辦理河漕諸務俱有起色前已屢次加恩甄錄此次毋庸交部議敘該督年老得子

經朕賜名札拉芬著加恩賞給六品廕生俾得早膺頂帶俟年及歲時再行賞給差使以示推恩至意七月奏黃運兩河伏汎安瀾

諭曰本年江境黃河甫經挽歸故道伏汎疊次長水仰荷 昊

蒼默佑各工平順目下黃河尾閘通暢大有轉機惟洪湖爲清水總匯其節宣橐籥全在五壩啟閉得宜今五壩已壞其四惟餘智字一壩設遇湖水漲滿不足以資宣洩不特下河一帶橫遭淹浸而清水不能收蓄則淮黃倒灌接踵卽黃運兩河仍必日形淤墊此時大局應以修復五壩爲緊要機宜著該督趁此各工無事之時卽會同籌辦務使湖水啟閉由我可以放心收蓄永資以清刷黃之利八月奏陳鳳翔於禮壩要工自四月開放後並未親往查

勘迨至六月水已衝動壩下土石椿木道廢節次稟報始行察看
行至高堰仍不親身籌辦僅委遊擊陳岱堵築陳鳳翔復藉查陳
家浦堵工遠赴海口至八月始行赴壩並河庫所發禮壩工銀至
二十七萬七千餘兩之多仍未竣工清水大洩下河州縣被水成
災 諭曰陳鳳翔在河督任內上年王營減壩及李家樓各工漫
口皆其貽誤所致嗣經簡用百齡督辦將漫口次第堵合朕念陳
鳳翔亦隨同幫辦加恩賞給三品頂帶以觀後效乃陳鳳翔於禮
壩要工仍不及早親往籌辦因循貽誤糜帑殃民著革職畱於河
工當差嗣百齡因禮壩急難堵合復劾陳鳳翔急開壩於前遲閉
壩於後以致辦理棘手請將陳鳳翔嚴加議處並自請議處先是

御史吳雲馬履泰劾奏任用朱爾賡額貪黷侵欺所舉劾多失當
敕下松筠等就近密行查訪 諭曰朕於百齡獲罪仍加恩畱
任者原以人才難得覈其前後功過權衡斟酌一秉至公毫無曲
庇百齡之心今該御史又有此奏豈可不查明覈辦松筠初彭齡
平日辦事公正此事仍交伊二人確查如吳雲摺中稱朱爾賡額
貪黷侵欺如此不肖百齡倚爲用人卽有不可問之處等語朱爾
賡額爲百齡信用是平日有納賄交通情弊又摺內稱百齡於屬
員意爲喜怒保舉參劾俱多失實不問可知等語並著松筠等詳
查百齡在兩江所舉所劾各員何人毫無勞績百齡受其重賄濫
行保薦何人懋著勤勞百齡任性憎惡屈抑參劾松筠等到江已

經月餘於百齡官聲事蹟自必有所聞見著於接奉諭旨後先行
據實覆奏仍一面密查確訪如查有前項真實款蹟卽由四百里
嚴參候旨交伊等審辦嗣經松筠等覆奏遵 旨查訪吳雲原摺
所參毫無確據良由毀譽之詞出諸恩怨之口實不敢以無據之
言妄行入奏 諭曰松筠等二人平日辦事公正眾所共知今所
言猶如此豈能據馬履泰吳雲二人空言搖惑卽將百齡斥辦耶
總而言之百齡實屬有爲之臣朕非輕言所能搖惑之主百齡將
來能永承恩澤與否朕不能保此時不能再加重譴以遂讒譖之
奸十八年三月偕河道總督黎世序奏仁義禮三壩近年屢經開
放衝跌壩基損壞刷成深塘難以修復請於蔣家壩以南附近山

國身書局藏書
卷三十一
岡之處儘先仁義禮三壩並挑挖引河三道儘先改建仁義二壩
將禮壩基址築作草壩以備本年宣洩並繪圖貼說進呈 上以
地基所奏未能詳晰飭令再議尋復加履勘力稱穩便 命卽照
所請改建九月 賞還頭品頂帶 命協辦大學士時直隸長垣
縣匪徒滋事竄赴東省曹州一帶百齡接准山東巡撫同興知會
卽派弁兵於江蘇安徽兩省交界地方分路協防就近選帶標兵
數百馳赴徐州察看情形相機籌辦奏入 上是之十二月奏籌
辦撤兵歸伍及邊防善後事宜 諭曰滑縣克復並無餘匪竄出
各省邊界防兵自應撤回歸伍該督以邊界甫經輯甯尙資彈壓
請暫畱兵一千二百名在彼駐防亦係慎重之意但亦不必遲至

二月該督察看情形如地方甯靜於正月內全行裁撤以節勞費
十九年二月請於江蘇各當舖按照成本多寡將息銀輸納二成
以捐輸之次年爲始分作五年卽於各州縣每年所徵錢糧內就
近照數給還並請於出資開當之本商有職銜者按等酌予加銜
無職銜者查明量給頂帶奏入 諭曰國家理財利用政有常經
卽權宜取濟亦當酌事理之平今該督等欲按當舖商成本責以輸
納又恐取民非制令五年如數給還無論一出入甚滋繁擾試
思地方官勒借所部財物尙干功令況以經國之需而謀及庶人
不已褻乎至仕宦家固亦有治生營運者然此輩大概市僧居多
強其所不欲而濫給名器亦太不計利弊輕重矣百齡由翰林出

身歷任封疆至協辦大學士不應識見庸陋爲此不學無術之言
除所奏飭駁外仍交部議處八月兵部尙書署江蘇巡撫初彭齡
奏請查辦各屬虧空 上以百齡初彭齡皆係實心任事之員
命會同查辦分別情罪輕重酌擬章程開單具奏九月以巡撫張
思誠已赴本任 命初彭齡於交篆後暫畱蘇省會同該督撫詳
悉妥辦嗣初彭齡百齡張思誠先後將查辦虧空之事各擬立章
程十條具摺人奏 諭曰初彭齡百齡張思誠平日辦事俱尙公
明是以此次江省虧空令伊三人會同查辦定立章程初彭齡等
自應和衷彼此共同商酌卽稍有意見不同之處亦不妨據理折
衷期於同歸一是乃初彭齡不待商定先於本年本月二十日自

將章程具奏彼此齟齬大乖公忠體國之義除將伊等各擬章程
派托津曹振鏞等妥議具奏外初彭齡百齡張思誠俱著傳旨申
飭尋初彭齡參奏百齡於兼署巡撫時管關道員鍾琦曾幫貼摺
差盤費銀一千二百兩並風聞百齡收受永豐壩泰壩委員餽送
銀二萬餘兩 命大學士托津戶部尙書景安馳往清江查辦先
是十一月百齡奏兩淮運使廖寅之子廖思芳拏獲林清案內逆
犯劉第五旋經解部鞫誣 命托津景安訊擬江蘇原審各員罪
諭曰百齡於此等重案不詳慎嚴鞫率以廖思芳恐嚇教誘供
詞冒昧入奏若非部臣平反幾成冤獄百齡不必交部議著革去
宮銜協辦大學士暫畱兩江總督之任二十年正月托津等奏查

明巡撫衙門提取兩關銀兩係相沿陋規由來已久此次百齡署
巡撫時曾因蘇屬出差兵丁口食不敷由藩司議詳在海關提銀
一千二百兩揚關提銀八百兩發縣生息以資津貼至兩壩解送
總督衙門銀兩係奏明批解公費此外百齡並無收受餽送情事
諭曰初彭齡原參摺內據稱百齡需索提用銀數係由藩司常
格告知經朕派軍機大臣傳到常格兩次詰訊常格堅稱並無此
語初彭齡奏事不實咎無可辭著交部嚴加議處百齡提取兩關
稅項銀兩發縣生息以資兵丁差費雖係以公濟公惟率據司詳
並不奏明辦理究屬不合著交部議處四月湖廣總督馬慧裕奏
江夏漢陽兩縣先後檢獲悖逆字跡三紙內有白陽立業聚會金

陵等語 諭曰前年逆案卽係白陽邪教今逆詞又以白陽之名
惑眾而起事之處獨指江甯地方畢竟白陽邪教黨羽伏匿在彼
著交百齡密訪嚴查畱心緝獲五月御史石承藻參奏湖北襄陽
府知府王樹勳原係京城廣慧寺僧法名明心後因犯禁遞解還
俗隱匿罪名混捐官職得 旨革職交刑部審訊 諭曰聞百齡
前在京師曾與明心識面後來百齡在湖北緣事來京之時王樹
勳正在楚省百齡曾令其起課占問休咎彼時百齡是否知王樹
勳卽係明心僧抑或但知其爲楚省官員並未識蹤跡著百齡卽
據實具奏尋百齡覆奏前在御史任內曾在廣慧寺與僧人明心
談禪丁母憂又曾就廣慧寺念經後在湖北令王樹勳占課時實

知王樹勳候補同知並不知係僧人明心請交部議處 諭曰百齡在楚省接見王樹勳之時事隔十餘年王樹勳容必更換伊既未述及前事百齡一時不能辨識亦屬情之所有至拜懺占課均例所不禁所有百齡自請議處著加恩寬免前百齡以私行拾獲逆詞並查辦情形呈奏 諭曰朕加披閱詞語悖逆已極末又將劉伯溫張百齡方維甸名字並列情殊險惡此項逆詞其布散既廣必非一二人所能爲看來並非僅爲挾讐傾陷而起必有蓄意倡亂之人糾結黨羽潛匿江境謀爲不軌先以此帖布散以惑人心百齡等必須速辦切不可視爲細事稍存大意以致日久釀成事端至百齡與方維甸皆總督大員乃逆詞內竟敢如此誣陷此

事朕萬無加疑之理但百齡被人誣爲叛逆伊尙何地自容該督查辦此案不惟以國事爲重直當忿切私仇必期得罪人而後快六月御史高翔麟奏江淮一帶私販鹽斤有巨梟窩藏淮徐廬鳳多有拽刀手等匪徒應設法訪拏 諭曰江省私販充斥自必有窩藏之所拽刀手招集匪徒結盟訂會尤易逞兇滋事皆不可不嚴拏懲辦況見在江南一帶散布逆詞若不上緊訪拏恐有潛匿逆謀之人與此等鹽梟拽刀匪徒暗引勾結百齡前因逆詞內有誣陷之語奏稱接閱之下不禁切齒恨不立時碎剉其屍語意非不憤激而數日以來未見拏獲一人亦未將緝捕情形具奏百齡曾經人誣以貪婪尙覺顏變愧生豈被人誣爲叛逆有不忿切私

國朝名儒類傳卷之三十一
二
仇欲得罪人而甘心若口是心非虎頭蛇尾因循怠玩意存消弭
自問爲何物耶著百齡與張師誠督飭所屬密訪嚴偵務期迅速
弋獲九月奏派文武官員先於和州地方緝獲散布逆帖人犯嚴
士龍究出編造逆詞首犯方榮升卽於巢縣拏獲並於窩藏方榮
升之朱上信家起獲九龍木戳及偽造時憲書悖逆經卷字跡四
箱 諭曰百齡督緝認真能將逆犯訪明蹤跡嚴密捕獲實屬可
嘉著加恩賞復太子少保銜並給還雙眼花翎仍交部議敘尋奏
拏獲首逆方榮升究明造意謀逆散帖惑眾各確情並獲夥犯一
百五十餘名 諭曰此案方榮升罪大惡極覆載不容雖在百齡
所管境內該督能督率所屬訪查破案將首從各犯同時並獲俾

國法早伸人心胥靖實係百齡之功百齡見係二等輕車都尉世職著加爲三等男並賞給吉祥如意玉牌一面白玉翎管一箇四喜扳指大小荷包共十事其子扎拉芬前曾賞給六品廕生著加恩賞給五品以示優獎九月奏感受風溼未痊請派員代辦武闡上命其安心調攝照常辦公十月奏患病未痊請假一月調理諭曰百齡前患胃痛病證近復感受風寒著加恩賞假調理不必拘定月日兩江總督印務著松筠馳驛前往署理十一月卒諭曰兩江總督百齡簡任封疆歷有年所辦事認真不辭勞瘁伊年逾六旬精力素強正資倚畀乃積勞成疾昨因患病請假特派乾清門侍衛帶領御醫前往診視茲聞溘逝殊深軫惜百齡著賞

還協辦大學士派乾清門侍衛博啟圖馳驛前往祭奠並帶同伊弟碩齡桂齡一并馳驛博啟圖事竣後先行回京桂齡碩齡在彼料理伊靈柩到京之日准其入城治喪屆時著軍機大臣奏聞朕派皇子至伊家賜奠任內一切處分概行開復所有應得卹典該部察例具奏伊子扎拉芬卽承襲男爵俟年及歲時再行當差二十二年正月 諭曰上年曾經降旨俟百齡靈柩到京准其入城治喪並著軍機大臣屆時奏聞派皇子至伊家賜奠昨據松筠奏徐州屬邳州貧民捫路呼號懇請撫卹事關民瘼前此百齡在徐時未能查辦周詳使其尙在必當治以應得之罪今已身故姑免追究伊靈柩到京毋庸奏派皇子賜奠准其入城治喪尋照例

賜祭葬 于諡文敏

右 國史館本傳

嘉慶二十一年十月兩江總督百公以疾聞 上命乾清門侍衛
率尙醫馳傳問視至日公薨 天子覽遺疏垂淚悼惜復協辦大
學士命理藩院侍郎博啟圖偕內閣侍讀學士公弟桂齡往奠禮
臣議卹 予祭葬諡文敏明年春公弟遵 恩旨護柩回京城治
喪越二十四年四月公子扎拉芬謹修 賜坐於東直門外駝房
營之原屬文貞珉以光揚休命伏念公才猷事功恭見於 寵綸
褒答一則曰國家柱石當代名臣一則曰鍾上蘭之秀氣生甫申
之良才煌煌乎彰信國史榮矣備矣寶伊古儒臣所未有更何文

之足云第天下後世之聞而驚歎慕思者咸知 聖人保一个臣
之恩而未由知公享千秋名之實爰詮次行履而質言之公諱百
齡字子頤號菊溪本姓張氏居遼東先世從龍入關隸內務府正
黃旗漢軍徙居熱河張三營祖應魁以武起家官直隸宣化都司
教諸子習文學父法良中乾隆甲子舉人官山西嵐縣知縣歷河
南陳州府知府方陳州公讀書宣化歲戊辰四月朔都聞公夢偉
丈夫持權衡入室覺而公生喜曰此大吾門子也幼穎異隨嵐縣
肄業長益奮發有文名中乾隆戊子舉人壬辰進士以二甲選翰
林授編修充四庫全書提調丁酉分校順天鄉試甫出闈 簡授
山西學政三晉文章風尚素所稔知陳州公宦彼十餘年德施在

人口公按臨所及人競攀與望景猶以公子稱之任滿還朝改江西道御史調京畿道持陳州公服壬子補江南道擢奉天府丞兼學政名不與開列而膺是命公之承異數始此尋終母李太夫人服嘉慶戊午今上御極之三年補奉天府丞兼學政己未調順天府丞兼署府尹庚申投湖南按察使辛酉調浙江遷貴州布政使壬戌調雲南癸亥擢廣西巡撫以平反武緣民枉死獄上嘉異之加太子少保賜孔雀翎調廣東巡撫甲子擢湖廣總督楚多劇盜公下令悉力擒捕行以便宜江湖千里如枕席莅楚三月以撫粵東失察家人事落職按驗上悉察而原之命來京效力史館丙寅命馳赴福建總理軍糧事竣賞六品頂帶補汀漳龍

道丁卯遷江蘇按察使己巳病假回京補鴻臚寺卿授山東按察使擢山東布政使山東巡撫再擢兩廣總督自是上知公者深信公者篤而倚用公者亦日益殷矣粵洋久不靖巨寇張保仔挾眾數萬勢甚張公至奏撤沿海商舶禁斷消賊濟水諸弊籌饋餉練水軍懲貪去愆每一檄下耳目震新又巡哨周嚴遇盜輒擊之沈海羣魁奪氣有投順意揚言必制府親臨驗誠否衷甲頓息以待實藉爲嘗試地公聞疾驅小艇放洋從數人往坦然示以不疑及彼張保仔率眾陳巨艦數百殿轟如雷煙燄蔽天日跪船頭作迎迓狀公危坐舟中屹然不爲動麾左右呼張駛近前曉以利害見者莫不睚眦膽落詫爲天人惟面縛乞命公立撫其眾許奏乞

貸死歸誠旬日閒解散殆盡收船械無算復窮治別股巨寇烏石
二等以次就獲全海肅清 上愈嘉異之復太子少保賜雙眼翎
加世襲二等輕車都尉辛未再以疾告回京補刑部尙書調都察
院左都御史兼正白旗漢軍都統未匝月江南王營減壩漫口工
興授兩江總督屬一力治河公之官京師也壯歲有子不育時塵
垂詢是年九月舉一子 上喜賜名扎拉芬奏謝荅以天賜麟
兒語臣僕之愛家人之誼迥異前聞壬申大工合龍疊荷 殊獎
並以漕艘渡黃遄速賞公子六品頂帶癸酉拜協辦大學士管兩
江總督公之治河也首治積年未疏之海口海口大暢乃求效於
河大要以謹守束清壩爲第一義撓令者必重創之盡瘁河干者

五年黃流迄無倒灌患卽盛漲亦晨長暮消恬瀾偉功至今老兵猶言之泣下甲戌以事劾免按驗無實畱總督任 上曰總而言之百齡實屬有爲之臣朕非虛言所能搖惑之主公聞仰天搏頽嗚咽不能起立嗚呼公之志苦矣江省有莠民散逆詞惑眾偵刺久無蹤公日憂急 上亦切督公乙亥夏一日召機幹將吏三數人入密室給契箭一枝令曰某已廉得逆犯主名可速往某處掩捕稽緩一時者斬疏脫一人者斬如公教果獲方榮升等首從百餘人械送轅門讞實抵極法無漏網者 上重嘉異之謂實能秉正祛邪厥功甚懋復太子少保 賞還雙眼翎加世襲三等男公子官五品旋兼署安徽巡撫九月歸積勞成疾喘欬不休力請開

缺回京 上深憐而勉慰之以大學士松公往代其事仍命公在
江省調理俟瘳回任迨 賜醫至度不起口授遺疏遽以十月十
八日薨軍民巷哭不絕 詔命軫卹重累而下公生平承異數者
終此享年六十有九配邱氏封一品夫人子一周夫人出銘曰
奕奕張星互霄而出結體光大寒芒正色不知公者謂有機心其
知公者謂此孤忱治獄無冤治盜無叛天下幾事手扶清晏晉陽
家教遼陽地靈以身許 國臣力所能不將而將不相而相終始
恩全青天何謗一蹟再奮公默咎矣積忠爲勞公格壽矣唐詔
李靖史亦有言君臣如此慟入九原子祿之榮男邦之采睨公神
遊江湖河海麟冢嵯峨松柏婆娑銘鐘勒鼎千載不磨

右墓誌銘劉鳳誥撰

百菊溪齡張姓內務府人成壬辰進士館選編修嘗領署事阿文成公見曰公輔器也異日功名當不在老夫下其後官階踳躓遭遇科道者二十餘年公頗熱中缺望韓旭亭師嘗曰大器晚成公無須躁進也 今上親政後立擢山東按察使不數載遂至封疆公性聰察遇事敏幹賞識人材如朱白泉廉使爾廣額温泉使承志皆拔自微員故人樂爲之用以集大勳其再任粵東時百姓匍匐庾嶺以迓其蘇蓋恨其來遲也時海盜充斥連檣百艦出沒波濤聞人莫敢攖公任温朱二公入盜艦中說匪首張保降保觀望未果朱覘知其妻鄭一嫂頗勇健保素畏之乃以賂資百萬饋之

曰百公良吏非前誘降以邀功者時不可失也温山右人故年少
美麗遂誘鄭鄭因慨然曰同輩中幾見有白首賊耶縱微公至妾
亦解甲降矣乃說保曰吾所以贊汝者以汝有丈夫氣也今察之
非知時事者向來海上諸雄所以能肆掠者蓋因督臣懦弱不敢
猝撻其鋒今百公健吏反前所爲必欲盡殄滅其黨類以報天
子今不及早稽首軍門則其兵朝暮下汝輩儼如齏粉妾不欲同
君盡也請自今始斷其稿袂各行其志可也保懼因同鄭降公復
督率將帥攻匪烏石二礮石驟發匪艇皆傾糜海水爲之色赤粵
東洋匪盡殲實海上第一功也事 聞加公宮保銜 賜雙眼花
翎朱温諸公 賞賚有差公貌岐嶷面如削瓜雖談笑閒而凜然

有忿狀使人望生畏心初任封疆以廉直自矢下民以包龍圖比之逮夫名譽既彰乃改初節又賄結權要偵探 祕旨然後傳會迎合故人莫敢撓其鋒銳初頤園大司馬彭齡素不直公所爲因巡察江南時露疏劾之 上命重臣往查虧帑公左右阻袒初卒以不實罷職人頗不滿公所爲也嘗爲御史吳雲參劾終莫能害丙子冬以勞瘵死 上下詔褒寵之繼以諱災爲松相公所劾始罷其奠醊焉

右錄宗室昭樾撰

百菊溪制府撫粵時多惠政而嚴禁班館重懲蠹役一節尤得民心班館者蠹役私設以羈畱犯事及訟案牽連之人也公在任數

月滿兩湖總督去之日士民遮道留肩輿不得行至夜乘馬出城
乃登舟後復奉命督粵先聲奪人海盜望風有降意於是巨盜
張保首先乞降公許之保懼誅未敢遽進請公出海招撫願望見
顏色乃降旁人謂公不宜以貴重之身蹈不測公曰粵人苦海盜
久矣今既乞降若不開其自新之路海氛何時息乎既招撫之卽
宜坦白待之使不生疑懼遂單舸出虎門時盜船數十艘隨張保
來環公船公神色不動命張保過船進見好言撫慰之獎勵之並
以所用之物賞之保於是率眾降公卽奏請旨賞給頂帶因命
張保招降巨夥烏石二烏石二猶豫未決公以計誘至雷州斬之
並斬爲從者百餘人餘黨釋之粵海巨盜悉平二十年來沿海居

民及商船來往安然無患者公之力也

右聽松廬文鈔張維屏撰

嘉慶乙丑六月二十六日菊溪百公調任兩湖總督有感 思紀
事詩四首錄第三首云不教藏過宰官身夾路香鐙照水濱豈有
去思畱異日從來直道在斯民同其好惡情能洽釀以詩書氣自
醇付與諸公勤撫字未妨單騎出城闌公去任之日士民遮道畱
至夜公乘馬出城故有結語

右聽松廬詩話張維屏撰

先生文名久超流輩復研貫史冊經濟宏深名稱益著時當路方
用事頗欲延攬英賢以峻聲望乃先生官閒於雲操尙愈厲觚稜

自喜不屑轉圜以故株守冷局者十有餘年

右嵩齡序略符葆森錄

菊溪相公節制兩粵時洋盜猖獗公勦撫兼施生擒麥有金烏等
全海肅清 上特晉宮保銜賞戴雙眼花翎公時尚未有子蒙

恩世襲輕車都尉異數也公有紀事詩八首

右臥園詩話潘煥龍撰

覺羅吉慶

覺羅吉慶正白旗人江甯將軍兼散秩大臣騎都尉覺羅萬福子由覺羅官學生考授貼寫中書乾隆三十九年補中書四十四年擢侍讀四十八年授江西道監察御史四十九年命巡視通漕五十年襲世管佐領又襲散秩大臣騎都尉五十二年授鑲白旗蒙古副都統八月遷內閣學士五十三年二月調鑲黃旗滿洲副都統十一月擢兵部右侍郎五十四年轉左侍郎五十五年六月命赴山東鞫平度州獄七月赴湖南鞫湘鄉縣糧書需索案九月赴湖北鞫應城縣倉書浮收案十月鞫江陵縣書吏偷減土方案各得實以聞五十六年六月赴河南鞫光山縣獄奏劾光州

牧玉山以瞻徇所屬庇役改供黜職 上寤之九月調戶部侍郎
十一月署山東巡撫旋實授五十七年春饑奉 旨截漕米三十
萬石自臨清運至楚旺以濟民食吉慶請將豫東二省軍船全行
撥運以免另雇民船俾商販得以常通物價不致騰貴 上嘉其
諸事畱心五十八年調浙江巡撫奏浙省海洋界連福建每當南
風順利閩省魚船多赴浙江洋面採捕魚盛則獲利益偶然乏食
則搶劫客商而本地船戶在洋相遇亦有被誘入夥者然時散時
聚並無一人聚集停泊之所諳弭盜之法全在編設島嶼保甲使
無處藏匿以杜其蹤嚴禁偷米出洋以絕其食嚴緝代賣盜賊使
無從銷變稽察出口照票以杜混冒 上從之五十九年六月義

烏奸民何世來聚眾不軌其逆詞吉慶未經入奏 上諭責之吉慶請治罪下部議處是月兼署浙江鹽政並織造六十年正月奏獲臨海逆匪李鶴臯倡立邪教拒捕毆官審明抵法 上嘉其爰速四月奏閩省漳泉米貴吉慶飭沿海各縣遇有閩省採買無許居奇阻遏並將各州縣倉穀屢米十萬石運濟 上是之飭部優敘五月兼署浙江提督十月以浙江通省歲收豐稔入 奏詔吉慶勸諭小民共敦節儉使閭閻家有益藏以爲耕九餘三之計十一月奏緝獲積年洋盜陳言等審明抵法下部議敘嘉慶元年五月劾鹽政岳謙任性執拗官商交怨謙罷 詔兼理鹽政印務六月授兩廣總督十二月劾提督路超吉不勝任 上嘉其公當降

超吉爲總兵二年三月兼理廣東巡撫時狎苗未靖粵黔界隔一江西隆州之平廣亞稿遮逢那地等寨匪徒潛與旬結竄踞八渡一帶吉慶與提督彭承堯酌調勇幹將領弁兵集西隆舊州先派員弁密帶義勇探路集官兵一千一百名於四月二十子夜令都司井決泉帶兵由石廠威楚一路至祥讀山梁靜候都司和順武佟樞效力革備馬國良分兵由大雅山後十里板堅坡兩路進發派副將王模都司李林貴率兵至弄江村口山梁堵截以壯其勢吉慶於後路督兵接應提督彭承堯由中路前進黎明抵八渡槍礮齊發苗匪潰竄進剿百扣板雅委后等處我兵據八渡百扣各隘守之翌日吉慶馳抵泗城令參將穆克登布駐守西隆新城其

凌雲縣屬之百樂一隘路通泗城苗匪偷渡滋擾吉慶令副將德昌等馳勦苗匪順流潰逃仍於黔岸結寨抗拒德昌等分三路直撲賊寨賊匪北京我兵奮追十餘里燬大小苗寨一十九又派守備羅嘉升勦捕來朋坡迓等村斬首五十一生擒黔苗三人六月進攻亞稱副都統和星額提督彭承堯分路前進吉慶領兵在後路策應行至夏雄苗匪千餘人迎敵我兵三路攻撲用槍礮擊斃六百餘人燒寨三藝房數百間提督彭承堯由八達行抵安那苗匪以木柵截其山梁路口都司羅嘉升等領兵勇分三路斫柵前進槍斃苗匪數百顛坑落谷者無算燒寨內藝柵二十餘座吉慶與和星額乘勝進攻永豐州苗目黃管舍班抱番先爲南籠逆苗

所脅以所管十三寨渡江降又百樂苗目王當亭羅管面亦以所
管十五寨渡江降吉慶令給酒食並書降苗字布條給令回寨
上諭吉慶迅速渡江永豐等苗目妥爲安插尋因亞稿正路過險
艱於進取令各兵於隘口佯作攻擊勢吉慶選精卒由小路乘夜
躡山前進直抵亞稿壓攻提督彭承堯由南路進賊於對面暗伏
千人槍石並下彭承堯搶占山梁擊殺賊三百餘吉慶見賊已失
險督兵由東面直進和星額督兵由西面夾攻彭承堯亦由山梁
壓下各拋火彈燒其寨屋殺賊千餘生擒六十九名餘匪突煙冒
火而出死者甚眾賊首龍登連先於溝內逸出亞稿平奏入 諭
曰西隆州亞稿寨苗匪勾結黔苗聚眾滋擾經吉慶等督率文武

將弁分路進剿埽蕩賊寨復帶兵渡江會剿黔苗即可蕩平吉慶
調度有方宜沛殊恩用昭懋賞著加太子太保銜 賞戴雙眼花
翎亞稿之克也有狹野狹周何馬老藤等十餘寨悔罪投誠其附
近亞稿之那地小河廣平蒙里等處尤險峻苗匪樹柵壘石抗拒
我兵分路進攻和星額由東柵入彭承堯由西柵入吉慶率將弁
攻其北柵斃賊二百餘出示招撫有八芒弄深官塘夏貴夏農隘
苗人千餘戶降而小河上下馬蟻石板等寨仍多黨惡助勢令遊
擊唐光茂等搜擒拔其寨會勒保已解南籠之圍渡江會剿盡克
之七月龍登連父子投首粵境肅清十月疏廣州駐防漢軍孤貧
請給銀養贍 允之四年劾濫押斃命之英德令陳寅 上以擬

國朝通志卷之三十三
罪輕縱傳旨申飭五年二月兼署廣東巡撫時博羅令丁大松下
鄉催科百姓與役互鬪毀令輿昌化縣役值科徵收過刻民人控
府飭責役昌化令張聚奎不遵行民人騰怨毀役屋 上聞之詢
吉慶吉慶以實奏 諭曰可見朕訪聞不虛安用此督撫爲耶五
月疏靈山匪徒林大懋捏造諭單門牌糾眾誑騙官兵捕獲審明
抵法 上是之十月陽江匪徒關定進糾眾結盟武生關元爵訪
聞蹤跡往捕吉慶請給外委銜令入伍 上從之六年四月授協
辦大學士仍畱兩廣總督之任五月疏添兩廣各營額此外委議
行八月以辦理秋審失入五案部議黜職 上念其平日辦事認
真畱之七年疏陸豐甲子司地方濱臨洋面地廣人稠巡檢一員

稽察難周請將惠州糧捕通判移駐議行七月 上聞博羅縣重
犯越獄按察司陳文等扶同徇隱又粵東賊罰銀兩按縣攤派批
解臬司作爲陋規等事 命吉慶密查尋吉慶奏皆實於是按察
使陳文原任按察使吳俊俱治罪如律議革吉慶任得 旨免之
是月博羅縣羊屎山匪徒陳爛屐四結拜添弟會糾眾擄掠吉慶
調兵勦捕匪徒千餘迎敵官兵奮擊生擒黃大晚訊得實八月提
督孫全謀副將李漢升分東西兩路進攻孫全謀由伯公凹至響
水地方斃賊七百餘生擒四十九名獲槍旗器械無算李漢升由
派尾至羅溪營山後斃賊十餘生擒二燬賊莊一座翌日進攻羅
溪賊千餘由山頂壓下我兵擊退之先是龍門縣屬之鰲溪爲羊

屎山後界吉慶派兵堵捕前後擊獲僞二大王黎亞瑞一名匪徒五十七名奏入 上嘉其所辦妥速九月吉慶會同孫全謀由響水地方進攻羅溪賊巢毀寨二擊斃百餘人生擒七十餘乘夜進攻華首臺先用大礮轟擊率兵搶上山梁殺賊千餘名生擒三百名并殲僞軍師謝元光焚其巢守備鍾鳴貴於周山獲解陳爛辰四審明寸誅 飭部優敘十月博羅賊匪復旬結永安匪徒官粵龍於大鍾嶺抗拒官兵吉慶以兵力不敷檄調江西兵二千 諭以書麟奏備滿洲兵一千五百名何不卽行調往乃舍近圖遠於相隔千餘里之江西贛州調兵來惠豈能速至吉慶何一無籌畫至此著傳旨申飭尋奏官兵攻義容墟各匪畏懼匪首曾清浩帶

匪徒入寨及脅從者四千餘人來營投首并繳器械當將會清浩等留營其餘分路安插提督孫全謀搜獲僞元帥薛文勝薛成宙僞先鋒糧官總督千總共二十三名管押分別審訊匪夥四百五十四名均經正法 上以吉慶辦理會匪一案節次奏報張皇冒昧革協辦學士仍留兩廣總督之任 諭曰該匪等既被官兵攻剿情急投誠吉慶應將接仗情形敘入并向訊取供詞及如何安插之處詳悉具奏候旨乃率以數語籠統聲敘究竟曾清浩因何投首伊帶四千餘人是否均經從逆何以遽肯投出且所稱將會清浩等留營一語更不可解該匪等聚眾謀逆今畏懼投出不過貸其一死足矣乃該督輒許留營豈欲藉爲差遣之用乎至孫

全謀搜獲僞元帥薛文勝等二十三名薛文勝僞稱元帥在賊中自較兇悍豈有束手就縛之理官兵搜出時曾否抗拒打仗其夥匪四百五十餘人曾否抗拒官兵亦應詳訊明確乃僅以均經正法一語了事難保此數百人內竟無濫殺之人朕將從何批示耶吉慶復奏臣於十月十七日行抵義容墟首匪官粵龍賴東保率夥匪千餘人投首並繳器械詳加研訊其悔罪投誠實出至誠惟前後投誠首夥人多必須分別辦理擬將曾清浩三人酌量地方妥爲安插其夥匪及脅從者查明安插甯釋 諭曰曾清浩等糾眾滋事擾害地方抗拒官兵此皆倡亂匪徒罪不容誅卽因自行投首量予末減吉慶亦當訊明情節將該犯等應得罪名擬奏候

朕施恩豈有遽稱妥爲安插之理且該犯等肆行焚掠各村墟均
遭蹂躪如將赦免則受其荼毒者何辜況被擾地方百姓銜恨者
多設遇該犯安插到彼心懷報復豈不又滋事端乎吉慶久任封
疆於辦理會匪毫無把握著傳旨嚴行申飭旋命廣東巡撫瑚
圖禮將會匪如何起事吉慶孫全謀如何搜剿據實密奏復命
內閣學士那彥成馳赴廣東查辦尋降旨革吉慶雙眼花翎暫
畱頂帶解任交瑚圖禮那彥成質審十二月初九日瑚圖禮奏吉
慶自戕身故上命那彥成查詢有無受屈不平之事奏入諭
曰吉慶平日居官廉潔辦事尙無貽誤前因辦歸善博羅永安會
匪奏摺總不明晰前後自相矛盾朕恐其有濫殺激變及有心疎

縱情節令那彥成查訊復因永安首匪曾清浩等三犯投出後吉慶不行定擬奏請安插辦理謬誤將伊革去協辦大學士拔去雙眼花翎並解兩廣總督之任旋據瑚圖禮奏稱吉慶自戕身故更堪駭異茲據那彥成查歸善博羅會匪竇係叛逆吉慶帶兵攻剿殲厥渠魁餘黨瓦解地方遂得平靖吉慶辦理此案並非濫殺激變惟曾清浩等各帶百餘人投首而吉慶則奏稱曾清浩率夥投出四千餘人官粵龍賴東保率夥投出千餘人其官兵攻剿天字嶂賊匪一節並無其事率聽員弁稟報之詞遽行入奏並將永安投首賊目概予甯釋加以賞賚以致民心不服紛紛控訴吉慶慚畏交并因病後糊塗自尋短見吉慶平日素有廉名卽此次獲咎

亦不過革職或發往新疆效力何至遽爾輕生既經那彥成查明委無別情亦不必追論著那彥成傳知伊家屬扶柩回旗並將吉慶前後獲罪及身故緣由通諭知之子四壽喜原襲散秩大臣騎都尉尉坐事革職尋賞藍翎侍衛復革常喜見襲散秩大臣騎都尉尉安喜候補筆帖式全喜監生

右 國史館本傳

粵東制府爲天下繁華之區居官者無不窮奢極慾搜括明珠翡翠珍奇寶玉載滿海舶而歸惟覺羅吉制府慶督粵幾十年不名一錢几榻蕭然渾如儒素壬戌冬博羅之變公率孫提督全謀極力勦捕業已蕝事而撫臣某素暴戾爭柄公屢寬假而某恐爲公

所害因先發制之密劾公疲輒失機數事 上命其究詰某乃坐
高座呼公至宣 上諭畢卽命公改囚服並去僕從銀鑰繫頸吏
隸詆訶以辱之並詈以譏謾之語公浩然曰某雖不才會備位政
府不可甘受其辱有傷國體因以佩刀欲自刎某素多力因搯其
左腕公情急遂取煙壺吞之逾時而死某遂以輕生上 聞公子
壽喜襲祖廕散秩大臣與余同官者二載余嘗往投刺其家華門
圭竇初不知爲曾任封疆者則公之清介可知也

右錄宗室昭棟撰

覺羅長麟

覺羅長麟正藍旗人乾隆四十年進士分刑部學習尋補主事洊升郎中四十八年授福建興泉永道遷山西按察使五十年四月調湖南按察使六月調江蘇按察使五十一年五月遷布政使九月擢刑部右侍郎 賞戴花翎五十二年二月授山東巡撫三月獲直隸大名府從犯段文經戕官案謝朝宗解京審辦八月奏疏濬東省河道請責成州縣儻有淤墊照河工隄岸不先修築例將該管官降調兼轄官罰俸捏報挑濬者該管官革職兼轄官降調上從之十二月獲鉅野汶上二縣積年窩竊巨犯田玉堂包五等分別治罪得 旨嘉獎五十三年四月運河水淺漕船行走稽

遲奏請議處尋部議革任 寬之 諭曰上年劉秉恬奏請將江
廣新造剝船三百隻畱於山東等處安設以備起剝當經詢問長
麟據奏德州一帶閒段古淺臨時可以雇用民船請將剝船仍歸
直隸安設等語江廣剝船東省或無須三百隻之多酌畱一百隻
則今年水淺即可應用起剝漕船何至遲阻而衛河水弱畢沅於
本省漕船又未預爲籌備是此事之誤皆在長麟畢沅二人見據
毓奇奏將南旺馬蹟諸河暢放北注以汶水之有餘濟衛河之不
足所想甚中目前之急務著傳諭蘭第錫長麟作速照辦以期運
河水勢增益並酌量情形分築草壩截蓄務俾迅速前進尋以德
州淤滯奏調楊村官剝船四百五十隻赴德州按站分設 從之

上命江西湖南巡撫各造剝船一百隻派員送到東省應用所
有剝船工料價值及途費罰長麟賠繳五月奏安設剝船事宜如
所議行五十四年奏請將淄川縣縣丞改隸禹城縣駐劄荷澤縣
縣丞改隸曹縣駐劄其黃河南岸劉家口沂州營泗水汛及青州
添設員弁營俱議行五十五年二月奏請將鄒縣李家集改隸壽
張縣蘭山縣馬蘭屯改隸嶧縣直隸鹽山縣田家莊高家莊及滄
州譚家莊俱改隸東省海豐縣三月奏請修新城等四十一州縣
城工又請於兗州鎮之沙溝及范縣二營添設額外外委二員俱
如所請行五月劾萊州府知府徐大榕承審平度州民人張子布
踢死妻母羅氏誤將羅王氏之子有良以正兇定擬請將大榕革

審大榕亦遣人赴部呈訴長麟所參不實 上命刑部尙書胡季堂等往訊尋奏此案實係羅有良扭毆張子布跌壓伊母腸肋致斃長麟審辦錯誤請革職交部治罪適長麟搶護臨清州民坵漫水穩固奏至 諭曰山東平度州民人羅有良與張子布互毆跌壓伊母致斃一案長麟不能詳審實情固屬咎有應得但不過冒昧參奏尙非有心出入此次搶護臨清州姜家莊民坵漫水堵閉鑿築尙爲妥協長麟著革職畱任免其治罪尋以擬薛對元罪失實去任先是長麟以濱州舉人薛對元與貢生杜宜豐糾訟對元奪犯毆差擬絞監候經對元之弟樸元赴京呈控對元係於上年十二月二十七日到京會試並無本年正月二十日在濱州毆差

之事 上命胡季堂及侍郎穆精阿給事中和琳先後往東省研
鞫至是年九月胡季堂奏此案臬司及府州詳報俱稱上年十二
月二十六日之事與該撫原奏本年正月二十日犯事日期迥不
相符咨詢長麟據稱審訊時公出在外未及覈對卷宗是以錯誤
所言亦難憑信至檢查該撫奏結原卷不但薛對元等供詞並未
畫押卽案內各犯成招供詞亦俱無押 諭曰此案大奇實爲從
來未有之事長麟由刑部司員洵擢藩臬辦事尙屬勤奮在江蘇
藩司任內輿情亦皆允協是以擢用山東巡撫朕方以爲督撫中
尙堪任使之人乃辦理薛對元一案竟將犯事月日任意更改那
前作後且於問擬死罪人犯不令其畫供過堂荒唐草率一至於

此且前於平度州民人羅有良一案未能審出實情幾至正兇漏網又復誣參知府彼時朕尙以該撫無心之過特爲寬宥今於薛對元一案又移改月日意爲增減則實係出於有心其咎甚重卽著革職仍畱山東辦理城工事務十月 命署江蘇巡撫 諭不准戴用頂帶支給養廉十二月奏請禁革徵收錢糧設立總折名目五十六年二月奏查勘碭山等縣受淤新涸地畝未經翻種者借給籽種貧民無牛者分委佐貳勸諭鄉鄰通融雇借宿遷邳州等處一併照此辦理俱得 旨嘉獎 命賞給養廉一半四月兩江總督孫士毅等奏籌江西建昌府鹽務 命長麟偕兩淮鹽政全德前往詳查妥議速奏尋會奏請於該府地方官設鹽店以杜

私販無論巡役兵民有能拏獲梟販者卽將所獲之物賞給以示
獎勵 從之五月實授江蘇巡撫並給頂帶 賞還花翎十月請
裁上元江甯句容元和吳江無錫武進丹徒丹陽等九縣額設站
船下部議行十一月奏海洋一帶無論文員武弁及總督提鎮各
營有能拏獲私運米石者將所獲充賞 上聽之五十七年二月
以浙江巡撫福崧奏修范公塘石壩與前撫臣琅玕改築柴壩異
議 命長麟往浙省查勘尋奏請如福崧議 從之閏四月奏拏
獲海洋行劫兇盜黃泳林等十三人審明正法 諭部議敘五月
調山西巡撫十一月奏請將太原駐防滿兵絕嗣入官地畝仍賞
滿城養贍孤寡 從之並 諭各省駐防將軍大臣等照此辦理著

爲令十二月調浙江巡撫 諭曰向來山西巡撫係兼提督職銜
用武職頭品頂帶補服今長麟調任浙江著加恩仍帶一品職銜
並准用文職補服應得養廉准其全給五十八年三月奏嗣後修
築海塘責成工員停止十一府公同保固之例如所請行八月遷
兩廣總督 命兼太子少保銜五十九年二月奏水師鎮將大員
出洋請委道府監哨參游都守會哨分委同知通判監哨均按季
飭取監哨各員並扶同徇隱印結送部查覈又偕廣東巡撫郭世
勳奏請添造營船九十三隻十二月偕新任廣東巡撫朱珪奏請
撥借田房稅羨間款二十萬兩交商生息作爲巡洋口糧及燂洗
船隻添補蓬索之用皆下部議行六十年四月奏擊獲海洋盜犯

陳相等審明正法 上嘉之五月署閩浙總督先是福建將軍魁倫劾總督伍拉納巡撫浦霖平日漫無整頓致海盜肆行出沒又劾臬司錢受椿等迎合愆愆致各州縣任意侵那倉庫空虛各款上命長麟馳往會同魁倫查辦尋奏藩庫銀兩係由司庫書吏周經虧短 上以長麟等未將伍拉納浦霖通同分肥實情審出屢降 旨嚴飭九月會奏伍拉納浦霖婪索鹽務銀十餘萬兩又奏錢受椿因漳州府民人薛林二姓械鬪傷斃多人向督撫商同換卷十月奏伍拉納等受廈門同知黃奠邦等銀九千餘兩 上廷鞠伍拉納等皆實交刑部從重議罪 諭曰此案前經魁倫參奏特派長麟由廣東赴閩秉公查審乃伊積次奏到之摺於伍拉

納浦霖扶同舞弊及婪索贓款並不早行查奏直至朕屢次飭諭
嚴查始行和盤托出長麟向好沽名取巧於此案始終迴護袒庇
瞻徇意存化大爲小殊負委任深恩斷難望其改悔振作長麟著
革職來京候旨十二月 賞副都統職銜自備資斧赴葉爾羌辦
事尋補庫爾喀拉烏蘇領隊大臣嘉慶元年二月調喀什噶爾參
贊大臣十月奏喀什噶爾所屬阿爾塔特等四村回子每月應交
各卡穀石請改每年一次呈交承辦糧餉處轉給各卡二年三月
請將阿克蘇不必作爲烏什所屬之領隊大臣令其各管各城閩
六月奏向例年班三品伯克進京准帶行李四千斤四品以下以
次遞減一千斤回子王照三品伯克加一倍貝勒以下以次遞減

請嗣後回子王貝勒各減去行李二千斤自貝子至五品伯克減去五百斤六品伯克減去三百斤如例外多帶跟役一人者再減去行李二百斤以卹驛站皆如所請行八月奏據提伊特部落布魯特報稱聞薩木薩克糾約鄂布拉散及喀爾提錦部落欲擾喀什噶爾業飛調滿漢及回部伊犁葉爾羌兵堵剿上以其失之張皇飭之十一月偕喀什噶爾協辦大臣策拔克等奏該處回兵一總管一副總管不敷管轄請再添副總管一員幫管兵丁十二月奏請於伊犁酌撥官兵六百名以資防守諭曰長麟歷任督撫於新疆事務本未諳悉本年秋間偶有薩木薩克糾約鄂布拉散滋事虛信輒復過於張皇經朕降旨令其鎮靜彈壓邊境薩

木薩克之子玉素普早已聞風遠颺今又奏請於伊犁官兵抽撥
六百名以資防守是長麟等之膽怯過慮已可概見著傳旨申飭
試思該處卡倫外方遼闊如果有需兵之事六百名又焉能敷用
但長麟等既有此奏若竟不允所請設有緩急長麟等轉有以藉
口此次姑准於伊犁官兵內抽撥添防四年四月偕幫辦事務回
子郡王伊斯堪達爾奏稱伯德爾格回民向例每年貢金十兩金
絲緞二匹葡萄一千斤自乾隆二十七年辦事大臣海明等奏稱
將阿奇木莫薩私取回民二千文入官以後每年照數徵收四十
五年辦事大臣瑪興阿等奏增貢金四十兩辦事大臣永貴又奏
每年祇收葡萄二百斤餘八百斤折錢入庫充公今請概行裁革

上從之並 命嗣後葡萄祇准進二百斤八月授雲貴總督十月調閩浙總督五年正月調陝甘總督時三省邪匪未靖二月赴甘省辦理軍精奏於經過地方勸令紳士築堡團練並派員於川陝豫楚各交界處一體遵照辦理得 旨嘉獎三月奏請募秦州等處難民精壯者爲兵 從之四月偕陝西巡撫台布奏稱賊匪漸趨鎮安洵陽一帶接經略額勒登保參贊大臣那彥成來札移棧道所設官兵赴江口防堵 上以防堵賊匪當以東面爲重長麟等辦理錯謬 命革去花翎閏四月因額勒登保於雒南將賊截回 上以長麟等同係辦賊之人並 命賞還花翎旋因防守黑河總兵索費英阿不能將戴家營竄匪攔截致由該汛入甘

上以長麟派委非人仍命革去花翎下部嚴議應革任奉旨
寬免六月督兵敗賊匪伍金柱於唐家河七月又敗之於傅家鎮
將軍富成陣亡九月敗賊於木蘭溝十一月與署固原提督慶成
擊賊於沔陽乾溝河六年二月疊敗高二馬五等匪於鐵鑪川舊
州鋪鋼廠武關等處擒襄陽逆首馬應祥殄僞元帥吳滄海並得
旨嘉獎交部議敘三月沔陽縣新起賊匪武振關等糾眾爲悄
悄會長麟令副將蕭福祿前往搜捕殺賊一千餘名生擒一千二
百餘名奏入交部議敘上意所奏不實命陝西巡撫陸有仁
密行查訪尋陸有仁奏稱其中有良民避賊入山猝被脅逼者蕭
福祿概行駢誅復虛報人數邀功督臣未經詳察遽行入奏上

以長麟曲意包容嚴飭之並撤其議敘尋以母老病陳請 上命長麟來京供職七年二月 諭曰長麟簡任陝甘總督以來於剿捕賊匪各事宜未能認真出力前此奏報傅家鎮剿賊一事聞彼時長麟漫無籌措若非富成竭力救援幾至爲賊所困而富成卽因此陣亡且長麟所奏情節不免諱飾其拏獲汧陽悄悄會任用蕭福祿殺戮過多辦理亦未妥協朕因其在陝不甚得力且念伊母年老加恩令其來京但若照見在職分仍以一品大臣補用不足示懲長麟著不拘文武以二品職銜補用尋署吏部左侍郎四月授鑲白旗滿洲副都統遷禮部尙書管太常寺鴻臚寺事兼翰林院掌院學士十月遷鑲白旗漢軍都統十一月授兩廣總督尋

以長麟母老 特命畱京署鑲藍旗蒙古都統仍 賞戴花翎十
二月以禮部尙書永慶年逾七十於兼管各衙門事宜未能辦理
裕如 命長麟兼管太常寺鴻臚寺樂部事八年閏二月補兵部
尙書充會典館副總裁五月兼署翰林院掌院學士七月署鑲白
旗滿洲都統調正紅旗蒙古都統八月部議錄寫 諭旨於 世
宗憲皇帝應行敬謹擡寫之處書寫錯誤下部嚴議應革職 命
從寬畱任九年六月轉刑部尙書管理戶部三庫事務調鑲黃旗
漢軍都統七月以失察鑲白旗滿洲放米舞弊一案降二級畱任
十年二月會典館恭進事例 上以書寫錯誤 特命總裁官自
行議罪尋偕大學士保甯等奏請革職得 旨均著加恩改爲革

職畱任又以承審錢局監督五靈泰一案漏查收銅案卷並未將
署監督員外郎百貴傳訊下部嚴議應革職奉 旨寬免閏六月
授翰林院掌院學士七月 上幸盛京 命長麟同成親王永理
等畱京辦事十一年五月調鑲紅旗滿洲都統六月以審辦楊四
迷拐案失實所有革職畱任處分均不准開復七月充崇文門監
督十一月 命以刑部尙書協辦大學士十二月 命同儀親王
永璇成親王永理恭校 高宗純皇帝實錄 聖訓尊藏本十二
年十月加太子少保銜尋以其母病故 賞給陀羅經被遣官
賜奠十三年三月 命偕協辦大學士戶部尙書戴衢亨帶知府
銜康基品赴南河查勘工程五月偕衢亨復奏康基品告稱十八

里屯地方前河臣靳輔曾建石閘二座隨往勘明原舊壩基該處
山石夾峙應請修復以減黃利運其督臣鐵保等奏修毛城鋪滾
水壩之處易致衝決應毋庸議 上從之尋奏王營減壩深塘積
水難以施工應改建滾水壩於舊壩之西並添築石壩以爲重門
保障其淮徐揚大隄應一律加培雲梯關至海口一帶應接築長
隄束水歸槽又奏堰圩各工應加築後戩土坡以禦風浪智禮二
壩應各加高壩底四尺均得 旨允行是月 命偕戴衢亨於查
勘河工事竣後馳赴揚州清查兩淮鹽務歷年雜項雜費徵收支
用銀兩尋奏官商等並無侵冒 諭曰兩淮雜項各款向係公捐
爲各口岸官役兵丁辛工等費無關正課亦應據實開報著照所

請自戊辰歲爲始將每年巡費辛工雜項雜費分別造冊報部存
案以息浮議其賞借項內支用之項歷年旣無報部覈銷之例應
仍令該鹽政循舊辦理無事更張閏五月 上以七月將啟 鑾
至 避暑山莊 命長麟同成親王永理等畱京辦事六月以會
審閒散宗室敏學毆傷步甲案故爲開脫下部嚴議應革職 上
原之改降三級畱任尋 命偕刑部侍郎廣興管理 萬年吉地
工程十四年四月以目疾乞假 上允所請十月復請展假 命
賞假兩月十五年二月 諭曰朕於長麟目疾輾轉賞假業經半
載有餘原係體卹大臣恩賞然在長麟自應以職任爲重陳請開
缺乃日久遷延支飾殊乖大臣以誠事君之道卽如本日博興患

病兩旬恐誤職守奏請解任調理朕方加之憐憫不甯遽令開缺刑部事務較繁更非理藩院可比伊二人一則念切急公一則意存戀職顯而易見長麟卽著開缺在家靜養如果目疾一切復元朕必賞給差使十六年四月卒 諭曰長麟由乾隆年間進士刑部司員蒙 皇考高宗純皇帝擢任封疆朕親政後復用爲陝甘總督曾歷戎行內簡部院大臣協贊綸扉尙屬明白曉事前因目疾開缺調理茲聞溘逝殊爲憫惜長麟著照太子少保協辦大學士尙書例給與卹典所有任內處分悉予開復 賜諡文敏長子懷新官雲麾使先長麟卒次子懷寬筆帖式孫普年刑部主事

右 國史館本傳

牧菴相公長麟 景祖翼皇帝裔也成乙未進士以部曹洊任督撫性聰敏歷任封圻以廉明稱任吳撫時擒獲強暴禁止奢侈嘗私行市井間訪察民隱每就食於麪館吳人傳爲美談撫晉時和相覬覦上公之爵乃因市人董二誣告逆匪王倫潛匿晉省某家和相因公 陛見至京握手 宮門柳下囑託再三曰無論其真僞務坐爲逆黨吾與公偕得上賞矣公至晉訪之皆無實據某實董仇家故傾陷公慨然曰吾髮垂白奈何滅人九族以媚權相也因坐董二以誣告大忤和相意後因閩中事牽連謫戍西域蓋爲之報復也 今上親政後 召入歷任閩陝諸省後以母老入都參知政事以目眚致仕久之乃卒余嘗與公直宿 禁中問其私

行余以節鉞大員小民皆所熟識恐無濟於實事公曰吳中風俗
 狙詐故欲其知吾私行以警眾也余服其言公亦暫修髯偉貌言
 語雋雅坐談竟日使人忘倦人亦樂與之交然性好奢華置私室
 數千廈毗連街巷鐵冶亭冢宰嘗規之公曰吾久歷外任亦知置
 宅過多但日後使此巷人知有長制府之名足矣亦善爲拒諫也
 任司寇時比昵尙書故治廣賡虞侍郎之獄頗急又誤判巫蠱事
 致傷多人頗爲人口實云

右錄宗室昭榘撰

